



4f4/a/Spr/siply


(100)











THEATRUM PASSIONUM ANIMÆ

APERTUM

IN CÆSAREO-ARCHIDUCALI
UNIVERSITATE OENIPONTANA

AUCTORE, & PRÆSIDE

P. LEOPOLDO NEI-
STYFTER SOC. JESU,

Philosophiæ Professore Ordinario,

& nunc

DECANO,

ACTORE, & DEFENDENTE

Prænob. D. ALEXANDRO ANTONIO
GISLIMBERTI,

Tridentino, A.A. L.L. ac Philos. Magistro.

Anno 1721. Mense Julio.

(Innsbruck)

OENIPONTI,

Typis Mich. Ant. Wagner. Cæf. Aul. Typogr.

EXCELLENTISSIMO

ET

ILLUSTRISSIMO

DOMINO, DOMINO

JOANNI

BERNARDO

COMITI KINIGL,

Libero Baroni in Ehrnburg, & Warth,

Dapifero Hæreditario Comitatus Tyroleos,

SAC. CÆS. REGIÆ q̃ CATH. MAJEST.

CONSILIARIO

INTIMO ACTUALI,

CAMERARIO, & EXCELSÆ CAMERÆ

SUPER. AUSTRIÆ

PRÆSIDI,

Domino Oppignoratio Dynastiarum Welsperg, Michaëlsperg,

&

Præfecturæ Stubacensis &c.

Domino, Domino, ac Patrono Gratiofissimo

Felicitatem.



Affiones fert disquisitio ista : patere
ILLUSTRISSE, Et EXCELLEN-
TISSIME COMES animalia hæc na-
tivo pædore squalentia in Augustum
TUUM irrepere palatium, ut sese tota
TUIS honoribus , TUIS obsequiis consecrent. Ob
ambitiose tentatum aditum in Magnam Domum, tan-
tò magis fulgentem, quantò magis majorum imagini-
bus cerisque fumosam , promereri veniam se credunt,
quòd tam publicis, quàm privatis impellantur nomini-
bus. Non adduco publica argumenta, quæ jubent
omnibus animi AFFECTIBUS submissè venerari CÆSAREÆ
CAMERÆ PRÆSIDEM Dignissimum. Norunt singuli,
TE laborare pro Tyroli piè , & sanctè , pro Augustissi-
mo sollicitè , ac prudenter , pro communi incolumita-
te TE verè Patriæ impendere PATREM. Merentur hæc

non

non paucas pagellas , sed iusta volumina plena TUI ,
TEque unum referencia : non tamen eadem persequor ,
quia TE nolle arbitror.

Quod opus hoc tenue advexit , est nova Dignitas ,
ac Felicitas , ad quam nuperrimè TE elatum à Romano-
rum IMPERATORE intellexi. Vicina ex domo con-
spexi exaltato ab Aquila REGULO omnium ordinum
gratulantium motus , ac erumpentium animorum in
plausus studium , quòd à Sac. Cæs. Majest in Actualem
CONSILIARIUM Intimum auspiciatissimè electus fueris.
Publica hæc gaudia abripuerunt secum Dedicationem hu-
jus Opellæ , ut omnium ordine TIBI gratularetur no-
vissimè à Supremo in terris MONARCHA collata decora ,
abundè ostendentia , quanto in ejus animo esses locò.
Omnes igitur AFFECTUS ex præcordiis prorumpunt , TI-
BIque gratulantur inexpressibili jubilo Celsissimos ho-
nores omni jure jam dudum promeritos. Et utinam
vocales satis essent , & publica satis professione Tuas ,
& multas , & magnas prærogativas deprædicare possent!
tunc foret , cur non tam TIBI , quàm sibi gratularentur
passiones animi.

Privatæ etiam rationes non erant studiosa indagatio-
ne conquirendæ , quæ persuaderent conatum meum
TIBI devoveri. Ut audeam Excellentia Nominis TUI
inscribere Philosophiam meam , est iptum Nomen TU-
UM. Quo enim deferantur animi passionès , nisi ad
illum.

illum ; qui nomine , & re verè est BERNARDUS ? dicuntur pathemata esse monstra , quæ vincere multis difficilius accidit , quàm ferocissimos domare leones. Motus primò primi illorum tam celeres sunt , tam violenti , ut nec humanâ prudentiâ prævideri , nec inhiberi possint. A TUA melliflua suavitate oportet , ut lucem impetrent , qua illuminetur eorum cæcitas , prudentiam , qua gubernetur propria inconstantia , & fortitudinem , qua debelletur earum crudelis seditio. Veneramur enim in TE has animi commotiones sine defectibus , turbines hos in perpetua malacia , & non minùs raro , quàm Illustri prodigio hostes istos humanæ rationis ita potestati TUÆ obediens , ut ad omnem motum expectent TUUM nutum , ac si ipsæ etiam forent mente præditæ. In TE solo spectare licet THEATRUM PASSIONUM , ubi nec minimus ventus spirat sine rationis imperio , ubi humani affectus videntur exuisse naturam , ac mirabili metamorphosi in meras commigrasse virtutes. Et hęc passionum frænò TE adeò Cæsaris voluntatem TIBI devinxisse multi non vanè autumant. Si quis tamen assultus passionis cor TUUM aggreditur , non insurgit ille , nisi pro vario patriæ statu. Congaudes bonis illius successibus , minùs prosperis affligeris , & malis ipsi imminentibus condoles. Has autem inquietudines condemnare audeat , qui patriæ hostis appellari cupit.

Quid

Quid igitur in obsequium horum mirabilium agam?
nisi ut TIBI dedicem hanc de passionibus lucubration-
culam? quam minorem venerationem exhibere summæ
TUÆ Dignitati, quàm ut publicè proclamem, TE ve-
rè esse illum, qui cæteros instruere possis, quomodo pas-
sionibus utendum, & eorum venenum in Antidotum
convertendum. Suscipe igitur AFFECTUS hosce meos,
quos in manus assumere jam justii pretii usura erit, mag-
nùmque videbitur, si dixeris, placet AFFECTUS illius, qui
totus est.

Excellentissimæ & Illustrissimæ
Dominationis Tuæ


Humillimus, & obsequentissimus Client

ALEXANDER ANTONIUS GISLIM-
BERTI Tridentinus,

Approbatio Theologica.

OMni Rege major est , qui se indomitósque animi affectus ritè novit regere. Artem hanc regiam egregiè docet & illustrat præsens ab Auctore , & à Propugnatore suo splendida & Illustris , à Patre no autem suo Illustrissima & Excellētissima Lucubratio , quippe quem hæc ipsa non jam Regulum , sed Regem in hoc maximum esse probat & demonstrat. Quis pro in hanc neget dignissimam esse , quæ in splendoribus genita lucem publicam aspiciat , & sub Excellētissimo , Illustrissimo , & per communem influxum omnibus benefico fidere servet perennem?

FRANCISCUS GAUN S. J.
SS. Theol. Prof. & nunc
Decanus.



Approbatio Philosophica.

Theatrum hoc ex passionibus animi constructum , ac orbi litterato considerandum propositum , tam ordinata methodo , doctrinæ soliditate , ac eruditionis copia distinctum est , ut omnes , qui sese nôsse cupiunt , & actores , & spectatores in eo esse , gestire debeant. Quare dignissimum judico , quòd pro omnium utilitate , ac primi actoris , nempe Prænobilis & Doctissimi D. Defendentis Glorïa in luce publica statuatur.

JOSEPHUS SCHREIER S. J.
Philos. Profess. Ord. locò
Decani


Elenchus sequentium dissertationum.

In parte prima.

- Dissertatio I. De passionum animi natura, earumque affinitate cum operationibus voluntatis.
- II. De partitione, & ordine passionum.
 - III. De sede, in qua recipiuntur.
 - IV. De Causis passionum intrinsecis.
 - V. De extrinsecis passionum causis.
 - VI. Expenditur causa finalis passionum.
 - VII. De bonitate, & malitia præcipua passionum proprietate.
 - VIII. Quanta sit passionum vehementia?
 - IX. An passionum atrocitas tollat libertatem?
 - X. An saltem eandem minuat?
 - XI. Utrum fuerint passionem in JESU Christo, & quales?
 - XII. An fuerint in statu innocentiae, vel etiam in statu purae naturae, & cujus indolis illae fuerint?
 - XIII. An, & quales dentur in plantis, & brutis?

In parte secunda.

- Dissertatio I. De natura, proprietatibus causis, & effectibus amoris.
- II. De odio.
 - III. Explicatur indoles desiderij.
 - IV. Quid sit fuga?
 - V. De genio delectationis.
 - VI. De dolore.
 - VII. De spe.
 - VIII. De desperatione.
 - IX. De audacia.
 - X. De Timore.
 - XI. De ira, & mansuetudine.





P A R S I.

De passionibus animæ in genere.

DISSERTATIO I.

De passionum animæ natura , earumque affinitate, & differentia ab operationibus voluntatis.

§. I.

De natura passionum.



NE inprimis statim litterarum apicibus cum importuno quodam interpellatore colluctandum sit de vocabulis, ideo sub qua significatione passionem usurpamus censemus præmonendum. Non sumimus in his paginis illam latissimè, prout quælibet actio passio esse frequentissimè defenditur ab ijs, qui parco naturæ genio se se accomodantes horrent entitates multiplicare sine urgente necessitate: non accipimus passionem pro qualibet receptione, tametsi nihil eorum expellatur, quæ prius subjecto inerant, conformiter illius inclinationi, atque ita anima recipit aliquid de novo, ut nihil præterea amittat de bono sibi connaturali, quo sensu Aristoteli 3. de anima t. 12. *Intelligere est quoddam pati.* Quâ etiam ratione aër patitur, cum solis radijs illustratur, & divina pati dicuntur, qui cum Apostolo ecstasi abrepti etiam post quatuordecim annorum Spatium adhuc recordantur, arcana se verba audivisse, quæ non lieet homini loqui. Neque significat nobis passio quamlibet rei receptionem connexam.

cum remotione alicujus præexistentis in passo, quando hoc non est perfectivum ipsius passi, qua ratione aqua patitur, cum refrigeratur. Sermo nobis in his assertionibus erit de hac passione, prout per eam denotatur receptio effectûs disconvenientis, conjuncta per se cum abjectione, ac destructione alicujus præexistentis in passo juxta naturæ leges & exigentiam, quo pacto verbi divini humana carne vestiti Deicidium, Sanctorum Martyrum torturæ corporum integritatem corrumpentes à plebe passio vocantur: qua ratione aqua pati dicitur, cum præsentē igne calorem recipere cogitur. Hujus igitur naturam jam expōnere aggredimur. *Passio igitur est motus appetitus sensitivi ortus ex imaginatione boni vel mali sensibilis cum aliqua insolita corporis immutatione.* Hæc descriptione maximorum virorum placita in unum conciliantur. Hoc enim significat Aristotelica definitio 2. Rhetoric. cap. 1. ita habens: *Affectus sunt, quibus homines commoti differenter judicant.* Videtur quoad verbum desumpta ex D. Joanne Damasceno Lib. 2. orthodoxæ fidei cap. 22. aiente: *Passio est motus virtutis appetitiva sensibilis ob imaginationem boni, vel mali.* Et quid aliud sibi voluit D. Augustinus Lib. 9. de civit. Dei, cap. 4. quàm id, quod nos asserimus, dum ita loquitur? *motus anima, quos Græci pathi appellant, ex Latinis quidam, ut Cicero 3. Tuscul. perturbationes dixerunt, alij affectiones, alij affectus, alij expressius passiones vocaverunt.* Denique non alium, nisi nostrum sensum præferet D. Gregorius Nyssenus disput. de resurr. & anima cum sorore Macrina ante medium his verbis: *Pathi, id est affectus, passiones, sive perturbationes, & motus animi, certò quòdam usu voluntatis, & arbitrij, vel virtutis vel vitij sunt instrumenta.* Sed ut apertius ista pateant, singula descriptionis membra partitè expendo.

Ante omnia igitur exhibilandi sunt Stoici, qui affectus nostros corpora quædam, & animalia esse dixerunt. Id, quod de ipsis quoque pathematis corporis ad deliria est referendum, ad affectus item voluntatis, & actus intellectûs, ac harum facultatum habitus transfulerunt, ac virtutum chorum, ac scientiarum ideas nobilissimas in corporum, & animalium classem ignobilissimam redegerunt. Argumenta ad pudendi hujus & fatui placiti confirmationem, quæ Seneca epist. 106. annotavit, sunt prorsus futilia. Ita enim Stoicorum secta ad probandum, affectus esse corporea animalia, argumentatur: ira, amor, tristitia, vultum nobis immutant, modò frontem adstringunt, modò faciem diffundunt, jam ruborem evocant, jam fugant Sanguinem. Quid ergo? an dubitandum, passiones esse corpora? tam manifestas corpori notas

credis ab aliquo posse imprimi, nisi à corpore? præterea mutationes istæ in corpore causari non possunt, nisi corpus tangant: quanta autem vis propensionum, ut impellant, ut cogant, ut retineant! nonne timor retinet? nonne audacia impellit? nonne gaudium extollit? ergo vim corpori inferunt. Quidquid autem tangit corpus, corpus esse oportet juxta Lucretij Philosophiam:

Tangere, vel tangi, nisi corpus, nulla potest res.

Sunt igitur affectus corpora, sunt animalia appensa animali ratione prædito, sunt adulterinæ hujus spiritus appendices, sunt lupi, simiæ, leones, ursi, utpote quorum opera, factaque imitantur. Apage monstrosam istam fabulositatem; cessa, humanum animum in stabulum transformare. Non est humanus animus hydræ species multa habentis capita, quorum unum quodque per se pugnet, per se noceat: non est chimæra, seu animal ex leone, & Dracone colligatum. At, inquis, agit passio, impetum habet: igitur animal est, do tibi, suum passiones impetum habere; at suum proprium non habent; ex animo ille oritur, & ob contactum corporis, connexionemque in illum derivatur. Si Stoicorum stultitia reciperetur, non tantum passiones, sed etiam virtutes, & vitia animalia essent; quia eadem nobis indicia præstarent. An nunquam attendisti, quantum oculis det vigorem fortitudo? quantam intentionem prudentia? quam modestam quietem reverentia? quantum rigorem severitas? igiturne virtutes erunt corpora? igitur si ex injusto aliquis fit justus, ex temperanti intemperans, ex forti imbellis, non perseverabit esse animal, quod primò esse cœpit; in aliud transire licebit. Ultra res ista procedet: omnes scientiæ, omnes cogitationes erunt animalia, quod non nisi delirans recipiet animus. Manet ergo solum animum in varias figuras converti, non esse toties aliud animal, quoties aliud facit; nec illud, quod ab animo fit, inter animalia esse numerandum.

Motus nomenclaturam primò dedi passioni; quia anima intuendo bonum, & malum, ut objecta sibi propria huc, illuc transfertur vel à vero, vel etiam subinde tantum ab apparente in rebus, quas admiratur. Incipit hic motus in sensibus externis, qui omnis cum vi quadam motrice conjunctus videtur; quæ enim sensum deliniunt, gratiam, quæ offendunt molestant commotionem efficiunt, sicque voluptatem, & dolorem, quasi naturales affectus, toto corpore diffundunt. Tum verò voluptate quâdam pars externa affecta perfunditur, cum facile, & perfectè operatur, quia hic omnis appetitus finis judicatur: ubi verò illa operatio impeditur, tum affectio molesta, & doloris nomine ple-

rumque donata subsequitur. Sic omnis continuitatis in corpore interruptio dolorem, ut restitutio in integrum voluptatem creat. Sic transitus à sono asperiore in leniorem jucunditatem inducit, quòd sensorium, seu organum auditus demulceat, auferatque molestiam. Affectus isti sensuum externorum, scilicet doloris, & voluptatis, quique diffusi sunt per tactum toto corpore, pertinent ad appetitum naturalem, & cum citra ullam cognitionem præviā excitentur, passiones propriè vocari non debent. Quia tamen objectorum impressiones per externos sensus ad interiorem traductæ notam aliquam boni, aut mali, commodi, aut incommodi secum ferunt adjunctam; ideo in appetitum animale diutius metus dimanant, affectusque interiores procreantur.

Secundò passio est motus potiùs *appetitus*, quàm virtutis apprehensivæ tam imaginatricis, quàm intellectualis; neque iterum audienda est Stoicorum schola, quæ dolorem & gaudia, ceterasque animæ propensiones esse solùm judicia quædam, & opiniones frivole somniabat: v. g. dolorem esse opinionem præsentis mali, in quo demitti, contrahique animò justum videtur; metum opinionem impendentis infortunij, quod intolerabile judicatur.

Non aliò opus fuisset ad explodendam hanc fabulam, quàm ut Chrysippus Stoicorum princeps Phalaridis taurò inclusus fuisset ad sententiam suam comprobendam: certò momentò temporis crassus error unàcum fumo evanisset. Fundamentum hujus rei est, quia actio potentia apprehensivæ tota absolvitur exprimendo simulacra ectypa objectorum, circa quæ versatur, & in his sistitur tanquam in termino suo ultimo. Igitur ex his operationum generibus per se non subsequitur transmutatio organi corporei, adeoque neque passio rigorosè accepta. Quòd si vel ob nimiam phantasie attentionem, nimiam intensionem, aut diuturniorem continuationem virtus apprehensiva detrimentum patiatur, aut ad corruptionem successivè organum disponatur, id habebit se tantum per accidens, causæque erunt assignandæ, aut dissipatio, aut affluxus nimius spirituum, & aliorum humorum. Sic cum proportionem res contingit in aliis potentijs ægrè post defatigationem operantibus; sic languorem conciliat diuturna lectio librorum, tum ex defectu spirituum, tum ex læsione organi proveniente à nimio spirituum affluxu, qui cum sint temperamenti calidioris, faciliè inflammationem organi inducunt. Propterea rubentes ex nimia lectione oculi, calor intensus capitis, & dolor, ac languor, seu fastidium ultioris laboris. Econtra verò operatio potentia appetitiva peragitur prosequendo, aut fugiendo objecta ipsi ab imaginatione proposita, ex quo nascitur motus in corpore.

corpore requisitus ad obtinendum, vel ad objectum reiiciendum. Ob hanc rationem appetitui sensitivo, tanquam supremo totius compositi œconomœ, obtemperant ad amissim omnes aliæ vires in animali reperibiles, atque ab ipso moventur ad suas functiones in utilitatem totius ritè obeundas. Hanc autem obedientiam à suis subditis impetrare non poterit, nisi priùs moveat organum corporeum à natura destinatum ad actus appetitus eliciendos: inducta verò semel agitatione immediata in organum proprium, facile motum in reliquas corporis partes emanare conspiciet. Constat igitur rationem passionis tantùm à delirantibus in apprehensiva virtute quasitam fuisse, cum illa in sola appetitiva inveniri possit.

Tertiò quoque falluntur collocantes motus patheticos in appetitu rationali, qui eadem res est cum voluntate. Quamvis enim in voluntate iidem actus circa bonum, aut malum sensibile exerceantur, quibus appetitum sensitivum infestari conquerimur, amoris scilicet, odij, desiderij, fugæ &c. motus tamen isti in altiori longè sphæra sunt constituti, quàm ut ignobili passionum turbæ se commisceri patiantur. Quemadmodum enim in Deo exulare debent omnes illi affectus, qui boni alijus absentiam, aut egestatem indicant, vel supponunt, & removendum est, quidquid limitationem, aut defectum involvit, ita, ut sacri codices sermone tantùm ad nostram imbellicitatem accomodato, & non tam affectum eò tropò, quàm effectum significant, quando Deo interdum passionibus v. g. erga bonos favorem, adversus improbos ultionem, iram, zelum, indignationem, & quæ sunt affines loquendi formulæ, tribuunt; adeoque primus omnium motor necessariò immobilis est cogitandus: ita pariter anima secundùm se spectata expers censenda est omnis passionis strictè sumptæ. Testatur enim nobis experientia, tam sæpè tumultus hosce seditiosos antevertisse liberum voluntatis exercitium, ut sæpiùs imperium dominatricis hujus reginæ à pertinacissimo Passionum furore fuerit superatum. Quando verò facultas rationalis ab impulsibus externis libera se ipsam determinat ad amplectendum, aut averſandum, quod intellectus clarè percipit, tunc quasi regio folio insidens, quæcunque patitur, ita recipit, ut propterea nihil eorum deperdat, quæ sibi juxta naturæ ordinem pro permanente dote sunt attributa, potestque tunc illo axiomate gloriari: Elephas non capit muscas. Hac de causa nemini mirum videri debet, quòd Philosophus tam sæpè in libris Physicorum animam immobilem esse scribat; operationes enim animæ à corpore separatim inspectæ, quibus vel absque ulla specie materiali, quæcunque objecta contemplatur, aut unam rem potiùs ample-

Etitur, quàm alteram; hæ, inquam, operationes exercentur sine ullo ab organo corporeo influxu, ideoque nullo mutationis inquinamento maculantur, quo corpora ignobiliora redduntur; sed tantùm adjunguntur, quæ aliàs ipsius naturæ propriè congruunt. Scio, voluntatem posse imperiò quodam suavi & politicò, non tamen despotico imperare, aut funditus tollere truculentiam passionum: patet nihilominus, & inferiùs magis declarabitur animam ad hoc uti solere appetitu sensitivo tanquam instrumento, qui frequentissimè instar belluæ indomitæ jussis refragatur æquissimis. Subsint ergo hæc animi pathemata jurisdictioni supræmæ voluntatis; nunquam tamen, ut filij, pro patre agnoscent voluntatem. Non tamen diffiteor hujusmodi operationes in anima rationali tanquam sede immediata partialiter recipi; cogit enim veritas actionibus vitalibus substratum vitale assignare: respectu tamen illarum anima non se gerit, ut spiritus, sed materiæ larvâ obtecta incedit.

Quartò additur, ejusmodi passiones ortum suum ducere ex imaginatione boni, vel mali sensibilis. Scit nempe perbenè facultas imaginativa appetitum ab origine sua cœcum esse, non posse ferri in incognitum, & sicut repugnat audire sine auribus, velle sine voluntate, ita implicare sine boni cognitione amare: novit se arbitram in hoc regno tantùm posse imperare, quantum proponit. Ideo calidissimæ lenæ instar ex omnium sensuum collibus corrogat pellaces rerum imagines, quibus plena appetitum aggreditur, eumque tot stimulis urget, quot sunt incitamenta pulchritudinis, aut deformitatis, quas nudas postmodum animæ proponit. Appetitus sensitivus ex se ipso adeò favet propriis inclinationibus, ut nulla sint, quam non benevolè sequatur. Quòd si insuper auxilium ipsi aliunde afferatur, movebit tempestatem, ut ventorum turbo decumanos excitat fluctus. Non opus est, ut bona aut mala, à virtute phantastica representata, sint verè talia, qualia apparent appetitui; confidit iste nimis temerariè; credit omnes propositiones, quin eas priùs ad examen revocet; non videt in tot tenebris alijs facibus prælucentibus, nisi quas ipse præfert, totumque se illius curæ committit. Si ipsæ scientiæ, quæ pro objecto veritatem sibi assumunt, ingeniosè nos fallunt, cum inter ratiocinationes sæpè sophisticæ cavillationes detegantur; quid fallaciæ apud lumen orbatum appetitum obtinebunt phantasmata? certè vana & levia pro gravissimis, festucam pro palea ostendent; impellent ad currendum post objecta ostensa, si similitudinem solum boni præferant, ad fugienda illa, quæ apparente colore mali vestiuntur. Succinctè adstipulatur Epictetus hisce: *sapius opinione, quàm re turbamur.* Cui nervosius adhuc accinit regius Plaltes psal. 38. *Verrum*

rum tamen in imagine pertransit homo, sed & frustra conturbatur.

Ultimò denique subjungitur hæc clausula, quòd fiant ista tanto cum impetu, tanta cum violentia, ut necessariò in corpus inducatur insolita aliqua mutatio. Hoc adeò verum est, ut si motus isti sapienter moderati forent, nec præter ordinariam viam excederent, passionis naturam non essent sortiti. Pone enim motionem quamlibet spirituum & sanguinis vocandam esse passionem; fieret ergo, ut citra passionem nihil homo velle posset, cum nulla esse possit in hac vita spiritualis affectio amoris, aut odij sine motu appetitus sensibilis, & agitatione spirituum, quemadmodum nulla intellectio sine imaginatione: hoc autem est contra torrentem; cum omnes supponant ut certum, fieri quædam ex passione, quædam sine illa, & quædam contra passionem irritantem. Præ aliis hoc advertit D. Damascenus locò superius laudatò, *Leves motus, atque hujusmodi, ut nullum sui sensum præbeant, nondum passionum nomen obtinent; magnitudinem enim, qua alicujus momenti sit, habere debent.* Non incommodè res sic explicatur. Quemadmodum in maris motibus est alius auræ tenuis, alius concitator, alius vehemens, quique horrida tempestate pontum à fundo cum incolis piscibus, & arenoso sabulo verrat: sic in animorum agitationibus quædam sunt leves, velut initia, quædam surgentis motus, & propriè affectiones dici debent: sequuntur validiores, quibus concitationis, commotionis, aut passionis nomen rectè aptatur: denique superveniunt, quæ animum universum coneuunt, de rationis sede, & judicij statione depellunt, & verò vocum rigore perturbationes appellantur. Ratione naturaliores satis luculenter sic ostenditur, quando effectus deprehenditur valdè remissus, etiam modica subsequitur transmutatio corporis; hinc citò unusquisque ad genium redire solet, & tale sibi conveniens temperamentum recuperare, ut nihil detrimenti passus esse videatur: malè ergo talis motus inter passiones civitate donatur.

Quòd si tamen per decursum affectus, quantumcunque tenuis non deponatur. Sed diutius perduret, aut repetatur sæpiusculè non interpositis diversis aliis pathematis, & non directè contrariis, succrescet necessariò perturbatio, & quæ ab initio nullatenus, aut vix inter passiones numerabatur, per decursum, & rem & nomen sibi vindicabit. Connaturale enim est cuicunque affectui, ut invehat in organum corporeum humorem temperamentum & dispositionem sibi optimè faventem, eamque semper augeat, ut rivuli majora flumina, de quibus ille cecinit:

Nasci-

Nascitur exiguus, sed opes acquirit eundo;

Quaque venit multas accipit amnis aquas.

ex quo rursus perturbatio præexistens majores vires assumet, & sic mixtura temperamenti per conditionem affectus, natura autem affectus per complexionem temperamenti sese mutui juvabunt, & continua augmenti hincinde vicissitudine insurgent. Quis ergo obstupescat, multos ob hanc causam quam plurimum nocementi passos fuisse, qui diutius pertinaciter alicui cogitationi tristi aut hilari inhæserunt, atque affectui semel hausto sine fine indulserunt? quis miretur, non nullos etiam incidisse in amentia barathrum, destructo irreparabiliter organi temperamento: tametsi passio in sua origine surrexerit ex levissima vena? Motus autem iste insolitus corporis observatur primariò in humoribus, scilicet in sanguine, & spiritibus, qui tum in venis, tum arterijs, tum nervis animalis contenti in ijs, tanquam in canalibus à natura destinatis, huc illuc discurrent. Non loquor hic de sanguinis pericyclofi, vel circuitu, quo fortè nihil illustrius detexit sæculi elapsi solertia, quamque se anno 1638. in Gallijs docuisse perhibet Honoratus Fabri; de hoc, inquam circuitu hic non loquor: sed de multiplici illo sanguinis motu mihi fermo est, quem diversæ passiones ciere solent. Sic aliquando sanguis exteriorem superficiem deserit; hinc pallor, tremor, frigus: non nunquam, eò ubertim affluit; hinc rubor, ardor, oculorum splendor, quæ variæ motuum rationes suis locis singulatim sint discutiendæ. Et verò ruboris accessio quid aliud, nisi sanguinis appulsum? pallor verò ejusdem subductionem dicere potest? Neutrum autem sine motu contingere posse, est palam. Imò ita non nunquam sanguis moveri videtur, ut versùs circumferentiam ex arterijs excurrat, velut in iræ, pudoris & gaudij motibus contingit. Aliquando autem secùs accidit, ut nempe à circumferentia versùs centrum quod cor jure vocari meretur. Ex venis adducatur, ut in mœrore, timore, odio, &c. Cum autem sanguinem à se ipso moveri sit impossibilè, utpote qui nec animatus esse defenditur, nec alia vipolleat, quàm eà, quæ cæteris liquoribus competere adstruitur; ideo adhuc aliquid investigandum, quòd ad hunc potius, quàm ad illum motum possit determinare. An dicemus omnes affectus, quos in sanguinis motibus observamus, spiritibus esse tribuendos? sed cum spiritus isti aliud non sint, nisi rarefcentis sanguinis portio; cum sanguis ipse inanimis sit, eodem jure dicendum erit, quòd potentia motrice per vasorum angustias quoquo versum se se extendendi sint privati, sicut sanguis à se ipso per totum corpus non diffunditur. An sanguinis motum, qui passiones comitari solet, ad animam rationalem referemus?

At

At cùm agitati humores animæ imperium sæpè non audiant, & sanguini anima minimè insit, hæc immediatè impetum imprimere non valebit, neque ad hoc asylum licebit recurrere. Igitur præter humorum æstum alia adhuc sunt accersenda, quæ in passionum insurgentium turbine inquietentur. Sed amabo quid passio in corpore non commovet? & primò quidem ipsius vitæ fontem, cor nempe aggreditur, quod vario pulsu apertè indicatur, qui in ira magnus, altus, & frequens; in timore frequens, & intermittens; in gaudio magnus & tardus, in tristitia parvus, & tardus deprehenditur, qui motus ab alio, quam à systoles & diastoles diversitate derivari non potest. Impetuntur violentè vasa arteriarum & venarum; quonam enim aliàs pacto fieri posset, ut in timore, & dolore sanguis versus cor retorqueretur, reptatu lubrico, serpentino, vel undulato? coguntur etiam per hæc symptomata sese explicare, vel contrahere vasa capillaria; unde sudor, frigus, tremor, pallor, rubor &c. ex quibus tanquam certissimis signis æque benè colligimus passionem, quæ cor opprimit, quam Medici ex arteriarum pulsu argumentū morbi desumunt, qui corpus infestat. Si enim capillares arterias contrahi contingat, totus ferè sanguis in carnes effusus à venis exsugitur; & cùm nullus alius in prioris locum succedere valeat, pallor & frigus, ac carnis depressio nascetur. Si autem capillares venas contrahi accadat, magna sanguinis copia ex arterijs in carniū fibras effundetur, & modica à venis contractioribus exsugetur, qui carnis ruborem, tumoremque faciliè formabit. Si verò venarum & arteriarum extremi canaliculi arctissimè comprimantur, copiosus sudor stillabit ex poris, tremorque cuticulæ micabit. Quid in nervis, in musculis, quid in alvi intestinis, in hepatis, & splenis fibris, quid diaphragmate, pulmonibus, trachea, lingua, oculis passio non efficit? quid in ventriculo, vesica aliisque organis, de quibus honestè loqui non possumus, quid in facie, ore, toto vultu affectus præstet, explicari verbis vix potest, licet nemo sit, qui hoc ignoret.

In tam terribili omnium partium tempestate ab affectibus excitata, si quis animam corpore inclusam consideret, saxeus sit oportet, nisi intimis visceribus illius conditioni miserandæ compatiatur. Quam impius, & sacrilegus demum fuerit Rex Nabuchodonosor, si tamen nobis inter sylvarum umbras obvius factus fuisset, exuvijs ferarum involutus, supremus quondam monarcha in monstrum æquivocum conversus, & pulverulento sæno pastus, oculos nostros ad lacrymas, viscera ad tenebritudinem commovisset. Ah quantò nobilior est anima rationalis, ad diadema perpetuum, ad immortale imperium nata! originem suam du-

cens de vitali fonte ipsius Deitatis : Trinitatis consiliò excellenter condita, ut ex consultatione artificis innotesceret pretium operis ! & animam hanc, ad ideam Divinæ essentia, tanquam ectypon ad prototypon elaboratam, sub tyrannide passionum tanquam vilissimum mancipium fideis oculis intuebimur ? verum est, eam, quando omnis affectus expers quiescit, instar aquæ tranquillè stagnantis sedatam esse ; at verò, quia nihil in eam magis agere potest, quàm corpus intima unione annexum ; ideo, cùm humorum affluxus rei aut molestæ, aut jucundæ incurfu commoventur, dum ferè, ut aqua lapide injecto, motuum recurrentium velut undulatione quadam agitur. Affluerit appetitum fortuitus aliquis dolor ; quales tunc eliciet anima cogitationes ? an permittet tunc illi libertatem applicandi se negotijs serijs ? verificabitur potiùs magni Augustini philosophia : *Illuc naturaliter rapitur intentio mentis, ubi est vis doloris.* Quòd si verò non in unam tantùm, sed in integram passionum legionem anima incidat, Deum immortalem ! quasnam strages tigrides istæ sanguinolentæ non dabunt ? quomodo instar bruti alicujus ratione carentis illarum sævitie præda eadet ? Medæa id satis experta, quam Tragædus sic furentem inducit :

Medæa nunc sum, crevit ingenium malis.

Mox iterum pudore perfusa dissimulat, quod priùs conceoxerat, proponit iterum alia, sed vix dissimilia, donec seposita omni in prolem teneritudine specioso prætextu habenas rabiei laxat.

Quidquid ex illo tuum est,

*Creusa peperit : placuit hoc pænagenus,
Meritoque placuit. Ultimum magno scelus
Animo parandum est : liberi quondam mei,
Vos pro paternis sceleribus pœnas date.*

Audaciam furore commota excitavit ; mox quasi ipsam pœniteat admisi furoris, verecundiam, metum, & misericordiam spirat :

*Cor pepulit horror, membra torpescunt gelu,
Pectusque tremuit, ira discessit loco:
Matérque tota conjuge expulsa redit.
Egone ut meorum liberum, ac proles mea
Fundam cruorem ? melius : ah demens furor !*

En quomodo, veluti classico canente rabidi canes impetum in animam fecerint, eamque suis latratibus, suis morsibus dilaceraverint, dilaniaverintque. Melius igitur est homini neque delectari, neque dolere sen-

fi corporeo; tunc enim anima tumultu vacua, & quasi se ipsa reclusa perfrui potest spiritualium suorum bonorum gustu & dulcedine.

§. II.

De affinitate, & differentia passionum cum operationibus voluntatis.

Colligo etiam non nullos sæpius hallucinari, dum affectum voluntatis ab appetitûs motu sufficienter, ut guttam ab aquæ gutta, non discernunt: cum enim affinia communibus & similibus gaudeant nominibus, ac sicut passiones audiunt nomine amoris, desiderij, lætitiæ, sic pariter de sapientiæ amore (quæ haud dubiè non est rebus sensibilibus annumeranda) legamus Sap. 8. *Hanc amavi, & exquisivi à juventute mea.* Sic etiam voce tenùs confundatur concupiscentia cum desiderio ab eodem Sapiente: cap. 6. *Concupiscentia itaque sapientia deducit ad regnum perpetuum:* cum similia deducantur ex regijs hymnis, ut Psal. 118. *concupivit anima mea desiderare justificationes tuas:* & inferiùs: *ecce concupivi mandata tua;* idèò facillimè incauti in errores labuntur. Rursus quamvis nihil vetet, affectus voluntatis sine ulla alteratione elici; non rarò tamen inter se amicabili successione sunt conjuncti, & eò ipsò magis idonei, si non ad nubilum inscitiae errorem procreandum, saltem ambiguitatis nebulam elevandam. Hæc affinitas adhuc magis viget in affectibus, quos nomine irascibilis facultatis exprimimus, quatenus istorum officium quodammodo est comparare bonum cum malo, & malum cum bono, atque alterum alteri præferre ex motivis invicem connexis. Comparare autem, unum alteri præferre philosophicæ palæstræ revocant ad munera intellectûs, & consequenter ad voluntatem. Ideo actus appetitûs sensitivi specialiter participes illius modi tendendi in objectum, accedunt propinquius ad actus animæ rationalis; ut audacia, timor, desperatio &c. Dissentiunt tamen & genere, & specie pathemata ab actionibus, quæ voluntati jure adscribuntur. Hæ enim lenes, placidæ, tranquillæ, illæ sunt concitatores, turbidæ &c. non secùs, ac intellectiones puræ dicuntur, quæ ex lumine naturali veritates potissimùm à materia secretas contemplantur; imaginationem autem vocitamus, cum ex sensuum occasione aliquid percipimus: sic volitionis nomine intelligimus impressiones, ex libertate à summi boni auctore indita, profectas; perturbationes autem animi ap-

B 2

pella-

pellamus, quas eum sanguinis, spirituum, aliorumque membrorum commotione probè sentimus, perspicimusque, "quid in nobis præstent. Fatendum quidem est, mentem nostram nihil percipere, voluntatem nullum actum elicere, citra aliquam spirituum in cerebro agitationem. Ex lege quippe à Molitore naturæ sancita, ita anima cum corpore est conjuncta, ut motus animi etiam illi, qui ad corpus non referuntur, quædam spirituum commotio comitetur; adeo, ut etiam ipsum amorem justitiæ, aut virtutis certa sanguinis agitatio sensibilem efficiat, & rerum intellectualium pereptionem impressa phantasie vestigia roborent. Sed hic humorum fluxus, qui actiones voluntatis consequitur, placide, & tranquille labitur; ubi econtra in propensionibus appetitus sensitivi adeò vehementer extolluntur, tumultuanturque, ut vix animus sufficiat ad eosdem in ordinem redigendos, tempestatemque sedandam. Imò si adhuc longiùs progredi voluerimus, in ipsis passionibus reperiemus, unam alterà majori fremitu sævire, & animal à statu connaturali, ac dispositione conformi dimovere. Ita gravius laborabit, qui tristitià opprimitur, quàm qui præ gaudio, & lætitià tripudiat; quia gaudij affectus sanguinem per omnes corporis partes diffundit, quem tristitiæ angustia ad interiora contrahunt. Quis autem ignorat sanguinis dispersionem per corporis membra minùs animali viventi nocere, quàm arctiorem ejus compressionem? cum massa sanguifera, prout etiam involvens lympham, & bilem, servire debeat animali pro alimento proximo, ideòque sui dispensatione per vasa totam corporis regionem foveat. Ex opposita autem ratione, ubi vitalis ille rivulus in contractis partibus, quasi in quadam cisterna stagnabit, parciore erit nutritio, & cum organa perpetuà transpiratione plurimùm de sua substantia deperdant, si rorulentà alimonià de novo apposità non restaurabuntur, eadem labefactari neceßè erit. Rationem à me si petas, cur passiones animales in plerisque majores vires exerant, quàm affectus voluntatis circa bona spiritualia, hanc affero principalem. Bona solo intellectu percipienda non aliter nobis innotescunt, quàm famulitiò sensibilibus: plerique autem hærent in prima horum superficie, nec mentem applicant, ut subtiliori meditatione bonorum spiritualium nucleum eruant, eaque in perfectum meridiem educant. Hoc didicimus ex Jeremia: *Nullus est, qui recogitet corde*, cujus vestigijs inhæret sapiens cap. 9. *Corpus, quod corrumpitur, aggravat animum, & terrena inhabitatio deprimit sensum multa cogitantem.* Sensibilem econtra tam bonorum, quàm malorum clarior in nobis, quia intuitiva cognitio splendet, ad quam majorem apprehensionem nihil connaturaliùs, quàm parem,

& fortiorem appetitum oriri. Quod si tamen facultas intellectiva intimius scrutetur suum objectum, quàm sensus suum comprehendat, nec hæreat tantum in exteriori accidentium cortice, sed ad substantiam usque pervadat: cùmque ex altera parte bona intelligibilia sint longè præstantioris naturæ: idèò sicut visus intellectualis præoptandus est visui corporeo; & sicut homo præeminet brutis; ita major erit affectus rationalis, quàm proprius appetitui sensitivo.

DISSERTATIO II.

De partitione, & ordine passionum.

§. I.

De partitione passionum.

Mirandum prorsus est, animam, quæ perspicacitate sui visus pervenit ad intuenda alia omnia; excæcata tamen sit ad seipsam clarè cognoscendam, nec satis distinctè se possit supra proprias reflectere operationes. Nihil est in naturæ thesauris adeò absconditum, nihil adeò arcanis involutum secretis, quò ipsa non penetret, quod suâ solertiâ non detegat. Rimatur viscera universalis omnium matris, terræ scilicet, fertur in incognita subterranei mundi regna, ad quæ olim Proserpinam à Plutone raptam fuisse, Poëtæ fabulantur: cognoscit quomodo humidum unctuosum continua coctione, & digestionem depuretur lutuosis recrementis, filtretur, sublimetur, ac tandem in argenti venas fixetur: scit sympathiam & antipathiam quatuor elementorum, quomodo in altum tollantur vapores, condensentur in nubes, dispergantur in pluvias, & emicent in fulgura, non fugit ipsam ulla pars proprii corporis, sive illa sit tenuis ductus thoracis, sive subtilissimæ in mesenterio venæ lacteæ, sive aliud quidpiam, quod sua crassitie capillum non excedit: dividit, & crudeli artificio omnia dissecat membra, ut singulorum proprietates accuratè addiscat. Interea tamen deest animæ notitia rerum, quæ in intimis ipsius penetralibus euduntur: notæ sunt ipsi functiones aliorum, circa proprias penitus cæcutit. Ut nihil lamenter, quod incertis solùm conjecturis comprehendat suæ naturæ excellentiam, nisi majus ipsi auxilium à fidei consiliis præstetur; de hoc solùm hic conqueror, quòd ipsæ etiam animi passionum in profundo abstrusæ celentur.

Sit, quòd suis stimulis imprimant quædam sensibus stigmata; characteres tamen isti adeò nondum sufficiunt, ut naturæ scrutatores Philosophi ne quidem in eorum numero statuendo convenerint.

Stoici cum Horatio illos ad quatuor revocaverunt. Voluptatem scilicet, dolorem, cupiditatem, & metum, juxta illud Horatij Lib. 1. epist. 6.

Gaudeat, an doleat, metuat, cupiatve, quid ad rem?

A quibus non multùm discrepare videtur Plato, qui in Theæteto sub persona Socratis sic loquitur: sensuum hæc nomina sunt, visus, auditus, olfactus, gustus, tactusque frigidorum & calidorum, quos sequuntur voluptates, dolores, cupiditates, atque timores. Sequitur hanc divisionem Trojanâ tubâ insignis Poëta lib. 6. *Æneid.* sub Anchysæ persona statuens mundum singulasque ipsius partes divino informari spiritu, ac moveri, speciatim verò hominum animas ex eo esse oriundas, suosque motus in corpore tanquam tenebris inclusas, pati, unde vix auras, coelestemque patriam possint intueri.

*Hinc cupiunt, metuuntque, dolent, gaudentque, nec auras
Respiciunt clausæ tenebris, & carcere caso.*

Aristoteles nullum inest certum affectuum numerum; sed ut occasio tulit, variè eos recenset. In Ethicis supremas omnium passionum classes decennariò numerò dirimit, nulla fugæ, aut spei factâ mentione, quas alij ubique suggerunt. In Lib. Rhetoricorum tredecim recenset omissa *verecundia*. Galenus reducit eas ad octo differentias. Apud Tullium Tuscul. quæst. lib. 4., qui non tantùm Romanæ eloquentiæ, verùm etiam Romanæ Philosophiæ Princeps est appellandus, habes quatuor affectuum genera. Ultimis temporibus Renatus des Cartes longissimam instituit seriem; ut sic non tantùm sit diversa apud diversos passionum combinatio, sed etiam diversa apud eosdem varijs in locis observetur.

Celebrior, & magis operosa multorum divisio est appetitûs sensitivi in concupiscibilem & irascibilem, ex qua desumunt, passionum alias ad concupiscibilem, alias ad irascibilem potentiam esse revocandas. Ponit hanc differentiam Philosophus lib. 1. Rhet. cap. 10. hisce verbis: *Appetitiones irrationales* (id est appetitus sensitivi) *sunt ira, & cupiditas*. Similia tradit Ethic. 3. cap. 1. inquires: *Oportet autem & ob aliqua irasci, & nonnulla appetere*. Meminit etiam hujus partitionis Bethlemiticæ Cryptæ incola D. Hieronymus, cùm in caput 13. Math. ait: *In ratione possideamus prudentiam: in irascibili odium vitiorum, in concupiscibili desiderium virtutum*. Tantorum virorum auctoritas cui sensus communior adstipulatur, fulcitur hæc ratio. Res bonæ

duobus modis expeti possunt, sicut & mala dupliciter repudiari: Primò ut bonum facile obtinibile, vel saltem præsciendens à difficultate: Secundò ut difficile obtentu, adeoque tam arduum, ut absque victoria difficultatis resistens haberi nequeat. Non quòd ipsa arduitas obtinendi tanquam ratio objectiva terminet appetitum sensitivum, eumque ad accedendum invitet; hoc enim esse impossibile constat: Sed quia bonum sic aliquando expetitur, ut per eam prosecutionem animal reddatur expeditum ad superandas difficultates, si quæ in procuratione boni fortè occurrant. Ubi tamen animadvertendum, non sufficere quamcunque difficultatem, qua objectum est circumvestitum, ut arduitatis nomine veniat: si enim exiguum molestiæ septum sufficeret, vix ullus inveniretur actus concupiscibilis, cum vix ullam rem amore prosequamur, in qua adipiscenda non modica saltem difficultas se se ingerat. Similiter contingit per appetitus fugam repudiari malum duobus modis: uno modo, ut malum absolutè, alterò ut arduum ad declinandum. Jam verò quis dubitabit? quin duo affectus diversam inter se naturam sortiantur ob respectum ad bonum secundum se, & alterum superativum magni obicis, cum ipsa objecta ob dissimilitudinem hanc inter se dissideant? nempe virtutis irascibilis effectus sunt ex innata indole pugnaces, contentiosi, aspirantque ad victoriam obstantium repagulorum; ut quando famelicus leo ferocientis tauri carnibus exsatiari expetit: pathemata verò facultatis concupiscibilis sunt genij magis pacifici, & quieti, ut quando ovis virentia ad pedes gramina affectat. Hanc utramque facultatem humano statui valde convenientem esse, ex eo probatur, quòd cum plurimæ Myriades malorum in mortalium vitam pro sua conditione frequentissimè incidant; bonorum econtra seges plerumque aridè succrescat; exinde oportuit hominum vires creberrimè incitari tum irâ, seu impatientiâ ob mali præsentiam: tum cupiditate ad absentia bona conquirenda.

Ex biforini hoc monstro appetitus concupiscibilis, & irascibilis, quod eodem sinu concludit duos gemellos, sibi invicem summè adversantes, scilicet affectum unum mitiorem, & magis compositum, alterum concitiatorem, & furentem, ex hoc, inquam, biforini monstro reliquas passionem originem trahere reputant. Quemadmodum enim de lerneahydra commenti sunt Poëtæ, quòd rescisso uno ex septem capitibus, statim alia duo in prioris locum repullulaverint: ita pari modo ex concupiscibili, & irascibili tot passionem sobolescent, quot numerantur motus animi, qui circa bonum, & malum capita extollunt. Atque ad appetitum concupiscibilem sex referuntur, scilicet *amor*, & *odium*; *desiderium*, & *fuga*; *gaudium*, & *tristitia*: In irascente autem quinque comprehenduntur:
nimi-

nimirum *spes*, & *desperatio*; *audacia*, & *timor*, ac demum *ira*, cui nullam opponi passionem multi docent. Et primò quidem hunc numerum circa appetitum concupiscentem conantur ita stabilire. Tot ex appetitu concupiscente profluent passionēs, quot diversis modis continget imaginationem tendere in bonum, vel malum absolutè, & non ut arduum, consideratum: hoc autem accidere sex modis censent. Primò enim oblata rei bonitate inclinatur anima propensione quadam in illud; ita tamen, ut præscindat ab illius præsentia, vel absentia, & hæc coaptatio exprimitur voce amoris. Si bonum illud sit absens, & facilè consequibile, excitabitur desiderium. Si præsens, exorietur gaudium, totusque animus illi incumbet. Similiter propositò malò, si illud repræsentetur, ut abstrahens à possessione, & non possessione, progignetur odium, seu aversio; si solum immineat, & sit vitabile, efficietur fuga; si denique malum præsens ingruat, anima illi succumbet, nasceturque tristitia. Secundò affectus facultatis irascentis ad quinque classes reducere satagunt. Vel enim bonum absens arduum elucebit ut obtentu consequibile, & ut præponderet difficultati, & concipietur spes; vel æstimabitur obtentu impossibile, ita ut arduitas prævaleat bonitati? & erumpet desperatio. Si malum aliquod respiciat, tunc hoc apparebit vel ut repulso facile, & ut dignum, pro quo obtinendo superetur difficultas, quæ inest, & pro quo fiant tanti sumptus? & crescet audacia; vel tendet in malum arduum ita, ut eidem obviam prodire, & ingruentis difficultatis impetum sui objectu sistere non præsumat? & talem invadet timor. Vel denique occupatur appetitus circa malum præsens vindicandum? & incendetur ira, quæ nullam habere passionem oppositam dicitur, ut in reliquis assignatur aliqua ubique contraria. Sit enim, quòd potentia irascibilis circa bonum aliquod versetur, contrarium priori malo. Hoc si attingatur, ut præsens, fieri non potest, ut proponatur circumvestitum arduitate; quia præsentia boni non accidit, nisi sublata omni obtinendi difficultate. Igitur ex nullo bono præsentis erui potest alius affectus, quàm gaudij, & delectationis, qui ad animam concupiscentem accersitur. Quod si ponas malum præsens apparere, ut irreijcibile nullis viribus, tantum in angustijs exprimes tristitiam: si ut reijcibile quidem, sed non nisi summo conatu, qui præponderet bonitati rejectionis, iterum aliud non obtinebis, quàm tristitiæ affectum, qui ad priorem ordinem est redigendus. Ad hanc partitionem stabiliendam excogitarunt duos versiculos, memoriæ juvandæ causâ:

*Tristor, amo, supio, delector, abominor, odi.
Despero, irascor, timeo, multum audeo, spero.*

Appetitus

Sensitivus.

Concupiscibilis.

Irafcibilis.

Amor.

Odium.

Spes.

Despera-
tio.

Defideri-
um.

Fuga.

Audacia.

Timor.

Delecta-
tio.

Triftitia.

Ira.

Alij adhuc melius consultum imaginationi credebant, si omnes passiones in schematismum describerentur, prout Dialectici lineam prædicamentalem, aut Jurisconsulti arborem sanguine junctorum depingere consueverunt.

Hac tam ampla partitione quidam adhuc non contenti, ulterius ad fallendum otium suis divisionibus progrediuntur; & quosdam quidem *naturales*, alios *ultranaturales* barbarò vocabulò dicere solent. Affectus illos, quibus animal indiget, ad statum suum, vitam, & speciem tuendam, conservandamque naturalium appellatione complectuntur ob aliqualem conformitatem, quæ eadem bona subjacent appetitui quoque innato, & naturali, quique omnibus tam sensu præditis, quam sensu orbatis, est communis. Hujusmodi esse volunt famem, & sitim, ac potissimum timores illos, quibus refugit animal à rebus corpus lædentibus, aut mortem afferentibus. Qui verò excedunt limites appetitûs innati, quique feruntur in bonum, aut malum futurum, præter naturalis voce indigunt, ob hanc conjecturam, quòd appetitus innatus moveri non possit, nisi in bonum, aut malum sibi actu præsens, vel certè quia præscindit ab absentia, & tempore venturo. Eadem ratione ad præternaturales affectus redigunt, quicumque tendunt in objectum compositum ex bono & malo invicem permixtis, eò quòd appetitus purè naturalis, ac innatus ne confusa quidem virtute dotatus sit diversa inter se comparandi, qua tamen prærogativâ sensus pollet. Ad hos etiam reducuntur varij affectus, quibus aliqui afficiuntur ex sinistra rerum apprehensione ad comedenda illa, à quibus, tanquam rebus foedissimis, alias natura secundum se abhorret, de quibus canit Poëta:

Sic ubi jam gravidas stimulant fastidia Matres,

Obscenam satiant fercla pudenda famem:

Scilicet expetitur modò calx, modò creta palato;

Et modò, quæ stomacho displicuere, placent.

Ulterius non omittunt discrimen superaddere inter affectus infinitos, & finitos, eo sensu, ut primi ordinis sint, qui non cessant, aut terminum ponunt, sed appetendo pergunt sine fine, etiam dum objecti concupiti præsentia fruuntur. Contra secundæ classis, ubi certam objecti sui possessionem aliquando sunt adepti, veluti saturi explentur. Causam reddunt, quia nempe intellectus amplissimâ suâ sphaera peregrinatur per omnia, adeoque capax est, ut species bonitatis apprehendat sine fine, & hoc ipso excitetur passio illimitata. Hoc didicisse se dicunt ex Philosopho, qui lib. I. polit. cap. 6. inquit: quòd infinito concupiscentiæ existente, homines infinita desiderant. Primorum exemplum dant amorem

rem inexplebilem opum, aut honorum: secundi ordinis sunt appetitus edendi, bibendiqne, & similium, quibus limitem natura fastidiò, & nausea præfixit.

Nisi temeritatis notam incurrere metuerem, si me opinioni ab universa vetustate per tot sæcula approbatæ opponerem; fortè non malè defenderem, non esse, nisi unicam passionem, & omnes commotiones, quibus anima exagitur, nihil esse, nisi solùm amorem variis schematis exornatum. Quia tamen res hæc ad quæstionem de nomenclatura devolvitur; nolo tanto molimine eam hic librare. Quem enim quæstum facerem? nempe integram nubem Auctorum contra me excitarem, in qua, quia singuli inimicorum debellari non possent, quæcunque pars remaneret illæsa, victoriam sibi adscriberet. Adjice, si vulgatæ huic divisioni insistatur, magnum compendium construi ad partem secundam in suas dissertationes commodius discendam.

§. II.

De ordine passionum.

Quod ad ordinem passionum spectat, duplex ille considerari potest: unus causæ efficientis, quatenus passiones aliæ ex alijs excitari, & se consequi possunt; alter dignitatis, quo aliæ alias perfectione superant. Ac in ordine quidem productionis generativæ, si respiciamus ad ipsam indolem animæ appetentis, & ad naturam objectorum secundùm se acceptam, non attendendo casus particulares, pathemata facultatis concupiscentis, primum locum abripiunt passionibus potentiæ irascentis. Quemadmodum enim priorem sedem tenet bonum, & malum absolutè præ malo, & bono arduitate contracto; ita etiam amor boni, & aversio mali absolutè talis (quæ animæ concupiscens sibi arrogat) priorem sedem obtinebit, quam prosequi bonum arduum, & malum arduum fugere, quo officio appetitus irascibilis fungitur. Rursus idcirco animal bonò arduò, tanquam hamò, inescatur, ut superata tandem difficultate in eo, tanquam in auro ab omni scoria purgato, tanquam in rosis sine omnibus spinis, & velut in optatissimo centro quiescat. Igitur passiones consistentes in aversione ex prosecutivis via naturali oriuntur, & in ipsas, velut in finem, ordinantur. Inter ipsas autem passiones appetitus concupiscibilis, illæ, quæ in prosecutione consistunt, ordinariè præcedunt eas, quæ consistunt in fuga. Rursus inter prosecutiones potentiæ concupiscibilis or-

dine præcipua erit amor; succedet desiderium; ultimò locò delectatio. Atque idem ordo inter fugas his tribus prosecutionibus oppositas est determinandus circa eontraria objecta, scilicet inter odium, abominationem, & dolorem, seu tristitiam. Inter prosecutiones irascibilis prima habenda est spes; annectitur proximè audacia, & postremò locò venit ira. Inter fugas autem, quæ sunt in irascibili, scilicet inter desperationem, & timorem, vix ordo aliquis certus tradi potest quoad executionem, sed videntur hæc potius disparatè se habere. Crassæ tamen æquivocationis vitandæ causâ insinuatio facta est de præcisione à casibus particularibus, quos scientificæ quæstiones negligunt, solumque ruminant, quid singulis per se conveniat. Quodsi enim aliquando ad initium subveniat menti objectum arduum, cessante postea difficultate, fiet transitus ab irascibili ad concupiscibilem affectum, & ira inflammatus potest concitari postea amore alicujus boni necessarij ad vindictam sumendam.

De ipso dignitatis, & perfectionis ordine, si quid compertum est, hoc fortè statui potest. Primò passionès concupiscibilis, saltem quæ prosecutionem sapiunt, præstantiores sunt pathematis irascibilis virtutis, quandoquidem, posteriores ad priores referuntur tanquam media ad finem, & sic tam vulgare, quàm verum Philosophi axioma magis inconcussum reddunt. Vide ergò, quòd, sicut actus intellectûs origine, & dignitate præminent operationibus voluntatis; ita affectiones appetitûs concupiscibilis prævaleant symptomatis potentia irascibilis duplici modò, & generationis, & perfectionis. Secundò tam inter affectus concupiscibilis, quàm potentia irascibilis præcipuus competit gradus ijs, in quibus prævalet prædicatum prosecutionis, postpositis illis, in quibus elucet ratio aversionis, & fugæ. Suaderi potest hic dominatus ratione quadam deducta ex perfectione motûs rerum naturalium. Quòd enim motus naturalis lapidis cadentis intensior deprehendatur in fine, cum nempe magis appropinquat ad terminum suæ naturæ convenientem, quàm in principio, ubi ab eo violentiâ adhibitâ avellitur, argumento est, magis naturæ consentire, atque adeò perfectius esse accedere ad terminum, quàm ab eodem recedere. Sic etiam cum prosecutio in appetitu se habeat quasi instar alicujus accessûs, præstantiâ suâ præcellet fugæ, quam similitudine recessus ostendit. Tertiò inter passionès omnes quatuor præcipuè potiores censerì solent, scilicet delectatio, dolor, seu tristitia, spes, & timor, quas lib. I. de consolatione Philosophia metro ultimo complexus est Boëtius illis versiculis:

*Gaudia pelle, pelle timorem,
Spemque fugato, nec dolor adsit.*

Superfedeo minutiores series ex his ordinare, cum nec operæ pretium esse, nec gustui legentium sapere judicem.

DISSERTATIO III.

De Sede, in qua passiones recipiuntur.

§. I.

An passiones in anima recipiantur?

TRiplicem passionibus sedem statuit Plato; motibus facultatis irascibilis in corde, nisibus concupiscibilis in jecore, vel lumbis, & rationalibus in cerebro, ut sic in eodem individuo descriptus habeatur triplex rerum publicarum status: scilicet consularis in appetitu rationali; militaris, & contentiosus in irascibili; quæstuosus, & avarus in vegetativo. Si quis ex discipulis antiquæ Philosophiæ Deum hunc ab hac ignorantia excusare studebit, id facile præstabit dicendo, non locutum esse de animabus, sed de animarum viribus. Juxta delirium Manichæorum, qui duplici anima rationali corpus humanum informabant, bonâ unâ, quæ velut particula Divinitatis à Deo esset resecta, & malâ alterâ, quæ portio aliqua à dæmone originem duceret; juxta hoc delirium, inquam, passiones in anima deteriori stabulabuntur, unde nobiliori insidiabuntur. Sed quænam intemperies adeò eos in transversum egit, ut substantiam essentialiter malam non perspicerent esse chymericam? ignorabant scilicet, tam physicum, quàm morale malum solum respectivè dici, & sæpè non aliud esse, quàm bonum minus, & defectuosum. Stoicorum abortivum vagæ mentis foetum, existimantium affectus in sola opinione erronea, & judicio sitas esse, jam supra explosimus: hoc solum hic insinuare sufficiat, ridiculum hoc effatum plurimum favere Cartesianis, quatenus pathemata aliud esse non volunt, quàm meras cognitiones spirituales. Nolint, quæso, confundere spiritualia cum corporeis; id, quod plerumque comitatur passiones, cum ipsis passionibus. Superest ergò nunc solum, ut quæramus, an in ipsa anima rationali passiones sint collocandæ; pro qua controversia aliqua priùs de animæ naturæ sunt advertenda.

Sicut unitas ineffabilis Deitatis adeò est simplex, ut ad illius essentiam melius comprehendendam coacti fuerint philosophi eam quasi dividere, & diversas illius perfectiones variis exprimere nominibus, utentes jam phrasi naturæ, jam fati, modò providentiæ, modò motoris supremi &c; atque hac ratione in orbem terrarum pluralitatem Deorum induxerunt, ac innumeris populis idololatriam affricuerunt: sic pariter iidem, cum indivisibilitatem animæ rationalis mente sua concludere non valerent, absolutissimam hanc Dei imaginem variis adumbrarunt nomenclaturis, ut varias ejusdem operationes vivaciùs ob oculos ponerent. Contemplati sunt eam in tribus statibus inter se maximè differentibus, ita ut in primo plurimùm appropinquaret dignitati Angelicorum spirituum; in secundo deprimeretur ad conditionem animantium brutorum; & in tertio vilesceret adeò, ut plantarum naturæ assimilaretur. Ut est vegetativa, in alio non occupatur, quàm in corpore nutriendo, in alimentis digerendis, convertendis iis in sanguinem, & distributione per arterias & venas facta, mirabili prorsus metamorphosi conatur eandem prorsus materiam condensare in carnis substantiam, extendere in nervorum propagines, indurare in osseum sceleton, & in cartilagineos processus elongare. Imò à Divina providentia impulsà curam suscipit universum ipsum conservandi, dum producit, quod constanter deficit, generatque sibi simile, ut perpetuò species sua perduret. Verùm in his omnibus anima rationalis aliud non agit, quàm arbores, & flores, quæ æqualiter excrescunt alimento à cœlo delapsò, & Solis calore per occultos meatus in altum sublato. In secundo statu anima rationalis sensibilis fieri videtur, quando incipit acquirere rerum cognitiones, & producere varias versus easdem inclinationes. Miratur varia objecta famulantibus sensibus externis, qui nuncii munere funguntur imaginationi; species productas fideli memoriâ recludit, ut magnâ curâ conservatæ iterum occurrente occasione resituantur. Explicata rerum bonitate aut malitia, incipit anima amare, vel odisse; accurrit ad sibi placentia, refugit ab iis, quæ offendunt, & à diversis qualitatibus, quæ ipsi obviam fiunt, incitatur differentibus motibus, quos Latini verbò passionis declarant. In hoc gradu anima rationalis constituta non transcendit perfectionem brutorum, cum illa non minùs auxiliantibus sensibus detegant objectorum qualitates, non minùs recipiant in phantasia species, easdèmq; memoriâ retineant. Denique in statu tertio à corpore extricata occupatur circa veritates altissimas, tractat cum Angelorum choris, per varias creaturas, tanquam per scalarum gradus,

dus, scandit usque ad Divinitatis sedem, ibique inexhausta pulchritudinis abyssus absorbetur. In aliis rebus, Deitate inferioribus, erecta mente examinat qualitates ad indagandam essentiam, comparat præterita cum præsentibus, & ex utroque de futuris conclusiones præfagit. Facultas hæc tot miraculorum vocatur spiritus, domina reliquarum potentiarum, arbitrium ita liberum, ut cælum ipsum suspiciat illius libertatem, nec ullo unquam tempore violenta prædeterminatione physica vim ipsi inferat; sed potius dexterrimè procurat obtinere consensum gratia tali, quæ quidem, si conversionem efficaci voluntate intendit, certò certius obtinebit effectum, quin tamen dira, sævæque necessitate obstringat. His connotatis

Dicendum jam, in anima rationali passiones sedem non obtinere, si illa consideretur, prout ultimo loco fuit depicta. Sic enim repurgata ab omnibus sæcibus terrenæ materiæ, solum poterit vim suam exercere in operationibus spiritualibus eliciendis, eritque tam parum capax pathematum, quæ sunt sensationes materiales, quam parum sensationes possunt inhærere alicui non sensibili, quam parum oculus potest recipere sonum invisibilem, & auditus esse subjectum lucis. Hæc ipsa etiam est ratio, cur Doctor Hypponenensis lib. 9. de civit. cap. 5. circa finem in aligeris spiritibus ante faciem Dei adstantibus passiones excludat, dum docet: *Sancti Angeli, & sine ira puniunt, & sine misericordie compassione subveniunt, & tamen istarum nomina passionum consuetudine locutionis humana etiam in eos usurpantur propter quandam operum similitudinem, non propter affectionum infirmitatem.*

Quod si tamen natura animæ inspicatur, prout in secundo statu fuit descripta, prout corporea mole est circumdata, nihil vetat, in ea passiones immediatè recipi. An non enim omnium philosophorum placitum hucusque fuit, ad appetitiones hominis animam necessariò debere concurrere, ut subjectum saltem partiale? clariora sunt D. Augustini verba, quam ut etiam à malevolis in sinistrum sensum detorqueri possint. Sic autem lib. de spiritu, & anima cap. 4. habet. *Anima secundum operis sui officium diversis nuncupatur nominibus; dicitur namque anima, dum vegetat; spiritus, dum contemplatur; sensus, dum sentit; ratio, dum discurrit; memoria, dum recordatur; voluntas, dum consensit.* Igitur anima vegetat, igitur sentit, & eò quidem modò, quo intelligit, hoc est, ut non solum sensationem producat, sed eandem etiam recipiat. Rationum pondus hoc potest auctoritati accedere. Si animæ non uniuntur appetitiones, non magis reddetur appetens, quam materia prima; vitæ enim ratio, si ulla fides est peripato, æquè dicit receptio-

ceptionem , ac effectiōnem sensationis : productionis titulō primariō fruetur anima , alterō gaudebit materia : confectarium ergō erit tam vitalem esse materiam , quā animam , quod refugit unanimis hominum consensio . Rursus si in anima non collocantur cognitiones , quæ materiales dicuntur , quomodo poterit homo per eas cognoscere ? certē ut aliquam denominationem totum mereatur , oportet illam suprà aliquam totius partem determinatam eadere . At , si anima non est subiectum immediatum cognitionis materialis , & materia illam recipiens tam parū est capax formæ denominantis cognoscentem , quā parū anima apta est , ut per albedinem vocetur alba , nulli parti hominis tribueretur determinatē denominatio cognoscentis : ergō rectē colligeretur nullam partem , & consequenter nec totum animal cognoscere . Jam si in anima rationali ponuntur cognitiones corporeæ , fatendum est , in ea etiam excitari appetitiones materiales ; aliās non erit idem principium determinans ad efficiendum amorem appetitūs cum principio cognoscente , quod tamen scholæ unanimi voce loquuntur .

Cū autem hujusmodi inclinationes & aversiones corporales ex natura sua exigant etiam unionem physicam sui cum materia , idē colligitur , adæquatam sedem passionum consistere in complexo ex corpore , & anima eam partem vivificante , ubi dantur hujusmodi motus , nec non in combinatione humorum , quæ inest tali parti . Et quia humorum combinatio diversa fit in diversis hominibus , idē , licet omnes sint compositi ex simili materia & forma , sollicitantur tamen diversis impulsibus corporalibus , sicut iisdem diversa vitæ mensura , uni longiores , alteri breviores , etiam abstrahendo à causis extrinsecis contingit . Imō idem individuus homo ætatis mutatione eveniente experitur eam diversitatem , ob immutatam nempe temperamenti constitutionem . Complexum , ut dicit humorum & spirituum combinationem , existens vel in una , vel pluribus corporis humani partibus informatis animā sensitivā , exprimi solet variis vocibus . Quoties enim audimus similes locutiones : homo superior , homo inferior ; homo novus , homo vetus ; homo animalis , homo rationalis , quibus libri ascetici sunt referti ? ista non sunt larvæ , ideæ , moralitates , & voces sine re ; sed omnia , quæ similibus nominibus includuntur , distinguuntur inter se verē realiter , saltem distinctione inadæquata . Quid enim censēs intelligi per partem superiorem ? cave ne aliquid aliud tibiingas , quā animam rationalem , quam melius recentioris philosophiæ patroni cum suis potentiis identificatam ponunt . Partem autem inferiorem si audire contingat , ob oculos men-

tis tibi propone collectionem ex humoribus, cum parte corporis, in qua resident, & anima illam informante. Ubi vides, animam inadæquatè ab eo complexo distingui, & sic à puncto veritatis non aberrabis. In unaquaque ex his duabus partibus hominis, nempe superiore & inferiore iterum aliæ duæ fiunt partitiones. Una appellatur pars concupiscibilis, qua facultas expedita redditur ad faciliè appetendum, vel saltem ad aliquid approbandum, sive id accadat actu voluntatis, sive actione corporis. Altera sortitur nomen irascibilis, quæ nempe celerius fluit ad repellendum aliquid alterutro ex illis duobus actibus, ad quam alluisse videtur regius psaltes, quando psalmo 4. dixit: *Iraſcimini, & nolite peccare*: Interdum etiam contingit, ut eandem operationem sibi vindicet tam virtus concupiscibilis, quam irascibilis: vel quia operatio per propriam suam arduitatem invitat, ut constat in generosis animis, qui ad facilia languescunt, ad ardua verò moventur, & excitantur: vel quia ipsum objectum ita vehementer desideratur, ut appetitus proterat omnes obices contra illud insurgentes, prout facit actus spei, per quem anima ita Deum ut ultimum finem appetit, ut insurgat contra omnes difficultates ad possessionem Dei impediendam emergentes. Usus tamen communis obtinuit, ut in nomine imponendo toti complexui communiter homines subscribant sacris codicibus, ubi legimus Genesis 4. *Subtus te erit appetitus tuus, & tu dominaberis illius*: & ideò hac loquendi methodo utuntur, dicuntque communiter, passiones sitas esse in appetitu sensitivo.

§. II.

Ubi resideat appetitus sensitivus?

JAm verò cum appetitus statuatur sedes, in qua passiones sustentantur; hic autem præter ipsam animam imbibat etiam tanquam partem organum aliquod corporeum: ideò ulterius animosa contentione inquiritur, quænam humani corporis pars præ altera sit in thronum eligenda. Et primò quidem Platonis Dogma hoc fuit: tres dari animas: rationalem, mentis optimam partem; & hanc capitis arcem tenere; irascentem procul à ratione ad domicilium cordis deductam esse, illique obsequi, & respondere locò sapientiæ; cupidinem infernas abdominis sedes tenere, ut popinas quasdam & latrinarum latebras, ac diverforia nequitiae; relegatam verò idcirco longiùs à sapientia hanc partem videri, ne im-

portuna vicinitas rationem, constitutam super eunctorum salutem, in ipsa cogitationum utilitate turbaret. Huic subscribit Claudianus de quarto consulatu Honorij:

*Iram, sanguinei regio sub pectore cordis,
Protegit imbutam flammis, avidamque nocendi,
Præcipitemque sui: rabie succensa tumescit;
Contrahitur tepefacta metu; cumque omnia secum
Duceret, & requiem membris vesana negaret,
Invenit Pulmonis opem, madidumque fluenti
Præbuit, ut tumida ruerent in mollia fibra.
At sibi cuncta petens, nil collatura cupido,
Injecur, & tractus imos compulsæ recessit,
Qua velut immanes reserat dum bellua rictus,
Expleri pascique nequit; nunc verberare curas
Torquet avaritia stimulis, nunc flagrat amorum,
Nunc gaudet, nunc mæsta manet, satiataque rursus
Exoritur, casaque redit pollentiùs Hydra.*

Secundò acriter inter se committuntur philosophorum Princeps, & medicorum antesignanus, quorum prior appetitui tanquam omnium aliorum sensuum moderatori, & judici tribunal in corde ponit; alter verò supremam totius corporeæ structuræ arcem, cerebrum nempe, erigit. Veniam hic rogo à magno Stagyrita, si eò paulisper deservò, in partes Galleni concessero. Libratis enim rationum momentis animus in adversam abstractus sententiam cogitur appetitum ad altius subselli-um, à corde scilicet ad cerebrum promovere. Ut veniam faciliùs impetrem, non græca posco naturæ mysteria; sed quæ nota sunt, quæ patent, quæ oculis observantur, ad mentis trutinam intromitti cupio. Et quæro primò: cur illaso cordis sinu sæpissimè vicietur, & non rarò prorsus deficiat internus appetitus, ut docent Phrenitides, & deliria? si facultas sensitiva appetens non re, sed cogitatione tantum ab imaginatione secernitur, eò quòd ad rei gratæ, vel molestæ species phantasiæ impressas statim sequatur operatio appetitûs; cur corruptâ phantasiâ, pharmaca applicamus cerebro, & non pectori? tertio cur vehementi studiorum occupatione, ex diuturno phantasiæ, ac memoriæ exercitio solum caput defatigatur? quare obnubilatò post mensam cerebro minus apti invenimur ad studiorum labores prosequendos? cur vulnera capiti inflicta memoriam aliis abstulerunt, aliis verò, quod de Clemente VI. scribitur, felicissimè reddiderunt? non invideamus igitur nobilissimam hanc cerebri stationem appetitui sensitivo, præsertim cum in illud velut

in centrum omnium externorum sensuum nervi immediatè transmittantur. Adhuc citiùs appetitui exitum à corde ad cerebrum permisisset Aristoteles, si manifesta oculorum experientia convictus cognovisset, nervorum omnium propagines, non ex corde derivari, sed à cerebro dominante, reliquis subministrari partibus. Debetur hæc notitia dicasterio medico, quod sectionibus animalium nervos omnes vel ex cerebro, vel ex medulla oblongata, prout intra cranium existente, progerminare ostendit, ita ut prope cerebrum, aut spinam, sint latiores, in progressu semper fiant angustiores. Non secùs ac arbores, quæ prope radicem in trunco amplissimum amplectuntur spatium; dum verò proficiscentes ramos tenuiores explicant; inde diffecantur in ramusculos, ac denique in frondium propagine omninò evanescunt. Nempè non examinavit acutissimus aliàs arcanorum scrutator, eandem esse cerebri, & nervorum substantiam, duplici membrana, seu meninge vestitorum, prout saltem in majoribus animalibus deprehendere potuisset. Nunquam vidit, incisò, vel ligatò nervò partem superiorem, & cerebro viciniùs copulatam nihil detrimenti pati; inferiorem verò, & cordi propinquiorem omni sensu ac motu privari. Hæc omnia palpabiliter appetitum à corde exulare jubent, & pro consentanea regione cerebrum attribuunt; quod sive triclinium, sive lacunam immundorum affectuum vocites, mihi perinde est. Non ignoro, cor variè contrahi, aut dilatari, prout diversi impetus exsurgunt, & quamdiu pectus ipsum non commovetur, non solere dici passionem: hoc tamen secum non trahit, cordis texturam, omnium motuum vitalium principium esse. Sufficiet ad hoc, affectum in spirituum commotione maximè sensibilem in cerebro formari; tum ad cor ipsum, quasi ad rotam machinæ primariam diffundi, ut in sanguinem, & alias corporis partes pervadat, ac corpus ipsum in eo situ, & partium dispositione, quam affectus natura postulat, collocetur.

Sed vix exhausta hæc difficultate emergit alia non levioris momenti, in quam scilicet parte determinata cerebri moretur appetitus sensitivus, quod à nemine satis fuit divinatum, hoc ante omnia Cartesius velit, nolit, concedat cum suis sequacibus necesse est, sensum internum non figere domicilium tantum in conario, seu glandula pineali, pendente prope tertium ventriculum in centro ferè cerebri, & figura piæ nucleum imitante. Quæro enim ex Cartesio, quare tam rigido plebiscitò, aut si mavult senatùs-consultò imperet animam reliquis corporis membris exesse, eamque intra solam glandulam ableget? reponit, ens indivisibile non posse occupare spatium divisibile. Habeat sibi adversarius, quod petit, me, non sine vitio interim permittente, sed audiat se-

quelam pessimam, quæ inde eruitur, ipsa glandula, cum habeat fibras, sinus, possitque dispesci in plures partes, cogetur misera anima etiam ex ipso conario exulare, durissimò Cartesij decretò. Si Dominus Renatus ad angustias reductus imperaverit animam in minimum aliquod glandulæ punctum recedere, tunc ineptam reddet ad omnia totius hemisphærij objecta percipienda, eò ipso, quod sine corporum penetratione, quam ut monstrum perhorrescit, omnes ad illud punctum, nervi convenire non possint, nec per illos ad sensus exteriores spiritus deduci. Imò neque ad nucem hanc in statu suo integrè relictam ex observatione Stenonis, reliquis rei anatomicæ consultis adstipulantibus, pertingunt omnes nervorum ipsorum fibrillæ. Nititur nempè hoc somnium varijs suppositis manifeste falsis. Judicat enim cum antiquitate, spiritus animales, qui ex vicinis ventriculis cerebri concurrunt, ibidem temperari, & adhuc magis perfici: nec spiritus in ventriculis generantur, & pars hæc potius à natura destinatur ad phlegmaticos humores recipiendos, adeoque anima potius à suis operationibus impediretur. Credit etiam morbis non esse obnoxiam, adeoque regionem pro principe parte saluberrimam: at testantur recentiores Medici arenulas, & calculos non rarò magnam, imò subinde plusquam dimidiam glandulæ partem occupare illæso appetitus usu. denique putat nucem hanc esse mobilem ad spirituum incursum, omnes nervos in eam desinere: at fixam anatome demonstrat, & contra alterum reclamationem autopsia. Quod si fides adhibenda Thonnero, qui testatur, glandulam hanc posse penitus exsiccari pulveris nitociani usu, appetitu nihil penitus corrupto, tunc sibi Cartesius de hellebero prospiciat, ad capitis sui intemperiem priùs sanandam, quàm tam subtiles veritates orbi universo proponere aggrediatur. Non est, quod vereatur, ne, si animam non includeret tam angustæ capsulæ, illa se ipsam aliquando in corpore amittat. Aliàs anima jam satis angusto carcere circumdatur, & dum carnis corruptione repellitur, ne ad alta exsurgere libèrè possit, cum Poëta conqueritur:

Libera, qua potui spatioso ludere cælo,

Cernis ut angusto carcere clausa premar?

Heu dolor! ut miseras me lux effudit in auras,

Ipsa loco carvea membra fuere mea.

Pes compes, manicaq; manus, nervique catena,

Ossaque cancellis nexa catastra suis. &c.

Sed quid ergo in hac materia, de qua apud Auctores vix aliquid invenitur, quod intelligi possit, ne dum explicari; in qua meræ tenebræ sunt, ex quibus ne minimam quidem luculam exprimere valeres: quid, inquam,

quàm , in hac materia statuendum ? adhæreo domestico in alijs etiam sententijs mihi amicissimo P. Honorato Fabri, viro, de quo meritò ambigere licet , an potius ad Philosophorum , an ad Medicorum cætum , an ad Mathematicorum chorum sit reducendus, adeò in omnibus est præstantissimus. Cùm hoc igitur sic concludo : organum sensûs interni consistere videtur in plexibus cerebri , quos secundinis fœtus non absimiles volunt Anatomici , quique retinam interioris cerebri componunt complectentem cerebri ventriculos. Hoc multis argumentis evinci potest. Et primò contra Græcos existimo functiones internas haud quaquam elici per totam cerebri substantiam , sed in aliqua duntaxat illius parte. Si enim in toto cerebro exerceri possent , cùm spinalis medulla ejusdem sit rationis , illa quoque sensui interno domicilium præberet. Idem dicendum de nervis opticis , præsertim juxta ortum suum , ut mirum videri non debeat effatum Galeni pronuntiantis, nervi sunt *cerebrum parvum, & compactum* : hoc autem quilibet sanus intellectus refugiet. Præterea perforatò non semel craniò , licet exquisitissimus in menyngibus, dura scilicet, & pia matre , dolor deprehensus sit , in ipsa tamen medulla , vel nullus , vel satis obtusus repertus est. Cùm autem organa sensuum externorum observentur exquisitissima sentiendi facultate pollere , cuinam tantùm animi erit , ut hoc sensui interno denegare non dubitet ? Ex hoc autem ulteriùs pergo & liberè pronuntio , nec ulli particulæ cerebri appetitum inexistere ; suspicio fundamentò non caret. Si enim in aliqua parte mansionem figeret, haud dubiè in tota medulla moraretur , cùm inter omnes partes non sit magnum , ac substantiale discrimen. At toti medullæ appetitus non inexistit, quod præter superiùs dicta testimoniò suò adhuc palam faciunt Medici , qui apud Isbrandum frequenter deprehenderunt una, & altera parte indiscriminatim læsa , vel recisa , principes tamen functiones integras permanisse. Ita narrant de juvene, cui magnum apostema penetravit in superiores ventriculos : ita de ancilla , cui diversis vicibus exempta fuit putrefacti cerebri quantitas pugni magnitudinem adæquans , quibus tamen phantasia sana constitit : igitur consectarium erit appetitum , neque parti cerebri inesse. Atque hac ratione corrui Arabum systema , qui imaginationem & appetitum sensitivum sedibus discretos esse voluerunt , ita , ut phantasiam , in partibus anterioris cerebri , appetitum , & memoriam in occipite collocaverint , experientia enim illorum , quòd læso graviter occipite memoria plurimùm periclitetur , non habet sat firmitatis ; nam ex Bonhij sententia non rarò appetitus & memoria corrumpitur ob vulnera sincipitis , & phantasia ob læsionem occipitis , cùm non minùs vulnus antiæ , quàm posticæ parti

infectum harmoniam & compagem cerebri queat dissolvere. Adhuc pluribus se se cavillis exponerent collocantes cum Kenelmo, Digbæo appetitum in septo lucido, quod in medullari substantia discriminat supremos duos ventriculos; quis enim principem facultatum sedem esse dicat mediam inter duas cerebri cloacas; quomodo in capitis hydrope, ubi aliquot libræ feri congeri deprehenduntur in ventriculis, & septum medium facibus innatat, poterit mens integra persistere? quomodo in hoc casu species visibiles appellere, vel spiritus poterunt dispensari?

Quæ cum ita sint, & appetitus sensitivus nec glandulæ pineali, nec medullæ cerebri, nec septo lucido inhæreat, & duntaxat plexus retiformis dictus supersit, restat solum, ut iste pro appetitûs organo assignetur. Argumento huic licet negativo, non tamen pondere suo carenti, plurimum roboris accedit ex analogia sensuum externorum, præsertim verò visûs, sicut enim retina fungitur munere organi visualis, eò quod ex defecatissima cerebri substantia, & innumeris tum arteriis, tum venulis constans, atque ipso nervo optico longè mollior, adeoque aptissima quoque sit ad affectionem sensibilem excipiendam: ita pariter interior cerebri plexus sedes appetitûs interni constituendus est, cum minutissimis arteriis, venulis, aliisque vasis fibrisque nerveis exquisitissime intentis, tam benè elaboratus sit, ut retinam oculi perfecte imitetur. Quæso accuratius illum intueamur, & videbimus è cerebri basi, in qua nervorum originem omnes agnoscunt, hunc plexum non procul abesse, ac proinde faciliè traduci posse affectionem organo sensûs interni impressam. Scilicet per nervos, quæ etiam sunt subjectum externorum sensuum diffunduntur operationes ad dictum plexum; ab hoc inde per nervos motibus localibus servientes in musculos toto corpore distributos. Nempè animal totum quoddam est, non tantum accidentale, ut cumulus lapidum ex multis aggregatus, sed operosæ naturæ arte elaboratum, ut omnes functiones ad communem quendam finem pertineant. v.g. sensus externus sentit, sed ea conditione, ut affectio, quæ prolicitur, ad officinam sensus interni traducatur; à sensu interno percipitur hac quoque lege, ut per nervorum, venarum, arteriarumque fibras in totam machinam spargatur. Hinc à peripheria itur ad centrum, & datur regressus à centro ad peripheriam; intellige à sensibus externis peripheriam quasi corporis obtinentibus ad sensum internum, qui fibrarum centro inhæret; ab hoc ad reliquorum organorum supellectilem, scilicet nervos, musculos, & membranas. Igitur, ne longior sim, cum in omnia corporis membra ex tribunali appetitûs interni affectionem propagari sit necesse, certè in ea duntaxat parte figi debet, quæ ex omni fibrarum genere

nere est composita: sed præter præfatum plexum nulla hujusmodi fabrica ostenditur, igitur in animalibus perfectis (in illis enim, quæ insectorum calculo comprehenduntur, in medullæ spinæ dorsalis sibi mansionem elegit) rectè dicitur in eodem sustentari appetitum sensitivum. Nec obstat multiplicitas innumera actuum internorum, facultatis scilicet imaginativæ, & appetitivæ: potentia enim vitalis ad hos non adeò laxum, & magnificum exigit fabrorum antrum. Quod, ut intelligas, in exemplum linguam, quæ, parva licet mole, subservit ad innumeros vocum sonos edendos, ad diversissimos saporibus gustandos. Idem in particularibus propriisque tum videndi, tum audiendi organis est manifestum. Unde moles perparva plexus retiformis nihil obest, quin mirabili artificio in eo varietas multiplicis organizationis contineatur. Neque abstrahit me ratio, quâ multi sibi persuadent, si in medulla cerebri appetitus sensitivus non subiectetur, tantam cerebri vim frustra in cranio esse repositam. Ego verò fidenter nego, tantam cerebri molem frustra esse; tum quia in homine magna humorum copia gyrans liberaliore indiget colatorio ad fæces secernendas; tum quia non parum ad sensum internum confert, licet appetitus sensitivus in eo minimè regnet. Ideam sciendi cupido manifestam iterum in sensibus externis exhibeo. Oculum accipe, qui plurimis ex partibus est fabricatus, licet in singulis actus vitalis non eliciatur. Alteri muneri inservit humor crystallinus, alteri aqueus: alio munere defungitur uvea, alio cornea: omnes visioni famulantur, videndi tamen facultate carent: minima inter omnes hoc privilegio gaudet, eoque munere defungitur. Quidni de sensu interno idem sentiatur? qui licet in toto cerebro non habitet, sed in una duntaxat angustiore casa commoretur; alias tamen omnes partes promptas habet, qui suò modò ad effectum concurrant, quatenus scilicet vel ad traducendam affectionem, vel ad conservationem, defensionem, nutritionem, purgationem, vel ad alium quemlibet usum ad eundem finem spectantem conducunt.



DISSERTATIO IV.

De causis passionum intrinsecis.

§. I.

Prima causa caro viva.

Perspiciuum cuilibet scio, non tantum in hominibus diversæ ætatis, quales sunt in florente juventute, & adulta senectute constituti, sed etiam in coævīs varios vigere passionum vepres. Videbis hunc velut Megaram ex erebo emersam ita ad iram pronum, ut ad minimam sibi oblatam occasionem accensas conquasset tædas, ignesque spargat exitiales; dæmonem ipsum, non à Deo immissum, sed sponte assumptum circumferat. Alios econtra ad iram esse segniores, ac propè rigentes; prouiores tamen experieris ad timorem, quo iugiter concutiuntur, ita ut meticolosæ hæ animæ, pusillique spiritus nihil unquam securum iudicent: omnia suspecta habeant, & ad quamlibet umbram infuso veluti gelu per omnia membra contremiscant. Sunt, qui nec irâ corripiuntur, nec absterrentur timore, & cæteris magis inclinantur ad gaudium, & lætitiā, quique continuum ver sereno, & roseo vultu præferant. Alii è conuerso mærore perpetuo, iugique angore cum Heraclito & Bellerophonte premuntur, qui instar filiæ novercantis fortunæ videntur quotidie amissas opes, sublato morte consanguineos, absumptas incendiis domos, grandine contritas segetes, disruptas, vel collisas ad scopulos naves, & alia id genus lugere, & deplorare. Quanam, amabo, causa intrinseca hujus proclivitatis ad tam varios, tamque sibi aduersantes affectus debebit excogitari? animam rationalem non putārim, cum hæc in singulis hominibus ejusdem speciei esse à sanioribus defendatur, & cum proprietates extrinsecæ minimè à natura sejungantur ab individuo, cujus sunt pedissequæ inseparabiles, oporteret omnes homines jactari iisdem passionibus, quod experimentis evidentibus refellitur. Data etiam ea opinione, qua multi detinentur ad judicandum, animas ratione præditas in perfectione substantiali differre, nondum tamen enodata est omnis difficultas, cum per ætatum varietatem in iisdem hominibus propensiones hujusmodi immutentur, & anima semper eodem persistat statu usque ad ultimos senectutis canos. Hic igitur erit præsen-
tis

tis dissertationis scopus , ut similibus proclivitatum causas intrinsicas perscrutemur.

Primò ergo dicendum , effectus istos nasci ex eo , quòd homo constet duobus elementis sibi contrariis ; corpore nimirum & animâ. Diæteriis vapularet, qui ad tuendam animæ dignitatem sibi persuaderet omnem passionum perturbationem à solo nostro corpore provenire, & animam solum ob contactum membrorum coinquinari. Univerſo enim orbi notissimum est, corpus ex se ipſo potestatem non habere ad operationes vitales producendas ; oportet igitur animam in omnibus actionibus assistere. Doctrinam hanc divinè elucidat Augustinus lib. de perfect. hominis , cap. 17. *Non enim caro sine anima concupiscit, quamvis caro concupiscere dicatur, quia carnaliter anima concupiscit.* Complexum hoc ex materia & anima multas appetit res, modò unam, modò aliam juxta diversarum causarum combinationem, quas anima expedita ad judicandum censet non debere fieri. Et ecce jam motus contrarios ! nempe illum, quo viva caro in-eitata ad vindictam, ad venerem, ad fugam has res non aliter, ac magnes ferrum appetit ; & alium, quo anima cognoscit, non debere hæc fieri, & de facto non vult fieri, quòsque oppositos motus quasi digitò ostendit Paulus, quando scripsit ad Rom. 7. *Video autem aliam legem in membris meis, repugnantem legi mentis meæ*, nimirum inclinationes corporeas resistentes judicio dictitanti illa non oportere facere, & voluntati nolenti ea perpetrare. Non ignoravit hoc sæcularis ille, qui cujusdam veneficæ nomine ajebat :

Video meliora, probòque

Deteriora sequor.

Ambæ quidem hæ partes conjunctæ inter se sunt quasi individui duo Collegæ ; nihilominus cùm unus originem suam adscribat terræ, alter se cœlo natum gloriatur ; ideò inter se dissidere, atque sese invicem odisse assolent. Nunc simul pacificè vivunt, & sese summo prosequuntur amore ; mox querimonix exaudiuntur, & à querelis ad rixas proſiliunt. Nullus melior judex hujus rei assumi potest, quàm D. Augustinus, qui sanctiori vitæ propinquior bellum hoc intestinum satis expertus est. Audi lamentantem : ego, inquit, deliberabam, ut servirem Domino meo, ego eram, qui volebam, ego eram, qui nolebam, ego eram, nec planè volebam, nec planè nolebam : ideò contende-bam, & dissipabar à me ipſo, & ipsa dissipatio me invito quidem fiebat, nec tamen, ostendebat naturam mentis alienæ, sed pænam meæ. Lib. 8. Confess. cap. 20. Quia verò hoc compositum ex

E

parte

parte rationali & irrationali, vocatur communi loquendi phrasiologia appetitus sensitivus, statim Philosophus videt causam efficientem pathematum à causa materiali non discrepare, eâ ratione, qua intellectus in seipso gignendo cognitiones, iisdemque in seipso mansionem exhibendo, duplicem quidem denominationem accipit; in rerum tamen natura una, eademque res permanet. Sed quid respondendum erit his ipsis naturalis sapientiæ amatoribus, si profundius controversiam expendendo exquisierint, quænam ex his duabus partibus seditiosi passionum tumultus magis rea sit agenda? salvo meliori iis assentior, qui animam tanquam magis ream rebellionis insimulant. Illa enim est, ex qua una cum vita oritur primariò omnis tumultus: illa est, quæ instigat corpus contra spiritum, & stulta cœcitate arma subministrat, quæ postea adhibentur ad propriam quietem extinguendam, ipsique vulnus lethale infligendum: illa est, quæ auxilia præbet corpori inanimi, quod alias putredinis ac paludis acervus bellum movere non solum non auderet, sed neque posset. Illa est, quæ utitur corpore, sicut faber malleò, aut incude, in qua format omnium perversitatum idola, & fabricatur quarumcunque voluptatum simulacra. Immeritò igitur querelis animæ defertur à Philosopho, si iusti iudicis partibus fungi velit, cum corpus tot criminum, quorum accusatur, non probetur esse auctor; sed tantum scelerum complex, solumque animæ consilium, & sententiam fuerit secutum. Hæc de primaria passionum radice; quæ tamen, quia nondum sufficiunt ad diversissimas in eodem homine animi agitationes explicandas, ideò

§. II.

Secunda causa est temperamentum.

Dicendum secundò, proximum à certis affectibus ortum duci ex temperamento humorum. Cum enim summa animæ cum corpore consensio intercedat, tantòque ista duo inter se tœdere sint conjuncta, ut alter alterius actiones consequatur: quis nostrum mirabitur, causam in agendo à suo instrumento, animam à corpore dependere, cum sciamus à scriba non adeò elegantes depingi characteres, ubi calamò minùs aptò utitur? & quis negaverit, nisi fortè ille, cui ferocitas molestiorem frontem penitus exuit, quis, aio, negaverit, illum ad iram plurimum proclivem esse, cui bilosus humor in magna quantitate obtigerit? Quis inficia-

inficiabitur, illum, qui crasso, & tenebricoso sanguine abundat, ad tristitiam facile mobilem? ideo Galenus in Opusculo, cui titulum inscripsit: *Quod animi mores corporis temperamentum sequantur*, ostendit, pronitatem animi ad certos affectus ex temperamento oriri, cui postea mores accommodantur. Quia autem hanc corporis temperiem diversi diversam fortiuntur, & etiam eadem ob varias causas extrinsecas sive aëris, sive victus, sive astrorum influxus in eodem immutatur consequens est, homines ex iisdem varia nancisci temperamenta, & cum ipsis varias infirmitates, hujus, vel illius affectus: hinc sicut varia symptomata effectus sunt diversi corporis temperamenti; ita vicissim varia corporis constitutio constituit hominem jam proniorem ad has vel illas inclinationes; ipsum autem temperamentum animalium emergit ex redundantia quadam quatuor qualitatum elementarium, caloris scilicet, frigoris, siccitatis, & humiditatis, quas in ipsis quatuor humoribus residere volunt Physici, in quantum homo aliquis esse temperamenti frigidi & humidi putatur, quando in eo hi duo humores prædominantur. Notandum igitur humorem illum, quem vulgus sanguinem appellare consuevit, non modò ex quatuor elementis constare, in quæ tamen immediate non resolvitur: sed ex quatuor aliis succis, in quos facile abire potest, esse conflatum; scilicet ex flava & atrabile, ex pituita, & ex eo, cui communis sanguinis nomen adhæsit. Pituitæ nomen sibi vindicat illa sanguinis portio, quæ ex chylo recenter desumpta, nec multoties circuitu per vasa corporis excocta, crudiori adhuc, ac minùs spirituosæ frigiditate, ac humiditate inficitur. Purissimi sanguinis voce audit ea pars, quæ pluries per corpus circumducta, & in corde dilatata ad mediocrem subtilitatem pervenit. Illa massa, quæ per frequentiores circulationes adhuc ad majorem tenuitatem est exaltata, & magis fervida evasit, & ad naturam calidam & siccam accessit, bilis nomen est adeptæ. Denique melancoliæ vox accommodatur illi substantiæ, è qua post plurimas attenuationes spirituosæ particulæ in magna quantitate sunt eductæ, atque hinc sola frigidior, crassior, & magis terrestris, & sicca, quasi in fundo remansit. Humores isti variè inter se misceri possunt, ita ut jam unius quantitas alteram mole superet; vel ut per motum, & agitationem certæ particulæ faciliùs congregentur, & sic unitæ majori vi polleant ad æstum procreandum, quàm separatæ. Ad hoc non parùm confert organorum structura, sicut ad pulsandam chelin, vel saltandum, & canendum. Quod si itaque in mixtione peracta aliquis descriptorum humorum v. g. biliosus, prædominetur totum temperamentum talis hominis ad biliosos revocabitur: totum animal verò in censum melancholicorum

eorum veniet, ubi portio, frigidior, crassior, & magis terrestris abundabit. Cum enim sanguinis massa ad nutrienda animalium membra sit ordinata, si in isto plures particulae terrae, & crassiores praevalerunt paucissimis ignitis, oportebit etiam illas partes, quibus in pabulum cedunt, similes morborum pravitates contrahere.

Verum quia inficiari non possum, humorum istorum habitudinem minimè appellandum esse temperamentum, sed potius effectum ipsius temperamenti; cum non idè hic vel ille ad Melancholicorum gregem spectet, quod in ipso plurimum atræ bilis detur: sed quia multum atræ bilis ex alimentis in organis principaliter famulantibus excoquit, ideo potius in illo multum nigræ bilis atramentum diffunditur: propterea ad alia in auxilium vocanda se debet mens extendere. Crediderim igitur, eos magis veritati appropinquare, qui tuentur, illam substantiam esse temperamentum, quæ ex primitivis humoribus, ex parentum sanguine, & ex congenitis seminibus constituitur. Ex hac radice decidendum putant: an iste sanguineæ, ille biliosæ sit complexionis, quod in prima conformatione corporis, vel sanguis, vel bilis magis convenientes obtinuerit qualitates. Cum enim ex hac massa cætera omnia membra suo tempore formentur, illam virtutem in istis prævalere oportet, quæ in materia, ex qua fabricantur, dominiò emineat, eruntque magis calida, quæ spiritu & sanguine abundabant: illa minùs, quæ istis carebant. Neque est ullum periculum, ne materia ista primigenia fons & origo principalium partium per continuam & valdè notabilem transpirationem deperdatur. An non enim in ipsa adulta senectute, an non in ipsis cadaveribus maculas primigenias altè infixas remanere cernimus? si in brutis, saltem imperfectis, exspiraret tota illa primigenia materia, ex qua foetus procreatus est, an non successu temporis una cum materia in auras abire deberent omnes animæ particulae? Certè anima materialis subiectum mutare non potest. Resultaret igitur totum novum animal adæquatè distinctum ab eo, quod primò fuit generatum. Hoc autem nec sibi ipsi persuasum habebit, qui illud dicere cupit. Tutiores nempe sunt partes illæ primigeniæ, quàm ut vi caloris nativi adèdè facillè resolvantur, & evaporent; tum quia fundantur in humido radicali, non tenui, & aqueo; sed oleoso, & calido, quod adèdè facillè expugnari non potest, ut sic diutius vitam protrahamus: tum quia agentia inimica ob præcedentem pugnam cum exterioribus membris plurimùm debilitantur, ut intima postea non tam citò superare valeant. Rectè igitur temperamentum constituitur partim in calido innato, partim in humido radicali, quod à primo ortu foetui inhæret. Hoc humidum radicale, & calidum innatum

tum, cum principalioribus corporis partibus inhæreat, non erit extra rhombum pauca, quæ ad rem nostram spectant ex ijs delibare, in quibus physiognomi inter se conveniunt. Dicunt igitur de medio animalis ventre, ad furentem audaciam, ad magnæ iræ præcipitantiæ nata esse corda frequenti calore, velocique respiratione dilatata: contra timidum animal, ubi pectus glabrum, parvum, angusta vasa, tarda respiratio, exiguusque pulsus. Imò his ipsis arbitris ex natura cordis (præsertim si hepar cum corde conspirat) totius corporis constitutio promanat, ita ut totum reliquum corpus humidum censendum sit, ubi humor cordis siccitati prævaluerit; siccum verò, ubi siccitas illius dominata fuerit. Neque malè hæc arguunt; corpus enim imitatur naturam humorum: isti calorem, & spiritus; calor autem, & spiritus cordis fabricam. Per infimum ventrem præcipuum viscus hepar, ubi nimio calore excedit, oleaginosos spiritus in nimia quantitate excitat, qui deinde sub acidi succi à liene venientis virtutem multum obtundunt; tumque hac ratione parvum fermentum procreant, nimia bilis tum atræ, tum flavæ copia progignitur, quæ ad Melancholicorum aut cholicorum actiones propendet. Quòd si aliquis hepar frigidum nactus fuerit, atque hinc minus aptum ad digerendum lienis succum; primò fermentatio plurimum detrimenti patietur; inde deficiet boni chyli concoctio; & denique sanguis crudus, serosus, ac in corde solummodo in aqueum vaporem extenuatus totum corpus merò replebit serò, ex quo frigidissimo, & humido frigore phlegmaticorum actiones promovebuntur. In supremo ventre præcipua portio frons, si quadrata, & præterea aliquantum in medio concava fuerit, magnanimitatem portendit; si verò rotunda omen proprium iracundiæ habebitur, eò quod in interioribus cerebri sinibus reverberati nimium spiritus, quàm plurimum inflammentur. Atque hæc tria membra principaliora habentur ad humores excoquendos, qui functionibus patheticis sunt subordinati.

§. III.

Consequuntur etiam ad operationem phantasia.

Tertio communissimè mater pessimorum filiorum, passionum scilicet, est vis imaginativa. Non ipsa bonitas, vel malitia objecti proutre ipsa datur in se, sed prout coloribus apparentibus depingitur appetitui, eandem varijs aculeis affliget. Advertit hoc Aristoteles, qui lib. 2.

Rhet. cap. 5. definivit *timorem esse ex imaginatione futuri mali corrumpentis, ac dolorem inferentis; perturbationem quandam, aut tristitiam*. Inhæsit hæc ipsa sententia Senecæ epistol. 13. *plura sunt, quæ nos terrent, quàm quæ premunt, & sapius opinione, quàm re laboramus*, miserum esse, qui se non beatissimum judicat, licet mundo imperet, apud Poëtam Comicum invenies:

Non est beatus, esse se qui non putat.

Quid enim refert, qualis status tuus sit, si tibi videatur malus? & ne sacram auctoritatem negligamus, hoc ipsum verbis non ambiguis ostendit Regius Propheta psal. 13. *Illis trepidaverunt timore, ubi non erat timor*. Nempè callidissimè sese imaginatio insinuat apud Principem facultatum appetitum nimirum; repræsentat illi sensuum oblectationes; intercedit apud ipsum tanquam advocatus apud judicem & suavissimè ostendendo varias necessitates, victoriam extorqueri. Nititur, auscultat anima benevolis auribus oblatas preces, non examinat pondera rationum, & ne tristem discedere patiatur, in illius favorem pronuntiat sententiam. Ita est, nimis citò accedimus argumentis apparentibus, non refutamus illa, nec excutimus; sed trepidamus, & sic vertimus terga quemadmodum illi quos pulvis pecorum fugâ excitatus castris exiit.

Certè quando contemplor animam corpore tanquam carcere conclusam intimis visceribus commoveor ad compatiendum illius statui, in quo non veritati, sed mendaciis à fallacibus sensuum nuntiis assentitur. Divinus iste spiritus undequaque materia tanquam muro circumvallatus plerumque non gaudet alia cognitione, quam quæ per viam aurium, & oculorum derivatur; isti enim videntur potissimum ministri esse destinati ad eruendam scientiam. Sed quæ utilitas ex ipsis? illudunt nobis dolosis narrationibus: non considerant aliud nisi rerum apparentiam: hærent in superficie accidentium, nec ad interiorem substantiam penetrant: ita ut magis conducere esse cœcum, quàm perfrui visione tam fallaci & obscura; ut melius esset, in ignorantia tenebris delitescere, quàm accumulare tot ac tam perniciosos judiciorum errores. Analogiam hujus rei non ineptam nobis exhibent Platonicæ. Tenet populus solem nobis maximas afferre utilitates, quando ascensu suo supra Horizontem conciliat iterum universis pulchritudinem, & splendorem, quos tenebræ malignè subduxerunt. Philosophis verò istis auctoribus orbi nostro plus detrimenti, quàm lucri ab illius præsentia obvenit, propterea, quòd detegendo terram recondat cœlos, & quando oculis indulget aspectum pratorum liliis, rosisque vernantium, retrahat ordinatissimos stellarum choros

choros & pulcherrimam mundi partem abscondat. Ita sensus sublimium rerum contemplationem impediunt, econtra vilium objectorum cognitionem ita concedunt, ut tamen veritatem nunquam integrè manifestent. Quid igitur mirum, si in schola tam cæcorum magistrorum non nisi stultas hauriat apprehensiones? si ex tenebris non nisi umbras? quid mirum, si ex falsis opinionibus inde nascantur appetitus tam inordinati?

Circa hanc tamen passionum causam duo animadvertenda. Primum est, mendaces imaginationis suspiciones non tam constanter durare, quàm latè sese extendunt; alias nimium infelices nasceremur. Immutantur igitur apprehensiones vix non singulis momentis, nascuntur, & pereunt vix non eodem tempore, & quod phantasia nunc ambobus brachijs amplectitur, illud pari iterum facilitate rejicit. Unde autem oritur, quòd apprehensio rei vivacissima, & altissimis radicibus inhærens in momento dispareat? accipe. Sensibus tanquam fulcro innitebatur, qui cùm, sicut sagarum specula, res exhibeant, quæ ipsis placent; ideo tam subitanea subsequitur priorum irritationum ruina, & interitus. Alterum quòd observo, est, ipsam opinionem non pollere virtute moveadi propriè tali ad tempestatem pathematum; hoc enim solis rebus terminantibus apprehensionem competit; neque phantasma est, de quo lætatur, aut contristatur, ad eum modum, quo corpus calefit aut rigescit vi calidi, aut frigidi sibi applicati, & non etiam vi ipsius applicationis. Solum igitur imaginationis actus verus, vel falsus excitare potest lætitiā, vel tristitiā, tanquam vera causa quatenus per cognitionem reflexam inspicitur, atque ita transit in rationem objecti præsentis aut boni, aut mali.

§. IV.

Accenduntur etiam à voluntate.

Quartò passionum seditionem non antecedit sola imaginatio, sed eadem quandoque præeunte intellectu, imò ipso voluntatis arbitrio accenditur, & hæc duo quidem ad ordinem rectum hominis conservandum semper antevertere debuissent, ut semper prævissent, passionem saltem vehementiorem, si homo integritatem, & innocentiam originariam custodivisset. Cæterum voluntas ipsa arbitrio suo non immediate & proximè in ullo naturæ statu passionum fluctus extollere potest.

Quis

Quis enim ex mero libitu imperare sibi cum effectu potest, ut amet, ut tristetur, quemadmodum potest movere corporis artus? petitur igitur necessariò cognitio congruens, ad quam proximè voluntas determinet, ut exinde appetitionis motus succedat. Hanc cognitionem prælucentem duplici via voluntas obtinebit. Et primò quidem imperando ipsi intellectui, ut paulisper à spiritualium contemplatione curam avertat, séque ad sensibilia bona non tantum in communi, sed etiam in particulari perpendenda applicet. Hoc autem si fiat, potentia intellectiva non solum amorem, odium, tristitiam, aliosque affectus spirituales in voluntatem inducet; sed amorem, odium, tristitiam aliàque pathemata in ipsam facultatem appetitivam invehet. Reclamant contra hanc symptomata excitandi methodum Cartesiani strepitu ingenti, eamque mirà explodunt acrimonia: sed cum ipse appetitus sensitivus in eadem animæ rationalis substantia radiceatur, quid deest, quo minùs intellectus appetitui lucem ad suas operationes præferre possit? Fateor tamen alteram, quam ipsi agnoscunt, rationem inducendi passiones per voluntatem: naturæ agendi modò magis conformem, magisque ordinariam esse; & idè hanc paucis declaro. Ubi intellectus à voluntate, dominante sua regina, imperium recepit, ad sensibilem considerationem incumbendi, ipsique tanquam subditus morem gessit; de lege ordinaria traducetur etiam in ipsam phantasiam cognitio aliqua, quæ quidem sua perfectione non adæquabit splendorem cognitionis spiritualis, sufficiens tamen lumen præbebit animali facultati. Inde sequetur distinctus motus in fibris plexûs retiformis, qui in musculos potentiæ motrici famulantes deducetur, reliquasque partes simili affectione sollicitabit.

§. V.

Procreantur quintò ab assuetudine.

Quintò denique ad prognerandas has animæ ægritudines plurimùm efficacix affert assuetudo, quæ habitum inurit facilitantem ex parte appetitûs ad actus similes depromendos. Annumeranda est hæc causis intrinsecis, eò quòd inolitam habituum proclivitatem difficillimum, si non prorsus impossibile, sit deponere, illàque inseparabiliter inexistat, quasi altera natura. Non pudet me hanc veritatem ex Aristotele describere, apud quem lib. I. Rhet. cap. II. ita lego: *quod usitatum est quasi jam innatum esset, gignitur. Nam cum sæpè ipsum ipsi semper pro-*

propinquum sit, & ipsius quidem semper natura sit, ipsius verò sapè consuetudo, natura consuetudo similis est. Ut more meo rem similitudine explanem, non omnino ineptam plantarum genesis subministrat. Quemadmodum enim ad vegetabilium productionem quatuor concurrunt, ipsum solum, semen, planta, & fructus: ita ex totidem principiis affectuum leges succrescere solet, temperamentum, & indoles à natura insita non malè solum nuncupabitur; primi actus, qui ex eo resultant, semen includunt; habitus ex frequentioribus actibus suborti semina quasi in plantam extendunt, ex quibus consequentes operationes velut fructus dependent. Sicut seminis granum, licèt valdè exiguum, si fertili inferatur agro, procreabit plantam suæ naturæ conformem: sic actus animæ, quamvis fugax, & tenuis, sui vestigium permanens relinquet, erit surculus imperfectior, non autem habitus vocabulum explebit; fragilis, instar virgulæ, facile aut exsiccabitur, aut evelletur, & operationes, quas efficiet, adhuc aliquam difficultatis acerbitem sapient, ut fructus nondum maturi. Quod si cum tempore altior excreverit, si actibus frequentioribus magis fuerit consolidatus, & usu firmatus, ita robustè resistet, ut eum nec facile vis externè illata, nec tempus longissimum sua falce radicibus exscindere possit. Unde monet Horatius lib. 1. satyr. 3.

Te ipsum

*Concute, num qua tibi vitiorum in se verit olim
Natura, aut etiam consuetudo mala. Namque
Neglectis urenda filix innascitur agris.*

Sed quid opus metaphoris ad deterrimam vim consuetudinis comprobendam, ubi longè graviora demonstrant potentiam illius ad effrenes, & indociles passionum furias producendas, sufficiat dicere, inveteratam consuetudinem ipsum temperamentum adeò pervertere, ut subinde vix amplius prima lineamenta appareant. Sic domesticus Licurgi canis venationibus continuis exercitus, & canis venaticus lautioribus epulis affuetus, cum ambo in forum ad copiosam multitudinem producerentur, venaticus ad expositas accurrit escas, dum domesticus leporem est persecutus. Sufficiat tam ardui operis rem esse imbutum sinistro habitu animum eradicare, ut si non omnem sudorem sterilem reddat, saltem duplicatum laborem requirat. Sic Timothæus insignis cytharæ pulsanda Magister duplicatum exposcebat stipendium ab illis discipulis, qui à rudiori professore initia hujus artis didicissent. Denique consuetudo tam tyrannicum exercet imperium, ut vix ipsi voluntati, reliquarum licèt potentiarum imperatrici regnandi habenas concedat.

F

Sed

Sed inquires, nihil tritum magis apud scholasticos, quàm habitum acquiri, intendi, ac per repetitos actus radicari: te lucem uberiorem exposcere, unde ex habitu tanta proclivitas ad varios affectus? quomodo eadem potentia motrix necessaria eodem prorsus organo instructa, nunc summa cum difficultate, nunc iterum cum maxima facilitate in actum erumpere potest? an fortè concurret ad talem motum peregrina quædam qualitas? respondeo, hæc tam aspera non esse, ut lævigari non possint. Nempè fibræ corporis animalis repetitis motibus facile assuescunt; quod clarè perspicies ad quascunque corporis partes, oculos convertes. An non crebra saltatio pernicitatem conciliat pedibus? an non frequens fidium pulsatio agilitatem digitis manuum? an non guttur ad canendum, lingua ad loquendum, studiò, usu, artèque facilitatem aquirunt? nimirum ubi eadem determinatio sæpiùs accedit, jus quoddam, ut sic loquar, in organum sibi arrogat; id est, certis vestigiis illud affectum relinquit. Sic virga in eodem situ diu retenta, vix ab eodem deinde amoveri poterit: sic brachium in tali, vel tali situ per vim adactum, in alium sine sensu doloris nequit adduci: sic oculus, qui viridem duntaxat colorem diù videret, eò quasi colore imbueretur. Ita etiam non in lubrico fabricam exstruit, qui docet, fibras, quæ passionum motibus inserviunt, ubi ad talem, vel talem motum v. g. iræ, frequenti affectione ab objectis traducta determinantur, eandem determinationem sibi familiarem facere; ea quasi imbui; ad eam se se componere, ubi deinde vel modicus affrictus ab extrinseco accedet, quis ambiget, eas ad motum v. g. iræ statim determinari. cum eam affectionem jam quasi induerint? non video planè, quid contra hanc explicationem insolubile pugnet.

Exposita sic natura consuetudinis, jam tecum ipso ratiocinare, quantum vim inesse oporteat vegeto habitui semel assumpto. Videbis luculenter affectus oppositos esse maximè arduos, eosque non nisi per vim extorqueri posse: contra verò actus, qui ex indito sequuntur usu, adeò facile profluere, ut quasi minimè cogitantibus excidant. Saxum cogita, vel quodlibet corpus grave in plano declivi positum: vix minimo digito attractum deorsum præceps agitur; tanti etiam est animum passionibus assuescere; minima nempè affectio ab extrinseco proveniens sufficiet ad fibras organi determinandas, & illicò potentia in actum prorumpet. Ante hanc radicem jam nobiscum nascitur fomes, sive putridus fons animi fluctuum; dum crescimus, inimicus iste nostris viribus suas adauget; nec debilitatur, nisi ubi decrepita senectute incurvamur; non extinguitur, nisi postquam nos ad mortem deduxit, & nobiscum occumbit,

cumbit, cum hoste hoc primis annis gerere oporteret bellum, quamvis non nisi serò finiendum; oportet etiam cum damno nostrarum virium illius arma infringere. Quantæ igitur stultitiæ reus fiet, qui adversario suo auxiliares copias submittet? quinutritis habitibus inimicorum numerum augere non negligit? consulat Augustinum in psal. 57. ubi hoc ipsum deplorat: *Cum concupiscentia natus es, ut eam vincas, noli tibi hostes addere; vince, cum quo natus es. Ad stadium vita huius cum illo venisti; congregare cum illo, qui tecum processit.*

DISSERTATIO V.

De causis extrinsecis passionum.

§. I.

Constitutio parentum.

CAusæ extrinsecæ, juxta præsens institutum illæ dicuntur, quæ extra animal constitutæ, movent, alicuiunt, exhibentque fomenta, concipiendis affectibus opportuna, quæque plerumque ipsum temperamentum accendunt. Ex pluribus contenti erimus aliquibus, inter quas primum locum merentur parentes. Cohæret hoc apprimè sacris codicibus, ubi Esdræ cap. 9. lib. 4. legimus: *Qualis ager, talia & semina, & quales flores, tales & textura.* Calculum suum addit Philosophus, dum lib. 3. Polit. cap. 8. definit: *Consentaneum est ex melioribus ortas esse meliores.* Notat etiam lib. 1. cap. 4. quod sicut ex hominibus homo, & ex bestiis bestia generatur, ita ex bonis parentibus, ut plurimum bona editur proles: ut è converso ex malè moratis genitoribus pessimi oriuntur filij. Et ne Poëtarum effata nobis minùs faverent, sic ludit Horat. lib. 4. Od. 4.

Fortes creantur fortibus, & bonis,

Est in juvenis, est in equis patrum,

Virtus, nec imbellem feroces

Progenerant aquila columbam.

Insedit hæc opinio adeò populis, ut communiter dicatur: *sapè soler similis filius esse patri.* Limitatur tamen adagium; quia non nunquam contrarium evenit, præsertim in Principibus, qui raro ijs delectantur, quibus eorum parentes fuerunt occupati. Quid autem dicemus homi-

nes ad ita sentiendum permovisse, non aliud, quàm quòd filii una cum sanguine, ut plurimum velut hæreditario jure recipiant etiam parentum temperamentum, quòd ad hunc vel illum affectum magis inclinât, ideò sapientissimè Plutarchus progenitores monitos voluit, ut magna cura & circumspèctione utantur conjugali licentia, ne intemperantem lasciviam postea luere impudentes cogantur proles. Achilles inter molli- ties filiarum Lycomedis, regis insulæ Scyri educatus, adeòque delitiis quasi effœminatus, nihil de belli certaminibus cognovit: at Ulysse ipsi monilia, & ostrum repræsentante, insita à parente indole prælegit arma, & scutum, opportuna ad mollienda fortium virorum facta, quæ tamen nunquam viderat. Quòd si quis, his non obstantibus, negare præsumeret, habitudinem nostri corporis nos majoribus nostris debere; digito tantùm ipsi demonstrandæ essent maculæ, & characteres, quos sola vehementior matris imaginatio fœtui imprimit; & quæ se talis expediret, planè nescio.

Plurimum etiam censetur momenti habere lac, quo parvuli aluntur, non tantùm, ut ex alimento infantes variam contrahant, ad multas passiones propensionem, sed ad ipsam etiam brutorum naturam castigandam. Quis enim nescit, selem, à cane lactatam, & propterea minus aggressam, ac infidam evasisse, quòd à se visum Cardanus refert? plusquam notus est puer, qui diù lacte suili nutritus, jam grandior natu factus, gaudebat in cœno volutare, morèque porcorum vorare. Audivimus non semel alium, quem capra diù lactavit, jam adultum virgulta avidè corrodere, & caprarum more saltitare consuevisse. Reprehendendum igitur illud, ut ita dicam, dimidiatum matrum genus, quæ cùm per novem menses proprium aluerint fœtum; cùm primùm postea eundem in lucem ediderint, eundem neglectum aliis mulierculis, non rarò valdè sagacibus nutriendum tradunt, quamvis diu, noctùque matris officium implorantem audiant. Redarguendæ sunt, quæ propriæ pulchritudinis venustatem novercali ritu sobolis utilitati præferunt, ipsique vitalem fontem exsiccant. Celebratur ab Apostolo vidua, eò inter Christianos nomine digna: si ipsa filios enutriet; non sufficit peperisse, sed si *nutrivit*. Magnus enim honor matrum lactare, & fovere, quam ediderint prolem, non autem editam ad extraneas abijcere. Ipsa naturæ solertia eas admonet, ne corpus ingentis primordiis benè inchoatum degeneri alimento alieni lactis corrumpere permittant. Postquam enim, sanguine oppitulante, in penetralibus suis corpus fabricatum est, adventante jam partûs tempore, in supernas se se partes profert, ut præstò sit ad fovenda rudimenta, & recens nato victum no-
tum

tum & familiarem offerendum. Non igitur frustra creditum est, quod sicut valet ad fingendas corporis, & animi similitudines naturæ seminis; ita non secus ad eandem rem lactis ingenium & proprietates valere.

§. II.

Promoveant passiones esculenta.

Proximam sedem occupant esculenta & poculenta, quorum vis non modica ostenditur ad varios ciendos affectus. Si enim diversa plantarum genera ex diversitate tum terræ, tum aquæ progigni cernimus; si videmus quotidie animalia, ut aves, pisces, & quadrupedia multum diversam pro alimentorum diversitate naturam consequi; quis inficiabitur, ex eibo, & potu, in propriam viventis substantiam transeunte, varia consurgere temperamenta apta ad pariendas varias pathematum cohortes? non, non, sunt mera ludibria præstantissimorum virorum effata, quando testimoniis suis palam faciunt, sanguini augendo aptissimum alimentum futurum panem recentem, eumque albissimum, probeque coctum: ova tremula, carnes juniorum animalium &c., aquam puriorem fontanam, vinum generosum salubriter dilutum. Non præcise ad auctoritatem suam tuendam, ut sæpè in aliis assolent, medici vetant alimenta crassa, duriora, & terrenam substantiam olentia, ad quæ spectant panis ater, & surfaceus, vinum nigrum, & crassum, aquæ turbidæ, & limosæ, legumina, caseus antiquus, carnes bubulæ, leporinæ, suilis, præcipuè fumò induratæ, pisces acetosi, salsi &c. His enim melancholicum humorem augeri fixum habent. Credendum ipsis est, ut alteri cuilibet in sua arte, quando docent, frigida & humida, qualia sunt fructus, olera, lacticinia, aquæ haustus &c. facili labore in pituitam mutari: quando tuentur, nimia ciborum copiâ calorem nativum obrui, cruditates gigni; quod etiam accidere volunt, si cibus statim à somno, vel immediate ante somnum, aut ante priorem cibum excoctum sumatur. Denique si ex ipsis intellexeris, calidos & siccos cibos, vina generosa, alimentorum defectum, bellaria in fine mensæ assumpta, & similia in biliosum sanguinem amarescere, ipsis ut fidem adhibeas, suadeo; aliàs facile ipsis erit, iram in te potione medica evomere. Jure igitur Plato lib. secundo de legibus interdixit pueris vini potum usque ad annum duodecimum, eundemque tantum permisit senibus ad discutiendam temperamenti frigiditatem temporis lapsu contractam. Non

immeritò hunc ipsum tanquam venereo igne plenum prohibuit juvenibus, ac iisdem toties parsimoniam in victu, & potu, tanquam rem mitigandis affectibus maximoperè aptam, commendavit. Sufficit nempe corpori malitia sua à natura contracta; quid flammæ ampliore materia opus est, aut belluæ copiosiore alimento, ut effrænator reddatur? neque verò alimenta duntaxat, cùm in substantiam viventis transeunt, per nutritionem pronitatem ingenerant ad certos affectus qualitatibus ipsorum ciborum consentaneos; sed etiam priusquam convertantur in substantiam aliti, idem plerumque præstant, immutato per virtutes suas viventis temperamento, unde illa ad passiones inclinatio derivatur. Ita perspicuè Philosophus sec. 30. probl. verbis istis: *Vinum enim immodicum tales maximè homines reddere videtur, quales melancholicos esse affirmamus, morèsque varios id condit, cùm bibitur, ut iracundos, humanos, misericordes, audaces: quorum nihil mel aut aqua, aut lac efficere potest.* Hæc fusiùs prosequitur, & inter alia illum Homeri vericulum recitat:

Me victum Baccho lachrimas effundere dicunt.

Exscripsi hæc verbatim; quod quia feci non illaudato Principe Philosophiæ, vitio mihi non ferendum timeo.

Ad alimentà proximè accedunt pharmaca, quæ extrinsecus ingeruntur, quæque non modicam vim habent ad passionum agmen advehendum. Convantum enim est in templis medicorum, magnum esse usum alexipharmacorum ad frænandos passionum morbos ex humorum intemperie concitados. Receptum est à communi omnium pocula medica plurimum conferre, ad functiones cognoscitivas expeditè & salubriter exercendas, cùm phantasiæ organum impuritate humorum illud gravantium liberetur. Hoc certè infedit animo Carneadi, qui disputaturus priùs caput Helleboro purgavit, ne quid ex corruptis in stomacho humoribus ad domicilium animæ redundaret, vigoremque, mentis labefactaret. Hoc etiam sentiunt Professores Theologiæ de moribus dictæ, qui suadent scrupulo infanientibus, ut atram bilem adhibitis evacuent remedijs. Cur ergo medicamenta hac virtute careant ad passionum ardores suscitandos? planè eadem arte medica humor ex variis corporis partibus poterit prolici, & medicamentorum varii haustus cum illo permisceri, ac ita diversimodè efficere, ut opportunus evadat, ad hanc vel illam symptomatum ægrotationem protrahendam.

Ad hoc genus causarum pertinent amatoria pocula, quæ philtro vocantur, quæque eò sunt nocentiora, quò magis corpori applicatà. Sic primò minus virium obtinebunt mixturæ ex variis radicibus, metallis, mem-

membrisque animalium compositæ, certisque ligaturis involutæ, ubi hæ tantùm sub chlamyde, vel inter lectuli plumas vel sub ostii liminæ fuerint abscondita, de quibus Propertius lib. 3.

Improba non vicit me moribus illa, sed herbis:

Staminea rhombis ducitur ille rota.

Illum turgentis ranæ portenta rubeta,

Et lecta exsectis anguibus ossa trahunt.

Si medicatis frugibus bellaria, è Dæmonum conviviiis relicta, cibo potuque misceantur, & ad interiorum viscerum contactum penetrent, non solum in Veneris furias pellicient, sed etiam valetudinem, & mentem à statu suo deiciant. Advertit hoc propter suam obscœnitatem in exilium relegatum Poëtam:

Nec data profuerint pallentiaphiltra puellis,

Philtra nocent animis, vimque furoris habent.

Scio hujusmodi lethæos succos, vel vestibus affrictos, vel corpori infusos, vim suam potissimum haurire ex pacto cum Dæmone inito, & plurima tantum deservire declarandæ fidei conventorum, ac ne malefici decipiantur, præbendo, (ut dici solet) quid pro quo: nihilominus quia, si non misceantur omnino toxica, certè absurdissima quæque adhibentur, quæ sine aurius offensione dici non possunt, & quorum solus odor equas in furorem adigit, ideo ipsa philtra secundum se quæque virtute pollent ad imaginationem perturbandam, humores concitandos, totumque corpus astrò quodam accendendi. Expertus hoc Caligula Imperator, & Neronis avunculus, quem à Cefonia simili potu interfectum scribunt Josephus, Suetonius, & Juyenalis. Expertus hoc Lucretius (Poëtane, an Philosophus magis ?) quem primò dementatum, deinde furoris impatientiæ se ipsum interemisse testatur Eusebius. Et ut sexcenta omittam, damnò suò hoc didicit Lucullus, quem primò actum in furorem amatorio toxico, mox etiam interemptum Plutarchus prodidit. Ex quibus sufficientissimè liquet, tametsi atrocissima hæc scelera nec Omnipotentis offensam, nec juris Pontificii, aut Cæsarei pœnas secum traherent gravissimas; attamen ingenuum animum, vel umbram illorum debere perhorrescere. Sit enim, quod effectus obtentus per illa non careat omni jucunditatis & gaudii gradu; erit tamen amor veneficiò nefando extortus amarissimus, turbidissimus, & non secus quam pisces medicamento capti, insipidus evadet. Tandem non minus oblectamenta hæc magica effectum suum obtinent in odij colubris procreandis, quàm in amoris sædi inflammandis tœdis. Superi boni! sæpius nimium contingit, ut personæ conjunctissimæ nulla præeunte injuria, odiis inter sese

flagrent acerbissimis. Obruit frequens hæc infelicitas præsertim conjuges recens sociatos, quando conjugii potentes patiuntur emulos; adeò ut in uno, & altero loco vix audeat quisquam clara luce matrimonii celebrare solennia, ne quis pessimus conjugatorum votis iludat. Ac ne naturalis aliqua offensionis & discordiæ causa occurrere fingatur; plerumque evenit, ut cum longè absunt, se invicem diligant, & conjunctione frui exoptent ardentissimè: cum autem ejus facultas per præsentiam suppetit, eam quàm impensissimè exhorrent.

§. III.

Promoveant easdem etiam dæmonis.

Affinitatem cum prolibus suis, scilicet Philtris, proximam habent dæmones, qui corporis humoribus implexi plures in humanis membris excitant fluctus, plerumque decumanis sæviores. Non est ipsis necesse aliunde fucata emendicare subsidia ad hominem pervertendum; sufficit, Euros, notòsque passionum immittere, ut triste sequatur naufragium. Hoc autem ipsis perfacile accidit ex duplici capite, tum exteriores sensus, præcipue visum, qui rex sensuum appellatur à Philone, circumveniendi; tum interiorem aciem imaginationis excæcando. Et primò quidem de externis sensibus, quibus utuntur, tanquam emissariis, qui in veterum monumentis legerit, dæmonem sub formaleonis apparuisse Sanctis Anachoretis, & erectis pedibus prioribus ungues utrinque illorum malis infixisse, ut sic à longiori orationis prerogatione deterretet; qui audierit eundem sub specie draconis circumfusum, torrentes flammaram integros evomuisse, ut sic contemplationis dulcedinem exsiccaret; qui hæc, inquam, & similia audièrit, non dubitabit, mediantibus sensibus atras passionum nubes conglomerari posse. At quomodo hoc obtinebunt? aio, vel permutatione in ipso objecto facta, adhibita celerrima ejus agitatione; vel occultatione, prout contigit Iphigeniæ dæmonum interventu subtrahæ, & cervà in ejus locum reposita; aut mutatione facta ex parte medii, quæ secluso quovis alio intelligentiæ artificio nobis plerumque est causa hallucinationis, ut fit, quando subito convivæ trunci, aut asininis apparent auribus; vel denique per variationem aliquam potentiæ, sive illa contingat per localem partium mutationem, ita ut organum compingatur, sive alicujus humoris, sive obstructis spirituum animalium meatibus. Humor enim sangu-

sanguineus, vel luteus oculis affusus eò modò causà est, ut omnia similiter colorata videantur, sicut per vitra rubra omnia purpurea, & ictericis omnia flava apparent. Et hæc quidem de oculo, verò corporis nostri sole.

In auditu non excedit facultatem malæ intelligentiæ, vel suavi vocæ blandiri, vel horrifonâ deterrere; quia varietas, quæ inter has voces cernitur, non nisi ex certa aëris fractione proficiscitur. Quæ aëris dissectio non est illorum potentiæ deneganda: poterunt igitur mugire ut boves, balare ut oves, pippire ut gallinæ, barrire ut elephantes, gingire ut anseres, ac demum loqui ut homines. Et hæc quidem non solum poterunt efficere huiusmodi animalium passivè tantum se habentium organa movendo, & ad effingendam vocem eis connaturalem adigendo, sed valebunt etiam vocem unius efformare per organa alterius. Dubitare de hoc nos non sinit serpens, qui cum Eva in paradiso adeò infelicia miscuit colloquia; non sinit asina Baalam; quæ propter diffluentem, in tanta rictus latepatientia, aërem, emissum priusquam aptè refringatur, inepta valde est ad voces humanas ritè effingendas. Addi possunt alia, utpote, quod per idolorum imagines, statuas, arbores, & aquas, sæpenumerò dæmones locutos fuisse sciamus, nisi circa odoratum pauca quædam occurrerent.

De hoc constat ex nostro Philosopho lib. de sensu, & sensibili cap. 5. odores propter inditam à calore levitatem ad altiora cerebri penetralia ascendere, ut illud salubrius habeat. Cum igitur aliunde sciamus, solum hominem inter reliqua animalia ob cerebrum proportionaliter amplissimum & humidissimum siccioribus odoribus affici; quis prohibebit dæmonibus, quin talibus allatis ingentem delectationis sensum in homine commoveant? sic contingere res poterit sægis, quando in fætidissimo loco, tanquam in fragrantissimo horto per integram noctem versari videntur. Quamquam sæpissimè per vehementem in interno sensu odoris perceptionem iis imponatur, qui se illius suavitate perfrui arbitrantur. Neque crediderim odores illos recens productos applicatione novi alicujus activi ad passivum, quam una cum reali substantia, in qua præexistiterunt, aliunde apportata transfusos fuisse. Simili prorsus imposturâ deludi posse gustum, probant convivia, quæ Numma ementiebatur. Hæc ciborum genera, sive solida fuerint substantiæ, sive inanitate plena; certò salivam, & cum hac corporis attemperationem animare poterunt ad partum variorum affectuum.

Venio nunc ad ea, quæ maligni isti Spiritus in sedem internam animi possunt. Et posse sanè non pauca interveni commotionis, &

spirituum, plusquam dolendum est. Hinc enim illud effatum Caldaicum, quod proditur expensu Zoroastri emanasse: *Tuum vas fera terrestres habitabunt* &c. quod sacri interpretes explicant de dæmone, varios in corpore humano motus ciente. Vas volunt esse compositam naturæ humanæ constitutionem; feras terrestres malignos spiritus in orbe circumvagantes: adeo ut cor nostrum malis scatens affectibus, quasi inhabitetur ab hisce bestiis commoventibus sanguinem, calorem, ac spiritus. Cor humanum à dæmone sic percitum elegantissimè depingitur ab Isaia cap. 13. qui non aliud adumbravit, quam pectus humanum variorum affectuum feris dilaceratum, ubi præfagit: *Requiescent ibi bestia, & replebuntur domus eorum draconibus: & habitabunt ibi struthiones, & pilosi saltabunt ibi, & respondebunt ibi ulula in adibus eis & sirenes in delubris voluptatis.* ubi per pilosos septuaginta interpretum versio aliud non intelligit, quam dæmones audaciâ suâ quasi hirsutos. Et verò si non transcendit efficacitatem dæmonum, ventorum vim imprimere, aut cohibere; tempestatum, & maris inundationem immittere, vel firmare, quod eorum operâ Empedoclem fecisse, constat ex propriis versibus:

*Indefessorum ventorum flamina tolles,
Qui spirando hominum perdetes arva fatigent.*

& rursus,

*Cùmque voles eadem tu rursus flamina pones.
Induces media de tempestate serenum.
Induces media pluvias estate salubres &c.*

Si item faciliè nobis persuadetur, posse ab intelligentiis malis induci sanitatem, aut morbum, ita ut tempore somni in quorundam hominum membris se se insinuent, ibique gloriam suam fabricentur; in publico verò omnium conspectu ab ægris avolent, & morbum ipsorum dolè productum obliterantes, homines iterum pristinae restituunt valetudini: si, inquam, hæc de tempestatibus inductis, de morbis etiam pestiferis excitatis, nobis faciliè persuadentur; non est ambigendum, eosdem non minorem phrenesin in sensibus internis accersere posse.

Modus autem, quo hoc obtineant, à Gabriel, in 2. D. Q. 2. art. 3. descriptus, nescio, an ritè rem exponat. Existimat ille species interni sensus ab intelligentiis istis transponi, ac moveri, quod non potest convenienter dici. Vel enim hæc phantasmata insident ipsi cerebro? at cùm hoc vivat, & cum partibus fixis, & stabilibus continuetur, non poterit, vivo animali, subire eam transpositionem. Vel species

cies aliquæ sensus interni inhærent spirituum humoribus? at, ut hoc negetur, me movet primò, quòd spiritus isti per transpirationem continuam intra breve spatium avolent; species verò multis annis persistent fixæ. Item hæc transpiratione admixta videtur impossibile explicatu: cur dæmon non posset spiritus phantasmate factos ex uno capite in aliud transportare; atque adeò obtinere, ut cæcus à nativitate, verè, & legitimè sibi imaginaretur colores, surdus sonos, & sic de aliis, quæ meritò à S. Thoma Quæst. 16. de malo art. 11. ad 9. refelluntur. Malim ego dicere: res, ad quas dæmonum industriâ cogitandas mens instigatur, prius fuisse sensu perceptas, ut patere videtur ex eo, quòd nunquam adducant cæcos à nativitate, ut sibi colorum varietatem imaginentur, neque surdos, ut sonos percipiant; sed quæcunque exhibere procurant, fuerunt antè percepta, & eorum species in phantasiæ cellulis asservantur. Cum autem hæc humorum nimio plerumque affluxu sopiantur, aliterve impediuntur, facile erit malignis spiritibus, vel abstersione humoris, vel alterius corporei impedimenti ab actione, aut certè novi humoris ad hoc, velut illud cogitandum opportunioris affusione species quasi à somno excitare. Hoc autem ut obtineatur, non opus est, machinas, nescio quas confingere. Sola potentia locomotiva dæmonum sufficiet ad humores variè permiscendos, vel ad cessandum ab ea agitatione. Ubi verò phantasia semel faciem appetitui sensitivo prætulerit, hic statim tanquam potentia necessaria totas ei manus dabit, & in amplam voraginem putridarum nequitiarum pertrahetur.

§. IV.

Procedunt etiam ex aëris qualitate.

SEquitur qualitas aënis, quam quis assidue haurit; inde enim certam proclivitatem ad pathemata oriri, immutatò per aërem corpus subeuntem, aut corpori appositum, temperamentò, adeò commune est Auctoribus, ut ingens nominum syllabus totam impleret paginam. Approbat hoc meus Antesignanus, Aristoteles. 7. Polit. cap. item 7. & sect. 17. problem. tradit hoc latissimè Hippocrates lib. de aëre, locis, & aquis. Vidit hoc Rex Cyrus, qui volentibus Persis aërem persicum ob regionis incommoda commutare amœniore, negavit transmigrationis facultatem, dicens, & plantarum, & hominum mores, pro regionum varietate effici varios. Dividamus, si placet totum terraqueum globum in sua cli-

mata, & zonas; & primò quidem septentrionales, atque australes, seu populos duobus polis viciniore exploremus. Approbabitur statim. Senecæ effatum lib. 2. de ira cap. 16. in frigora, Septendrionemque vergentibus immanis ingenia sunt, & ut ait Poëta, suoque simillima collo. Assentimur versibus Lucani, lib. 8.

Omnis in arctois populus quicunque pruinis

Nascitur, indomitus bellis, & mortis amator.

Zonæ torridæ subjectos, seu proximiores æquatori, si lustrabimus, deprehendemus, regiones has procreare homines moribus temperatioribus, crudeles nihilominus, timidos, & astutos, ut iterum ex Lucano loco cit. audio:

Quidquid ad Eos tractus, mundique teporem

Labitur, emollit gentes clementia cæli.

At unde timoris effectus in Meridionalibus, & audaciæ augmentum Borealibus, & Australibus? ex hoc capite. Timor oritur ex frigiditatis complexione, ideòque cum timore percellimur, frigus sentimus; audacia verò ex calore provenit; unde qui suis viribus magnâ audaciâ confidunt, calorem experiuntur. Cùm autem naturæ providentia dederit corporibus naturalem complexionem locis contrariam ita, ut, qui incolunt loca frigida, abundant temperamento calido ad resistendum frigori, & ij, qui habitant in calidis gaudeant complexione frigida, ne calore interno ab externo æstu aucto animal succumbat; ideò captu difficile non erit, cur uni ad timoris, alii ad audaciæ passiones sint proniores. Si hoc non arridet dicere poteris, diminutionem caloris in hominibus minùs disitis à linea æquinoctiali oriri ex nimia ejusdem evaporatione per poros ab intensioribus solis radiis apertos: econtra majorem illius copiam faciliùs contineri ab intensiore frigore poros septendrionalium constipante, & ignes innatos ad centrum propellente. Si ulterius in eodem clymate reflectamus iter ad regiones maritimas experiemur illas, quantumvis aliàs calidas, viciniâ pelagi moderata temperie clementiores evadere ob continuum ventorum motum. Ubi deinde ad montosas plagas nos contulerimus, ut plurimùm obviabunt nobis incolæ, uti masculo robore, & torosis lacertis præditi, ita audaciâ magis insignes. Nanciscuntur nempe sicciorum, & validiorem indolem, vel quia illos aër, à vaporibus ex uligine corporum progenitis purgator, continuo afflat; vel quia vehementiores flatus montosis incolis valde familiares plurimùm conducunt ad ferociore animi impetus, ut montium asperitatem hominum ingenium referat. Singulorum locorum constitutiones non vacat expendere, quamvis non deessent multa ad differendum de eorum inæqualitate; sed res est invidiæ nimis exposita,

§. V.

Advocantur passionες per syderum influxus.

Inferioris cœli virtutibus adjungendi sunt syderum, & cœlorum influxus, quibus aliquid esse juris ad has proclivitates inducendas aliqui tam clarum volunt, quàm manifestum est, solem, & hoc absente, reliquum astrorum chorum lucere. Nec sphaeræ cœlestes tantummodo eum in finem circumvolvuntur, suasque periodos absolvunt, ut stellas velut nobilissimas gemmas annulis infixas diversis ostendant regionibus, suisque aspectu homines, ore erecto cœlum spectare jussos, in adorationem sui conditoris trahant. Notum est illud Philosophi asserentis, hominem, & solem generare hominem. Notum est principes nostrorum corporum partes alias aliter affici pro diversa cœli constitutione. Adverte vel superficiali cura, & deprehendens certissimè, nos modò languere, modò rectius, commodiusque habere; lætatur modò, paulò post in tristitiam labimur. Non hîc propugno causam sectæ astrologicæ, quæ de incertis belli eventibus, de morte Magnatum & Principum, de prospero, vel infelici eventu matrimonij futura, & non futura vanis, & mendacibus conjecturis effutire præsumit, quibus curiosæ aliquæ animæ adeò firmiter adhærent, ac si ex antris Apollinis vaticinio provenissent mugitu. Hoc solum pronuncio, astrorum indolem, virtutum, conjunctionem, & oppositionem in tenella, carea & cujusvis impressionis capacia infantis membra potissimam vim exercere posse. Videmus ab astris cieri ventorum turbines, progigni morbos lethales, procreari nonnunquam pestes: crinitæ, vel barbata cometarum faces plerumque variorum effectuum prodromi censentur juxta illud Claudiani I. de raptu Proserpinæ:

Non illum navita tutò

Non impunè vident populi.

Cur igitur cœlestes isti influxus non poterunt in homine aliquos humores augere, minuere, & deprimere alios? cur non istos permiscere, illos stabili syntaxi connectere, & coaptare? an fortè nimia distantia tollit necessariam applicationem ad effectum requisitum producendum? at verò poterunt sydera primò in substantiam ætheream inducere magnam aliquam novitatem; hæc deinde in aëris regionibus eò usque propagari, donec in humores hominis præparatos incidens, eosdem refringat, ac castiget ea varietate, quæ ipsis concursibus syderum est indicta. Hoc

ipsum autem intelligitur nomine temperamenti, nomine primæ radices propensionum, & morum animi, ac consequenter magna ex parte hominum actiones ab influxu dependent, si quidem magna hominum pars inclinationum placitis obsecundat. Si quis igitur esset, cui stellarum, planetarumque genius penitissimè esset perspectus, qui illorum proprietates in intimis visceribus sensu aliquo perscrutatus fuisset; præterea, si cui esset certum, syderum virtutem ab aliorum planetarum, stellarum, aliarumque causarum concursu, non hebetari, non impediri, non refringi, ita, ut miscella quædam ex diversis variarum causarum qualitatibus oriretur; cui, inquam, hæc omnia nota essent, is citra temeritatis notam, & satis probabiliter de futuris passionibus aliquid prædicere posset. Sed quis est ille Oedipus, qui vastissimorum illorum corporum naturam inspexit? quis in intimis visceribus reconditas qualitates ad trutinam revocavit? item quis certò cognoscit astrorum virtutem non fuisse immutatam aliorum syderum aspectu, nunc uno planeta viciniùs ad solem v. g. accedente, nunc aliquantum recedente? igitur quia influxus isti possunt retundi, ac enervari combinatione aliarum naturalium causarum, non secus, ac major propinquitas solis respectu nostri poli est quidem opportuna ad æstum inducendum; & tamen flante Aquilone sentire possumus frigus etiam in mediâ ætate; & quoniam opportheret notam habere totam causarum naturalium peristalim, quæ tunc concurrunt, ut tutò dicere possemus, multæ sunt, aliquæ sunt, nulla e contra est causa naturalis, quæ mitiget, quæ castiget, quæ promoveat, quæ coëreecat influxum hujus planetæ v. g. tristis, timidi, suspicacis, & pertinacis Saturni; læti, & liberalis Jovis dominantis; audacis, & crudelis Martis &c. ideo terricolis non est concessum, absolutas, & firmas prædictiones ex constellatione de pueri temperamento, & naturali propensione ad amorem, vel odium, ad iram, vel mansuetudinem conjectari.

§. VI.

Inferunt affectus exempla aliorum.

Superfunt adhuc duæ propensionum ad passiones causæ, quæ prorsus sunt extrinsecæ, & non nisi moraliter ad eorum genesis concurrere possunt. Et prior quidem influit per adhortationem, aut exemplum, quod quàm est frequentissimum, tam est potentissimum ad virus passionum inferendum. Quidam apud Marfilium ficinum lib. 3. de triplic. vi-

ta cap. 23. retulerunt eam in album causarum Physicarum, eo ex capite, quòd opinarentur, ab hominibus malis, qui impuris dæmonibus obsidentur, exhalari pestilentes vapores, & emitti radios subjectorum, ex quibus prodeunt, malignitate foetos : hos porro non solum contactu, sed etiam solo contuitu quasi quadam præstigiarum dulcedine inebriare, & ad exitium trahere. Id autem vel maximè verum esse defendebant, si talis transpiratio contingeret mense Jovis, hoc est, secundo post infusam vitam vegetalem, aut mense Martis tertio, quo anima sensitiva perturbationibus mancipata advehitur. Sed hæc erroribus adeo crassis sca- tent, ut vel luscii eos deprehendant, dæmonum videlicet inhabitantium, emissionis radorum maleficorum multiplicium, in eodem nomine advenientium suecessio &c. Itaque fixum esto, hanc causam tantum esse mo- ralem, & extrinsecam. Quanta verò vi pollere debeat, ex eo licet col- ligere, quòd Stoici à Galeno rejecti hanc unicam esse causam propensio- num ad affectus censuerint. Quod tametsi à veritate multum recedat, cum in nobis ipsis igniculos, & semina irritationum circumferamus; de- monstrat tamen, supra modum prodesse ad incendium suscitandum alio- rum exemplum. Scilicet quamvis mortalibus nihil magis innatum, quàm ad libertatis auram suspirare; nihilominus in amoribus est illis servitus; non utimur judicii balance ad ponderandam rei bonitatem; sed populi numeramus voces, & aliorum exemplis trahimur, ut affectum, quem alioqui indecorum, aut minùs statui nostro convenientem rati sumus, minùs tetrum ducamus, eoque irretiti minùs abhorreamus. Amplius aliquid audi: non tantum sequimur antecessores, & cæcò modò illorum placita amplectimur, sed studemus insuper luem aliis affricare; cum qui- libet socios rebellionis aggregare desideret juxta Senecæ sententiam lib. de vita beata cap. 1. *Nemo sibi tantum errat, sed alijs erroris causa, & auctor est.* Et ut ligato quoque veterum stylo id melius imprimas, lati- nus Satyricus, Satyr. 2. hoc malum sic infectatur.

Dedit hanc contagio labem.

Et dabit in plures sicut grex totus in agris

Unius scabie cadit, & porriginè porci;

Uvæque conspecta livorem ducit ab uva.

Et edic fodes, si phantasia repleta est millenis vulgi erroribus, quid aliud in inferiore hominis parte sequi potest, quàm ingens passionum strages? cæcus est appetitus sensitivus; non discernit inter bonum ve- rum & apparens, & cum facultatem imaginativam omni veneretur submissione; ideo aut fugit objectum propositum, aut illud prosequi- tur. Cœcitate sua posset fortè se excusare, & tot crassorum erro- rum

rum arguendus solùm erit tam malignus Magister usus, ac pessima axiomata, & discursus.

§. VII.

Parturiuntur denique à musica.

DEnique ad hoc caput revocatur efficacia conventus musici in passionibus exstimulandis, & fortè non inani, & putida notatione corda à cordibus movendis est dicta. Vim illius magnificè extollit Cassiodorus lib. 2. epist. 40. Tristitiam, ait, noxiam jucundat, tumidos furores attenuat, cruentam sævitiam efficit blandam, excitat ignaviam, soporantemque languorem, vigilantibus reddit saluberrimam quietem, vitiatam turpi amore ad honestum studium revocat castitatem, sanati mentis tædium bonis cogitationibus semper adversum &c. hunc cunum adhibuerunt vitæ perdendæ deprecatores, cum modulos precibus miscuerunt, neque surdis cecinerunt. Ita Theophilum è vinculis liberum dimisit Ludovicus Pius, ubi ab eo plena voce cantari audivit hymnum in carcere recens compositum: *Gloria, laus, & honor tibi sit Rex Christe Redemptor*. Huic fulcro infixus publicè perorabat Tiberius Grachus, qui nunquam ad populum dicturus prodibat, nisi ponè haberet citharædū, cujus varia modulatione, prout res ferebat, concitarentur ejus affectus. Hac machina Timotheus tibicen Alexandrum Magnum ita commovit, ut jam ad arma exiliret, jam immutato sono quietum convivijs, ac mensæ restitueret. Hæc denique animorum domina, & moderatrice Flavianus, Antiochenus antistes, Theodosium Imperatorem in Antiochenos ob dejectam Imperatricis statuam exacerbatum, ita inflexit, ut emollitus ipsum quoque poculum inter bibendum fufis respergeret lacrimis. Sed quid singularibus immoror, qui scientificis scribo? melodia homini indoloribus est lenimento, tristibus solatio, merentibus gaudio, in laboribus, in itineribus levamini. Hinc ubique gentium opifices in officinis, remiges in navibus, oratores in agris, operarij ferè omnes in ferendis, trahendisque oneribus vocis modulamine student laborem minuere, moerorem propellere, animumque exhilarare. Fare, quid fortius ad excitandum amorem, quàm vocis cantus melita lyræ dulcedine temperatus? hæc certè arte utuntur amasij ad alienum sibi amorem conciliandum, qui non nunquam delicatò calamò ita argutè fides molliter resonantes verberant, & voces ad musices leges demulcent, ut non amo-

rem

rem tantum sibi concilient, verum ipsum etiam animum videantur corporibus eripere. Nemo igitur miretur, antiquas Poëtarum fabulas concentui dulcisono tantam attribuisse virtutem, ut cantaverint, ab Orpheo musicæ artis peritiâ instructissimo feras è nemorum opacatis secessibus extractas, arbores ad saltum excitatas, amnium cursus inhibitos, & ipsam Euridicem lectissimam conjugem ex ipsis infernalium specuum penetrabilibus ad superos reductam fuisse.

Verum quam notus est effectus harmonicæ melodiæ in acuendis animi stimulis tam profundè videtur latere illius causa. Confugiunt multi ad nescio quam sympathiam inter hominis temperamentum, & organum corporeum. Sed fortè his mysterijs non satisfaciunt neotericorum gustui. Philosophi illi, qui sonum aliud non esse clamant, quam meras aëris tremuli vibrationes (à quibus planè non est recedendum) effectuum proritatem à concentu effici propterea docent, quòd intima cochleæ membrana in nervum acusticum expansa subsultantem recipiat aërem cum affini tremore. Sequitur motus reliquorum nervulorum in totius corporis partibus, moventurque muscoli, prout vel Dorius, Phrygius, Æolius, Jastius, & Lydius inter se pugnant ; vel (ut alijs verbis idem significem) prout numerorum lex vel crebrescit incitationibus, vel tenore composito quiescit, aut lentitudine quietem imitatur. Vociferaberis, insulitates istas sapere atomistam orbe jam pridem proscribendum ; sed parcius mi bone ! citharâ furorem prius tibi mitigabo, ut quondam David sacrorum Canticorum Poëta ab insania Regem, Saulem liberavit. Suspendo in uno pariete, & altero remotiore fides æquè tensas, easque calamo percutio, quamvis in arte musica prorsus non versatus ; & ecce unâ chordâ tactu concitatâ, statim alterius citharæ chorda contremiscit. Cur ergo nervi per totum corpus chordarum, instar extensi ad exterioris soni commotionem non æquè facilè irritari possint ? an fortè tanta diversitas inter substantiam nervorum & chordarum ? at cum eam anatome planè non ostendat, idcirco facta extimi aëris subeuntis accessione marcidus, & depressus animus attolletur ; elatus verò mutata modulorum ratione cohibebitur, aut etiam de suggestu detrahetur. Sic oculis quasi subijcio, cur plerique aliud agentes canentibus, & ipsi occinere soleant ; sic explano : cur si quis submississimè loquatur, & nos simili tonò respondeamus: econtra si exoritur clamorque virum, clangorque tubarum, etiam clamandi libido incessat majorem hominum partem, quam vel pudore, vel rationis imperio cohibere oportebit. Et hæc de concentus musici efficacia, qui solo auditu

sine manibus captivos abducit animos, in fidibus sine ore loquitur, & per fermè insensibilia in sensuum potentias dominatum exercet.

Ne autem, quæ hæcenus circa inclinationis causas attulimus, in deteriore partem detorqueantur, restat, ut præmoneamus aliud esse homines propendere ad certas affectiones, & ex natura sua ad certos passionum impetus proclives esse: & aliud, eundem his suis affectibus obsequi, aut istas ab anima nolente consensum posse extorquere. Quamvis enim cuilibet obtigerit miscella aliqua ex diversis causis ad passiones inclinantibus, non secus, quam ex variis corporibus, herbis, lapillis, gemmis &c. inter se permixtis variarum virtutum nascuntur, & consurgunt medicinæ; ita ut unam dosim ministraverint parentes, & temperamentum, aliquot semisses miscuerint alimenta, aliquot scrupulos assuetudo, & hæc omnia à siderum influxu, aliisque principiis fuerint variè excocta: nihilominus præter ista attributa est cuilibet nostrum nobilissima animæ portio, quæ rationis lumine exorbitantes passionum conatus, velut alter Pædagogus reprimat. Causæ hucusque allatæ suadere, & blanda, ac congrua objecti propositione pellicere solent, & possunt; de reliquo tenent cum summa reverentia viam, quam Deus sectari solet; nempe voluntatem, ut se dedat, cogere, aut omnino impedire nequaquam possunt, ne feratur in partem, quæ aridet. Nec ipsi quidem dæmones, quibus tamen maxima vis inest, extorquere animi consensum, & libertatem exscindere possunt. Hinc tam sæpè in concionibus sacris illud D. Augustini de dæmone serm. 197. de tempore nobis inculcatur: *Alligatus est tanquam canis innexus catenis, & neminem potest mordere, nisi eum, qui se illi mortifera securitate conjunxerit.* Et paulò infra: *latrare potest, sollicitare potest, mordere omnino non potest, nisi volentem.* Non enim cogendo, sed suadendo nocet, nec extorquet à nobis consensum, sed petit. Igitur potestas diaboli, non in temeritate illius, atque jactantia, sed in hominum posita est voluntate: ex antris suis infernalibus, in quæ ictu suo percussus cecidit, ad fauces suas sollicitationum carminibus solum trahit infelices illos, quos sibi assensum facile præstituros prævidet, & inermis voluntariam prædam expectat. Quòd si quandoque legamus satanam cogere nolentes, urgere invitos ad id, quod ipse vult, habere vim ad imperandum &c. hæc tantum intelligenda sunt hoc sensu, quod nollent, nisi ita arctè premerentur, & ad agendum, quasi scuticâ urgerentur.

DISSERTATIO VI.

Expenditur passionum causa finalis.

§. I.

Finis physicus passionum.

Duplicem ego finem promptis & celeribus animi volatibus (hoc enim nomen passionem à Zenone hæredidârunt) duplicem, inquam, finem assigno : unum, qui ex scientia physica, alium, qui ex morali desumitur. Ex fine physico affirmo, concitationes eò tendere, ut animatum corpus perfectè habeat : scilicet ut servetur intacta omnium organorum fibula, ac perfectè functiones suas animal exerceat, quod est veluti centrum, ubi viventia ultimò conquiescunt. Explicatiùs finem affectuum percipe. Primò proposita est appetitui operatio facilis, & ex toto congruens, atque respondens suæ virtuti, & endelechiæ; quia in Philosophorum Synagoga nihil frequentius auditur, hoc axiomate : esse est propter operari. Igitur quia animal est principium sentiendi eò spectabit, ut perfectam eliciat sensationem. Quid autem supponit perfectè sentire nisi gratam affectionem ab eo objecto impressam, quod bonum sensibile vocant? & quid est ipsum bonum sensibile, nisi affectio ipsa, & impressio inducta, & excitata in vivo corpore, & ab objecto externo determinata? igitur objectum erit tantum mediatus & ultimus, non verò proximus, & immediatus appetitus sensitivi finis. Ad perfruendum autem hoc bono, proque illo obtinendo animal adhibet varios motus, usum scilicet appetitus : igitur passionum appetitivarum finis erit consummatè, ac jucundè operari, removendo scilicet ea, quæ huic perfectæ operationi sunt contraria, & ea procurando, quæ eidem probè conveniunt. Quia verò animal totum quoddam est diversis instructum facultatibus, hoc est, multiplici sensuum genere; ac cum unus sensus non semper alteri subserviat, & subinde uni arrideat, quod alteri maximè nocet; ideò ut toti bene consultum sit, communis cujusdam conspirationis vinculo, seu fœdere, omnes potentia obstringi debuerunt ad communem organorum, & partium ipsius viventis conservationem, horretque natura animalis solutionem hujusmodi nexûs horrore quòdam veluti publico, non secus, ac peripatheticè dicitur naturam universam horrere vacuum horrore distributo per singulas universi ipsius partes.

Et ecce! alterum, quod *passiones* sibi pro scopo eligunt; adeoque adequatus finis illarum spectat ad perfectionem animantis, quæ in jucunda operatione, & omnium organorum consensu consistit. Fatendum quidem citra passionum adminiculum hominibus à natura esse inditam inclinationem ad prosequenda, quæ conducunt ad sui conservationem tum secundum individuum, tum secundum speciem, tum secundum societatem: sapientissimè nihilominus affectuum quoque efficaciora auxilia naturæ providentia adjunxit. Pone enim appetitionum stimulos deesse; pone iisdem naturalem inclinationem non intensius urgeri: nec homines, nec bruta ferrentur, quantum, & quomodo oportet in eas actiones, & objecta, quæ fini proposito idonea habentur. Vereor, ne longè plures modò ex difficultate, modò ex nauseante fastidio ab iis abstinerent, ad quos tamen necessitas urgeret. Saltem non ita alacriter, non ita ferventer, aut animalia agerent, aut necessaria appeterent; sed omnia moroso languore & tepiditate perficerentur.

Non me fallit, excessum, & exsuperantiam, ad quam perducunt *passiones*, potius obesse, quàm prodesse conservationi animalis: verùm Divina Sapiencia non utitur methodo œconomix humanæ, & procuratoria sorditie, omnia parcissimè subministrando, sed liberalissima & expeditissima administratione rebus à se conditis prospicere solet. Videmus in aliis, quod non definitè ad balancem singulis duntaxat illud præparet, præstetque, quod præcisè satis est, vel quod summa necessitas exigit ad fines præscriptos; sed ex abundanti, & copiosissimè media supeditat; etiamsi plura ex iis otiosa sint futura, & quandoque ex accidentario hominis abusu damnum non leve sint allatura. Confessionem hujus extorquent alimenta viventium, quæ Deus locupletissimè suppeditavit, etsi magna ex parte nutritioni non famulentur, sed excernantur. Fateri hoc nos cogit ipsa liberè operandi facultas, quam immortale Numen hominibus indidit, quamvis prævideret, pleròsque eâ vitiose usuros. Quid ergò novum, quòd non dissimilem conditionem *passiones* sint sortitæ, ut videlicet præter naturalem, simplicemque modum ad necessaria conferretur etiam abundantia, qua quandoque possent exorbitare? Præsertim cum natura quoque præstiterit homini, unde ab excessu cohibere posset nimium æstum, scilicet liberum voluntatis arbitrium.

§. II.

Finis moralis passionum.

Alter passionum finis est moralis, ut scilicet nobis ad vitam ex virtutis regula instituendam conducant, inferendo nobis Divinorum desiderium, & subministrando vires, quibus labores, pro iis suscipiendos toleremus. Non enim Deus titillatorios sensus homini iniecit, ut noxam & probrum ei concilient; sed eos ad salutem animæ attexit, atque conjunxit, voluitque nos morem sapientum Medicorum imitari. Volentes ipsi depellere præsentem, aut immanentem gibborem, utuntur venenoso viperæ corpore. Sic adhibendum affectionum hujusmodi virus, vel ad expellendum præsentem, vel ad impendentem vitiorum morbum, vel ad comparandam, aut conservandam virtutis integritatem. Neque indecorum sibi sapientiæ studiosi ducunt, carnis affectus à rebus corporeis avocare, & ad cœlestium adeptionem convertere; veluti quando ex cupiditatis affectu efficiunt motum animi Divina expectantis: ex voluptate lætitiā incolumem, gaudiūque virescens ob Divina charismata: ex metu solitudinem procul observantem supplicia ob scelus infligenda, atque è tristitia præsentis mali corrigenstem poenitentiam.

Quod universim de impressionibus corporeis hucusque dictum, nempe datas easdem esse homini Omnipotentis concessione ad munera exsequenda, v. g. cupiditas, ut Dei præceptis pareamus, ira autem, ut sceleribus resistamus, confirmemusque virtutem, hoc jam in specie expendamus de ira, quam rationis satellitium pulcherrimè Nemesis insignivit. Quod ergo irascibilem vehementiam attinet: Si miles quidam loricator, armata manu, diu noctūque paratus adstat ad nutum sui Ducis auxilium laturus; erit iracundia rationis adjutrix, erit animæ nervus, ad ingruentia per insidias crimina repellenda. Præbebit indignatio fortitudinem, constantiam, roburque ad res optimo ordine gerendas. Hæc animam fortè repentina voluptate delinitam ac lascivientem veluti durissimo ferro cohibebit, austriorem, fortiorēque ex molli, ac remissa reddet. Huic equo jugali insidens, ubi eum rationis freno, ne modum excedat anima cohibuerit, facile viam ingrediens, mentis rectoris consilio iniquitatem longè fugabit, quam sine hoc, quo decet modò non fuisset persecuta. Si existimas æquale circa diligendam virtutis heroinam studium esse adhibendum, ac ad odium retinendum adversus

fucatam vitiorum meretricem, quid magis utile erit, quam indignatio? æmulatur nimirum illa canum pastoralium indolem. Canes isti ad vocem peregrinam ad conspectum alienum, torvos, agrestes implacabiles sese exhibent: licet eos palpatu lenissimo demulcere studeas, frustrabuntur omnem industriam: notorum verò ac domesticorum blanda alloquia minarum instar timere, & revereri videntur. Sic iracundia rationi obediens mitem, mansuetam, opitulatricem, & ad nutum animæ prudentis revocabilem se præbebit; e contra insidiosis prorationibus nullum benevolentiae signum ostendet, nunquam piratis conciliabitur, nunquam cum eorum principe familiarem contrahet consuetudinem; sed adversus insidiantes voluptatum feras, vel contra venientem lupum continuo latratu invigilabit, sæviétque.

Ne hæc speciosius, quam verius dicta existimes ipsas consule sacras paginas, quæ illis Regii Placitis verbis: *Ira scimini, & nolite peccare*, iræ usum nobis non solum concedit; sed tanquam instrumentum ad multas utilitates opportunum disertè præcipit. Quid judicas, an fortè nobis imperatur, ut indignationis effervescencia supra debitam mensuram peccemus? absit! hæc enim esset utilis instrumenti temeraria perversio. Hoc jubet Scriptura, ut alios peccantes inhibeamus: non ut fiat animi ægritudo, sed ut sit ægritudinum remedium, & aliorum vulnerum emplastrum. Sed quis omnia iræ commoda enumerare sufficiet? somnolentem pigritiam incendit, languentem animum corroborat, virésque addit, acriores nos efficit, ut indignemur pro his, quos injuria affectos videmus, ut moveamur ad pœnas de insidiatoribus sumendas, & denique scelestas, improbásque cogitationes absumat, dæmonémque undique pellat. Manet ergo iram institutam esse, ut magnum ex virtutibus etholumentum capiatur. Et quis sibi persuadere posset ipsas passionnes sædarum cupiditatum, quæ ex carnis uligine innato subvehuntur æstu, quæque maximè inimicæ, & noxiæ reputantur, mirum animæ commodum afferre, ejusque utilitati deservire, nisi hoc evidenti argumento comprobaretur? perpende eos, qui corpore spadones sunt, & deprehendes, quam evirata hæc constitutio eos in appetendis virtutibus desides reddat, ac tepidos. Nimirum quia corrumpendæ integritatis nullum se credunt periculum habere, veluti ab omni necessitate soluti, nec labore continentiae corporalis, nec contritione se æstimant indigere. Hac securitate resoluti nunquam perfectam vitiorum purgationem, vel in virtute progressum quærere, vel possidere festinant; qui status eò est deterior, quò magis à frigido ad detestabilem accedit tepiditatem. Illi verò, qui stimulis corpori insidentibus perpetuò urgentur, eos re-

putant

putant pro negligentia suæ judicibus, frugalitatis tenentur districtione, & ubi eos semel ardor, ac desiderium accenderit propositam victoriæ palmam prætendendi, famem, sitim, vigilias, nuditatem, cunctosque labores corporis non solum patienter, verum etiam libenter sustinere compelluntur. Igitur absque ira, absque concupiscentia vera mentis vivacitas subsistere non poterit, quamvis eam in bonam partem immutare sit necesse. De reliquis passionibus, qui aliud sibi iudicium formant, creatoris scopum ignorant, & bonorum datorem malorum auctorem faciunt.

DISSERTATIO VII.

De Bonitate, & malitia, præcipua passionum proprietate.

§. I.

An passiones sint peccata?

AD hanc quæstionem aditus nobis est faciendus vocabulorum istorum motus *primò primi*, & *secundò primi* ambiguitatem tollendo. Paucis te expedio; motus illi, qui omnino sunt indeliberati, dicuntur *primò primi*: qui verò semi-deliberati, appellantur *secundò primi*. Porro deliberatio involvit iudicium mentis præcedens electionem, idque tale, ut secum afferat cognitiones oppositas ignorantia, quæ tollit voluntarium, & quoniam plures hujusmodi eliciuntur cognitiones de objectis, hinc consequitur, ut prout plura, aut pauciora de objecto prædicata, vel adjuncta cognoscuntur, deliberatio quoque porrigatur ad plura, vel pauciora adjuncta, quæ de objecto cognoscuntur. In re præsentī ad actum deliberatum absolutè, & sine voculis arctantibus significationem, revocatur ille, cùm deliberatio tam amplè patet, ut si objectum ex sui natura censeatur graviter peccaminosum, admittatur grave delictum ab eo, qui illud deliberatè agere non veretur. Hujusmodi porro deliberatio secum affert attentam ad summum bonum animadversionem, & ad jacturam integram illius conjunctam cum tali operatione, de qua edenda, vel elicienda anima consultat; quamvis opus non sit, ut ad hoc advertatur explicite, & sine omnibus
pror-

prorsus involucris. Adverte jam, ubi nunc plenam allatorum vocabulorum notitiam produco. Si animus nullo prorsus pacto attendat ad summi boni iacturam, prout dormientibus accidit, motus editus sortietur denominationem primò primi, & indeliberati, modò ex prava consuetudine, vel causa præmissa non dimanet. Si contingat, ut animus consideret duntaxat partialem iacturam illius boni, cuius nobis ideam exhibet ægrotus vehementer sitiens, cui aridis labris haurienti aquam, ex perturbatione animi, occurrere non potest, vehementis sitis potum esse lethalem, sed tantùm valetudini quadantenus noxium; in hoc casu motus elicitus jam extenduntur ad secundò primos, ad semi-deliberatos, nec ab omni culpa immunes. Non admittetur tamen in his circumstantiis grave delictum ob non præeuntem plenam attentionem. Hæc de vocabulorum, quæ hunc locum attinent, discussione.

Nunc primò quædam veriùs portenta, quàm dogmata superiori ætate ad sacram doctrinam inficiendam excogitata in transitu, velut muscæ quædam infestæ, sunt abigendæ. Hujusmodi impudentiæ plena monstra sunt partus Calvini lib. 2. instit. cap. 1. & lib. 4. cap. 15. Cyclopiæ Augustanæ Confessionis Philippi Melancthonis art. 2. Martini Kemnitii in examine sess. 5. Conc. Trid., qui cum omnibus Affeclis statuunt spurciloquis labris non modò passionem, quamvis indeliberatam, esse peccatam; sed eò insaniam progressi sunt, ut ipsam quoque concupiscentiam in actu primo, seu defectum subjectionis perfectæ appetitûs ipsius sensitivi ad rationem, cum peccato originali unum, & idem esse sibilaverint. Quòd si eos impugnare volueris cum Conc. Trid. Patribus Sess. 5. dicendo: in renatis per sacri fontis aquas ablui maculam peccati primitivi, & tamen in restitutis dono justitiæ adhuc residere propensionem ad scelera, juxta Apostolum ad Rom. 8. *Nihil esse damnationis iis, qui sunt in Christo Jesu.* Si objeceris, nos per baptismum commori penitus peccato, sicuti Salvator mortuus fuit, & sepultus, proponendo alium Doctoris Gentium locum ad Rom. 6. *Quicumque baptizati sumus, in Christo Jesu baptizati sumus, consepulti enim sumus cum ipso in mortem &c.* Si in testimonium allegaveris verba Isaïæ 1. *Peccata vestra ut coccinum, velut nix dealbabitur, si fuerint quasi vermiculus, velut lana alba erunt.* Si conjunxeris Regiam Psalmistæ versiculum: *Asperges me hyssopo, & mundabor, lavabis me, & super nivem dealbabor.* psal. 50. si inter innumeras alias sacrarum paginarum sententias etiam miscueris illam Michææ 7. *Deponet iniquitates nostras, & projiciet in profundum maris.* Si hæc omnia, inquam, contra corruptam fermento doctrinam attuleris, collegerisque, deleta licet originali

ginali macula, nihilominus remanere passionum fontem: ergo hæc unum & idem esse non posse: non sibi deesse verba credent, quibus hæc & similia diluant. Fingunt sensum tantum esse, in renatis passionibus ad æternum barathri supplicium non imputari; gratiæ stolâ seditatem illarum tantum obtegi; scabiem tantum extrinsecam radi: reipsa autem concupiscentia, si ipsis fidem habemus, numeranda est inter peccata omnium maxima, quod tanquam malum immedicabile nunquam tollatur, nunquam eradicetur; sed ita inficiat hominem, ut, quidquid ab eo procedit, peccati pestem contrahat.

Verum notent sibi abortivi, & seditissimi isti erronei, Apostolum asseruisse, *nihil damnationis esse*, ac proinde ne manere quidem ipsam iniquitatem, qua homo dignus reddatur æternorum tormentorum; præsertim cum in eadem epistola damnationis nomine ipsum etiam peccatum, quo quis pænarum reus fit, comprehendatur, illis verbis: *Sicut enim unius delicto in omnes homines in condemnationem, ita unius justitia &c.* advertant, quod si culpa originalis per sanguinem pretiosissimum Christi non ablueretur, infringi, quæ eodem loco efferuntur, scilicet, ubi *abundavit delictum*, superabundavit gratia; constat enim, delictum illud delevisse omnem prorsus justitiæ lineam: igitur nisi justitiæ dotes postea similiter eluant omnem delicti squalorem, dicendum esset, potius scelus superabundavisse. Maxime autem illos confundit, quod ad Titum 2. scribitur: *Qui dedit semetipsum redemptionem pro omnibus, ut mundaret sibi populum acceptabilem sectatorem bonorum operum &c.* Hic enim maxime apparet, meritum Christi inexhausto thesauro non solum ab inferis nos exemptos, sed etiam effectos acceptabiles esse, & dignos, qui à suprema Majestate diligamur. Non me fallit, qua arte laqueum hunc declinare laborent. Aiunt enim justitiam Christo insitam, eique propriam esse id, per quod nos simus Deo cohæreditarii filii. At verò unum scire aveo, quare non etiam Christus factus sit nobis sapientia, ut eadem sapientiâ, qua ipse, & nos saperemus; cum tamen in eodem contextu dicatur: Salvatorem nobis factum esse justitiam, sicut factus est nobis sapientia? sed, o he jam satis est blasphemiarum, atque impietatum! præstat filum hinc abrumpere, & reliquam ex perversa segete messem errorum abominabilium missam facere.

§. II.

An cadant in virum Sapientem ?

STatuendum ulteriùs tanquam indubitatum , nec tantùm cum peripato, sed etiam cum orthodoxæ fidei placitis magis cohærens, posse virum sapientem, sinè eminentissima virtute excultum, absque criminis labe passione aliqua subitanea præoccupari. Veritas hujus asserti per hoc extorquetur, quòd videretur aliàs Deus universi auctor culpæ insimulandus, si nobis naturam indidisset adeò vitiosam, ut affectus naturaliter ex ea exsurgentes ante liberæ facultatis edictum, non possent in hominem virtute ornatum cadere, quin eum turpi labe oblinirent. Distinguendum igitur est inter animi pathemata, quibus voluntas favet, & quæ amplectitur; & inter ea, quæ tenuis umbræ modò mentem humanam solent prætervolare, seque vel tantummodo monstrare transeundo; vel certè repugnanti, ac invito animo suggeruntur, quibus mens cum horrore quodam resistit, ac renititur; quibus ut contristatur admissis, ita lætatur expulsis. In illis quidem, quæ se menti leviter ostendunt, & quasi fugiendo demonstrant, non solum nulla peccati labe est; sed ne quidem pugna intercædit: in his autem, cum quibus anima aliquamdiu luctatur, æquale certamen committitur. Subinde voluntas consentit, & vincitur: subinde eadem respuit delectationes, vincit, acquirítque de pugna victoriam. Illi ergò tantùm titillatorij sensus criminis rei sunt arguendi, quando impressionibus mentis consensus accedit, quando malum blandè fovetur, quæ in factum gestiunt erumpere; imò nequidem omnis hujusmodi proritatio, licèt eam voluntas libera impleat, actione criminis est condemnanda, ut paulò ifra demonstrabitur. Neque in hoc acquiesco, quòd negem humanam naturam esse agrum, nil nisi urticas sponte proferentem; sed insuper defendo, impossibilem esse apathiam, seu indolentiam, à Stoicis ad virtutem requisitam, ita ut omnis passionis exortus impediatur.

Stoam ipsam ingredior, & primipilos eorum sic compello: ostendite mihi, ò impatientes homines, & Dijs, si tamen Superis placet, æquales, ostendite mihi aliquem, qui dogmata, quibus cathedræ vestræ personant, simulacrò vitæ suæ exprimat. Ostendite nodosis podagræ, vel chiragræ doloribus laborantem, qui nihilominus beatè vivat: morientem, & felicem; periclitantem, & tamen non miserum; exulantem, & tamen bonis omnibus abundantem; contemptum, & ignominiâ notatum,

tum, & tamen hilari vultu incedentem. Ostendite, per Deum, desidero talem Stoicum videre; cupio videre immobilem talem statuam. etiam motuum involuntariorum expertem, eamque supra Phidiæ artificium extollam. Nimirum non habetis talem effigiem jam expressam; adhuc artifices in opus incumbunt, ut eam exsculpant. Vereor, ne unquam hominem omnibus affectibus liberum, vereor, ne unquam spectaculum tam jucundum orbi exhibeatis, eumque verbo tenus invehere laboretis. Imò multum esse judico, si assensum liberum semper passionibus negaveritis; si semper rationis auctoritate increpueritis latratus inquietos; si insanientem bestiam catenis ferreis in intimis animæ recessibus ita alligaveritis, ut nunquam foras prodeat, sed intus fractis dentibus se ipsam mastiget captiva concupiscentia, & corrodat. Cessent igitur Stoici, multa nobis de plena passionum compressione imponere: cessent sibi titulos arrogare, qui ad ipsos non pertinent, scilicet Dei, non tantum similitudinem sibi cum Lucifero arrogando, sed etiam æqualitatem asserendo omni perturbatione exclusa; cessent invektivis orationibus appetitiones sensitivas incessere.

Aio insuper passiones jultro quoque advocatas, concitata ad eas per liberam voluntatem naturâ, vel ex quo sponte exsurrexerint, liberè retentas subinde omni noxæ labe carere, nec per eas incontaminatum virtutis decorem gradu suo excedere, si recto mentis consilio dirigantur. Quis moderatum pudorem crimen dicat? quis culpæ insimulabit hominem, cui viscera commoventur visâ alterius miseriâ, quique inde vehementer inclinatur ad inveniendum remedium? non nisi aliquis ex omni malorum fæce coagulatus bonum esse negabit justè, & sanctè ob summi Nominis gloriam in vindictam criminum assurgere. Approbant certè omnes nobilissimum Mattathiæ Machabæorum parentis factum, qui cum vidisset unum ex gente sua idolis sacrificantem: *doluit, & contremuerunt renes ejus, & accensus est furor ejus &c.* nullum audivi, qui teneritudinem Josephi Proregis Ægypti vituperio & asperis tractaret, qua fratrem suum Beniaminum est persecutus. Non possunt quidem omnes affectus deliberatè suscipi, prout hoc expressit Philosophus lib. 2. Ethic. cap. 6. in malevolentia, impudentia, invidentia, & aliis nequitiiis; ista enim nulla mediocritate condiri possunt à dirigente ratione, semperque inhonestatem olent: at verò ex se passiones omnes cum vitiorum turpitudine confundi non debent; & si quandoque peccati nomine à christianis Doctoribus maculantur, id non fit, nisi metonymicè, quatenus eorum licentia ex peccato oritur, & ad peccatum inclinât, prout ipse appetitus sensitivus affectuum fons

non rarò per tropologicam dictionem peccatum appellatur. De reliquo injuriam facit, qui iram moderatam, bellicæ virtutis cotem, damnat immanitatis, & perniciosæ crudelitatis: ab orbe est extrudendus, qui amicos redamare prohibebit, non aliam mercedem lucrabitur, nisi immanitatis in animo, & stuporis in corpore, qui vult me non dolere, non sentire debere, quando ex putridis membris quid refecatur à vivo, aut avellitur.

Passiones igitur ex natura sua nec laude, nec vituperatione nos dignos efficiunt; quia eatenus sunt expertes libertatis, quæ est aliquod necessarium constitutum moralis bonitatis, aut malitiæ: si verò rationis imperiò regantur, laudem merentur; si modum exceßerint, in vitiis sunt numerandæ. Si equus, quo naturâ suâ ferocior est, ac vehementior, ed præstantior haberi solet: cùm tamen ipse rationis sit expertus, se fore perito, moderatorêque egeat, ubi hic in equum ascenderit, conabitur quidem ille uti genio suo: at si rector insidens naturales jumentis assultus gubernet, præterquam, quod illo utiliter usus ad propositum finem perveniat, etiam se incolumem servabit, & pullum ad usum sibi opportunum esse intelliget. Contra verò si equum, qui in frænando præstet, vitiosè instituerit, & pullus sæpenumero à recta aberrabit via, & per confragosâ ruens se, & sessorem ipsum in eandem ruinam pertrahet, & utriusque casus non alteri, quàm rectoris ignaviæ adscribetur. Non alia ratione attributa est corpori potentia appetitiva, quàm ut ad illius commoda, & utilitates subserviat. Tolle omnem voluptatem, aut dolorem nulli erunt ejus, quod bonum est, aut malum, characteres ab Auctore naturæ impressi, quibus utilia à noxiis separemus: spe omnino sublatâ, quid jucundi restat in vita? si misericordiam fugabis, immanitatem adduces; si metum eliminaveris, temeritas pullulabit; si hunc sustuleris, omnem vitæ prudentiam simul auferes. Imò aliud munus virtus non habet, quam in id incumbere, ut carnis suggestiones, rationis regulis subdantur, ne extra naturæ fines excurrant. Si non haberet virtus, quæ vinceret, vel regeret in passionibus, omnino otiosa marcesceret. Occupatur fortitudo in supprimendo timore, cessaretque hæc ardua virtus à generosis suis ausis, si homo timere cessaret. Modestia normam, & mensuram præscribit spei, ac desiderii; non nitebit nisi inter competitores ambitiosos. Temperans continentia frænum iniicit voluptati, & ad nihil opus foret hac virtute, nisi guttatim nobis instillasset natura delectationem ad opera quotidiana. Clementia temperat iram Principum, qui nisi subinde incitarentur ad vindictam, non tanti in ipsis fieret animus moderatus. Tantùm igitur abest, ut passiones vitiis sint accer-

accensendæ, ut potius isti vilissimi motus animalis à prudentiæ legibus nobilitentur. Moderare audaciam, & fortitudo evadet: da modum cupiditati, & temperantiæ vestimentis incedet: vepres inculti in rosas convertentur, semperque subsistet illud Theagis: virtus ex affectibus nascitur, & nata cum ipsis constat.

§. III.

Quid censendum de bonitate physica passionum?

Quod si verò sermo sit non de bonitate, aut malitia mores hominum concernente, sed de physica vel utilitate, aut nocumento, quod afferunt constitutioni naturali corporis animati, rursus tenendum est, æstus istos simpliciter bonos, & utiles esse. Omnes quidem commotiones appetitus sensitivi quodammodo disconveniunt animali, & sic lata aliqua significatione noxam contrahunt. Dictum enim est statim ad initium, omnia pathemata facultatis sensitivæ hoc habere commune, ut deijciant aliquatenus animal à statu, & dispositione sibi convenienti, quod sine aliquo detrimento accidere non potest. Nihilominus, sicut medicinarum pocula, ciborum, & potus subsidia, aliæque extrinseca simpliciter merentur bona dici. Agentia, quorum applicatione utiliter uniuscujusque defectibus, quos pati contingit, subvenitur: sic idem de passionum symptomatis verificatur. Sunt namque naturæ plerorumque hominum, ex tali elementorum mixtura compactæ, ut in se includant excessum, vel defectum, quoad aliquas illorum virtutes; & vix ullum est invenire (si tamen tam rara avis omnino sub cœlo degat) qui non cogatur pati in suo corpore aliquam exsuperantiam caloris vel frigoris, melancholiæ, aut flavæ bilis. Pone igitur limosa, & superflua sanguinis fæce abundantem melancholicum; pone cruda, insipida, & nondum excocta pituita oppletum phlegmaticum; pone istos deliniri; demulcerique patheticis halitibus, cum sanguinis fervore, aut ejusdem hilari diffusionem conjunctis: sauciabit quidem levi vulnere talis motus peculiarem, & innatam hujus subjecti inclinationem & exigentiam; naturæ tamen hujus hominis velut propitium affulgebit sidus, utpote emendans defectum tali inhaerentem subjecto.

Cessent igitur jurati passionum hostes, nos naturalibus hisce ad virtutem, ad opera magna instrumentis exarmare: cessent in nobis destruere velle omnes appetitiones, nosque Diis aut Angelis similes efficere.

Malè nimium actum nobiscum vellent, qui omnium sensibilibus affectuum refectioe nos quodammodo truncare cogitarent. Qui ne minima quidem agitatione hominem perturbari volunt, hominem ex homine tollunt, in corpore constitutos volunt esse sine corpore, saxum, aut Deum nos fingunt. Ultra verum hæc dici ne autuma: pauca verba ex Stoica superbia percipe; sic apud Senecam epist. 73. loquuntur: plura Jupiter habet, quæ præstet hominibus, sed inter duos bonos non est melior, qui locupletior: non magis inter duos, quibus par scientia regendi gubernaculum est, meliorem dixeris, cui majus speciosiusque navigium est. Jupiter quo antecedit virum bonum? diutius bonus est. Sapiens nihilo se minoris æstimat, quod virtutes ejus spatio breviori clauduntur. Quemadmodum ex duobus sapientibus, qui senior decessit non est beator eò, cujus intra pauciores annos terminata virtus est: sic Deus non vincit sapientem felicitate, etsi vincit ætate, non est virtus major, quæ longior &c. En quanta insania! non, non est ita; modestior est virtus, quam ut laudes sibi non debitas adeò cupidè prensare audeat; quam ut extollere se præsumat ad thronum Divinitatis, quem potius adorandum esse cognoscit. Quamdiu nobilissima anima coacta fuerit exercere functiones ipsis brutis ratione carentibus communes, tamdiu passionibus erit subjecta; quamdiu in operando à sensuum organis dependebit, intuebitur spem timore permixtam, non minùs ipsam dedecet malignæ fortunæ casum horrere, quam magnæ felicitatis auram spe suspirare: non minùs dedecet malis irasci, quam oculos ad videndum, aures ad audiendum adhibere; imò minùs difficile est gubernare passiones, quam sensus; facilius cicurari possunt audacia, amor, odium &c. adhibitò rationis fræno, quam fames, sitis, somnus, aliæque pro sustinenda animalis vita necessaria. Quod si etiam fieri posset, ut homo enervatis animi passionibus ad immobilem mentis stuporem perduceretur (quod tamen ante separationem animæ à corpore est impossibile) hoc tamen nequidem expediret; non enim quia durum aliquid, idèò rectum, aut quia stupidum, idèò sanum, an non aqua semper jaccens, & quieta, est insalubris, & magis turbida? cur ergo animum à nobis exigunt immotum, ac torpentem? an non æquè homo sine passionum agitatione erit inutilis, & nequidem ipsam vitam tuebitur? an non per hanc immobilitatem animum vitâ privarent?

Opponunt temerarii isti hæreticorum Patriarchæ (quandoquidem Pelagii, cæterorumque e mentitæ virtutis auctorum errores ex his fontibus hausti dicuntur) multâ speciosissima argumenta, vel potius scommata, quibus passiones impetunt. Dicunt primò, quod quidquid agitur,

tur, ex instigatione passionis, fiat ex amore proprio. Per quem creatura seipsam constituit tanquam centrum ac finem ultimum: hoc autem quis neget esse turpe, & inhonestum? addunt secundò carnis affectus esse perturbationes, esse animi morbos, ex quibus consequitur, eundem aptum non fore ad fungendum munere suo, seu ad utendum benè ratione. Quèmadmodum enim oculus non probè affectus deest officio suo, manus intumescens agilitatem deperdit, totùmque corpus cùm commotum fuerit, ad officium obeundum ineptum redditur; sic animus ira turgescens, vel audacià inflatus, aut dolore oppressus sanitate carebit; & sicut eos sanam mentem habere dicimus, qui nullo improbo perturbantur motu, ita ad insanos erunt relegandi, qui contra sunt affecti. Securius igitur erit perturbationes, cum quibus vera quies consistere nequit, omnino ad nihilum redigere, quàm prudentià regere: non profunt milites suo Duci, qui illius imperium non audiunt, qui magis propendent ad bellum cum ratione gerendum, quàm ut illius auctoritatem propugnent. Quam diu morbidæ istæ febres, etsi levi tantùm paroxysmo animum exacerbabunt, tamdiu integra sanitate frui non licebit. Tertiò denique totos se consumunt, ut nobis ostendant celeres istos animæ volatus ex peccato natos esse, & ad peccata, & terrena deprimere; quod vel maximè se evincere contendunt illo Apostoli: *Cùm essemus in corpore passiones peccatorum &c.*

Sed amabo! temperemus paulisper æstum, & mente composita libremus singula: primò igitur dico, si omnis amor concupiscentiæ esset ad vitia deturbandus, tunc temperantia & fortitudo quoque ad malam hanc societatem pertineret; illæ enim virtutes directè referuntur ad ipsius fortis & temperantis conservationem, atque adè ex fine proximo, & amore conservationis ab utroque exercentur. Distingues ergo inter finem ultimum & centrum ipsius appetitûs sensitivi ex una parte, & inter centrum, & finem ultimum totius hominis secundùm omnes potentias, non est inhonestum, quòd facultas sensitiva per actus suos sistatur in bono sensibili tanquam in suo fine, citra cujus limites se se extendere non valet. Criminosè autem agit homo, si bona sensibilia per voluntatem complectatur tanquam ultimum finem creaturæ rationalis adæquatè sumptæ. Ad alterum consentientem me habes, passiones esse morbos & perturbationes, cum rationis limites prætergrediuntur, vel quando iisdem malè utimur. Et de his sapientissimè pronuntiavit Cæsar apud Salustium de bello Catil: *omnes homines, qui de rebus dubijs consultant, ab odio, ira, & inimicitia, atque misericordia vacuos esse decet.* At nobis sermo est de pathematis moderatis,

& rationis dicto audientibus, quæ tam utiliter possunt adhiberi, quàm cibis & potus, tanquam instrumenta ad sublimissimas virtutes assumuntur. Si appetitiones temperantur, & quamvis iudicium rationis præveniant, accidere potest, ut nulla ex parte obfusetur ejus claritas. Quòd si etiam aliquò modò concitiores nifus leviter alterent convenientem cordi dispositionem, id naturam humanam dedecere non est credendum. Quemadmodum enim moderatus calor, cibi sumptio, & digestio perturbat, nec parùm infuscat vim intelligendi, & somnus prorsus tollit ejus usum, nec tamen hæc censentur animali afferre nocumentum: sic quoque moderatæ commotiones & si paulò intensiores non adversantur naturæ, quam exinde vegetiorem, & expeditiorem reddunt ad opus jam deliberatum explendum, & ita malum bono per passionem illatum compensatur. Ad tertium denique non sunt confundendi actus partis inferioris cum motibus partis superioris. Inclinationes corporeæ in tota latitudine acceptæ nec sunt causa, nec effectus, aut pœna peccati. Non sunt causa scelerum, quæ sæpè prosequuntur objecta, vel ex se indifferentia, vel positivè rationi conformia, & quæ sæpè juvant ad opera honesta melius perficienda. Multò minùs convenit inclinationibus istis, ut numerentur inter pœnas peccati à protoplastis nostris commissi; non enim persuadebis mihi, caruisse hominem in statu puræ naturæ (si ita loqui licet) sensuum irritationibus, tum prævenientibus iudicium rationis, tum subsequenter. Non persuadebis, Adamum, & Evam sine genesi alterationum vixisse, prout tamen absurdissimum est dicere, in illis posita fuisse insecta, quæ ex carnibus aliorum hominum pullulant. Hoc igitur firmissimè tene, nocere solum excessum, qui vel non tollitur, aut non compensatur: Stoicos verò omnes nobis affectus amputantes, & nos spoliantes alacri vigore luxuriantis animi evertere nostri sensus optimam partem, & hominem ipsum de homine insanè tollere jactantiâ.

§. IV.

Conciliantur Stoicorum dicta.

Sed quid ego multum tanta verborum, & rationum profusione Stoicorum sectam oppugno, cum tamen ipsi è suo sapiente passiones non excluderint; sed eas admiserint, modò moderationem interventu virtutis susciperent. Nimirum nomine tenus ab ipsis dissidemus, & ipsi
Stoi-

Stoici affectum usurpant, non prout communi vocis rigore accipitur pro motu animæ non superante mediocritatem, sed pro motu fines mediocritatis prætergresso, quem rectè docent excindi, ac tolli oportere, nec esse temperandum; cùm eo ipso, quòd excedere supponatur, non suscipiat moderationem, nec sit futurus, qualis revera est, si adhibita temperetur castigatione. Hoc ut evincam testes duos locupletissimos, & Stoicorum principes profero. Primus sit Seneca, qui etsi oppositum sensisse videatur, multis tamen locis luculenter defendit, eos motus in sapientem cadere posse, qui nullo mentem errore subvertunt. Lege per otium lib. 2. de ira cap. 2. & invenies, quòd nulla ratio persuadeat, quòd minùs fiat horror frigidâ asperûs, ad quosdam tactus asperatio; quòd minùs ad peiores nuntios subrigantur capilli, prærupta cernentes sequatur vertigo, & rubor ad improba verba suffundatur. Lectionem non interrompe, & ita scriptam invenies: ira præceptis fugatur: est enim voluntarium animi vitium, non ex his, quæ conditione quadam humanæ sortis eveniunt, ideoque etiam sapientibus accidunt. Inter quæ & primus ille ictus animi ponendus est, qui nos post opinionem injuriæ movet. Hic subit etiam inter ludicra scenæ spectacula, & lectiones rerum vetustarum. Sæpe Clodio Cicronem expellenti, & Antonio occidenti videmur irasci. Et ne judices, Senecam in sapiente tantùm admittere motus primos naturaliter exsurgentes, hósque solùm eundem non eliminare; expressè te urget epist. 71. ex qua hæc verba transfero: non educo sapientem ex hominum numero, nec dolores ab illo, sicut ab aliqua rupe nullum sensum admittente submoveo. Memini ex duabus partibus illum esse compositum. Altera est irrationalis: hæc mordetur, uritur, dolet. Altera rationalis: hæc inconcussas opiniones habet, intrepida est, & indomita. Sic etiam lib. 1. de ira dicit: illa utendum est, non ut duce, sed ut milite.

Alterum, quem in testem produco est Epictetus, qui apud Arianum lib. 2. cap. 20. hæc nobis reliquit: enimverò quí potest olea non moveri, prout fert natura ipsius; aut vitis quodnam aliud est opus, quàm quale ei natura definivit? neque enim vel olea vitis, vel vitis olea potest opus præstare: tantùm enim abest, ut id fieri possit, ut ne conjecturâ quidem aliqua fingere istud liceat. Quocirca nec homo omnino affectionum humanarum expers esse poterit. Palmaris est alius locus, qui ostendit id, quod quæritur, ubi sic: visa terrificata animus sapientis non approbat, sed abjicit, respultque: igitur hoc est inter sapientem, & insipientem discrimen, quòd insipiens, qualia sibi ipse primò animi sui

pulsu visa sunt, sæva, & aspera, talia esse putet, & eadem incepta, quæ quasi jure metuenda sint, sua quoque offensione approbat. Sapiens autem, cum breviter, & strictim colore, atque vultu motus est, statum, vigoremque sententiæ suæ retinet, quam de hujusmodi visis semper habuit. Ut ergo dissertationem concludamus, officium rationis erit præstare, ut in passionibus abscindatur id, quod in latissimos palmites exundat; nam ut nullam omnino patiatur, nec ulli sperandum, nec ulli exoptandum. Hunc modum observet, qui nec impietatem in corpus imitetur, nec insaniam mentis prædat. Fluant lachrymæ, sed eadem exsiccentur: trahantur ex imo pectore gemitus, sed iidem & finiantur; talem te approba, qualem Virgilius Æneam describit:

Mens immota manet, lachryma volvantur inanes.

DISSERTATIO VIII.

Quanta sit passionum vehementia, & quænam omnium maximè violenta?

§. I.

Passionum ferocitas.

Sicut Ter Maximus Deus singulariter suam ostendit omnipotentiam, in stupenda hominis fabrica, in qua partes adedò inter se diversas, Terrestrem unam, cœlestem alteram, animam scilicet, & corpus conjunxit; sic illius infinita sapientia resplenduit in mirabilissima temperie, qua mutuam inter eas amicitiam constituit. Quamvis enim anima, & corpus contrariis ferrentur inclinationibus, corpus nimirum in terram, è qua fuerat formatum, anima verò in cœlum, unde suam traxerat originem, scivit tamen intelligentia suprema tam dexterè amborum desideria refrigerare, & justitiæ originalis vinculo tam arctè oppositos inter se appetitus constringere, ut anima particeps fieret omnium corporis commodorum, quin ab eo ullâ injuriâ afficeretur; & vicissim corpus spiritui famularetur, quin tamen ab eo ullam pateretur violentiam. In felicissimo isto statu imperabat anima cum magna dulcedine, & corpus summo cum gustu obediebat; quæcunque objecta ipsis proponebantur, utraque pars sine discordia in unum conspiraverat. Verum

rùm non adeò longo tempore fortunatissima ista conditio perduravit; tamdiu solum ea gavisa sunt, quamdiu protoparens noster divinis jussis obedivit. Quamprimùm serpentis promissis allectus, partes dæmonis secutus fuit; statim condignam retulit peccati pœnam, & ex illius exemplo, quo Deo rebellavit, etiam reliqua quamvis subdita, animalia occasionem sumperunt, contra hominem movendi seditionem, & tanquam hostes capitales insurgendi. Neque hic finita est omnis immutatio; sed ad interiora progressa, in ipso corpore principiorum divisio facta, & corpus ipsum animæ bellum indixit, bellum tantò crudelius, quantò tranquillitas prior non oriebatur tanquam effectus ex natura, sed erat merum gratiæ donum. Inimicitia succedens priori tranquillitati eò adhuc nocentior evasit, quòd ex crimine genèsim suam duxerit. Hoc enim sicut in se ex inordinata componitur confusione, ita ubique discordiam profeminat, non solum ad exsequendam sententiam. Divinæ Justitiæ, sed etiam ut eodem tempore proprio obsecundet genio. Ex hoc fonte confurgunt omnes nostrarum passionum turbines, qui licet æqualiter filii sint corporis & animæ, ac inter utramque partem mediatores esse deberent; crudeliter tamen oppositionem utriusque partis adaugent, ita ut nec minimum quidem actum obedientiæ exercere velint sine crimine. Appetitus, qui concupiscentiæ nomine auditur, plerumque corporis partes protegere conatur; e contra, qui irascibilis nomen implet, plerumque animæ operationibus favet. Primus nos immergit infami otio, & voluptatibus: secundus nos obarmat contra dolorem, calcæque addit ad actiones generosas incipiendas; ita ut homo vix possit cognoscere, quid sit vera tranquillitas, sed cogatur perpetuò in se immanes nutrire vyperas, quibus miserè dilaceratur.

Ut verò manifestiùs pateat, quanta sit vis affectuum, si modum excedant, nonnihil dicendum, quot, & quantos ipsi corpori ægritudines hi animi morbi inferant. Vix non audeo asserere, æquè tot stragulari desperatione, quàm anginæ constrictione periclitantur; tot ab ira in furorem agi, quot redundante bile, & felle corroduntur; tot desideriorum submergi poculis, quot hydropisi turgescunt; tot amoris ignibus exuri, quot febrili exæstuant ardore; tot à mœrore exedi medullas, quot vetita absument gangræna carnes; tot intestinis odiis exanimari, quot lenta phtisi devorantur. Non vacat per pathemata fusiùs vagari ad ostendendum, quas in corpore infirmitates omnes undecim procreare possint: iræ, & mœoris animi potissimùm inspicimus tristissima ulcera. De ira quidem, quamvis ea fortè extremam cladem animali non inferat, constat nihilominus, quantum damnum proficiscatur hac furente Me-

gara. Quis licet latera sic confringere poterit, quæ verruca ignita sic explorat corpus; quæ insania sic stupida reddit naturalia præcordia, ut ira, & furor? Febres exsuscitat acutissimas; ob nativi caloris effervescentiam circa præcordia vitiosi humores in peregrinos tubulos præcipitantur summo cum impetu; ex quo tumultu motus quidam quasi convulsivi necessariò emergent. Si in exteriores corporis partes tot, ac tantæ profiliunt alterationes, quos Poëta descripsit hoc disticho:

*Ora tument irâ, nigrescunt sanguine vena,
Lumina Gorgoneo sævius angue micant.*

si tantas, inquam, alterationes in exteriora membra despumat, quas idearum confusiones, quæ deliria hæc insaniæ soror in mente pariet? poterit quidem interdum frigidioribus quibusdam corporibus ira foras prodiens non levem afferre utilitatem, quando calorem debiliorem magis accendit, ac crassiores humores dissipando confertim exhalat: ordinariè tamen iracundia tam foras profiliens, quàm intus compressa spiritus sanguineos exasperabit, æstuosissima acredine humidum innatum carpet, depascetur, atque inæqualibus motuum concussionibus, præsertim in biliosis, melancholicis, & senectâ gravatis, plurimorum morborum nosocomium eriget. Maximè autem sanitatis perniciem secum trahet, ubi refectionis tempore ebullire incipiet; tunc enim non solum dissipatis ac venenatis spiritibus concoctio vitiabitur, sed effusa bile succus chylosus sædè inquinatus aut cachexiam inducet, aut diarrhææ intempestivas dejectiones provocabit.

Magis adhuc valetudinem evertit, corpusque pessimè afficit doloris, & mæstitiæ introrsum conclusio. Nihil dico de phrasiologia, quibus languorem animi aliqui depingunt, dum eum cordis tineant, amarum cibum, aut balneum diaboli vocitant: id certum, magna sanguinis, & spirituum contractione avocari necessarium calorem à sensuum instrumentis, aliisque facultatibus vitalibus. Hinc macies, & ossium exsiccatio, tarditas, & molestia operandi, injecto membris torpore quodam, & veluti stupore ob spirituum attractionem. Cor verò malè torquetur per tristitiam, eò quod natura confestim benignum spirituum nectar per corpus diffusum ad centrum revocet, & copiosa nimietate aggravet. Istud verò, tanquam fornax, necessariò scatens plurimis fuliginibus eum non sufficiat ob maximam constrictionem ad easdem depellendas, idè ejus puritati, & serenitati, bonoque statui plurimum officitur. Hinc istis lento tenore diaphragma deprimitur, crebra suspiria & gemitus prorumpunt: aliis appetentia ciborum labefactatur nullis Luculli, aut Apicii coquis restauranda; alimentorum

in ventriculo concoctio destruitur, quæ omnia obstructionibus, cardiæ, logiæ, melancholiæ, cancræsis tumoribus, aliisque innumeris morbis fo- res pandunt, tandemque vivacior sanguis in vappam stagnantem resolvitur, ut meritò de anxietate & sollicitudine illud Ovidii proferatur :

*Si quid & in nobis, vivi fuit antè vigoris,
Extinctum longis excidit omne malis.*

§. II.

Subinde passiones mortem accelerant.

VERùm inter leviores clades numerandi sunt tabifici morbi? quibus tristitia molestiam creat ; tanta interdum est per mærorem cordis exsiccatio, ut postquam cuncta, quæ invenit, consumplerit, plurimi paralyti, & apoplexiâ multi in mortem sint prolapsi, ac si debili fulcimen- to niterentur, subrutis eorum viribus immodico tristitiæ ponde- re. Sic luctu, animique tædio obiisse maximum Philosophorum Prin- cipem, tradit Justinus Martyr in sua parænesi, & Gregorius Nazianze- nus oratione prima contra Julianum. Sed quid mirum si tam atro ho- ste incumbente animal suffocetur, & vita ipsi eripiat, si ex mera læti- tia, quæ utique est blandissima & floridissima titillatio; æquè tristes ef- fectus germinant? non solum ob immoderatum gaudium lipothimia, & animi defectio consequitur, sed plena animalis extinctio non rarò acce- leratur. Sic fidem non superat, quod notavit Livius lib. 2. Decade 3. nuntiata clade, quæ ad lacum Thrasimenum acciderat Romanis, altera mater sospiti filio ad ipsam urbis portam obvia facta, nimio gaudiò re- pentè exspiravit : altera cum falsò mortis filii nuntiò mæsta domi reside- ret, ad primum redeuntis conspectum exanimis concidit, nec par esse potuit gaudio, quæ superfuerat orbitati, & dolori. Sic facile mihi per- suadet Valerianus maximus, quod scribit lib. 9. cap. 12 : nempe Philip- pidem, comædiarum scriptorem non ignobilem, cum in Poëtarum cer- tamine præter spem æmulos vicisset, effusèque gauderet, præ lætitiæ magnitudine subitanea morte corruisse, & flebilem spectatoribus tragæ- diam exhibuisse. Sic negare non ausim testimonium Gelii noct. Attic. lib. 3. cap. 15. ex quo accepi, Diagoram Rhodium, cum tres filios ado- lescentes, unum pugilem, alterum pancratiastem, tertium luctatorem eodem olympiæ die simul coronatos videret, & eum tres nati amplexi, coronis suis patris capiti impositis oscularentur, simulque gratulabun-

dus populus flores undique in eum jaceret, spectante toto foro animam
 efflasse. Affectus nimirum iste maximè cor dilatat, & exinanit juxta il-
 lud: *Tunc videbis, & afflues, mirabitur, & dilatabitur cor tuum.*
 Ex quo fit, ut vitalis, & insitus calor foras ad rem lætabilem immodicè
 dispellatur, & animoso ocurso festinet, sensimque per sudorem, rubo-
 rem, & sanguinis diffusionem intereat, & evanescat. Potest insuper ad
 hæc incommoda præter necessariam spirituum eruptionem plurimum
 conferre cohibita inspiratio, solave, ore semper patulo manente,
 continua expiratio; sic enim cor respiratione opportuna destitu-
 tum calore opprimetur, animusque deficiet. Videtur res eò modò
 habere, sicut cum iis, qui diu in tenebris versati, si repenti maximo
 splendori occurrant, subito excæcantur. Sapientum enim consensu na-
 tura subitas mutationes non tolerat. Sicutiam illis, qui famem longo
 tempore perpeffi sunt, evenit; quippe in cibum magna involant avidi-
 tate, plùsque alimenti assumunt, quàm eorum virtus possit digerere,
 quo fit, ut abundantia non restaurentur, sed potius pereant.

Denique validus, & intempestivus risus, quamvis progenies sit
 ipsius gaudii, tam magnum est malum, ut non minùs pluribus interitum
 adduxerit lachrymis dignum. Ita Zeuxis pictorum Alpha, cum anum à
 se admodum ridiculè depictam fuisset contuitus, adeò vehementem su-
 stulit cachinum, ut animam in faciem edentulæ vetulæ exhalaverit.
 Chryssippi immoderatus risus passim legitur; cum enim puerum tardiùs
 accurrentem ad abigendum asellum, ficus devorantem adhortatus fuisset,
 ut quando cibum asello dedisset, propinaret & potum; inter hæc
 dicendum adeò vehemens eum risus aggressus est, ut post hunc labia
 nunquam ampliùs commoverit. Scilicet in his, & similibus eventibus
 ob diaphragmatis dilatationem per consensum nimis quoque muscoli
 thoracis dilatantur; unde præter diffusionem nimiam, & dissipationem
 spirituum, latera quoque & dorsum, & universum corpus nimia succus-
 sione, & agitatione malè afficitur. Hoc tamen est observatum ab eru-
 ditis, difficiliùs vitam eripi per inordinatum gaudium, quàm per tristi-
 tiæ oppressionem. Confirmant item plurimi variis hypocratis, & Gale-
 ni testimoniis, neminem per iram mortem obiisse, quorum auctoritas
 non leviratione fulcitur. Nempe cor per iracundiam non prorsus eva-
 cuatur, ut in affectu gaudii contingere solet; neque suffocatur nimio
 sanguinis & spirituum appulsu, quot insolitæ tristitiæ confectarium esse
 dicitur. Quando igitur apud aliquos legitur, Lucium Syllam, Ner-
 vam, & Valentinianum Imperatores, ac Wenceslaum Bohemorum
 Regem nimio furore excandescens interiisse, id vel casui extra naturæ
 leges

leges communes adscribendum, vel non tam in affectum iræ referri oportet, quàm in morbum ex ira conceptum; si autem mors repentina ingruerit, eadem attribuenda est causæ alicui alteri præsentaneæ necis, quæ connisu vehementissimo, & contentione extraordinaria loco, & sede movetur. Sic Valentinianæ mortis originem reddit S. Hieronymus crumpentem nimium sanguinem, eò quòd Imperator adversus Quados, & Sarmatas propter Illirici depopulationem minitans, & fremens exarsisset. Ordinariè tamen iracundia non infert necem; retractis enim ad cor sanguineis spiritibus arx vitæ firmatur: neque tamen omninò opprimitur, eò quòd retractatio cum moderamine contingat.

Vidisti ex parte aliqua quantorum malorum mater sit inordinatus passionum fremitus, ubi anima instar naucleri, vel Principis in Imperio eas non moderatur, ac regit. Hoc tantùm addo, affectus sensitivos, nisi superioris facultatis mandato intra legitimos contineantur fines, longè fortiores esse, quàm sint ipsi affectus voluntatis circa objecta spiritualia. Confessionem hujus asserti sic extorqueri posse judico. Cognitiones, quæ circa bona intelligibilia solum versantur, tametsi interdum non relinquunt dubium de veritate; nihilominus sunt obscurissimæ circa rerum proprietates, nec aliæ, quàm quales solet formare de luce, & coloribus cæcus à nativitate: vel quas formaret de pratis, montibus, montibus, floribus, de insulis, stellis, urbibus, musica &c. ille, qui natus, & educatus esset in obscurissima specu subterrenea, audirétque Philosophos de his multa hinc inde disputantes. Ita quamvis animæ nostræ vi polleant intellectivæ; quia tamen à primo suæ creationis instanti fuerunt inclusæ intra specum terream hujus corporis, ad quam per nullum sensum illabitur ullum æternum, ullum infinitum, ulla substantia, aut ens spirituale: & ex altera parte, quia harum rerum species infusæ à Deo non habent: ac demum qui suâ perspicaciâ non adæquant Angelicam, quæ sensibus corporeis carens ad intelligendum illis non indiget, eò quòd sit substantia completa spiritualis: hac de causa obscurissimum formant conceptum de amabilitate horum objectorum; cum tamen clarissima fruantur cognitione earum rerum, quas aliquo sensu prehendunt. Jam verò ex obscuritate harum cognitionum naturaliter nascitur, quòd prosecutiones, aut fugæ appetitûs in res vel nullo modo, vel non nisi tepidissimè ferantur. Accedit, quòd plerique hæreant in purissima superficie, nec ulterius applicent intellectum, ut attentam meditatione ac consideratione denudent bona intelligibilia, eaque perfectè apparere faciant, juxta illud Jeremiæ 12. *Nullus est, qui recogitet corde: atque illud alterum: Corpus, quod corrumpitur, aggravat animam, & terrena*

inhabitatio deprimit sensum multa cogitantem. Sap. 9. *econtra ex perspicacitate cognitionum circa alias res, quas sensu aliquo possidemus, naturaliter procedit, quod prosecutiones, aut fugæ sint vehementissimæ, & nisi Deus, & ratio opituletur, etiam violentæ.* Denique affectus appetitûs sensitivi connexi sunt cum transmutatione corporali, ratione cujus clariùs innotescunt, magisque percipiuntur, & eò ipso sæpiùs quæruntur tanquam remedia, & medicinæ adversùs alios affectus, & dispositiones molestas, & si ita loqui fas est, quasi febriles; ideò avidius appetitus eosdem indagat, eisque intensius, majorique cum impetu incumbit. Hæc autem iterum non ita se habent in affectibus facultatis rationalis: igitur etiam ex hoc capite patheticæ appetitiones sua virtute superant affectus potentia rationalis.

§. III.

Quid de hoc senserint Antiqui?

A Trocitas hæc passionum non latuit antiquos Philosophos; sed in hoc errârunt, quòd illius fontem assererent solam voluntatem, & radicem illarum opposita intrinseca principia, animam scilicet & corpus, non agnoscerent. Judicabant ex mala consuetudine, vel ex falsis opinionibus omnem provenire tumultum; ideòque sicut morbos, contrariis expellere medicamentis nitimur; ita sibi persuadebant, optimis præceptis, & bona educatione, eundem esse tollendum. Ideo erexerunt publica lycæa ad disputandum de summo bono: composuerunt panegyricas orationes ad extollendum virtutis pretium: declamârunt contra patheticos motus maledictis invectivis ad eosdem eliminandos. At ubi se ipsos debiles nimium deprehenderunt, & omnem laborem adhibitum recidere incassum, tunc temerariè ausi sunt supremam Dei Sapientiam accusare, quæ hominem fabricasset ex duabus partibus, quas impossibile foret, amicâ inter se concordia gaudere. Si uno, vel altero passu longius progressi fuissent, semitam invenissent, quæ ad veritatis cognitionem certò adducit. Si enim nobiscum fatentur Deum adèò justum esse, ut nihil possit à nobis exigere, quod vires nostras superat; facile inde inferre potuissent, tantam fragilitatem ex delicto aliquo perpetrato tanquam pœnam, & jugum, sub quo gemimus, non imponi nobis à natura; sed descendere à justa Dei vindicta. Facillimum erat hoc consequens eruere: agnosco propriam virium debilitatem; igitur ad sum-

summam bonitatem pro impetrandis auxiliis est recurrendum. Sed excavit illos propria superbia, malueruntque accusare Altissimi providentiam, quam propriam confiteri infirmitatem. Utinam non in hoc idem sæpè veræ fidei cultores delinquerent, & potius scelera sua agnoscerent causam esse tantæ tyrannidis, quam ut Deum nimii rigoris insimularent. Non ex sola originaria culpa prosiliunt viperæ virulentæ affectuum; sed ex propriis sceleribus plurimum sobolescunt. Permittit Deus inimicos suos sub insanientium passionum bestiis vexari; ille furiis istis infernalibus imperat, ut sui loco vindictam exercean, ille convertit hominum peccata in illorum supplicia, ut quotidiano discamus usu, quam verè Augustinus scripserit: *Jussisti Domine, & sic est, ut pœna sua sibi sit omnis inordinatus animus.* Non opus est, ut Deus ex abyssu dæmones evocet; non ut barathri fauces adaperiat: sceleratus sui ipsius carnifex tot in se experitur tormentorum genera, quot enutrit passionum monstra. Tot flagella, quæ nos exterrent suo strepitu, non sunt omnium durissima: pestes, quibus integræ regiones exhaustiuntur; bella, quæ provincias devastant; fulmina, quæ capitibus nostris imminent; voragines, quæ terræ motibus recluduntur, leviora tantum sunt iræ divinæ verbera: utitur sæpè istis, tanquam misericordiæ suæ instrumentis ad corrigendos filios charissimos. At ubi statuit multarum culparum reos punire, & ad plenè satisfaciendum justissimæ suæ indignationi proponit eos derelinquere in luto suarum immunditiarum; tunc imperat passionibus sævissimam exercere carnificinam; permittit, ut inclinationes istæ in peccata convertantur, & ut in erroribus suis majorem saporem gustantes non amplius cogitent de seditione mitiganda, aut vitâ ad meliorem statum convertendâ.

Hoc solum habet aliquid commodi in passionibus, quòd longo tempore non subsistant, tum propter fluxum, & refluxum continuum sensibilibus objectorum, tum propter agnatam illis transmutationem corporalem, cujus diuturna, & uniformis permanentia valdè nocet, nec à natura toleratur. Sicut enim beneficiò Divinæ providentiæ contingit, ut scorpionum unus alteri insidietur, eumque perimat, ne fecundissima pestiferorum animalium propagatione humanum genus attenuetur; ita respectu horum colubrorum, qui fecunditate sua virtutes multum superant, bonum est, ut unus ab altero interimatur, seque illi carnificem præbeat. Videlicet quælibet affectio diutius attentè, & uniformiter continuata cor vexare, & naturalem ejus dispositionem plurimum immutare solet. Quare eodem modo, quo, necesse est variare agentium externorum incurfus, ut immutatis eorum influxibus incolumitati

eorporis consulatur ; quod fieri vix poterit absque calidorum , & frigidorum , humidorum , & siccorum vicissitudine ; ita oportet quoque variare sensibiles motus , ne organa earum operationum nimium depraventur , in eamque incidant corruptionem , cujus deinde emendatio , & reditus , in statum naturalem reddatur impossibilis . Exercebunt igitur passiones perpetua inter se certamina ; odium extinguet amoris flammam ; pavidus timor perimet temeritatem ; spes cum desperatione pugnabit ; nihil magis hilarem delectationis vultum contristabit , quàm mæstus doloris aspectus . Imitabuntur Cadmæos fratres , qui simul ex draconum dentibus nati , & educati , mutuo in se ipsos irruerunt , sèque invicem confecerunt solis superstitibus septem , ex quibus Thebanus populus traxit originem . Hoc igitur perpetuum , & ferum passionum bellum iniquam illarum intensiorem aliqua ratione diminuet , temperabitque .

§. IV.

Quanam ex omnibus passionibus ferocissima ?

Sicut autem opus est optimè perspectos habere morbos , ut proportionata remedia possint adhiberi : ita non minùs justum est in indolem corruptorum istorum halituum indagare , & quærere , quinam omnium fortiori assultu hominem aggrediatur , ut pariter sapienti , & sufficienti gubernentur regulâ . Circa hanc materiam philosophi adeò discordant , ut eorum litigia ad hanc usque diem nondum fuerint composita . Divinus Plato dubiam quæstionem non resolvens , solum docuit quatuor esse pathemata , quæ aliis viderentur potiora . Horum voluptatem statuebat primum , quæ licèt exteriori facie nihil , nisi dulcedinem spiraret , pertinaciori tamen impetu bellum rationi movet , quàm dolor . Secundum dicebat iram , quæ , cùm aliud non sit , quàm sanguinis fervor circa cor , necessariò in igne , & fervore consistit , & nisi benignior natura curâset , ut in ortu primo statim suffocaretur , monstrum ferocius non facilè reperiretur . Hæc bellua , licèt sit valdè indomita , non tamen adeò longè distat à ratione , quàm voluptas ; quia sicut faciliùs cicurari possunt leones Africani , quàm pisces , ita minori labore sedatur homo irâ accensus , quàm voluptatibus immerfus ex illis extrahatur . Tertium est desiderium honoris , quæ reliquas omnes appetitiones multum superat : hæc enim auget animum militum ducibus ad expugnanda urbium munimenta ; hæc eloquentes reddit oratorum linguas , & hæc sapientes facit phi-

philosophos ; quamvis enim omnes isti diversas ingrediantur vias , ad eundem tamen tendunt terminum. Quartum est timor mortis , qui armis suis tam insolitos excitat turbines , ut eos quidem patiamur , non tamen sufficienter cognoscamus. Illa hominem omni umbra mali exterret , & tamen ipsi audaciam inspirat : auget vires jam prostratis , & adjuvante desperatione recuperat victorias jam deperditas. Sed veniam nobis dabit nobilissimus Philosophus , si illius rationes non approbaverimus. Voluptas enim potius origo est omnium passionum magis placitarum , nec adeo ferocit , ut non facile pacificetur , ubi dolor ipsi opponitur. Vires has suas omnes deperdit ad inimici adventum , nec homines facile corrumpit , nisi ubi nulla ipsi contrarietate resistitur. Quam primum occurrit , qui voluptati bellum movet , cedit illa , fugitque , attestante experientia , quod levissimum vulnus inflatum obliterare soleat delectationem etiam intensissimam. In ira fervet revera ardor ; sed modice durat , & nisi migret in odium , subitanea magis erit , quam violenta , nec malignos adeo producet fructus , aut perversa excogitabit consilia. Gloriæ desiderium æternitatem quidem fert , & juxta Tacitum omnium novissime exuitur , maloque huic non nisi morte adveniente medeberis : attamen multiplicata hinc inde infortunia illud diminuunt , & duo , aut tria certamina infeliciter inita , in melancholicam illud convertunt tristitiam. Contentus vixisset Alexander devictâ Græciâ , si Persia habuisset , quem ipsi opponeret , & sinister aliquis prælii successus restringere potuisset , frænareque indomita desideria : magnanimum illius pectus , cui angusta minus erant totius mundi confinia , satiatum fuisset solo Patris sui Philippi regno , si tot , tam felices , & temerariam etiam spem excedentes victoriæ ambitionem non inflâssent , totiusque orbis dominium promississent. Timor mortis est passio , quæ plebeios tantum animos occupare solet ; generosi eandem spernunt ; infirmi ab ea sese defendunt spe omnium miserorum individua sociâ : hæcubi defecerit , succedit desperatio , ferax arduorum , & omnem philosophorum constantiam superantium actuum.

Aristoteles in uno , vel altero loco sustinet odium esse eam passionem , quæ ultra debitum ordinem hominem maxime excedere compellit. Quando enim ira , aliàs de se satis formidabilis , multis suspicionibus nutrita , maledictis exasperata , & in sinu , tanquam fornace , longo tempore excocta , mutatur in odium , tunc secum trahet cumulum omnis perfidiæ , præcipitabitque in omnia scelera. Tunc enim in cordis throno residens (quod aliàs amori pro sede deputatur) omnes alias passiones suo furori cogit famulari. Ira ipsi providet de armorum gene-

re; audacia pro ipsa configit, spes faustum promittit exitum, desperatio ad victoriam obtinendam adjuvat, & quod adhuc magis obstupescendum est, ex ipso amore, quamvis hoste suo vires colligit. Utitur enim illius axiomatibus ad oppositos prorsus fines sequitur illius vestigia, & placitum adeò affectum adigit esse ministrum tam detestabilem intentionum, ut pulchrè annotavit Seneca in Medæa.

*Si quaris odio misera, quem statuas modum,
Imitare amorem.*

Nihilominus sicut Protothypus nunquam assequitur Ectypon, sic odium quàm pertinax denique illud sit, cum amore tamen nunquam erit comparandum, semperque infra illius gradum subsistet. Idè aliqui etiam stagititæ opinionem deserentes judicârunt, Zelotypiam violentiâ de omnibus passionibus triumphare; & verò, si hæc sententia veritatem non attingit, certè fundamenta satis firma obtinet. Cùm enim Zelotypia componatur ex amore, & odio, contrarii adeò hospites in officio contineri non poterunt, quin sæpè bellum oriatur, & quin subiecta pathemata arripiant arma ad tuenda utriusque commoda; hinc Zelotypus nunquam carebit timore, audaciâ, gaudiò, tristitiâ: & desperatione: quamvis autem zelus mixtum aliquod sit ex amore, & odio, non tamen sequitur esse maximè impetuosam ex omnibus corporis impressionibus; ingredientia quippe hujus miscellæ nunquam quieta simul permanebunt, nisi in certo gradu attemperentur; & sicut elementa non uniuntur in eodem corpore, si illorum virtutes non refringantur; ita ex ambabus passionibus nunquam consurget Zelotypia; si utriusque vires debita ratione non inhibeantur. Opportet necessariò, ut amor imminuat odium, ut delectatio debilitet dolorem, & spes mitiget desperationis excessum. Non desunt similitudines ad rem declarandam. Sic enim inventa sunt venena, quæ simul permixta, antidotum efficiunt mortifera sua vi deperditâ, & necis loco vitam afferunt. Ita in Zelotypia ab amore extinguetur rabies odii, nec tam acutis stimulis cruciabitur Zelotypus, cùm isti elidantur in oppositarum passionum pugna. Igitur cogimur tandem dicere, amorem esse, qui reliquos omnes affectus ferocitate superat, utpote qui juxta superius dicta omnium aliarum cordis agitationum principium, & causa fuit ostensa. Reliquæ cunctæ fateri debebunt, omnem se accipere suam virtutem ab eo, à quo tanquam featurigine proveniunt; & per hunc in ipsas influere omnem efferratum impetum. Amor est quasi princeps, qui inclinationibus reliquis tanquam subditis imperat, ille est quasi primum mobile, quod reliquas sphaeras secum proprio motu trahit; ita ut incumbendum solum sit ad debi-

debitam amoris moderationem. Si enim hic ritè dirigatur, omnes aliæ exemplum imitabuntur, & homo qui moderatè scit amare, facilè poterit violenta frænare desideria, aut vanas sopire spes.

DISSERTATIO IX.

An passionum atrocitas tollat libertatem.

§. I.

Nulla est timenda libertati violentia à passionibus.

OB summam hanc affectuum efficaciam ad pertrahendam in facinoris consortium voluntatem, de qua unusquisque potest sibi metipsum ferre testimonium locupletissimum, aliqui longius sunt progressi, quàm par erat; & quærentes excusationem suis delictis, statuerunt, liberam facultatem ab his tortoribus juratò odiò in eam tendentibus abripi, & vinciri. Hoc Ethnicos voluisse ex eorum doctrina non obscurè liquet. Sic enim discurrebant: facilius est excludere perniciosissima, quàm regere; & non admittere, quàm admissa moderari: cùm semel in possessione posita sunt, suum superant rectorem, nec se recidi, minulve patiuntur. Deinde ratio ipsa, cui fræna traduntur, tamdiu potens est, quàm diu affectus eam non impugnat: si semel se illi commiscuerint, & inquinaverint, quos priùs ratio facilè submovere potuisset, continere ampliùs non poterit; ut enim in præceptis datis corporibus nullum sui arbitrium superest, nec resistere, morarive dejecta possunt, sed omne consilium, & pœnitentiam abscondit irrevocabilis præcipitatio, debentque necessariò eo pervenire, quo priùs non ire licuisset: ita animus, si in iram, amorem aliòsque se projecit affectus, non permittitur reprimere impetum, rapietur vi illorum oportet, suo pondere ad imum agatur, nec adregrediendum ampliùs locus relinquetur. In primis finibus hostis est arcendus; ubi namque semel intravit, portisque se intulit, modum agendi à captivis non recipiet. Ubi mens irritamenta affectuum in se ipsa patitur, jam ultrà, quàm oportet, processerunt: facient de cætero quantum volent, non quantum ratio permiserit, júsque omne in voluntatem sibi arrogabunt. Ex his, similibusque veterum lamentis de vi passionum in raptanda voluntate spurcissimus Calvinus lib. 2.

instit. cap. 3. intulit, relinqui tantum voluntati, ut spontaneè, & non coactè, non tamen cum potestate frænandi operationem eliciat.

Nihilominus nullam libertati à passionibus, quamvis multum ferocientibus timendam esse violentiam, est manifesta fidei veritas. Prostat namque peremptorium summi principis, ac naturæ auctoris edictum ad hominem, in quo, non minùs appetitus viguit: *Subtus te erit appetitus tuus, & tu dominaberis illius.* Arieti huic potentissimo addamus ad urgendum philosophorum auctoritatem. Adeat hæresiarcha horum principem, & lib. 3. ethicor. cap. 1. videbit, contrarium dicere esse ridiculum, esse excusationem, quæ jure obtendi non possit sceleri ex cupiditate admissio. Legat Platonem, & inveniet, nihil esse frequentius illi, quàm loqui de aurigatione animæ, ad hoc, ut præmium pænàmque consequatur. Stoicos ipsos, quos tamen pro se allegat, idem sensisse testatissimum est ex eo, quod docuerint, appetitum à facultate libera eò usque domari posse, ut ne mutire quidem contrà audeat. Sed quid importunè suffragia philosophorum coacervamus, quos omnes idem sensisse, atque idcirco impegisse, ultrò concedit libertatis juratus osor Calvinus? igitur ad rationis tela descendendum est, quæ tamen ipsa Aristotelis pharetra suggerit, sic igitur contendo. Appetitus cum suis functionibus habet se ad partem rationalem tanquam subditus ad principem, non quidem principatu despótico, qui est domini ad servum, ubi præcluditur facultas rationes, & sua proponendi jura; sed principatu politico, aut regali, qui relinquit subditis liberam quoad plura electionem, ac dispositionem: imò quoad plura subest rationis imperio, quàm ulla potentia materialis. Sib facultates animæ vegetantis per se, ac directè liberæ voluntati non subsunt, sed prorsus ad ejus mandata se surdas exhibent. Sanè demisso in ventriculum cibo, liberum homini ultra non est, ut materia illa dentibus subacta, & commolita, postmodum interventu caloris, tritura, maceratione, fermentoque liquorum excoquatur in chylum, ac per venas lacteas, tanquam elices, ac tubos ad ductum, quem thoracicum Recentiores Anatomici appellant, deferatur: non est amplius liberum, ut materia hæc ad varias corporis partes derivata præmissa multiplici apparatu dispositionum, viventis formam inducat, illudque alat, & suæ quantitatis accessione, amplius faciat. In hæc quippe omnia, semel ingestò cibo, nullum ultra jus est voluntati. Judicium idem est de externis sensibus; nam si objectum adsit, & potentiam immissa specie, objecti semine, perfundat, non erit in potestate voluntatis statuere, an actus dispositioni illi consentaneus exsurgere debeat, an non: etsi sensationem externam impedire volueris, sensorium obstruere cogeris.

Fun-

Fundatur hæc necessitas in fine proximo harum potentiarum materialium, quæ est conservatio proprii individui, aut speciei; unde quoad operationes immediatè necessarias ad utrumque istum finem non possunt impediri directè per imperium rationis, sed tantum indirectè, subtrahendo nimirum pabulum, vel intensè speculando, ut spiritus. & vires animæ exsugantur, ut iis accidit, qui libris impallefcunt. At verò longè aliter se res habet in appetitu sensitivo, nulla enim operatio hujus facultatis, rationi magis propinqua, ita est necessaria ad fines assignatos conservationis individui, & speciei, sicut ad eosdem requiruntur necessariò actus aliarum virium & partium corporis, maximè verò cordis, & quæ idèò omnium minimè subduntur voluntatis imperio. Relicta igitur erit voluntati libertas indifferentiæ supra hanc virtutem sensitivam, & illius operationes, utpote, quæ non sunt determinatæ ad prædictos ipsarum fines immediatos: ipsa autem voluntas captiva, & renitens à subdito suo abripi, eique subiacere non poterit; sed ad summum per sympathiam harum duarum facultatum in eadem anima radicatarum contingere poterit, ut appetitu in aliquod objectum inflammato vicinus voluntati paries ardeat, & flammam de incenso fomite adjuncto concipiat.

Hinc insignem injuriam in Magistratus, & legislatores, ac quotquot alios faciunt, qui ut appetitui obsistamus pro potestate, & à passionibus nos avocare satagunt, inficiatione libertatis quinti, ac sexti Evangelii buccinatores nuperi Calvinus, Lutherus, & mali hujus corvi malum ovum Melancthon. Quid enim proderunt tot Senecæ, & Epicteti, aliorumque admonitiones, si tetra hæc, & in legum everfionem conficta de humanæ libertatis inanitate opinatio solidò nitatur fundamento? verum ut hæc omnia adhuc magis perspectiora fiant, fasque sit unicuique insignem totius honestatis everfionem ex teterrimo hoc dogmate consecuturam, quasi manibus palpare; statuamus hominem de Calvini caula hac persuasionem institutum, mala, quæ admittit, necessitate admitti, ereptâ sibi ad bonum facultate à sæviente passionum tyrannide, quarum impetum effugere, aut cassum reddere non valeat. Hunc igitur Calvinii propositionem sic persuasum, & obfirmatissimè perversæ opinioni affixum statuamus inter virtutes, & passiones medium, hinc trahente ad carnis affectus concupiscentia; inde invitante ad bonum naturaliter insito rationis lumine, piis monitis, Deo ipso per scripturas, ac præsertim per internum magisterium in cordis scholâ, eò nutantem animum impellente. Interim via ad bonum aspera, salebrosa, prærupta, & sentibus obsita proponitur: econtra delapsus in bonum sensibile lenis, mollis, rotas inter, ac violas, nullius laboris, nullius difficultatis amaritudine perlitus

litus obversatur animo. Occurret insuper menti motus appetentis facultatis eâ efficacîâ adigere, & pellicere, ut obsistere tantis viribus humanam excedat potestatem; viam ad bonum esse oclusam, ac imper-viam, quidquid tandem conetur homo. Eccui dubium incidet, quamnam in partem his propositis misera voluntas se summo impetu sit præcipitatura? quid enim segetem sibi maroris, ac tristitiæ comparet per stultum laborem illud exsequendi, quod præstare nulla poterit ratione, sublatâ ad id facultate? quorsum inane ineat consilium vitandi illud, quod, ut homo maximè velit, passio, cui resisti non potest, ab invito extorquebit? hortamenta, aut leges propones? causabitur inanes esse voces. Sibi enim per passionis assultum adactò ad eam partem, quam amplectitur, fas non esse ad aliam verti. Intentabis supplicia, præsertim æterna in passionem consentientibus divinitus infligenda? ne ille sublatò cachinnò fatua hæc terculamenta explodet. Quòd lumen naturæ clarissimè ostendat, ab infinita bonitate alienum esse, ut quæ per nos fieri injecta necessitate voluit, tantarum immanitate pœnarum plectere statuatur, cum vel apud barbaras gentes eorum, quæ invitus quis admisit, supplicium nemo sustineat. Itaque facessere sine dubio jubebit importunum hortatorem, & auribus ad quævis monita oclusis, præceps ruet in ea bona, quæ sensum in præsentia feriunt, iis flocci factis, quæ plena fellis, ac amaritudinis, insensibili aliqua, & procul posita, imò verò assecutu impossibili bonitate prædita ostentantur. Unde monitorum, inspirationum, ac legum, divinæ, ac humanæ operæ fructus omnes everti nemo non videt.

Quæ autem hucusque in medium protulimus de facultate appetente, non sunt vel ad irascibilem, vel ad concupiscibilem tantum arctanda. Reperies quidem apud Stagiritam 7. Ethic. cap. 6., iram quodammodo sequi rationem, cupiditatem non item, & ideò cupiditatem esse ira turpiorem. Per hoc tamen non intendit tueri, appetitum concupiscibilem extorquere à ratione omnem actionem. Sed tantum affirmat, concupiscentiam includere plus turpitudinis, eò quòd semper exorbitet à via, quam recta ratio indigit; ira autem plerumque consurgat, ex edicto rationis, & in illud, quod faciendum est effervescat, quamvis cum admixta aliqua perturbatione. Et hunc germanum esse sensum verborum manifestè deprehendes, si modò lectionem non interruperis, sed ab iis, quæ separatim dicuntur de concupiscentia perrexeris ad ea, quæ de ira scribuntur. Ita enim juxta Mauri clarissimi interpretis versionem sequitur: jam verò minus turpem esse incontinentiam iræ, quam cupiditatem, consideremus. Ira enim audire quidem rationem videtur, sed tamen
non

non rectè percipere, quemadmodum festini ministri faciunt, qui priusquam omnia, quæ dicuntur, audiverint, excurrunt, deinde ab actione aberrant, & canes quoque, antequam inspexerint, an amicus sit quispiam, si strepitum tantummodò fecerit, latrant. Ita ira ob fervorem, celeritatèque naturæ audiens quidem, sed non quid præcipiatur, attendens, ad vindictam incitatur. Nam statim, ubi ratio, vel imaginatio contumeliam, aut contemptum esse ostenderit, ipsa quasi ratiocinando collegerit, bellum ei esse inferendum, indignatur. At cupiditas, si tantum ratio, aut sensus, suave esse aliquid, dixerit, ad fruitionem ejus incitatur. Quare ira rationem quodammodo sequitur, cupiditas non sequitur. Turpior igitur cupiditas est, ex quibus patet, Philosophi mentem non esse, quòd ira rationem sequatur, eique politicè obediat, non item concupiscentia : sed contendit, quòd ira sæpè in idemmet opus cum recta ratione conspiret, non item concupiscentia. Verum est, quòd ira excitetur per rationem, non item cupiditas, quæ in nobis ab ipsa infantia inolevit; nihilominus accepit animus potestatem frænandi stimulos corporis, & quasi legitimus ac perfectus auriga ultra concessas metas extollentes se carnis impetus cœlestium præceptorum habentis reflectit, ne ultra terminos suos currus corporis raptus in periculum suum secum rapiat, & ipsum aurigam.

§. II.

Non tamen omnes affectus subsunt imperio voluntatis.

CÆterum non omnes universaliter actus appetitûs sensitivi obediunt imperio rationis, & de lege naturali fieri non potest, ut omnes ita subsint, sed solum per extraordinariam Dei providentiam. Quòd enim homini (verbis utor S. Thomæ quæst. 25. de veritate, art. 7.) in primò statu collatum fuit, ut ratio totaliter inferiores vires contineret, & anima corpus, non fuit ex virtute principiorum naturalium, sed ex virtute originalis justitiæ, ex Divina liberalitate superadditæ. Quâ quidem justitiâ per peccatum sublatâ homo rediit ad statum convenientem sibi per principia sua naturalia: & ad quod affirmandum S. Doctorem impellere potuit sequens ratio: nihil ad arcanum tribunal intellectûs pervenit, quod per alicujus sensûs conclave non transiit; priusquam igitur supremus judex deliberet, de agendis, & appetendis circa sensibilia, sensus ea-

M

dem

dem exhibent virtuti appetitivæ, quæ tanquam potentia necessaria, non poterit suspendere, aut differre suum actum ad intellectûs deliberationem, & subsequenter voluntatis electionem, sed protinus juxta objecti conditionem profiliet in operationem. Analogiam præbent sensus externi, in quibus necessario sensatio, cùm primum objectum convenienter applicatur vel per se, vel per speciem sui operatio sequitur. Sic etiam in sensu interno, ubi imaginatio prima apprehenderit conditionem objecti, fieri non potest, ut prosecutio, aut fuga illius suspendatur, expectetque rationis beneplacitum. Quòd si autem hi omnis tranquillæ vitæ inimici ita indomiti fuerint, ut rationis judicium opprimant, tollantque habilitatem proximam ad illa opportunè consideranda, quæ ad rem vel maximè spectant, supremæ potestati liber usus eripietur. At, quæres, quid poterit corporis motus judicium rationis opprimere? aio hoc modo. Dependet habilitas mentis ex usu quarundam potentiarum sensitivarum, & certa earum dispositione. Hæc cùm ob vehementem corporis immutationem, semper cum ferocitate passionis conjunctam, perturbetur plurimùm; hinc malum propagabitur in supremam dominam, ligabiturque habilitas intellectûs ad ritè excutienda, quæ ad rem summè pertinerent.

Non solum autem affectus, qui voluntatis electionem præveniunt, non possunt ab ejus imperio subigi; sed etiam, qui directionem rationis exaudiunt, non statim ad primum instans obedientiam & conformitatem mandatis reginæ exhibent. Politicè, ut dixi, subdi postulant, ita ut nec omnino imperium detractare queant, nec omninò cogantur jussa ita exsequi, ut motiva in oppositum occurrentia proponere non liceat. Similitudinem hujus rei cedrò dignam exhibet Philosophus 1. Ethic. cap. ult. in hæc verba: *quemadmodum resoluta corporis membra, si ad dexteram movere volueris, è contrario in sinistram deferuntur; sic quoque in anima contingit, in contrarias enim partes incontinentium appetitiones feruntur.* Sensus est, quemadmodum cùm per morbum, v. g. paralytin, aut per ebrietatem contingit dissolvi membra corporis, virtus corporis rectorix non potest plerumque membra torquere, in quam vellet, partem; sed cùm directio inflecteret ea in partem sinistram, ipsa contrariò impetu in dextram feruntur: ita appetitûs functiones non ita subjacent animæ edicto, ut sine murmuratione illius jussa capeant; sed sæpiùs in contrarium obnituntur, cùm ratio aliquid dicat. Nimirum irrationes patheticæ suspendi, aut variari aliter vix possunt, quàm suspensa aut variata imaginatione, à qua appetitiva facultas immediatè & universaliter dependet quoad omnem operationem, ejusque ommissionem.

nem. Unde sicut fieri non potest, ut feratur in incognitum, ita repugnat, ut non tendat in cognitum ea ratione, sub qua ipsi propositum fuerit. suspensio autem, & variatio phantasie non contingit in instanti, sine interposita temporis mora, quâ opus est, ut spiritus ad sedem sensûs interni vel avocentur, vel revocentur. Et hæc est causa, ob quam aliqui tantam experiantur difficultatem, & ingemiscant in reiicienda aliqua imaginatione, & in adducenda aliqua alia, quam efficacissimè desiderant rejectam, & adductam.

§. III.

Satisfit rationibus hæreticorum.

Quia tamen damnatam suam doctrinam adversarii Apostolo, aliisque gravioribus viris attribuunt, ideò ne simplices circumveniantur, paucis redarguenda sunt, quæ ad errorem defendendum allegantur. Inprimis igitur aiunt Sanctum Paulum ad Rom. 7. sub tam duris passionum catenis gementem non erubuisse profiteri, sentire se legem in membris suis, à qua captivaretur in lege peccati, & mox addidisse: *Non quod volo bonum, hoc ago, sed quod nolo malum, illud facio.* Quid istis clarius posset in medium afferri, quam quòd actiones quæcunque potentie irascibilis, & concupiscibilis, non fiant liberè, sed appetitu quodam præcipiti, ac impetu cæco? igitur voluntas ingenuitate sua, ac libertate ab affectibus sensibilibus exuetur; & in turpissimam mancipabitur servitutem. Quando ergò veniet amor in cor hominis, tunc statim voluntati dicet: subditus meus es, in illius pulchritudinis amore te mihi vendidisti; in illo meretricio concubitu pretium pro te numeravi. Quando veniet desiderium, ita increpabit: aurum, argentum, reliqua omnia bona, quæ habes, servitutis tuæ pretium sunt; possessio, quam tenes, juris tui emptio, venditio tuæ libertatis est: igitur placitis meis obsequere. Veniet delectatio, & dicet: planè meus es servus. Ille epularum sumptus, tui capitis licitatio, tui est summa contractus. Inter calices te redemi, inter epulas acquisivi, nunc vilior es ipso cibo tuo. Veniunt aliæ, & aliæ passionες, & dicunt voluntati, nescis, quòd audaciam tibi contulerim, ut meæ servires potestati? nescis, quòd fugam tibi imperaverim, ut ad me properares? Et voluntas, quàm tot exigunt perturbationes, non sit vile mancipium? manet igitur, quòd cupiditates homini dominium in se ipsum eripiant, per quod ipsa libertas constituitur.

Verùm ista ad ostentationem magis, & imperitorum seductionem, quàm ad serium erroris fundamentum ab adversariis proferuntur. Quid in Apostoli verbis est, quod non omnes omnium temporum Catholici profitentur? quis enim dubitat magnam intervenire difficultatem, & subinde etiam temporis moram triumphandis carnalibus istis hostibus? at verò absoluta impossibilitas, & superioris voluntatis necessitas non agnoscitur. Procul dubio subinde æstus rationis advertentiam præveniunt, conanturque animam adamantinis vinculis stringere. At ubi ratio vigilat, reluctari iis potest, eaque tanquam fortissimus Samson instar fili disrumpere. Denique solum deploratur allatis verbis nostra fors, qui sæpè symptomatum imposturis circumvenimur, & propè nescii, simulque conscii fasciamur, & ad malum abducimur, quod evitare oporteret. Fit namque sæpissimè, ut voluntas improvida, & inconsulta appetitum blandientem ultrò, ac lubens sequatur, non secutura impulsus in devia, si efficaciter vellet. Verùm enim verò quia, si refranare vellet, experiretur difficultatem non modicam, idcirco pertæsa laboris, ac difficultatis cedit, ac eatenus abripi dicitur, & agere, non, quod vult bonum, sed quod odit malum. Alterius dicti Apostolici fallax expositio etiam jam pridem fuit detecta. Non usurpat gentium Doctor hoc verbum *non volo* in eo sensu, ut tollatur liberum arbitrium, & coacta necessitas inducatur, sed quòd rem peractam non laudaret, non approbaret; aliàs dicere non debuisset, quod non volo, facio, sed addere, *quod cogor, & compellor, hoc facio*. Ideo ad distinctionem adjunxit, quæ sequuntur: *Sed quod odi, hoc ago*. Vides ergo voluntatem non corruptam, sed in ipsa actione propriam servare nobilitatem, & etiamsi vitiosa perpetret, attamen subinde illa cum adjuncto odio, & aversione perpetrare.

A ratione præsidium suis erroribus quærunt hoc inutili labore. Potentia necessaria non potest impediri, quo minùs positus omnibus ad agendum requisitis erumpat in suam operationem, præsertim si actio de foris extorquetur; id enim, quod aliunde planè movetur, quo pacto adhuc in nostra potestate erit? atqui appetitus est potentia necessaria, & objectum, quod illi est extrinsecum, non subjacet imperio voluntatis, nec ab illa dependet, quòd occurrant talia, vel talia sensibilia bona: igitur infallibili necessitate sequetur æstimatio interior, nec ferreum cupiditatis jugum voluntaria mentis inclinatione poterit excuti. Aliàs pueri, bruta, & furiosi libertate gaudebunt. Et quis rationis compos, & arithmetica disciplina, vel superficialiter tinctus extorqueri à se hoc judicium sinat, *his duo, non sunt quatuor*? nimirum sicut evidentia rei

rei voluntatem præveniens legibus arbitrii non obsecundat: ita objectum appetibile tantam habet vim movendi, ut plumbeum pondus cervicibus ingerat, nulla ratione deponendum. Appellant in hoc ad rationem à posteriori, scilicet ex frequenti innumerabilium experimento, qui quantumcunque renitantur, eò quòd clarè ipsis constet, quàm dedeceat naturam rationalem; quàm noceat ipsis aliter agere: servitutem tamen suam, & vincula, quibus impediuntur, deplorant miserabiliter juxta illud:

Odi, nec possum cupiens non esse, quod odi.

Vel aliud:

Aufferor, ut rapidà concita pupis aqua.

Si Ethnicorum fabulas explodimus, divo Augustino credamus, qui non alieno ferro, sed sua ferrea voluntate vetere, & carnali contra spiritum pugnante ligatum se esse suspirat lib. 8. confess. cap. 5. velle meum, inquit, tenebat inimicus, & inde mihi catenam fecerat, & constrinxerat me. Quippe ex voluntate perversa facta est libido; & dum servitur libidini, facta est consuetudo; & dum consuetudini non resistitur, facta est necessitas. Quibus quasi ansulis quibusdam sibimet innexis, unde catenam appellavi, tenebat me obstrictum dura servitus. Valedixit igitur charæ libertati primus parens, quando filiorum non sollicitus fatali appetitum pomo exsatiavit, nobisque nunc deplorandum in corpore, quod corrumpitur, & aggravat animam, necessitatem relinquit.

Ut hæc, quæ adeo prolixè sunt allata, dissolvantur, fatemur, non esse semper in potestate nostra, ut fruantur sensus externi quibuscunque indiscriminatim sensibilibus. Cæterum quæ successivè, & seorsim sensibus externis exhibentur, manent conjunctim in phantasæ cellulis: igitur sub dominio voluntatis erit, ut cuilibet eorum adhæreat vis æstimatoria, utque ex eisdem faciat varias mixtiones, quæ sensus externi vires excedunt. Quis præterea inficiabitur in nostro arbitrio esse, ut sensus isti externi applicentur, cuilibet ex objectis simultaneè existentibus in debita distantia, vel ut non applicentur? quis negabit posse me per motum localem acquirere vel evitare eandem distantiam, vel indistantiam? ecce igitur jam duos aditus, quibus potentia superior dirigere, vel arctare poterit facultatem appetentem; determinando nimirum, ut libet, vim apprehensivam ad hæc potius objecta, quàm ad alia. Quòd si aliquando præter, aut etiam contra rationis imperium ob repentinam objecti impressionem, aut mentis oscitantiam ad aliqua objecta excurrat, & magno pondere voluntati incumbat, tunc inescandi & blandiendi vim habebit: causare tamen ipsam voluntatis operationem nullatenus

poterit. Edic enim, quare rebus appetendis propositis iste eas appetit, alter respuit? si enim rei appetendæ hæc natura foret, ut appetentem cohereret, & motus ab ea necessario proliceretur, oppoteret eam appeti ab omnibus, quæ appetendi vi essent prædita. Imò ne appetitionis titulo quidem insignienda esset illa actio, sed inter violentos impulsus, inter obstinatas actiones comprehendi deberet. Cum igitur plectio sit tantum motio, sive tractio metaphorica, cui liberum arbitrium renuntiare potest (si simplicem boni suaviationem, ad primam objecti propositionem necessario excitatam excipias) immerito ab Ethnicis affertur exemplum necessitationis, quam intellectus patitur, cum objectum sub aliqua evidentia clarescit; v. g. quod bis duo sint quatuor. Negatur enim par ratio inter voluntatem, quæ in actus suos dominium obtinet, & intellectum, quem potentiam necessariam Philosophi nuncupant. Denique, quod ultimo loco de experientia afferebatur, potius condemnat, quam ut absolvat eos, qui voluntatem in æquilibrio positam foedè examant, & vinculis induunt. Nemo enim est, qui si velit appetitum suum subigere non possit, quod omnes comprobant, qui laborem, & renium in ea lucta devorandum non fastidiunt.

DISSERTATIO X.

An passiones saltem minuant libertatem?

§. I.

Passiones aliquatenus imminuunt liberum?

COntroversia non est de passionum commotionibus liberum arbitrium consequentibus, seu talibus, qui ab homine in se ipso liberatè excitentur, de his enim manifestum est, quod indicent potius libertatis augmentum, quam ejus imminutionem. Nam vel subsequitur sensibilis agitatio ex quadam redundantia voluntatis, quatenus hæc intensa secum rapit appetitum inferiorem? & tunc non auget quidem libertatem, sed tamen plenitudinem voluntatis clarè ostendit. Vel noscitur dulcedo ex electione voluntatis, quatenus hæc opus non frigidè, sed ardentè, ac vivaciter peragere intendit, & ideo passiones velut igniculos quosdam attentionem, vehementiam, ardorem, vigoremque operi inspirantes eligit, juxta illud Homeri:

Vir.

Virtuti immitte furorem.

Prout iudex ad malos deterrendos iram excitat, & miles adversus hostem animum irritat, & acuit: & in hoc casu potius augebitur dominum liberæ potestatis, quia non solum se ipsam, sed etiam subiectas sibi potentias, earumque effectus exhibebit tanquam arma iustitiæ. Quæstionis ergo cardo circa hoc vertitur, an passionēs antecedentes, & voluntatis exercitium prævenientes libertati aliquam remoram iniiciant. Quamvis enim superiori dissertatione declaratum sit per huiusmodi cupiditates non tolli usum supremæ dominæ, cum nihilominus prodeant à principio intrinseco, & res tantum ita se habeat, ut necessitas qualiscunque, cum voluntaria sit, excusare non valeat voluntatem, nec voluntas, cum sit illecta, excludere necessitatem: attamen saltem videtur minui per eam indifferentia ad utrumque, cum & notitia æstu appetitionum obnubiletur, & actus sic elicitus abreptio potius sit voluntatis in objectum, quam inclinatio, & prolapsio nativo arbitrii pondere & nutu facta. Abstrahendo à passione, quæ metus nomine donatur, breviter sic sentio.

Imprimis quomodocunque tandem regnet affectus sensibilis, ex quo aliquid gestum est, actus simpliciter, & absolute liberi nomen sibi vendicabit. Innititur assertio disertè doctrinæ Philosophi 3. Ethic. cap. 1. ubi sic habet: *Si quispiam & jucunda, & molesta esse violenta idcirco dixerit, quod extrinsecus sint, & nos cogant; is efficiet, ut ea ratione omnia sibi esse violenta unusquisque putet; quippe cum horum causâ omnia omnes agant: alii violenter, & inviti ob molestum: alij jucundum cum voluptate. Sed ridiculum sanè est, in externâ potius causam referre, quam in se ipsum, quod huiusmodi rebus facile capiatur, & honesta sibi, turpia jucundis scribere.* Addo passionum interventu causari voluntarium acutiùs quoad intensiorem actûs. Augetur enim acriter operatio physica ab intrinseco procedens per motum facultatis appetentis, & voluntas suo nutu in objectum præcipitata ab ardore concupiscentiæ vehementiùs accensa propellitur; unde intensiōis plures gradus consurgere oportet. Insuper efficiunt, ut ametur objectum cum minori repugnantia molestia: quin potius tristitiam, si quæ esset ingerenda, per media, quæ usurpantur, absomit, profusione suavitatis in bono concupito repertæ. Hanc autem prærogativam non habet amor rei ex metu, qui idem non reddit medium, quod ex eo eligitur sapidum, cum non tollat renisum voluntatis in objectum simpliciter consideratum. Hinc longè probabilior est illorum doctrina, quæ fert publicarum libidinum victimas non obligari ad restituendum, quod à procis,
exce-

excæcata blanditiis eorum mente extorserunt: hinc verior illorum sententia, qui statuunt, non vitiari testamentum, quòd maritus blanditiis uxoris ductus, in favorem illius confecit.

Nihilominus cùm prorationes sensibiles, ob amicam vim, quam voluntati ex se fragili, & infirmæ inferunt, aliqua ratione voluntarium imminuunt; efficiuntque, ut actio minùs sit in potestate sita ob ægritudinem virium voluntatis, quæ semota exacerbatione hujus sibi adjuncti ardoris, fortiùs resisteret illicitis. Transeat, quòd hujusmodi passionis impulsus sit homini intrinsecus; inclinatio tamen hujusmodi non est adæquatè intrinseca voluntati; ideò licèt violentus iste motus non sit minùs spontaneus, si sermo sit de homine ùt involvente partem sensitivam, respectu tamen voluntatis ambigi nequit, illum esse minùs voluntarium, quia passio voluntati est extrinseca. At, inquires, ista concitatio immanet ipsi voluntati, appetitus enim, & anima ex parte principii sunt idem: quomodo ergò movebitur voluntas ab extrinseco? quomodo sic minuetur voluntarietas? an non potiùs illa magis augebitur, prout augetur per acquisitum consuetudinis habitum? dicam, si accommodaveris intentionem, & subtilitatem tuam. Materiales operationes respectu rationalium dicuntur extrinsecæ, quatenus se habent quasi disparatè in ordine ad animam, & sunt inter se quodammodo ex conceptu suo independentes; unde quando anima determinatur à sensibilibus ad spirituales actus, dicitur ab extrinseco determinari, non ab intrinseco. Declarare tibi rem poteris ampliùs in potentia visiva, & auditiva, quæ licèt idem sint ex parte animæ, tamen ad audiendum per accidens se habet posse videre, & econtra. Si hæc non satisfaciant, certè per obtenebrationem, quam passiones inferunt, intentum consequar. Oculò enim mentis per concupiscentiam hebetatò, & ex parte obducto, tollitur notitiæ claritas; hac absente ipsam quoque voluntarii perfectionem imminui oportet. Ita enim ego mecum hætenus discurrebam: omnium voce ex hoc capite per passionem retunditur acumen libertatis: igitur eodem jure torpebit etiam voluntarium; nam quidquid libero officit, obscurando cognitionem, officit quoque voluntario, ad quod rerum representatio requiritur.

Atque hinc expressit Aristoteles 7. ethic. cap. 4. peccatum eò minùs fore, ac levius, quò vehementior fuerit cupiditas, quæ ad illud propulit, & dimidiatum videtur facinus, cui non accessit diuturnior deliberatio. Aliter si tibi visum fuerit, perge, per me licet, & Augustinum, corrige, qui lib. 14. de civit. cap. 12. inde exaggerat peccatum primorum parentum, *quia nondum, ùt inquit, voluntati cupiditas resistebat.*

Quasi

Quasi diceret, peccatum illud futurum fuisse minus grave, si ex antecedente inordinata cupiditate appetitus fuisset perpetratum. Veterum monumenta evolve, & deprehendes, ea, quæ ex doloris, vel iræ impetu admittuntur, mitius plecti, ac sæpè etiam inulta abire, miserante iudice conditionem animi vel iusto dolore, vel ira afflicti. Sic M. Pompeius prætor neque damnare, neque absolvere voluit mulierem, quæ matrem fuisse percusserat, dolore necatorum filiorum, quos avia filiæ infensa peremerat. Hoc ipsum agnovit Tiberius eò iudiciò, quo damnavit Mundum equestris militiæ ductorem, cum Paulinam, quam deperibat, in Isis templo constuprasset, corruptis pecuniarum vi sacerdotibus. Namque ipsum Mundum, quod amoris æstrò absorptus scelus perpetrasset, exiliò tantum multavit: sacerdotes autem in crucem egit, templum diruit, Deæ simulacrum in profluentem projici imperavit, non exigua imminuti per concupiscentiam voluntarii significatione. Ipse Deus Deuteronomii cap. 19. minorem pœnam ejus, qui per animi impotentiam ex mæstitia haustam deliquerat, ratam habuit, ut adeò mirum non sit, si leges civiles, v. g. *lex aut facta s. causa. ff. de pœnis*, aliæque permultæ suffragentur. Igitur quando passiones suavitatem objecti importunè exhibent, & acriter ingerunt, ex altera verò parte turpitudinem occultant, actus subsequens simpliciter erit liber, & quadantenus involuntarius, quatenus ad eum voluntarietatis gradum non ascendit, quem, si abesset vehemens abstractio, & per pathemata illectio, fuisset consecutus.

§. II.

Quid sentiendum de metu?

Quæ verò metum superius excepimus, nunc, quid de eo sentiendum sit, est enodandum. Adverto, metum posse subinde nos impellere ad admittenda objecta alioquin nobis ingrata; prout metus mortis pertrahit ad projiciendas in mare merces, quæ abjectio valde durè suscipitur ab homine, qui thesauris istis cor suum affixit. Posse item adigere ad objectum, in quo alioquin magna percipitur voluptas, vel saltem nulla sentitur difficultas, ubi si quis mortem comminaretur alteri, nisi comederet cibum alioquin illius saporì valde aridentem. Hoc discrimine posito sic statuo: quando metus instigat ad actionem secundi ordinis, tunc non minuit voluntarium, sed potius illud auget, eò quòd ad-

N dar

dat novum pondus boni attrahentis. Sic qui ex se propendebat ad haustum ob aridam sitim vel delectationem, si stricto gladio ad hauriendum poculum cogatur, talis timor non reddit ipsi haustum ulla ratione violentum. Si verò objectum, ad quod metus inducit, alioquin tale sit, ut ab ea voluntas abhorreat, tunc admitto, à metu viciari puritatem voluntarii. Hanc duntaxat, & non aliam necessitatem in tyranni precibus admixtam agnosco, ob metum nempe instantis damni, nì voluntati peccantis protinus satisfiat. Eleganter Aufonius expressit potissimum hoc imperandi genus esse, cùm rogat, qui jubere potest, quando à Theodosio ad edenda sua carmina rogatus, ita est præfatus.

Scribere me jubet Augustus, mea carmina poscit,

Panè rogans, blando vis latet imperio.

quod idem alius non insecitè sic expressit:

Nonne rogare ducum species violenta jubendi?

Et quasi nudato supplicat ense potens.

Inest igitur vis quædam, atque necessitas in eo, quòd per eas preces efficitur metu imminenti mali, si, qui rogatur, ad eas obsurdescat: ac proinde, quod ex metu fit, non vacat involuntario, sed est mixtura quædam ex volitione, & nolitione. Nolitio enim mali, quod metuimus, est planè voluntaria: volitio autem mediè ad malum illud declinandum usurpandi involuntaria est; quatenus voluntas, quæ metu ingruente illud vult adhibere, detrectaret fortè id facere, si metus abesset. Indicium hujus mixturæ patet iterum in mercatore, qui tempestate, & metu interitus pressus, merces in mare projicit ad navem exonerandam, ut ea ratione vitæ, ac salutis consulatur. Actio projectionis spectata in se impedit inclinationem voluntatis, & idcirco ingenerat molestiam, nec absque dolore exercetur. Aliud indicium hujus miscellæ desumi potest ex eo, quòd plerumque leges, alioquin justæ, metu incumbente non obligent cum tanto rigore; cur enim legislator prudens noluit subditum adstringere ad legum observationem, quando gravis metus damni non faciliè alias declinandi interponitur? certè alia hujus rei ratio dari non potest, quàm quòd jus ipsius arbitrii aliqua ratione ledatur.

Ut tamen actio metu extorta meritò censetur minùs expeditum reddidisse voluntarium, oportet eam nasci ex metu gravi, nec sufficet qualiseunque animi ægritudo. Ita restrinxit assertionem philosophus noster 2. ad Eundem. cap. 9. ubi dixit: *Non si quis, ut contantum vitaret, occidisset alterum, vi se id, coactumque fecisse dicat: majus enim, acerbiusque malum oportet non facienti propositum sit.* Non tamen malum metui illi objectum debet esse gravius malo, quod incur-

incurreretur, si homo metu succumbat, seseque dedat; id enim necessarium non est ad consternationem, siquidem malum negandi fidem, in quod martyr incidet, si ob horrenda tormenta à fide resiliat, longè gravius est quibusvis tormentis: & nihilominus ipsa tormenta censentur malum sufficiens ad urgendum metum inductivum voluntarii. At quodnam malum censendum erit grave ad hoc, ut quis meritò percellatur metu? quodnam erit minutum, & indignum nomine mali? sic habe. Comparationem istam mali, quod timetur, attendendam esse penes mala, quæ passim evenientia hominis non meticulosi animam, confundere sunt apta, & idonea ad eum de proposito dimovendum. Sin minùs juxta leges rationis, considerata mali acerbitate, & hominis conditione, quæ non nisi magno nisu assurgere potest ad subeundum, atrox illud malum potius, quàm ut à proposito scopo deflectat. Qui enim mali impendentis metu, quod cum hujusmodi malis, quæ passim, gravia habentur, expugnatur ad aliquam actionem, quam alioquin non, fecisset, non potest censi leviter attractus, & meritò judicatur cum displicentia egisse.

Quamvis autem gravitas mali metum istum excutientis pensanda maximè sit ex natura rei potius, quàm ex conditione personæ timentis; tamen etiam hæc non est dimittenda in tali æstimatione. Aliud enim dicent esse opportunum ad percellendam mulierem, vel puerum, quod circa virum militiæ assuetum pro nihilo judicaretur. Hinc passim metus, de quo hæctenus, vocatur *metus cadens in virum constantem*, vel *metus justus*. Ut habet Ulpianus, Labeo, Celsus partim ff. *de eo quod metus causa*, partim ff. *de regulis juris*. eò quòd scilicet sit gravis mali, ac prudenter susceptus. Et hoc vocant metum cadere in constantem virum. Non enim metum cadere in aliquem est quodammodo eum digito tangere; sic enim metus levis diceretur cadere in constantem virum, quod esset ridiculum: igitur metum cadere in constantem virum, est hominem ita metu moveri, ut, tametsi aliàs fortitudine pectus obarmatum gerat, nihilominus concutiatur, & de proposito dimoveri possit.

Animadvertendum etiam, nunquam esse necessarium, ut simul cum actione ex metu nata reperiat hęc volitio conditionata: *Non facerem hoc, nisi me metus impelleret*. Nam metui quis satisfacit ex integro eam operationem amplectendo, quæ hîc & nunc requiritur ad vitandum malum, etiamsi eam conditionatam voluntatem non habeat. Quod enim actio aliquam difficultatem includat; ut est projectio mercium, similisque naturæ contrariæ, ad summum ostendit, posse voluntatem hunc modum tendendi habere: *Non facerem, si aliter possem*;

quòd verò debeat necessariò hoc dicere, nullà viâ demonstratur. Imò oppositum manifestè constat in eo, qui cum summa arduitate suggestionem peccandi superat, ne in barathrum detrudatur; cui ea suggestio est secundùm quid involuntaria, & tamen nullatenus potest in hunc actum prorumpere: *Succumberem tentationi, si aeternum supplicium non timerem*; talis enim actu committeret scelus, & tentationis non evaderet victor, sed illi fædè succumberet.

Nihilominus quando à metu, tanquam Tyranno coacti, opus aliquod suscipimus, aut admittimus, libertas adhuc potestatem suam retinet. Sic etiamsi mihi succensi Phalaridis tauri, aliæque mortes proponantur, nisi genibus flexis, idolis ligneis thus immolavero, adhuc in mea electione positum est, in faciem Neroni dicere; non immolabo, sed potiùs supplicia præligo. Igitur si poplites curvavero mortis metu, liberè consentio. Nempe fieri non potest, ut quidquam collato deteriori cum optabili amplectamur, nisi assensus consultò imperet, ut unum alteri mali metu præponatur. Neque tantùm intendo actum ex metu profectum esse voluntarium, sed aio, quamvis voluntarium, & involuntarium commisceantur in hujus modi operatione, prædominari tamen voluntarium, & robustam nolitionem ac repudiationem prævalere languidæ, & inefficaci volitioni ad bonitatem, malitiâ, seu difficultate dilutæ.

§. III.

In metu voluntarium prædominatur involuntario.

Voluntarii in hujusmodi actibus præponderantis indicium evidens suppetit, quòd metus non eluat maculam actionis ex se turpis, & vitæ. Quamvis enim metus interdum legum aliquarum obligatione exsolvat; tamen alii sunt, qui etsi metu interposito efficiantur, nihilominus inquinantur, eò quòd lex non obstante tali agrimonîa vigeat, & perstet integrum malitiæ fundamentum. Hujusmodi namque actibus frustra obtenditur metus, cum præstet gravissima quæque incommoda subire, quàm scelus admittere, quæ omnia jurisconsulti fusiùs ruminant. Ratio à priori desumitur ex Angelico, quòd nempe unum quodque principalius denominetur ab eo, quod ei competit: & non nisi secundùm quid ex eo, quod competeret illi, si aliqua conditio poneretur, quæ nunc non ponitur. Illud enim reipsa, & actu inest rei; alterum autem non

non nisi in apprehensione nostra : actus autem ex metu hebescent , est re ipsa , & de facto voluntarius : non autem involuntarius nisi sub conditione ; nempe quia si secluderetur status præsens , & removerentur hæ singulæ circumstantiæ , homo hujusmodi medium non eligeret , dolètque se eo in statu esse , quo satius ducere debet hoc medium eligere , quàm alteri malo subiacere : igitur homo in hujusmodi eventu censendus est potius voluntariè operari , quamvis in ejus actionem inimica quædam resistentia invehatur. Insinuavit hanc doctrinam non obscurè magnorum moralium Magister lib. 3. ethic. cap. 1. ubi apertè agnoscit, quosdam actus turpes , & minùs decentes hominum statum (non quidem turpitudine peccati) absque culpa , & cum laude exerceri ; quamvis aliud quoddam opus v. g. ministerium aliquod , usque eò abjectum sit , & abhorrens à conditione hominis , ut generosus animus cum laude , gravia quæque potius sit delecturus , quàm ut ob exiguum peculium se eò usque demittat , & operi addicat. At quibusdam actibus metu ereptis venia potius , & commiseratio debetur , quòd considerata humana infirmitate & vegeti mali impendentis acerbitate , ac culpæ tenuitate lapsus veniam mereatur ; quamvis gloriam relaturus fuisset , si generosè delegisset malo potius , & incommodo , quàm probrosæ subiacere culpæ , & revera malè se gesserit impari conatu pugnando & cedendo. Quis enim non moveatur commiseratione illius , qui stricto ense , nisi jocolum mendacium effutierit , timore exarmatus succumbit ; quamvis immortalis cum laude necem potius oppetere , quàm se levi illo mendacio fœdare debuisset , & ita planè factum oportuisset ? verùm mox istis subjungitur ab Ethico , culpæ quædam tam sunt graves , ut qui eas admisit , nullum possit metum obtendere , vel inde commiserationem expectare , ut morte potius defungi debuisset , quàm tanto crimine se inquinare. Hac ratione mors Eriphilis per Acnæonem filium illata , non caruit gravi scelere ipsius filii , ridiculèque se excusavit præcepto patris , & metu delinquendi in jussa patris Amphiarai , qui ab uxore proditus , proficisci ad bellum coactus fuerat. Tam sædum enim actum nullius magni boni prætextu in animum admittere oportuisset.

Nec obest hucusque dictis , quòd aliqui contractus injusto gravi metu extorti positivo jure irritentur , alii verò pro arbitrio metum passi faciliè rescindantur à judice , quasi supponente , consumptum in eis fuisse voluntarium , ideòque præsumente esse per vim illatam extortos. Revera enim Theologi morales & jurisprudentes rescindentes hoc non supponunt ; alioquin si gesta fuissent incusso justè metu , æquè forent irritanda , contrà quàm juri bus cautum est. Igitur pro certo statuendum,

pacta illa, & conventa aliunde nulla esse, quàm ex defectu voluntarii & libertatis indifferentiæ. Idcirco igitur vel lex naturalis, vel positiva conventiones, & contractus multos valere noluit, alios verò voluit facile rescindi, qui metu urgentur, & ex sua natura subsisterent, quia actus per injuriam obtentus non debet ei patrocinari, qui vim intulit: & hoc non parùm conducit, ut obviàm eatur infinitis malis, quibus aditus pararetur, si injuriæ irrogatio utilitate & commoditate faveret irroganti. Quemadmodum igitur venditio nulla est, ob enormem læsionem alterius paciscentis in eodem utique genere bonorum: ita non minùs rescindendæ sunt coventiones in diverso bonorum genere, cum æquè enormis læsio interveniat, quoties minis, & terroribus obtinentur.

Sæpiissimè etiam intervenit defectus pugnans cum ratione actûs, qui exercetur, quamvis consensus simpliciter liber interveniat, & tunc actus secus etiam lege humana irritante, nullius est valoris. Ita donatio gravis summa facta ex metu gravi prædoni, ne loco auri vitam eripiat, suapte natura nihil valet, etiamsi volita sit. De natura enim donationis est, ut fiat ex liberalitate, & plena libertate, cui impedimentum injicit metus mortis à prædone aliquin imminenti. Quamvis idem non contingat in donatione alicui tertio facta, ut me ab invadente prædone suis viribus tueatur; quod enim isti donatur, robur & vim obtinet, etiamsi metu adactus donem. Nimirum præterquam quòd iste præmium ac mercedem operæ suæ præstitæ accipere debeat, metus ibi intercedens, ex quo proximè persolvitur stipendium, non est metus extrinsecè illatus, qui solus patienti est injurius, sed oritur immediatè ab intrinseco, ac homo ipse sibi eum infert; proinde injuriam non patitur, neque leges sufficiens habent fundamentum illum irritandi.

DISSERTATIO XI.

Utrum fuerint passionēs in JESU Christo, & quomodo illæ à nostris fuerint diversæ?

S. I.

Passiones habuerunt verè locum in appetitu sensitivo Christi.

Modicum christianæ religionis lumen illi affulgere deberet, qui ignoraret,

raret, Dei filium voluisse naturam humanam assumere tam infirmam, quam illa in se est: & excepto peccato, ac ignorantia, defectibus cum dignitate suam personam dedecentibus, in aliis omnibus miseriis, fratribus suis fuisse assimilatum. Indiguit per decursum vite alimentis ad eandem conservandam, quiete, ad reficiendas vires, somno ad interpolandum laborem, aliisque remediis, quibus providentia divina nos intruxit contra naturales aegritudines. Expositus fuit injuriis tempestatum, passus est vicissitudines temporum, visus est obriguisse gelu sæviente hyeme, & sudore persusus ardente sirio cane. Elementa, quæ ipsum venerabantur ut Deum, impugnabant ipsum ut hominem: creaturæ ad illius nutum obsecundantes, alio tempore ipsum aggrediebantur, & fluctus, qui eo vigilante stagnabant pacati, eo dormiente in navim magno impetu spumabant. Fames ab ipso in deserto devicta, iterum in civitatibus in illum insurrexit; mors ipsa in persona Lazari oppugnata, & prostrata, ausa est vires colligere, eumque in Calvarie monte deprimere. Cum igitur etiam passiones aliud non sint, quam morbi ab homine inseparabiles, noluit etiam ab istis esse exemptus. Hinc conjunxit lachrymas suas fletui Magdalene; prius commiseratione particeps factus opprimentium faminam malorum, quam omnipotentia sua iisdem mederetur: priusquam patraret prodigium, signa dedit imbecillitatis, & prius lachrymis tinxit sepulchrum, ut in cunas converteretur renascentis Lazari. Permisit sæpius, ut cor illius occuparetur tristitia, & miraculo stupendo effecit, ut in anima illius simul resideret gaudium & dolor. Denique ut varii eventus occurrerent per vitam 33. annorum, varias concipiebat passiones, amore hominis eo adductus, ut etiam proprias illius infirmitates non respueret, sed easdem amplecteretur. Pereant igitur argumenta philosophorum, qui negant in sapientem cadere perturbationes animorum: habeant eas animi christianorum, nec Stoicorum consentiatur errori, qui profecto sicut vanitatem existimant veritatem, sic stuporem deputant sanitatem, ignorantes sic hominis animum, quemadmodum corporis membrum desperatius ægrotare, quando doloris amiserit sensum.

Ut verò ista in particulari pateant, imprimis exploratissimum est, in Christo debere agnosci dolorem ex tot circumsonantibus Scripturæ Textibus. Dolores enim nostros tulit per suos dolores, & hac maxime ratione Patri Divino satisfecit pro nobis, quos perdiderant voluptates illicitæ justis doloribus compensandæ. Rursus ad immensam tristitiam voluntatis, qua perfundebatur ob propè infinitorum mortalium à fine suo aversionem, de inutilitate fusi à se sanguinis, de eluvione denique tot malo-

lorum orbem universum inundante, ad hanc, inquam, tristitiam non poterat non subsequi tristitia in appetitu inferiori, secluso miraculo, cuius invehendi nullum planè est fundamentum. Solum illud Lucæ. 22. *Pater, si possibile est &c.* Sufficiens vindicat Christo dolorem, & tristitiam, ita ut nusquam magis pietas ejus sit admiranda. Minus enim contulisset nobis, nisi & nostrum suscepisset affectum. Suscepit Tristitiam nostram, ut suam nobis largiretur lætitiā, & qui pro se nihil habuit, quod doleret, pro nobis doluit, & sequestrata delectatione Divinitatis æternæ, tædiō nostræ infirmitatis est affectus. Fuisse in Christo iram indubitatum est ex cap. 3. S. Marci, ubi legimus, eum circumspexisse adversarios cum ira, & contristatum esse super cæcitate cordis eorum. Timorem locum habuisse demonstrant SS. Evangelistæ Joannes, & Lucas, qui Christum paventem & turbatum sine ambiguitate produunt. Quid enim ista verba: *Pater, si fieri potest, transeat à me Calix iste?* Quid enim ista, nisi in belliduce pusillanimatorum trepidationes? ægroti vox est in medico; imò eousque prævaluit, quæ fortis est, ut mors, dilectio, ut tristem Dominum Angelus confortaverit. Nominatim autem concedo etiam in hominum Salvatore eum timorem, qui pudor, sive verecundia appellatur, nec primus sum, qui post Doctorem mellissimum eam pudoris materiam, quam ex corporis nudatione contrahimus, (præsertim si eæ partes pateant, quas natura velatas voluit,) Christo in cruce pendenti non defuisse affirmo.

Quibus autem contrarius error adscribitur de passionibus in Christo eliminandis, non eo, ut æquum est, sensu fuerunt intellecti. Respuit has in Christo S. Hilarius, si ille secundum deitatem spectetur; admittit tamen in humanitate contra Arrianos, cum quibus confligebat, quæque verbum in divina natura doluisse contendebant, eoque omnia sinistrè detorquebant, quæ de Christi doloribus scripturæ produunt. A probro hoc sanctus vir facile purgatur ab iis, qui ejus scripta evolvunt, ubi commentariis in psal. 53. splendidissime se ab hac calumnia sic vindicat: passus ergo est Deus, quia se subjecit voluntarius passioni, sed suscipiens naturales ingruentium in se passionum, quibus dolorem patientibus necesse est eas inferri; virtutes, ipse tamen naturā suā non excidit, ut doleret. Ratio autem, qua dolorem à Christo patiente sublatum volunt, pro refutatione aliud non meretur, nisi contemptum. non enim invitus patiebatur, sed volens, ut nostro bono consulere. Neque tamen non patiebatur, sicut ægrotus sumit amarum pharmacum, ut sanitati restituatur, & tamen ejus amaritiei malè afficitur.

Cespitant etiam, qui iram à Christo excludunt, quasi Scriptura tantam in eo mansuetudinem celebraret, ut ne calamum quidem quassatum esset confracturus. Pessimè interpretantur, quasi omnis ira vitio fœdaretur, & si mediocritatis fines non excedat. Intra rationis gyrum contenta modum honesti observans ab Aristotele insignitur, quòd sit *satellitium rationis*, & *cos fortitudinis*: Proinde summopere decuit, in Christo tam arduis laboribus intento, residere affectum ad eos adeò commodum.

Hallucinantur quoque, qui timorem in Christo à synodo damnatum arbitrantur; refellitur ibi Theodorus solum, quòd Christum purum hominem statueret, censueritque, illum non potuisse timorem aut prævenire, aut frænare, sed in eo fines excessisse, ut explicatissimè videre est ex verbis ipsius S. Synodi. Quærit enim, quomodo timorem in passione suscepit? quid vehementioribus orationibus ad imminentem necessitatem indiguerit, quas cum magna, & clamorosa voce, cum plurimis lachrymis Deo referebat; cur ex immensa trepidatione fontes sudoris emiseric sanguinei? quid denique Angeli adventu, & visitatione egebat reficientis in experimento malorum, confortantis ejus alacritatem, urgentis ad patientiam, & tolerantiam ostensione futuri fructus, & futuræ gloriæ? quid hæc omnia, nisi quòd verum aliquem timorem Christus expertus fuerit? denique, si qui alii tentasse videntur passiones Salvatori abjudicasse, ne impegisse eos dicamus, sumendi sunt hoc sensu, quòd pathemata non necessitate aliqua naturali ingruerint, sed ipse eadem cum voluntate libera suscepit, adeoque passio nec non fuerit passio, nec tamen naturam passionis exercuerit. Hoc tunc vel maximè videtur contingere, cum motus sensibilis patientem velit, nolit, ad dolendum potest compellere; cum juxta impetum, quo iste superveniens ingravescit, ille vel animo, vel corpore contabescit. Hanc autem vim motus sensibiles in Christo nequaquam adhibuerunt, cum eorum amaritudo adversus sanctissimam personam prævalere non potuerit, quia etsi appetitionum stimulatio fuerit gravis, & multiplex inflicta, ille tamen nonnisi quando, quantum, & quomodo voluit, est afflictus. Unde non usque adeò malè id, quod sensit, dicitur quodammodo non sensitisse, & vim pœnæ sævientis, sine sensu pœnali excepisse; qui videtur non sentire pœnam, qui eam non gravatur, & videtur non gravari, qui voluntatis imperiò gravedinem moderatur.

Maximè verò decuit Christum verè, & non tantum apparenter, affectus sensibilis susceptio ad veritatem mysterii incarnati detegendam, & ostendendam convenienter ipsi factam collationem appetitivæ facultatis.

tatis. Si enim naturam humanam verè integram fortitus est, & non tanquam phantasma nobis illudit, debuit non carere appetitu sensitivo. Sic autem semper judicavi, facultas, quæ non erumpit in actum cæteroquin non dedecentem, otiosa videtur, & frustra: igitur congruentissimum fuit, ut humanis affectionibus, prout tamen defectibus expertes sunt, locum præberet. Insigne planè hujus rei testimonium præbet Augustinus Lib. 14. de civit. cap. 9. Quamobrem etiam ipse Dominus in forma servi agere vitam dignatus humanam, sed nullum habens omnino peccatum adhibuit passiones, ubi judicavit esse adhibendas: neque enim, in quo erat verum hominis corpus, & verus hominis animus, falsus erat humanus affectus. Aliud fundamentum petitur ex eo, quòd Christus assumptione, ac sanctificatione affectionum, quæ sunt in nobis omnium propè malorum scaturigo, præbuerit se eximium exemplar benè compositorum affectuum, siquæ obstruxerit in nobis caput profluvii iniquitatum, nostròsque morbos sanaverit. Confidenter ergo dicendum non exulasse in ipso tristitiam; non tulisse tantum stuporem vulnerrum, sed etiam dolorem, ut fortitudinis haberet laudem, nosque erudiret, ut, qui in Iosepho Ægyptiaco didiceramus carcerem non timere, futuræ mortis tristitiam vincere disceremus in Christo. Sine hæsitacione pronuntiandum trepidasse adveniente hora mortis, ut non modò passio corporis, sed etiam cordis affectio pro nobis faceret; & quos vivificabat mors, timor robustos, mœsticia lætos, & tædium alacres redderet, ac desolatio consolatos. Quomodo enim illum imitaremur, nisi ut hominem sequeremur? multi certè mortuum non crederent, nisi morituri tristitiam comperissent. Accepit ergo ægroti infirmitates, ut infirmitatibus virtutem perficeret; &, qui hominis carnem propterea mortalem assumpsit, ut mortalibus plenam conferret immortalitatis gratiam. Homini animam cum infirmitatibus suis sine tamen crimine suscepit, ut nostris animabus impenderet medicinam. *Vulneratus est propter iniquitates nostras*, quod proprium carnis fuit, quando defuncti latus lancea fuit apertum. *Infirmatus est propter scelera nostra*, quod est animæ, cujus pro nobis infirmitates suscepit.

§. II.

Quæ peculiaria fuerint Christo circa passiones.

Quemadmodum autem illi in fide vacillant, qui prætextu quodam venerationis

nerationis passiones Christi illusiones, & imposturas dicunt, & reverendô hôc suô obsequiô fundamenta salutis concutiunt: ita ex alia parte cautio adhibenda est, ut relinquatur intacta majestas Redemptoris, & dum idem passionibus subijcitur, adhibenda est cura, ne affectuum navis subijciatur. Nimia enim esset temeritas, credere velle, passiones in illo non fuisse à nostris sordibus defæcatas, ad quas nos virtutibus indigemus. Primus nostrarum passionum defectus ex eo adversatur honesto, quodd infelicitèr absque fatu sobolescant, & rationem liberam præveniant ob pernicipem phantasie nostræ mobilitatem; appetitionum autem sensitivarum fames sit quasi rabida, circa escam boni sensibilis inhonesti per imaginationem prælucentem propositi. Tam subito insurgunt, ut etiam sapientiores nec prævidere, nec impedire possint eorum imperus; tam delicatè dormitant, ut murmure tenuissimo excitentur; ita ardentèr propendent ad bellum, ut ad primum tympani sonitum arma corripiant, & propriæ telluri talem ruinam inferant, quam non armatus hostis externus. Hæ ergo cupiditates, quæ rationem antevertunt, à Christo penitus sunt amoliendæ. Non assero affectus quoscunque appetitus sensitivi non potuisse, aut debuisse in Christo naturaliter exsurgere posito objecto sensibili, v. g. dolorem posita objecti disconvenientis immissione; iste enim ex necessitate exsurgere debuit, nisi ratio præveniens eum intercluderet. Quod igitur Christo singulare tribuo, illud est, pathemata quatenus in nobis moraliter noxia, hoc est, quatenus in quibusdam circumstantiis instigarent ad aliquid ex se inhonestum, si voluntas consentiret; aut quatenus in nonnullis occasionebus, nisi cohiberentur, segne redderent, ac difficile honesti exercitium; has passiones non prius in novissimo nostro Adamo fuisse excitatas, ac in primo, nisi ratio positivè eas permisisset, aut advocasset: ea verò exortum prohibente, nunquam exsurrexisse, contra quàm nobis evenit post Adami naufragium. Cum igitur Christus nobiscum degeret, fuit tunc quidem inter mortuos, sed liber, fuit inter parvulos, sed magnus, inter infirmos, sed validus; siquidem ipse semetipsum turbavit, ut Joannis 16. dicitur: ipse oblatus est, quia ipse voluit, & omnis ejus ægritonia de voluntate fuit, non de necessitate. Nec solum hujusmodi passiones janua animæ sanctissimæ nunquam inopinatè pulsârunt, sed quando etiam jubebantur adesse, id non nisi gravibus de causis contingebat. Homines affectus suos affigunt objectis eorum amore indignis, & sæpissimè ex motivis futibilibus induunt catenas gravissimas. Incauta alterius actione commoventur ad furorem, & sine discrimine majorum, & minorum errorum vindictam spirant, tam ob verbum asperius,

quàm ob homicidium perpetratum. Sic Consul Romanus Mancipium brutis devorandum exposuit ob confractum vitrum; sic Princeps iratus inundavit urbem sanguine suorum civium, & ut vindicaret injuriam statuae vel ære fusæ, vel marmoreæ illatam septem millia hominum vivas Dei imagines ad mortem condemnavit. Dolor pro consolatione sibi sculpsit idola, & cum filii non possent è mortuis resuscitare parentes defunctos, ob excessum amoris & doloris, post erecta ipsis mausolæa, etiam templa consecrârunt. Denique nulla hominum passio debitam observat mensuram: nostrum odium ferocitate excedit injurias irrogatas, quæ ipsum parturiunt; amor plûs ardet, quàm flamma, à qua accenditur; spes nostræ magis firmæ videntur, cum tamen debili nitantur fulcro. Aliâ longè ratione regebat filius Dei passiones; ut nempe cum causæ nobilitate æqui ponderaret affectus. Non apparebat in eo indignatio, nisi ob injurias insictas omnipotenti suo Patri, vel ad puniendam templorum profanationem: amabat personam nullam nisi juxta meritum, & ubi perfectionem suo affectu dignam non invenit, benigno suo intuitu animas amabiles reddidit, effectque, ut amor esset causa & effectus amoris. Non admisit timorem, nisi ex motivis gravissimis; & quamvis crucis patibulum ad eum incutiendum suffecisset, credo tamen magis animam turbatam nostrorum scelerum, quàm suppliciorum ignominia.

Ex quo altera labes passionum nostrarum colligitur, quod nempe in nobis lex membrorum pugnet adversus spiritum sine ullis indiciiis; indeque jugis pugna, & irrequietum bellum exoritur. Spernunt nostra consilia, sicut non curant nostra imperia; solumque quiescunt, quando diuturnitate lassantur. Hæc contrarietas procul exulavit in Christo, prout patet ex synodo s. constantinopolitana, quæ anathema esse jubet defendentem, quod Redemptor noster desideria carnis, aliasque molestias passus à deterioribus tantum paulatim recesserit, & sic ex profectu operum melior factus fuerit. Nihil ergo anima sublimitati virtutis habebat adversum, nec discordia desideriorum gignebat oppugnantiam voluntatum. Nullam talem, sive brevem, sive diuturnam moram passionum rationi infestam, ejusque pacem labefactantium, aut nos viatores concutientium in Christo fuisse plenissime versat origenes tract. 35. expendens, cur Evangelista de Redemptore non pronuntiaverit tristatum esse, & tedium concepisse, sed *capisse pavere, & tedere*. Ait enim, passionem in ipso factam non esse secundum similitudinem humanæ naturæ; sed solum principium tristitiæ, & pavoris. Videns enim instans certamen, quod non erat ei adversus carnem & sanguinem, sed adversus tantos reges terræ assistentes, & principes congregatos in unum
ad-

adversus se, quantos nunquam; cepit pavere, vel tristari, nihil amplius tristitiæ, vel pavoris patiens, nisi principium tantum. Hoc autem non contigit ratione alicujus habitus divinitus per se infusi, sed inventu habituum facilitantium appetitui infusorum per accidens, quibus conferebatur potentiæ appetitivæ facilitas ad sequendum rationis ductum. Maxima verò ex parte hoc contigit per providentiam Dei extrinsecam, & curam Dei specialem; nullus quippe habitus appetitui immisus potest formaliter excludere motus ejus inordinatos; cum habitus non sint stupefactivi, & inhibitivi operationum, sed earum potius profusivi.

§. III.

An stantibus istis Christus potuerit tentari?

Cum istis cohærere non videtur, quomodo Christus potuerit tentationibus impeti: tentatum autem fuisse disertè traditur ab Evangelistis, neque id ejus sanctitatem dedecuit. Prima ratio, cur tentari se permisit, est, ut hominem, quem gerebat, ad nostræ imitationis temperaret exemplum. Vita enim nostra in hac peregrinatione tentatione carere non potuit, nec coronari quis potest, nisi vicerit, nec vincere, nisi certaverit, nec potest certare, nisi qui inimicum habuerit. Quoniam igitur nobis, qui sumus corpus ejus, voluit præbere exemplum elidendi dæmonem, & ansam dare confidendi, illuc secutura membra, quo ipse præcessit; idèò tentari voluit in eremò. In Christo ergo nos tentabamur, quia ille de nobis sibi habebat carnem, de se sibi salutem: de nobis sibi tentationem, de se nobis victoriam: modò nos non solum in illo agnosceremus tentatos, sed agnosceremus nos in ipso etiam vincentes. Poterat à se diabolus prohibere; sed si non tentaretur, nobis vincendi magisterium non præbisset.

Congruum etiam fuit, Christum tentari, ut iisdem lineis, quibus perierat primus Adam, per secundum salus restitueretur. Cum enim primus Adam adhuc in inviolata Dei imagine perduraret, devolutus est in gastrimargiam, cenodoxiam, & superbiam; gastrimargia enim est, qua interdicti ligni præsumit edulium; cenodoxia est, qua dicitur, *aperientur oculi vestri*: superbia, qua dicitur, *eritis sicut Dij scientes bonum, & malum*. Hac tripartita tentatione Salvatorem legimus tentatum fuisse: gastrimargiâ, ubi suggeritur: *dic, ut lapides isti panes fiant*;

cenodoxia, ubi de pinna templi admonetur, ut se deorsum mittat, tentandi gratiâ, utrum ab Angelis suscipiatur; superbia, ubi in monte constituto ostenduntur omnia regna terræ, & horum gloria, quæ omnia promittuntur, si cadens adoraverit. Sic igitur iisdem tentationum lineis est appetitus, quibus primus Adam fuit in ruinam pertractus. Porro quantumvis his tribus tentationibus præcipue intenderit explorare Divinitatem Christi, de qua ob multa indicia ambigebat; nihilominus intervenit admixtio pellectionis ad peccatum, quod semper in tentationibus quatientibus dæmon sibi pro scopo proponit.

Longè tamen diversa via fuit Christum tentandi, ab ea, quam tentator inire consuevit ad nos corrumpendos. Nam in nobis tentationes cientur, concitatis diversimodè passionibus à dæmone, abutente complexione nostra corporea, & adhibitis alijs artificijs, quibus scintillas in nobis, imò incendia vel renitentibus excutit, & adurente fumo commaculat. Nec robustis adeò machinis satanæ laborandum est, ut aliquid de sua spurcitia immittat, quæ ex carne putrida per se ipsam, cum abominabili nausea ferè perpetuò scaturit. Assiduæ illusiones ubi viderint animam minimè occupatam, & ad sui circumspeditionem minùs sollicitam circumvolitant velut fuci in favo apum; continuò importunos edunt bombos, coguntque nos in his muscarum populis abigendis perpetuò lassari. Hi autem nefarii motus, qui tam audacter nos ad malum prolestant, suntque prolusiones ad peccatum, tametsi secluso consensu innoxia, in Christo non prosiliebant sponte sua, nec extrinseco artificio, complexione corporea irritata, alijsve malorum incentivis adhibitis enascebantur: sed tunc tantum excitabantur, cum advocabantur, nec erumpebant nisi signò per rationem superiorem dato. Quare propositus modus tentandi in Christo non habuit locum, sed illè tantum admitti potest, qui peragitur per meram exteriorem suggestionem, & objectorum propositionem realem vel vocalem.

Hanc de externis tantum suggestionibus, & non per internos motus doctrinam aureis verbis exponit S. Gregorius, quando tres tentationum modos distinguit; nimirum suggestionem, delectationem, & consensum: refertque nos plerumque in delectationem, aut etiam in consensum labi, quia in carnis peccato propagati in nobis ipsis gerimus, unde certamina toleramus. At verò Deus, qui in utero virginis incarnatus, mundum sine peccato est ingressus, nullum criminum fomitem contraxit. Tentari ergò per suggestionem potuit, sed ejus mentem peccati delectatio non momordit; atque ideo omnis diabolica tentatio de foris suggerebatur, non intus nascebatur. Pulchrè vocat tentationem *per delecta-*

tentationem, qua abstrahimur, & à propria illicitur concupiscentia, aegro mortalitatis nostræ has per se ipsum urticas proferente. Tentatio verò per *suggestionem* in nobis plerumque est interna: cum scilicet satan idoneorum humorum commotione species ad tentandum opportunas prius quasi sopitas suscitatur, & ignem concupiscentiæ antea suppositum doloso cineri vegetat, non absque aliqua prægustatione peccati inde progenita. In Redemptore nostro tentatio per suggestionem fuit merè externa, qualis est in nobis ea, qua per accomodum objectorum sensibilibus applicationem proritamur ad malum. Sed in nobis vel invitis excitantur motus aliqui, qui, si prorsus desit assensus, sunt innoxii: si autem rudimentum aliquod duntaxat assensus interveniat, procreatur culpa levis, quo tamen via munitur pleno assensui, ac ruinæ sanctitatis. Summam huius discursus sic accipe. Non admittitur in Christo tentatio per consensum, neque tentatio per delectationem intrinseco incentore nata, vel quæ est per internam suggestionem.

§ IV.

Ex qua passione ortus fuerit sudor sanguineus Christi?

Sanguineum sudorem, quo sacratissimum Christi corpus imminente passionis tempore perfusum legimus, verè contigisse credo, & profiteor contra infanientes nonnullos sectarios, qui jure insignis impudentiæ convincuntur, quòd effectum in ipsis sacris paginis proditum, commenti arguere, ipsùmque Evangelium eà narrationis parte truncare non erubuerint. Ut verò causam stupendi huius effectus aperiam, suppono, duplici ex ratione sanguinem per poros corporis emitti eò ferè modò, quo naturaliter sudor effunditur. Et primò quidem, sicut sudor aquosus, & simpliciter dictus, vel caloris efficacitate per latentes exprimitur poros, vel absque caloris impetu per virium, & virtutis contentivæ imbecillitatem emittitur, ut contingit in sudoribus, quos syncopticos appellant, aliisque frigidioribus: ita sudor sanguineus ex utraque hac causa emanare potest. Sic scribit Michaël de Palacio in cap. 18. Joann. e. nar. 3. sub finem, quendam nobilem Pincianum cum capite minuendus esset; sanguine sudasse. Sic Benefinus de medela occultorum morborum refert, se hominem vidisse, qui ad certa temporum intervalla ex late-

latere sano, & integro sanguinem mittebat, ultrò sistente sanguine, atque adeò poris naturaliter se laxantibus ad sanguinis fluxum, & se comprimantibus ad consistentiam, donec scissa vena hepatica salutem attulit. Ultrumque hujusmodi sudorem sanguineum tribuit philosophus complexionis vitiatae. Ita enim habet lib. 3. hist. cap. 19. *Si sanguis immundè humescit, morbus infestat: sic enim in speciem saniei diluitur, & adeò ferescit, ut jam nonnulli sudore cruento exsudarint.* De altero ita loquitur lib. 3. de part. cap. 5. *Nonnullis accidit, ut cruentum quoddam excrementum exsudarent propter vitiatum corporis habitum.*

Sudor tamen iste non in omnibus ex hac causa proficiscitur; ubi enim deficit materia, nec sanguis admodum est aquosus, sed per magnitudinem passionis magis attenuatur, accidere potest, ut sanguis effluat per corpus spongiosum, & rimosum, & omnino ob vehementiam seceratur. Sic deficiente lacte, si nimium per suctionem extrahitur, sanguis elicitor, quia venae, quae sunt sanguinis conceptacula, toto corpore sparguntur tanquam tubi ad deducendum benignum humorem, quo universae partes rigantur. Si ergo interveniente extraordinario aestu calefiat, & rarefiat sanguis, foras expelletur per cruentum sudorem. Sic scribitur vir ubertate sanguinis, & praeservida temperie praeditus, ex modica ad ludum applicatione non semel, sed saepius sudasse sanguine; licet ludus vehementem intensionem non exigeret, nec esset periculum magni dispendii ex colludentium victoria. In hanc ultimam causam refero sanguineum Christi sudorem. Neque enim iste oriri potuit ex temperamenti corruptione, vel cutis nimia tenuitate, aut virtutis retentivae imbecillitate, qui omnes defectus à Christi corpore optimè constituto sunt semovendi: neque nasci potuit ex mera tristitia, quae potius sanguinem ad cor traxisset, quam foras propulsasset. Igitur natus est ob extraordinarium aestum, qui sanguinem rarefecit, & ad exteriora membra pepulit, in suo quidem exitu tenuem, paulò post tamen vi externi frigoris iterum condensatum.

Ardor autem ille vehementissimus secutus est in Christo post immen-
nem tristitiam, quae eum primò adeò gravavit, ut usque ad mortem affectum se maerore fateretur. Ea enim tristitia aliquamdiu conflictata est cum generoso audaciae motu, insurgentis adversus imminetia tormenta tristitiam inducentia; qui conflictus agoniae nomine donatus est à sacro codice, & aliquamdiu à Christo habenas affectibus laxante susceptus est, donec heroico impetu superavit audacia, & erectio mentis. Unde tantus in sanctissimo Christi corpore aestus exstitit, ut sanguis, quem prius timor ad cor retraxerat, calefactus, & rarefactus ex omnibus parti-

partibus exsudaverit per venarum rimulas & poros ardore laxatos. Adstipulatur nostræ huic sententiæ philosophus sect. 2. problem. q. 26. ubi quærit, cur in lucta, sive agonia sudent pedes, & partes aliàs admodum frigida, & in ægris omnium maximè operimenti egentes. Problema enim hoc more solito per interrogationem sic dissolvit: an quia agonia non est caloris transmutatio (quemadmodum in timore ex supernis ad inferiora; quare etiam timentium ventres solvuntur) sed ejus potius augmentum, quemadmodum in ira? igitur ex interna lucta, sicut sudor aqueus, ita etiam diffusio sanguinis exoriri potest, nec alia illius causa potest excogitari.

DISSERTATIO XII.

An fuerint passiones in statu innocentia, vel etiam in statu puræ naturæ, & cujus indolis illæ fuerint?

§. I.

Explicantur diversi status.

PEr statum hęc intelligenda est certa vivendi conditio, in qua homines secundum ordinem Divinæ providentiæ, aut fuerunt constituti, aut saltem constitui potuerunt. Omissio statu viæ, qui tunc dari dicitur, quando creatura rationalis tendit ad possessionem ultimi finis, seu statum patriæ, qua beati fruuntur in cælo, ad alios intentioni nostræ magis accomodos pergo. Hi autem vulgò nominari solent, primò status puræ naturæ, qui licet exstiterit nunquam, supponitur tamen esse possibilis, estque imprimis necessaria illius cognitio ad cæterorum intelligentiam hauriendam. Tum subsequitur status naturæ integræ, ac deinde status justitiæ originalis, ac tandem status naturæ lapsæ, ejusque postmodum per Christum reparatæ. Status puræ omnino naturæ ille audit, in quo homo quidem instructus fuisset perfectione essentiali, & facultatibus illius naturæ congruentibus, cum adjuncto Dei concursu, & providentiâ circa illum occupatâ; præter hæc tamen dotatus non fuisset donis aliquibus naturæ de se indebitis, ac proinde ordinaretur non nisi ad finem naturalem, nec media alia ipsi subministrarentur, quàm opportuna ad beatitudinem naturalem. Statum naturæ integræ implet ille, in
p quo

quo ultra omnes facultates naturales, apparet in homine specialis prerogativa, quæ consisteret in carentia fomitis, & effrænata concupiscentiæ; seu in perfecta subjectione appetitûs sensitivi ad rationalem, ita ut inferior contra superiorem moveri, aut rationem prævenire non permitatur. Cum enim ex dissidio duplicis appetitûs natura humana difficultatem, & repugnantiam ad bene operandum patiatur maximam, si pax accesserit, & concordia, censetur tunc ita perfici, ut rectè, non autem quasi claudicando in moribus progredi valeat; ac proinde vox illa integritatis visa est idonea ad istius perfectionem significandam. Huic proximè accedit status innocentiae, & iustitiæ originalis, qui primis nostris protoparentibus obtigit, quique præter naturæ integritatem involvit primariò gratiam sanctificantem, quæ vulgò in sacris litteris iustitia appellatur, eò quòd maximè constituat hominem rectum in ordine ad Deum. Accomodatur etiam illi nomen iustitiæ originalis, quia sanctitatem illam cum aliis donis protoplastis acceperunt, ut ad posteros per originem, id est, per generationem naturalem à se propagandos transfunderent, nisi transgressio præcepti Divini obstitisset. Quod postremum quidem contigit, atque ita successit ille, qui cum proprietate status naturæ lapsæ, seu per peccatum corruptæ exprimitur, & in quo lapsus Adami non tantum fuit personalis, sed potiùs capitalis, & totius naturæ humanæ. Quamobrem ipse cum posteris orbatus fuit omnibus prerogativis, quæ statum innocentiae illustrabant, sicque sublata iustitiâ originali, quatuor hæc vulnera naturæ humanæ per peccatum Adami inflicta fuerunt; primò ignorantia intellectûs; malitia in voluntate; concupiscentia in appetitu concupiscibili; & infirmitas in irascibili; quibus accedit in corpore mortalitas, & pravi morborum affectus.

Tam longum tempus elapsum est, ex quo ornamentis innocentiae fuimus spoliati, ut non nisi obscura nobis idea de illo remanserit; & nisi Deus continuò pergeret punire peccatum parentis in filiis, jam una cum memoria excidisset omnis sensatio nostrorum vulnerum. Non possumus quidem ad vivum describere nec delicias loci, qui Adamo pro aula serviebat, nec perfectiones animæ, aut corporis, quibus in statu iustitiæ fruebatur; obligamur tamen admittere, locum abundasse omnibus, quibus avarissima desideria ad satietatem adimplerentur, & exulasse omne illud, quod quacunque ratione poterat quietem succutere, juxta illud Augustini: absit enim, ut illa beatitudo posset, aut in loco illo non habere, quod vellet, aut in suo corpore, vel animo sentire, quod nollet. Paradisus nec admittebat ardores æstatis, nec frigora hyemis, semper dives fructibus autumnii, & plenus deliciis vernantis æstatis. Non aderant

aderant tumultus, qui essent componendi; non inimici, qui impugnandi; non infortunia, quæ timenda. Omnes creaturæ unanimiter conspirarunt in servitutem hominis, bruta omni submissione venerabantur illius auctoritatem, ac sicut supra terram nullæ germinabant spinæ, ut aliqui indicant, sed mera succrescebant gaudia, ita feræ in mediis sylvis omnem exuerant ferocitatem. Cæli ipsi non poterant demittere, nisi felices influxus, nec sidera alio, quàm benigno, & faventi nos intuita fuissent aspectu. Constitutio humani corporis tam erat excellens, ut sanitas nunquam alteraretur, &, si fortè temporum injuriis subjaceret, solo esu fructûs de ligno vitæ novo instaurabatur vigore, quo robustior reddebatur adversus quoscunque insultus. Erat immortalis non quidem ex sua natura, sed per gratiam, cognoscebâtque homo non posse peccatum vitæ insidiari, nisi ipse aditum aperiret infelicissimo innocentie destructori. Nec anima debebat invidere hæc bona corpori, cum etiam ipsa frueretur felicitate non minùs æstimabili: nempe scientiâ rerum naturalium infusâ tantâ, ut occultissima quæque cognosceret. Videres in illa memoriam oblivionis incapacem, voluntatem ad ordinatas solum inclinationes propendentem, affectus omnes ita ritè compositos, ut nihil illius quietem posset interpellare.

§. II.

Status innocentie à passionibus non fuit immunis.

Non credo, me offensionis ansam præbiturum Theologiæ Magistris, si aliquid de felicissimo hoc statu protulero, quod veritati consentaneum judico. Ita autem sentio. In fortunatissima illa conditione, quam, nescio, an dicendi simus potius perdidisse, vel projecisse; in illa, inquam, conditione tamen passiones non defuerunt. Sicut enim homo defensus gratia originali immortalitatis robore erat instructus, quamvis ex corpore compositus mortalitati esset expositus; ita videtur pari ratione inferendum, passionibus fuisse obnoxium, eò quòd purus spiritus non esset, quamvis illæ fuerint pacatissimæ, & à rationis norma penitus cicurata. Ut vim hujus argumenti meliùs perspiciamus, ponderemus explicatiùs principium, unde consequens derivatur, & statim patebit, hominem abjiciendo gratiam potuisse morti succumbere, & immortalitatem magis fuisse donum à cœlo descendens, quàm naturæ proprietatem. Si revera immortalitas hominis ad illius integritatem pertineret, opus non ha-

huius alimentis, & necessarium non fuisset privilegium, ut liberaretur à malo, quod non erat pertimescendum. Igitur cognoscimus, eundem, sicut indiguit cibo ad vitam conservandam, ita eandem perdere potuisse; & quia vita debilis redintegranda erat auxiliò fructuum miraculò excoctorum, sequitur, eum à morte non fuisse immunem, & vitam illius æquè indiguisse remediis obstantibus, ac nostram. Verum est, huiusmodi remedia sua virtute superasse nostra, & operata fuisse efficaciam singularem, & validiori, ita ut vitæ cursus nunquam tam funesto fine terminatus fuisset, ac noster: verum etiam est, fuisse eliminatam omnem corporis corruptionem, sed fatendum pariter est, si homo talibus remediis usus non fuisset, à calore naturali absumendum fuisse humidum, ut vocant: Philosophi, naturale, & senectus indispensabiliter illum ad confinia mortis protrussisset. Ab hoc, quàm parùm absit Hipponensis Antistes, patet luculenter ex lib. 1. Quæst. vet. & novi testamenti, ubi scribit: *Non corpus ejus tale erat, quod dissolvi impossibile videretur, sed gustus arboris vita corruptionem prohibebat. Denique etiam post peccatum potuit indissolubilis manere, si modo permissum ei esset edere de arbore vitæ.* Si igitur Adamus naturaliter à morte exemptus non fuit ob annexum sibi corpus, etsi morti non subjacuerit unctus balsamò divinæ gratiæ; dici æquè poterit illum non omnibus passionibus caruisse, eo quòd anima corporeò ergastulò fuerit mancipata.

Solum igitur statuendum, mansuetiores tunc fuisse passiones, à iustitia originaria sanatas has ægritudines timuisse Adamum in statu innocentiae, sed timorem natum non esse sine ratione; spe in varia abductum fuisse, sed spem istam fundamentò non destitutam. Credo equidem, non omnes in Adamo passiones locum invenisse, eò quòd animam ad quietem ordinatam infestare non potuerint illi affectus, quorum præcipuum munus est sana consilia præpedire, aut perniciem advocare; non dico, cor illius fuisse occupatum tristitia, aut desperatione, eò quòd malum ipsi appropinquare non potuerit, & inundatus solum gaudiis, mærore, solis miseris proprio, caruerit. Interea tamen certò existimo, cum perspiceret se subiectum legibus à suprema Majestate sibi impositis, subinde spem ipsi blanditam fuisse, vel timore absterritum, aut ab utroque affectu inter repagula debiti officii coërcitum. Ita certè censeo, in infelicissimo illo contractu inter incautam Matrem nostram, & dæmonem instituto, repertas fuisse omnes illas passiones, quæ communiter insurgere solent, ubi de negotiis majoris alicujus momenti consultamus, mihi quæ persuadeo, promissa infernalis seductoris arrexisse illam ad sperandum; minas à Deo intentatas timore illam percussisse; pulchritudinem pomi
vetiti

vetiti induxisse ad desiderium; & difficillimum erit concipere, tantam voluntatis immutationem sine ulla corporis alteratione, aut immutatione. Atque hoc est fulcrum, cui innititur assertio, hominem in statu innocentie passionibus fuisse expositum, quas nos experimur, cum fuerint ipsi metuenda supplicia, præmiæque respectanda. Sicut usus est sensibûs, tanquam instrumentis corporis sui, ita adhibebat passiones ad animæ suæ functiones. Nec differebant illæ à nostris pathematis ex earum natura, sed solum magis dociles se exhibebant rationi, & per gratiam originalem earum rabies, & confusio extinguebatur.

§. III.

Quales passiones fuerint in statu pura natura?

Comparando statum hominis post infelicissimum Adæ lapsum cum statu ejusdem in puris naturalibus (si culpam originariam detrahas, hominemque solum quoad intrinseca consideres) non sunt in uno statu aliæ, aut vehementiores passiones, quàm in alio ad bona sensibilia inconcessa, experireturque ille eandem in utroque pugnam partis inferioris cum superiore. Videtur hoc sequi ex hac propositione damnata: *Integritas prima conditionis non fuit indebita naturæ humanæ exaltatio, sed naturalis conditio*, quam confixerunt Sanctus Pius Quintus, & Gregorius Decimus tertius. Ex ea enim infero sic: igitur tenenda est ejus contradictoria: integritas primæ conditionis, prout illa abstrahit ab elevatione naturæ humanæ, fuit indebita naturæ humanæ. Sed, amabo! quid est aliud integritas naturæ, prout illa ab elevatione præscindit, quàm plena subjectio partis inferioris ad superiorem? si ergo integritas non fuit debita humanæ naturæ, neque subjectio partis inferioris ad superiorem ei debebatur, & quod ulterius concluditur, tales nunc exsurgent ex hoc fonte passiones, quales excitatæ fuissent, si donum illud removens hæc mala nunquam intervenisset. Indicant hoc ipsum non obscure sacrae literæ Genes. 3. illis verbis; pulvis es, & in pulverem reverteris. Hujus sententiæ juxta purpuratum Bellarminum sensus est: quamquam mea benignitate te valde gloriosum effecerim, ita ut nec mors, nec alia tibi mala formidanda essent; tamen ex natura tua mortalis, doloribus, laboribus, passionibusque subjectus eras; verbo pulvis eras. Et quia donò illò meò superadditò es tuâ culpâ spoliatus, & in statum tuum naturalem. ecidisti, in antiquum pulverem tam physicum, quàm moralem, tam.

in mortem, quàm in concupiscentiam reverti te sinam. Sic etiam miratur regius Propheta psal. 8. hominem ferè Angelis æquatum, dum inquit: *Quid est homo, quod memor es ejus &c.* quasi dicere vellet, obstupescendum est, hominem ex natura sua corporeum, mortalem, animalium, cæterorum affectibus obnoxium, ad eum honorem, & gloriam evectum, ut parùm omninò ab Angelis distaret. Et quid designant honor, & gloria, quibus dona primo homini collata comparantur, nisi aliquid extrinsecum, & superadditum? de veterum, Sanctissimòrum Patrum testimoniis si loqui vellem, infinitus essem. Sic enim S. Dionysius Areopagita libro de divinis nominibus cap. 4. parte 4. loquens, *Nec Angelica*, ait, *munera his tributa aliquando permutata, sed integra sunt, penitusque conspicua.* Ex quo Scholastici Theologi communem illam sententiam acceperunt, naturalia in dæmonibus post delictum commissum, mansisse integra. Si autem in Angelis malis naturæ dona intacta fuerunt relicta, quare multùm dubitemus, ut id de homine quoque intelligamus? sic etiam S. Augustinus Lib. 4. in Julianum cap. ult. ait: quid est, gustatò cibò prohibitò nuditas indicata, nisi peccatò nudatum, quod gratia contegebat? *Gratia quippe Dei magna ibi erat, ubi terrenum, & animale corpus bestialem libidinem non habebat. Qui ergo vestitus gratiâ, non habebat in suo corpore, quod puderet, spoliatus gratiâ sensit, quod operire deberet.* Vides hoc loco semper ab Hipponensi innocentiam illam, justitiàmque originalem primi hominis, gratiam appellari: vides eam indumento, quod superadditur extrinsecus humano corpori perpetuò comparari. Vides denique bestialem libidinem terreno, & animali corpori naturaliter convenire, & ideo non ex natura sua, sed ex Dei favore corpus Adamì terrenum, & animale in statu innocentie caruisse. Accedit S. Ambrosius, qui libro de Elia, & jejunio cap. 4. sic scribit. *Opertus erat Adam virtutum velamine, priusquam prævaricaretur, sed tanquam exutus prævaricatione vidit se esse nudum, quia indumentum, quod habebat, amiserat.* An non iterum vestis appellatio gratuitam innocentie stolam indicat?

Addamus hisce argumenta ex ratione petita. Constat, naturale esse corpori animali sensibus, & appetitu prædito inclinari versùs bonum sensibile: naturale esse spiritui rationali concupiscere bonum spirituale, ac rationale: quare si ex corpore animalis, & spiritu rationali una natura completur, ingenitum huic composito erit diversas, & inter se pugnant propensiones elicere. Quod igitur primi parentes nostri ante fatalem pomì esum pugna istà violentiore, & maxime periculosa diversarum appetitionum caruerint, donum erat naturæ vires excedens, & non conditio

ditio naturalis. Secundò, si major daretur passionum rebellio in natura lapsa, quàm in natura pura, tunc hæc provenire debuisset ex morbida aliqua qualitate. At quænam hujus causa idonea assignari potest? certè non alia, nisi peccatum protoparentis. At verò hoc ineptum est ad producendam in nos, derivandamque hujusmodi qualitatem, quia actus manducandi vetitum cibum in ipso protoplaste remansit, & ideo in aliis qualitatem istam morbidam procreare non potest. Rursus an ex peccato primi hominis producta fuisset naturaliter qualitas aliqua in ejus semine, cui vis inesset venenatam illam qualitatem in appetitu, subinde aliam in voluntate posterorum producendi? igitur peccatum in omnibus hominibus eadem vi polleret, & cæteri parentes scelerum suorum facce pariter posteros inclinarent ex vi generationis naturalis, quod ex innumeris titulis cuilibet displicere debet. An dices, non virtute generationis naturalis, sed ex sola Dei voluntate ægritudinem traduci? at reclamant Scripturæ, quæ concupiscentiæ actus non esse à Deo multis locis testantur. Ita D. Joannes eandem affirmat non esse ex Patre, sed ex mundo. D. Jacobus scribit: neminem à Deo tentari, sed à sua concupiscentia; *lex non concupisces*, sancta, & bona sine dubio promanat à Deo: quomodo igitur lex membrorum, quæ illi repugnat, est à Deo? quomodo, si ipse hos stimulos produxisset, non esset ille causa, & Author peccati?

Neque passiones indomitæ allicere nunc possunt voluntatem intensiore conatu ratione habituum vitiosorum, quibus affecta est in uno homine potius, quàm in alio; hæc enim consideratio est extra rhombum præsentis controversiæ, cum homo lapsus ratione solius peccati originalis non induerit aliquem habitum vitiosum, utpote qui solum erumpit per plures actus frequentatos. Quin fieri posset, ut homo quispiam genitus in natura pura, postea per pravam consuetudinem sibi adscisceret intensissimos vitiorum habitus, quibus pathemata æquè redderentur effrænia, ac nunc in homine lapso æqualiter vitioso. Denique tertio, si vires appetitus in homine post perpetratum peccatum in se sunt minores, quàm fuissent in natura pura, hoc solum accidere posset per ablationem alicujus boni intrinseci in ea facultate; vel per introductionem cujuspiam qualitatis nocivæ; vel per imminutionem inclinationis naturalis ad honestum. Qua enim viâ aliâ deterior status exponi potest? At verò nec potuit detrahi anima, nec corpus auferri sine totius hominis destructione. Non secundum; quia qualitatem illam prorsus commentitiam esse nunc primum ostensum est. Non denique tertium; quia etsi per quodlibet scelus superinducatur aliqua pronitas ad scelus simile

In futuro perpetrandum; hæc tamen major inclinatio tantum oritur ex specie relicta, quæ successivè augmentari potuisset in ipso Adamo, non autem modo in illius posteris. Addo tantum hoc, quod si per admissum delictum intrinsicam corruptionem humana natura passa fuisset, tunc janua aperietur asserendo, per plura, & iterata crimina posse ex toto congenitam naturam deperdi. Credo autem, cum Hipponensi lib. de Spiritu cap. 28. hominem etiam extremè impium sine aliquibus bonis non inveniri. Credo cum eodem nullius animam adeò esse perversam, in cuius corde Deus non loquatur, quæ locutio interior locum non videtur habere in eo, à quo omnia naturalia intrinseca excluduntur: credo denique in ipsis damnatis remanere, naturalem inclinationem ad virtutem, sine qua in eis remorsus conscientiae vix salvabitur. Igitur videtur multipliciter manifestum, passiones nunc ex se non parturire peculiarem difficultatem ad peragendum bonum, & malum evitandum, quæ non etiam in statu puræ naturæ emerisset.

S. IV.

Quomodo homo per peccatum fuerit vulneratus in naturalibus?

Sed qua ratione nos in hac sententia exponemus similitudinem illam à D. Luca nobis propositam hominis scilicet descenditis ad Hierusalem, qui in latrones incidens non solum spoliatus vestibus, sed etiam impositis plagis semivivus fuit relictus? huic enim Patres communiter comparant hominem post Adæ lapsum, voluntque hominem à sede gratiæ dejectum, non modo spoliatum fuisse gratuitis donis, quæ vestium extrinsecarum nomine intelliguntur; sed advertunt etiam, in naturalibus vulneratum fuisse. Nodus iste adeò difficilis non est, ut præeunte Doctore Angelico solvi non possit, qui 1. 2. q. 85. art. 3. in corpore concupiscentiam sanatam esse docet per justitiam originalem, qua justitia post peccatum perpetratum potentiæ naturales fuerunt destitutæ: additurque: *& ipsa destitutio vulneratio dicitur natura.* Quod non ita cum Calvino, Lutero, Janzenio, & horum gregalibus est accipiendum, quasi justitia originalis ideo dicatur naturalis, quod debita fuisset; sed quia fuit sanativa naturæ ad rebellionem propensæ, & quia fuit reductiva naturæ ad ordinatam subjectionem: hincque appellatur naturalis non
enti-

entitative, & ratione sui, sed terminative, & relate ad id, ad quod sanandum erat destinata.

Ut autem hæc clarius perspiciantur, servit nobis Philosophus, qui dolorem & vulnus inductivum doloris in animalibus ex divisione, aut separatione quadam continui oriri docet. Cum igitur in homine duæ partes (nimirum anima rationalis, & corpus, ac subinde duplex appetitus, alter rationalis, alter sentiens) in felicissimo illo iustitiæ originalis statu essent conjunctæ, & amica unione convenirent in bono agendo, & malo vitando, etiam intra ordinem naturalem; postea verò per amissionem ejus doni supernaturalis fuerint invicem divisæ, quodammodo, & in opposita inclinent suo nisu, jure meritò dicitur homo lapsus non solum fuisse gratuitis spoliatus, sed etiam vulneratus in naturalibus. Si unio nulla præcessisset inter utramque partem, prout antecessit statum naturæ lapsæ, tam parùm naturalium hominis partium divisio vulnus diceretur, quàm parùm laborum separatio rationem scissionis habet. Porro vulnera homini illata per crimen originale quatuor numerari solent; nimirum infirmitas, ignorantia, malitia, & concupiscentia. Infirmitas in eo sita est, quòd natura humana spoliata donis gratuitis, ac sibi relicta non solum subjaceat ægreditudinibus, & morti corporis, sed neque polleat robusta vi ad bene agendum, careatque in pœnam delicti admitti iis auxiliis, quibus aliàs munita piè vixisset. Ignorantia est inscitia veritatum quàm plurium non modò ad theoriam, sed etiam ad morum praxin spectantium; sive defectus considerationis motivorum ad sanctè operandum utilium, qui facit, ut homo tenebroso quodam, & profundo sinu ignorantiae delitescens, non nisi cum magno labore salutarium meminerit, & perceptorum faciliè obliviscatur. Malitia potissimum habet locum in voluntate, quæ ob perversum amorem à Deo ultimo fine fuit averfa, & inclinata ad bonum commutabile sibi oppositum. Concupiscentia denique ex eodem fonte orta est propensio ad bonum sensibile & delectabile rationi repugnans: hæc amisso aureo frænò iustitiæ originalis, quo in officio continebatur, sponte sua belluinos excitat motus, ac sæpè adeò effrænes, ut rationem impotenter abducant, nisi gratiæ viribus inhibeantur. Sed hæc tam gravia, & exitialia vulnera non habuit homo ex institutione divina attestante Hipponensi Præsule lib. 3. de libero arbitrio cap. 18. non posse à libidinosis operibus temperare non esse naturam instituti hominis, sed pœnam, & vindictam damnati: coibant priùs mutuo fœdere anima, & corpus, vires hominis superiores, & inferiores in cognitionem veri & amorem boni honesti, non modo supernaturalis, sed etiam naturalis: at ubi separatio facta est non solum sub-

cuta est spoliatio donorum supernaturalium ; sed præterea hæc quatuor vulnera naturalibus viribus fuerunt inflicta , etiam sæpissimè passiones prædominantur.

§. V.

Opponit se hisce Thomas de Lemos.

Hisce se acerrimè opponit famosus divinæ gratiæ contra Molinam pugil Thomas de Lemos qui in panoplia sua demonstrat sententiam nobis adversam esse Divi Thomæ , ut refert Henricus à S. Ignatio in ethica amoris. Hic (si fides adhibenda celeberrimo Historico Sery, contra Gregorium de Valentia nostram opinionem sustinentem in congregatione decima de auxiliis , multis declamavit , ex eaque peccatum originale extinctum iri contendit. Quin consultores jussu Pauli quinti jam elaborârunt Canones damnandæ hujus doctrinæ , ut adversæ Tridentinis decretis ; proferturque illa ab eodem Historico non quidem ut authentica ob legitimæ promulgationis defectum , sed ut veritate Scholastica nixa.

Bene est , amplector adversarium , & illius dictis levi impendio dissertationi meæ firmitatem statuo. Demonstrationem ventilat ; sed puto esse talem , quæ sit digitò , & aliud non est , nisi indicatio : pernego autem esse demonstrationem talem , de qua Aristoteles in libris posteriorum ait , esse syllogismum evidentem per causam , donec allegetur demonstratio. In congregationibus habitis declamaverit Lemosius , contenderit ad raucedinem usque ; quid inde ? elaborârint Consultores Canones ; quid mali evenit ? quis nescit , ex his pro Molina stetisse Henricum Sylvium Vicarium generalem Ord: Carmel. Anton. Bovium ejusdem ordinis præstantem Theologum postea Melvitensem Episcopum , aliósque viros omni exceptione majores. Ad bullam quod attinet dormiamus securi dum illa authentizetur. Interea legat Lemosius constitutionem Innocentii X. in qua decernitur assertis actis manu scriptis , & forsitan typis excusis , congregationum habitatum sub Clemente VIII. & Paulo V. nullam omnino fidem esse adhibendam , neque ab alterutra parte , seu à quocunque alio allegari posse. Nec tantùm Pontifex actis , & constitutioni Paulinæ prætensæ fidem in judiciis decisivam , verùm etiam fidem historicam ademit. Lemosii enim , Pegnæque acta , nec non bulla prætensa Pauli V. priùs , & antecederet ad constitutionem Innocentii jam carebant fide in judiciis decisiva , cùm multò ante sumus Pontifex
per

per solenne decretum permiserit in Ecclesia citra censuram doceri tam doctrinam Molinæ, quam Banesii : igitur Innocentius ademit ipsis fidem, quam purè habebant, puta fidem historicam.

Tam multus est hic auctor in sua opinione stabilienda, ut in primo Tomo partem posteriorem ferè totam impendat ad persuadendam liberi arbitrii læsionem velut certam omnino & manifestè traditam à Conciliis, & Patribus ; velut doctrina catholica circa gratiam, & culpam originalem vix, ac ne vix quidem possit subsistere, si asseratur naturam infectam peccato originis habere easdem vires, ad bonum agendum, & vitandum malum, quas possideret condita in nuda natura. Sine, ut firmitatem tantum præcipui fulcri periclitemur. Sic autem habet : in statu naturæ lapsæ tanta communiter censetur rebellio passionum, ut absque præsidio supernaturali non possit moraliter homo servare diu legem naturæ, & vivere sine crimine mortali : hæc autem imbecillitas repugnat in statu naturæ puræ, & innocentis, cum obstet iustitiæ, & bonitati divinæ hominem, condere in tali statu, in quo sit moraliter ineptus ad consecutionem sui ultimi finis, & coactus ad transgressionem alicujus præcepti gravis : igitur non tam indomitæ passiones inclinarent ad actus turpes contra præceptum naturale hominem in puris naturalibus constitutum, quam rebelles nunc in malum, & perniciem pertrahunt. Et quis unquam prudenter optare posset in ea conditione creari, in qua ex una parte moraliter esset necessitatus ad aliquod crimen grave saltem indeterminatè sumptum : ex alera verò parte perpetrato semel scelere, remissio illius ipsi non deberetur, cum remissio peccati gravis sit beneficium prorsus indubitum, & transcendens omnia creaturarum merita ? an non ambæ aures tinniant animæ piæ, si audiat, Deum justissimum, optimum, & sanctissimum sub gravissima comminatione æterni supplicii homini imperare consecutionem ultimi finis, & tamen innocentibus per effrænes passionnes obicem ponere moraliter insuperabilem ? nec sufficit reponere, hominem in ea hypothesi habiturum vires ad prævalendum passionum seditioni per auxilium sibi à Deo concessum. Vel enim hoc adjutorium, consisteret in ordine gratiæ, vel naturæ ? per primum tolleretur, sive dissolveretur status puræ naturæ, à quo procul exulat omne spectans ad gratiæ classem. Secundum non sufficit ; cum illud adjutorium in alio consistere non valeat quàm in generali ipsius Dei concursu, qui sicut nunc non est potens ad gravem tentationem superandam, ita nec tunc inclinationibus prævalentibus adversus rationem præponderasset.

Hoc est potissimum fulcrum adversæ opinionis, majorem fortè, quàm pro merito, præferens speciem. Aio igitur, homini in natura

pura condito semper futuras fuisse moraliter sufficientes, & expeditas vires ad resistendum inordinatis passionum motibus, vel ex vi concursus generalis Dei, si affectus insurgerent nisu leviori, & non superante conaturali rationis, & arbitrii facultatem; vel ex vi specialis auxilii intra ordinem naturæ collati, & nullatenus spectante ad classē supernaturalem, quo solo status purorum naturalium subverti posset. Hoc ipsum divinæ benignitatis præsidium intra ordinem naturæ dupliciter distingui deberet, in unum, quod esset sufficiens ad tollendam moralem necessitatem peccandi, & alterum, quod esset efficacissimum, ut modo contingit in exaltatione gratiæ supernaturalis. Si sermo sit de adjutorio efficaci, saltem respectu hujus, vel illius hominis in individuo, liberrimum esset Deo illud pro libitu denegare, aut liberalissimè, sive ex gratia latè dicta, & intra naturæ limites contenta (quæ sanè excludi non potest à statu puræ naturæ) conferre. An enim divina liberalitas thesaurorum suorum domina non est, ut eos tribuat, quibus vult, & quos voluerit, repellat? negata autem hac divinæ benignitatis protectione, & concessa solum moraliter sufficienti, manifestè constat hominem in ea hypothese liberrimè peccaturum. Adjutorium porro speciale sufficiens, seu præbens homini in natura moraliter sufficientes, & expeditas vires in actu primo proximo ad resistendum passionum tumultibus vehementissimis nunquam à Deo negaretur innocenti, sed potius deberetur.

At, inquires, quomodo potest gratia deberi? quid gratiæ magis adversum, quam debitum? an non ideo gratia, quia gratis datur, ex nominis etymologiâ, & communi mortalium sensu? an non Aristoteles hisce lib. 7. Rhetor. cap. 7. quid est gratia? gratis data? quid est gratia? gratis donata, non reddita, manifestè oppositionem involvit? verum enim verò cuperem, ut intelligeres medium hoc, quod ego nunquam gratiam nuncupavi, dupliciter deberi posse. Non est idem, Deum aliquid debere sibi, & debere homini. Fidelis est Deus, qui non patietur mortales ab appetitionibus sensibilibus tentari supra id, quod possunt teste Apostolo. Hoc medium igitur debuisset Deus sibi, ut imbecilles homines in statu naturæ puræ viventes, vel non sineret in graviores ad malum impulsus incidere, vel auxilium iis præpararet sufficiens ad resistendum. Nondum tamen dico, Deum sic hominibus debere gratiam: & multa potest Deus debere sapientiæ suæ, & justitiæ, ad quæ præstanda nulli obligatur creaturæ, sapientiæ, & justitiæ suæ debet Deus, ut non præcipiat homini, præcipuè innocenti, impossibilia: justitiæ suæ debet, ne pœnas exigat ab eo, si quid non fecerit, quod in sua positum potestate non habuerit. Ita, si rectè memini, contra

tra Lutherum, & Calvinum definitum fuit à Patribus Tridentinis, ita contra Jansenium à Pontificibus. Unde sicut nunc, quoties Divinus Legislator homini præcepta imponit, quæ absque supernaturali gratia adimpleri nequeunt. Exigit à Deo sua sapientia, & justitia, ut tale auxilium, licet naturæ hominis indebitum, omnemque ejus ordinem transcendens, nequaquam deneget, præsertim, si transgressionem ad culpam, & supplicium imputare decreverit: ita ad ejus quodammodo justitiam pertinet homini in natura pura prorsus innocenti oportuna, & necessaria subministrare auxilia ad consequendum finem ultimum naturalem, ad quem creatus fuisset. Imò non tantum sibi, sed etiam ceraturæ deberet auxilia sufficientia. Alioquin verum esset, quod argumentum intendit, scilicet, quod homo in magna infelicitate primum positus à Solo Deo esset, ac frustra in eum finem conditus, quem nec propriis viribus, nec concessis sibi à Deo intra ullum statum assequi valeret, quod sapius ut planè absurdum à D. Augustino, & aliis est rejectum. Insuper cum in eo statu homo adstringendus foret præceptis naturalibus Dei ad actiones præcellentes quarumlibet ferè virtutum moralium, & præcipuè ad dilectionem Dei super omnia, prout est naturæ auctor, & ultimus finis; daretur utique aliqua exigentia ad sufficientes, & expeditas vires, quibus ejusmodi præceptis obsecundaret; alioquin, si istæ non præstarentur creaturæ rationali, imponeretur subdito obligatio, & onus impossibile. Sed hæc Philosopho sufficiant in re altioris fori.

DISSERTATIO XIII.

An, & quales dentur passiones in plantis, & brutis animantibus.

§. I.

Cur quidam plantis passiones attribuerint?

U T nullum adeò absurdum delirium, quod non fautorem suum invenit, ita quoque trunci quidam exstiterunt, qui non modò perfectioribus, sed omnibus omnino plantis sensum, & appetitum tribuerunt, nec aliud esse discrimen à brutis volebant, nisi quod in istis sensus magis acutus, in plantis verò magis obtusus vigeret. Inter horum somniorum Patronos recensent Empedoclem, Anaxagoram, Hieronymum.

ronymum Cardanum, nec ipsum Platonem Plutarchus eximit; jurēne, an injuria, non decido. Ut ita sentirent, & passiones arboribus tribuerent, suadebant similia: quod plantæ res alias amore, alias odiō prosequerentur, nec non ad invicem amicitias, & inimicitias exercerent. Sic scimus hederam ad vicinas arbores adrepere, easque amico complexu stringere: vitem ex adverso ita ab hederā refugere, ut juxta plantari nolit. Eadem vitis implacabili odio non modò hederam, sed & corylum, brassicam, & laurum prosequitur. Unde Androcides præsens temulentia propulsandæ remedium ex hisce quatuor plantis confecisse dicitur à Theophrasto. Quam perpetuas invicem conservent inimicitias geminae hæ plantæ, ex eo etiam eruitur, quod, si, dum coquitur brassica, vel modicum quid vini affundatur, illa nec probè coquatur, nec ipsius color sibi ampliùs constet. Si hoc experimento non convincimur, jubent nos intueri quercum, quæ referente Dioscoride, adèd non fert nucem juglandem, ut juxta illam consista extabescat: cui tam ingens cum olea dissensus, ut altera in alterius scrobem depacta emoriatur, & quemadmodum glandes comestæ capitis dolorem provocant, ita oleum ex olivis expressum eundem fugat. Exhibent nobis arundinem, & cicutam, quæ adèd sibi invicem adversantur, ut una alteram interimat, si quidem perit filix, quam paulo uberior arundo circumdat. Vicissim evanescit arundo, quam multa filix in orbem cingit. Quin fama, si non fabula est, radicem filicis contusam arundinea spicula corpori infixæ ejicere, & si filice, vomeri imposita aretur campus, nullam in eo arundinem nasci.

Ut autem hæc, & similia discordiam, ita alia plurima amicitiam colunt, uti oliva, & myrtus; oliva, & ficus; ulmus, & ficus, juxta illud Juvenalis Satyr. 8.

Stratus humi palmes viduas desiderat ulmos.

Congruunt cum istis apprimè, quæ de amore singulari scribuntur, quo vitis prosequitur olivam, oliva, & malus punica myrtum; quo allium depereunt rosæ, & prope id haud paulo odoratiores evadunt. Palmæ adèd se mutuò amant, ac quærunt, ut simul ac ramus unius ramum alterius contingit, una mox alteri se implicet, nec una sine altera fructum procreet. Quis nescit, plantas quasdam dici *pudicas*, quas memorat Scaliger exercit. 181. n. 28., quæ appropinquante homine, vel animali ramos constringunt; recedentibus pandunt? quis fidem negabit Diodoro asserenti arborem aglaophitim noctilucam, quæprehendere conantem refugit, verita contactum præ metu incommodi? hæ ipsæ tamen multum discrepant ab illa alia herba, quæ *impatiens* appellatur, quia appro-

appropinquantibus digitis siliquas contrahit, nec est tentandum mutare velle siliquas in folia; tangi enim impatiens eam mutationem non admittit. De herba viva notant, quòd, si quis apprehendere attentaverit, eandem se sub tenues ramusculos condere, & quasi fuga subducere. Similia tradunt de herba *minosa*, aliisque similibus, qui arcana naturæ scrutantur.

Imo nec opus est exempla ista in medium afferre, ut passiones plantis vindicentur, ulteriori nos examinis labore supersedimus, ubi ex Plinio, Columella, Theophrasto, Cardano, aliisque Potamicis intellexerimus, in quibusdam plantis, ut in quercu, robore, siliquis, palmis, ac cyparissis utrumque sexum reperiri, ubi audiverimus communi voce herbam tabaci, aliam marem, aliam foeminam appellari. Passim conjugium vitis cum ulmo rei rusticæ scriptores celebrant, quibus ulmus mas est, & vitis foemina, ex quo conjugio feracissima uvarum, ac vini soboles enascitur. Denique totum negotium confectum volunt hòc ratiocinio, in plantis perinde, ac animalibus adest caro, medulla, nervi, venæ, oculi, cor; nervi pleni sunt spiritibus, venæ succò, ac sanguine, ubi cortex totus per circuitum secatur, arbor omnis arescit eodem planè modò, quo animalium, ita & plantarum nutritio, ac augmentatio peragitur. Sicut enim animalia cibum per os in stomachum trajciunt, ac chylum per ductum thoracicum in reliquum corpus dispensant, ita plantæ alimentum per radices, velut per os, ex terra in truncum tanquam in ventrem accipiunt, ac postea in ramos, cæterasque partes porosas distribuunt, donec in singulis in propriam convertatur substantiam. Nec desunt, qui cum clarissimo Domino Perraut, Malpigio, Mariotte, & aliis eximiis naturæ scrutatoribus existiment, succum nutritium in plantis non secus, ac sanguinem in animalibus perpetuò circulari, & ex radicibus in truncum & ramos ascendere, & ex his rursus in radices relabi. Secundùm exteriorem quoque partium configurationem plantæ sat multæ absoluti animalis speciem referunt; ita ut Kircherus asserat, se orchides apiformes, ac musciformes Romæ vidisse, quæ non modo figuram, sed & nomen commune cum apibus, & muscis habeant, quid igitur deest, ut plantis sensibilia pathemata denegemus? quid deest, ut formidemus dicere, easdem prosperis rebus lætari, tristari adversis, mœrore contabescere; cum aliàs quoque vitibus lachrymas tribuamus?

§. II.

Quàm insulsè hoc fecerint?

Nolim ego infrà bruta passiones diffundendas existimes : Aristoteli, Augustino, aliisque sanioris Philosophiæ Sectatoribus adhæreo, non huic lignatorum sententiæ. Horum primus lib. 3. de anima. cap. 13. tex. 66. disertè pronuntiat, plantæ nullum habent sensum. Et lib. 2. de anima cap. 3. explicans animæ potentias tex. 27. *plantis*, inquit, sola inest vegetativa. Hipponensis verò Præsul lib. de quantitate animæ cap. 33. sic eum Sarcasmo rejicit contrarium : *Non est audienda, nescio quæ impietas, rusticana planè, magisque lignea, quàm sint ipsæ arbores, quibus patrocinium præbent, quæ dolere vitem, quando uva decerpitur, atque audire credit : de quo errore sacrilego alius est dicendi locus*, scilicet libro de morbis Manichæorum, qui hanc fatuitatem admiserunt. Si prodesset deliram hanc sectam colere, & arrideret reverentiæ officium ligneis istis hominibus exhibere, ratione sic tueri posset nostra assertio. Si plantis affectus quidam inessent, aliquò illos, eoque sufficienti judicio proderent : exhiberent nempe aliquod signum doloris, cum securis ictum excipiunt, se v. g. contrahendo, ut animalia etiam imperfectissima, puta, ostræ, spongiæ, cochleæ, aliæque conchyliæ assolent; quæ, si quid asperi ipsis impingitur, protinus sese contrahunt, & ingrata refugiunt : explicantur autem, si quid humidi, & grati accidat. At quis unquam in plantis talem motum observavit? nimirum terrestria nimis sunt, ac densa plantarum organa, ac proinde inepta corpora ad tam nobiles operationes eliciendas. Ipsorum sensuum externorum organa, etiam tactûs solum temperamentum subtilius, & magis delicatum exigunt; quanto magis interior cognitio, & appetitio perfectiorem nervorum, & tunicarum structuram requiret?

Præterea verus affectus prævio sensu elicitus potest diuturna assuefactione etiam in ipsis animalibus mitescere, aut prorsus deponi. Cum enim sensus internus, & appetitus illi subjunctus non sint facultates usquequaque determinatæ, poterunt accessu habitûs inflecti; hinc bruta alioquin ferocissima cicurantur, fateturque Scaliger se lupum vidisse inter oves cicurem, ac leporem inter canes venaticos aluisse. Quàm autem vereor, ut tu mihi plantas etiam post longissimam indaginem invenias, quæ radicata sua deponant odia, aut in suis frigescant amoribus. Carent igitur hujusmodi substantiæ affectibus sensibilibus, denique

que ut cum Philosopho lib. 5. de generat. animal. cap. 1. discurremus, siccum illo inferimus: ubi sensus viget, etiam somnus, & vigilia locum habet; & quod vigilia est major, eò etiam perfectior erit vita, & sensus; unde infantes recens nati omnium maximè somno dediti esse solent. Quia, cum intra maternum uterum totum tempus dormiendo consuevit, consuetudine contracta, vigilandi quasi nescii, sentire, ac vivere quasi dormiendo videntur. At, ut opinor, non voles plantas dormire, neque vigilare; cum nullus somnus sit inexpergiscibilis. Igitur nonnisi ineptè in plantis fingitur appetitus, & motus illius, qui virtutibus opponuntur.

Nec adeò multum valent phænomena: quæ priori loco contra rem nostram animo parum philosophanti videbantur. Sic igitur habet. Quamvis fortè non omnia, quæ de his plantis circumferuntur, fabulis sint accensenda; cum improbabile omnino sit, tam omnibus antiquis naturam harum plantarum fuisse incompertam, quam parum prudenter factum, tot cornicum, seu recentiorum oculatorum testium oculos vellemus configere: nihilominus ubi in aliquibus plantis tam mirandi pudicitiae, impatientiae, minarum, aliisque effectus recensentur, dici potest, eas non esse plantas sola anima vegetante instructas, sed plant-animalia, & arbores sentientes juxta Nemelij appellationem; hoc est, vera animalia plantis quibusvis nobiliora. Fortè etiam sola transpiratio tangentis hominis hujusmodi virgineis, & delicatis plantis nociva est; cum ex aliis arbutis elucescat, eadem solo animalium halitu emarcescere.

Quæ de diversitate sexus, & conjugio vitis, & ulmi fuerunt allata, risum potius, quam responsionem merentur, suntque anilibus fabulis accensenda. Omnis nempe similitudo, proportioque, qua nomen sexus fortiuntur, vel consistit in hoc, quod quasdam arbores reperire sit, quæ quidem fructum ferunt, aliæ autem non ferunt, ferentes tamen adjuvant ad fructum maturandum. Vel ex hoc in aliqua specie una dicitur mas, quod superiora illius sint majora, robustiora, & efficacioris ferè virtutis ad medendum; femella autem illa, cujus partes superiores sunt minores. Ex augmentatione, & nutritione animalium adducta non plus evincitur, quam analogiam quandam intercedere; nunquam tamen plantæ elementi elaboratione perfectionem animalium assequuntur. Imitatur enim natura prudentem patrem familias non modò in alendis membris diversis ejusdem animalis, ut sapientissimè advertit Aristoteles; verum etiam in nutriendis diversis viventium speciebus. Quemadmodum enim cura rei familiaris hoc exigit, ut cibus optimus dispensetur liberis, deterior detur servis, vilissimus projiciatur sociis

animalibus; ita speciebus viventium præstantioribus præstantiorem vitam tribuit natura, minùs præstantibus crassiorem, naturæ tamen, & forti suæ consentaneum.

Denique ex eo, quòd aliquæ plantæ animalis speciem præferant, nequaquam conficitur, quòd passionibus propriè, & non metaphoricè dictis sint obnoxia. Sit, quòd anthirrinum caput hominis, napelli flos mortui cranium, mandragora figuram hominis præferat: an inde dicemus, plantarum aliquas esse homines? sic sanè, volupe si esset, cum veteribus Ægyptiis parem furorem furere, quibus ut canit Juvenalis:

Porrum, & cepe nefas violare, ac frangere morsu.

Quòd numen aliquod illis inesse crederent, insaniæ gentis vecordissimæ merito sarcasmis, & cachinnis irridendâ. Aliud itaque est: animalis speciem præferre, & aliud verè esse animal, & proprias illius propensiones sentire. Priùs admitto, quibusdam animalibus competere: nego ulli competere posterius; aliàs etiam Zeuxis uvæ, & pictus Apellis equus, ad quarum primas decerpendas avolârunt aviculæ, huic verò prætereuntes equi adhinnierunt, non mera simulacra, sed veris formis prædita essent.

§. III.

An bruta sint obnoxia passionibus?

JAM quod ad bestias attinet, an nimirum illæ capaces sint similium alterationum, quæ à nobis passionibus nuncupantur; sciendum, Stoicos cum recentioribus Atomistis arbitratos fuisse, bestias passionum capaces non esse. Confundebant nimirum antiqui pathemata cum vitiis, volebantque omnes motus partis inferioris criminosos esse; unde non malè inferre poterant bruta omnibus affectibus sensuum carere, eò quòd omni libertatis umbra destituta, nec condemnari ob aliqua vitia, nec laudari ob virtutum decora possent. Dicebant, bruta animantia solo instinctu duci, qui aberrare non potest; & si quandoque debitam in suis actionibus mensuram excedant, id non accidere ex eorum beneplacito, sed ordinatione supremæ Providentiæ, quæ his tortoribus utitur tum ad hominum scelera puniendâ, tum ad tristiores casus præfigiendos. Quare illis sæculis animalium motus omnibus populis erant futurorum nuncij, statueruntque ex avium volatu, ex victimarum intestinis cæli voluntatem, & venturorum secreta cognoscere. Nituntur hæc

hæc testimonio ipsius Senecæ lib. 1. de ira cap. 3. & 4. pronunciantis. *Dicendum est feras irâ carere, & omnia præter hominem. Nam cum sit inimica rationi, nusquam tamen nascitur, nisi ubi rationi locus est. Impetus habent fera, rabiem, feritatem, incursum, iram quidem non magis, quam luxuriam. Et in quasdam voluptates intemperantiores homine sunt. Non est quod credas illi, qui dicit:*

Non aper irasci meminit, non fidere cursu

Cerva, nec armentis incurrere fortibus ursi.

Irasci dicit, incitari, impingi. Irasci quidem non magis sciunt, quam ignoscere. Multa animalia humanis affectibus carent: habent autem similes illis quosdam impulsus. Alioquin, si amor in illis esset, & odium esset: si amicitia, & similtas: si dissensio, & concordia, quorum aliqua in illis quoque exstant vestigia. Cæterum humanorum pectorum propria bona, malâque sunt &c.

Verum licet bruta à vitiis eximantur, gaudeantque natura innocentis; nihilominus tamen non sunt insensibilia, sed capacia tum veri doloris, & delectationis; tum desiderii, & metus. Edic sodes! an non hoc arguitur ex naturali instinctu, quo bruto condolemus ægrotanti, aut innocenter percusso? sanè non crediderim Cartesianos, ante quos omnes Ethici affectus in rationales, & irracionales diviserunt, adeò omnem sensum exuisse erga suos catellos, si fortè discerperentur, aut in flammæ conijcerentur; quidquid interim anima in glandula pineali judicaret, canes esse meras machinas indignas commiseratione. Certè nemini hueusque incidit, ut calamo fracto condoleret, aut ligno in flammæ projecto. Et cur homines censet verè dolere, & delectari? an quia præbent indicia harum propensionum? sed nec hæc indicia in brutis desiderantur. Dices, homines ita testari: at præterquam quòd communis persuasio doceat, bruta dolere, & delectari, etiam ipsæ bestię testantur per gemitum suum dolorem. Ais, hominem habere experimentalem notitiam, non verò bruta. Sed unde hoc tibi innotuit, nisi ex signis exterioribus, quæ æquè in animantibus ratione destitutis deprehenduntur? repetes, homines verbis posse explicare suas affectiones. Esto: nam & bruta saltem per naturales voces easdem significant. Deinde quomodo probas, abstrahendò à Divina fidei revelatione, infantes dolere, delectari, desiderare, amare, timere &c.? an ex vocibus articulatis? at has formare nesciunt. An ex gemitibus, aliisque signis naturalibus? at hæc etiam in brutis audies. Ex quibus judico, evidenter concludi posse, vel etiam in brutis hæc signa sufficere ad passiones ibi adstruendas, vel neque in infantibus sufficere: cen-

seo, ineptissimè defendi, naturam brutis concessisse facultatem ad signa doloris, & omnem dolendi facultatem ademisse. Et mirandum sanè esset, à cane herum tam animosè defendi, si omni sensibili motu destitueretur; à tympanorum & tubarum strepitu, imò ab inflictis vulneribus animari equum ad pugnam, si aliud præter spirituum agitationem nihil interveniret. Plura istis addere volebam; sed inexpectatò memoriæ incidit taurorum astutia, quam fortitudini adjungunt, ubi in circo aperto non minori calore pugnant pro obtinenda gloria, quàm Principes pro regnis acquirendis. Occurrit præterea leones assultibus suis non tam expetere vindictam, quàm honorem. Ubi enim adversarium ad pedes prostratum intuentur, mox iram deponunt; quasi arma ad aliud non arripuissent, quàm ad excellentiam suam protegendam; hac conservata libenter vitam condonant, qui victoriæ palmam concesserunt. Denique non minùs Zelotypiâ, quàm amore aduruntur: suspiciunt æquè fidelitatem, ac vagam libidinem puniunt, & occisorum sanguine maculam pluunt; ita ut dubitari non possit in bestiis æquè, ac in hominibus nigram passionum cohortem castra metari.

Imò non minùs bruta, quàm homines sua sibi invicem sensa, desideria, passionēs, & affectus per voces communicant. Sic aviculæ suo pipitu se fame laborare parentibus indicant: sic visò accipitre conclamant, & hunc suum ingeminando clamorem aliæ alias sollicitè convocat; sic gallina inventò inter quisquilias pisò suos convocat pipiones; quodque magis mirum, alio clamore utitur, cùm eos evocat ad pastum, aliò, cùm visà milvi umbrâ illos jubet capeßere fugam. Memorabile est illud vindictæ genus, quod Coloniae accidisse refert B. Albertus Magnus lib. 8. de animalibus cap. 2. passer hirundinis nidum occupaverat, cui expellendo cùm hirundo se imparem vidisset, lugubri stridore convocat socias, multa apud illas de injuria sibi à passere illata proferens, atque ad eam ulciscendam querulis vociferationibus excitat. Et verò id suis hisce lamentis apud socias est consecuta, ut omnes illicò ad colligendum lutum se accinxerint, illudque rostrò præferentes simul facto impetu ad nidum concurrerint, ejusque ostium ea celeritate obstruxerint, ut importuno hospiti, inque rem alienam involanti nullus patuerit effugii locus, sed in cavea emoriendum fuerit; cùm interim hirundines suo trinsatu lessum accinerent, vel visò insultarent. Res adeò manifesta est, ut multi non parum docti non solùm signa naturaliter indicantia molestum, & jucundum, sed facultatem quoque sermocinandi, & colloquendi brutis inesse contenderint. Sic Malch: Porphyrius scribit naturam omnibus animantibus, quibus sensum & memoriam concessit, de sermo-

ne quoque tam interno, quàm externo prospexisse, adjungitque Apollonium Tyaneum, Melampum, Thyresiam, & Thaletem brutorum sermones dijudicasse, ac intellexisse. Quòd autem non perinde & nos illorum assequamur idiomata, dicunt novum non esse, cum plurium etiam nationum linguas non calleamus. In eandem opinionem consentit Plato; nec suo tempore defuisse tradit Præsul Hipponensis, qui gloriati fuerint, se gallorum cantum, ululatum luporum, barritum Elephantorum, canum baubatum, ranarum coaxatum, cygnorum drensatum &c. intelligere. De Salomone disertè pronunciant, eum post infusam divinitus scientiam, & à somno experrectum avium cantus, latratus canum, cæterasque animalium voces intimè cognovisse. Nolim ego magnopere litem de vocabulo movere, an vociferationes istæ brutorum ad sermonem propriè dictum sint revocandæ; cum fortè ad sermonem propriè dictum prærequiratur in loquente cognitio distinctiva, & comparativa signi cum re significata, quod animalistica brutis denegat: hoc tamen videtur omnino necessarium fuisse, ut natura brutis tribueret signa de se significantia molestum, ac jucundum, tanquam media ad illorum felicitatem apprimè necessaria. Cum enim tota beatitudo illorum in hoc consistat, ut bene sentiant, & omnes internæ affectiones illorum eò tendant, ac ordinentur, ut vitam conservent fugiendò, quidquid est molestum sensui; prosequendo autem id, quod jucundè accidit vitæ sensitivæ: cumque non quodvis brutum semper se solo possit depellere molestiam afferentia, aut consequi naturæ suæ conducentia; idèò opus fuit, ut natura de sufficienti, & competenti instrumento provideret, quo suas affectiones, nimirum lætitiā de objecto jucundo, tristitiā de molesto &c. manifestare possent, ut sic similis speciei sociæ in auxilium opportunè advocarentur.

Sub plerisque tamen affectuum generibus subsunt quædam species, quæ eò ipsò, quòd supponant rationis exercitium, & aliquid in suo objecto involvatur non nisi per intellectum perceptibile, in bruta non possunt cadere. Sic omnes affectus pertinentes ad appetitum irascibilem, si considerentur secundum conceptum suum omnino perfectum, & plenum bestiis competere nequeunt; possunt autem si spectentur solum modò confusò. Cum enim objectum spei audaciæ, & iræ cum suis contrariis commisceatur ex bono & malo, & moveat sensum internum, prout in hac miscella unum supra alterum eminet, includunt præterea possibilitatem, & futuritionem; ac denique ira insuper comensurationem vindictæ cum læsione facta,

ut ex secunda parte de singulis patebit. Hæc omnia non nisi imperfectè, & obscure à purè sensitiva facultate apprehendi poterunt, licet distinctissimè ab intellectu attingantur. Sic etiam omnes delectationes sensibiles in animantibus mente carentibus revocantur ad delectationem secundùm tactum, & canes non gaudent odore leporum, sed comestione, nec bovis voce delectatur leo, sed carne. Sic etiam non capiuntur harmoniâ musicæ, aut pictarum imaginum pulchritudine, sed reliquæ omnes animalium operationes ad delectationem tactûs tanquam ad finem ultimum, & intrinsecè ipsorum perfectivum ordinantur. Sic quando Aristoteles anserem verecundum scribit, eò quòd à coitu aquis submergatur, pudorem metaphoricè, & pro aliqua pudoris humani delineatione, & imagine accepisse censendus est; cùm veram, & simpliciter dictam verecundiam, quæ est timor infamiæ, vel ignominia brutis nunquam attribuisse legatur, utpote bonæ famæ, & oppositæ ignominia tanquam rei, quæ sub sensum non cadit, expertibus. Nonnihil tamen extensa voce usurpata verecundia in anserem admitti potest, sicut eadem etiam in pavone conspicitur; animal enim hoc superbissimum, quod antea semetipsum ostentans, tanquam cælum sideribus distinctum imitans, quasi in pompa quadam se circumducebat: mox caudâ per annuam vicissitudinem amissâ, pudibundum quærit latebram, tandiùque arborum foliis coopertum delitescit, donec decor pristinus recurrat, quasi nuditatis ignominiam non sustineret.

§. IV.

*Utrum plures, ac vehementiores passionēs nostræ, an
brutorum?*

POTISSIMUM verò dubium hoc loco nascitur, plūsne in brutis, quàm in homine vigeat affectuum ferocia. In qua re fatendum est, excellentiam ipsam homini plurimum nocumenti asferre, & ab appetitu infelicitè fertili, ac multipliciùs in nobis fructificante, ob rationem acuentem, numerosiorem passionum seriem effici. Bruta non pertimescunt mala, nisi sensibus præsentia; non attendunt futuris, nec multùm adeò recordantur præteritorum, vel ab iisdem absorbentur. Verùm homines casus etiam longinquos curiosè perscr-

serutantur ; anxie videntur invitare ventura sibi infortunia , & sponte velle subjacere malleo sinistræ fortis , quando adhuc ictum non infligit , sed à longè solùm ostendit. Exhorrescimus ob mala tam præterita , quàm futura ; contremiscimus propter turbinem non ampliùs nos afflantem , & impallemus ob fulmen nondum excoctum. Commoventur bruta paucorum objectorum occursum ; exceptis illis , quæ ad vitam conservandam sunt necessaria , reliqua omnia indifferenter prætergrediuntur : ubi tamen mortales nullam desiderii suis metam , nec terminum statuunt. Non sola necessitas exsatiat cupiditates : excedimus finem utilitatis ; superflua investigamus , ut nobis ipsis plura supplicia augmentemus. Adeò sæcundæ sunt nostræ propensiones , ut illud ipsum , quod eas delinire deberet , easdem magis exasperet , & quod conceditur ad earum famem explendam , ordinariè ad aliud non servit , quàm ad eam magis acuendam ; ita ut homo potiores suas facultates applicet , vel ad se ipsum magis miserum , vel sceleratiorem reddendum. Quid ? quod temperamentum bestiarum magis stupidum , ac plurimùm de terrestri gleba participans easdem ferè insensibiles reddat , & sic innumeris eximantur malis , quæ mille modis phantasiam hominis excruciant. Stimulis pungendi sunt tauri , ut in furorem concitentur ; secùs carnea hæc massa non faciliè irritabitur , sed languebit , quasi aliam animam præter corpus non haberet. Elephantes durissima quæque à suis magistris sustinent ; nisi viderint emanantem ex crebris vulneribus sanguinem , vix se læsos existimabunt : si dolor cessaverit , etiam ira subsidet , revertenturque ad pristinam mansuetudinem. Homo econtra tam delicatæ est constitutionis , ut levissimis quibilibet offendatur ; sanguine abundat igneæ alicujus naturæ ; facillimè commovetur , & ubi semel est accensus , in reliquas quoque partes sævire non desistit. Tam faciliè excitabiles sunt in hominibus passiones , ut minima atomus sufficiat ad easdem eliciendas. Unicum verbum , unicus capitis motus offendit ; silentium ipsummet non rarò in fugam convertit. Hinc Poëtæ occasionem fingendi sumpserunt , animam humanam in varia animalium corpora transmigrare ; ibi ex singulis exsugere sævum toxicum , sicque in se ipsa congregare odium serpentis , rabiem tigridis , iramque leonis &c. qua fabula nos edocere satagebant , in solo homine tot stabulari passionum nîsus , quod in singulis animantibus seorsim observantur.

Quam-

Quamvis autem longè densior turma absurdarum appetitionum in homineprehendatur, quàm appetitui brutorum respondeat; & ut Aristoteles 1. politic. cap. 6. prodit, humana cupiditas infinitè pateat; nihilominus affectiones, quibus bruta tentari solent, acriores in brutis esse pronuncio, cum nullo rationis fræno coërcita toto impetu in objectum propositum ferantur. Non sicut unus homo mitis, alter crudelis, sic idem in bestiis ratione carentibus contingit: non una felis infectatur mures, & altera tuetur. Omnes vulpes procreantur subdolæ, omnes lupi voraces, omnes tigrides sævæ, omnes in operationibus suis in præceps rapiuntur, nec tam agunt, quàm aguntur. Nunquam feles deliberant, an parcendum muribus, nunquam vulpes consultant, an abstinendum sit gallinis; cæco impetu feruntur, ad quod determinantur. In homine non parùm de æstu, & fervore remittitur ob efficacem rationis vim, ad affectuum immoderationem naturaliter reclamantis: ita, ut sicuti ad moderatam, & honestam actionem obstrepat nativa appetitûs inferioris pertinacia, ita istam quoque reprimat, acretundat vigor rationis, nunquam prorsus dedocet, quid humanam naturam dedeceat. Palmari hoc similitudine expressit Philosophus, quando utrumque appetitum hominis contulit orbibus cælestibus. Namque sicut isti contrariis motibus feruntur, ita, ut quamvis unus alterum abripiat, retardetur nihilominus, & remoram ab altero subeat: ita potentia inferior inhibetur à superiori, ut non adeò vehementer, & expeditè cieatur, quàm si renisus superioris facultatis non interveniret.

Finis Partis primæ.




PARS





F. L. 1700. No. 1. 1.

*Quaenam verbis respondens Musa duobus
sic leviter causam reddidit hanc: Amor est.*



P A R S II.

De passionibus animæ in specie.

DISSERTATIO I.

De affectu amoris.

§. I.

De natura amoris.



IN amplissimo campo, & grandi singularum passionum messe, quæ delibanda magis erit, quàm demetenda, omnium dux & choragus affectuum sese primò offert amor, passio, quò magis communis, eò minus nota. Quemadmodum enim nihil ab intuitu nostro remotiùs & oculis nostris viciniùs apparet, quàm Deus, cujus magnitudinem, & omnipotentiam in creaturis manibus palpamus, & tamen nunquam sentimus, nec comprehendere possumus; ita res se habet in amore. Desideria nostra testantur existere amorem, spes plenæ sunt hac passione, omnes affectus commixti, & compositi sunt illius calore. Ille nihilominus profundioribus tenebris absconditur; quantò fortiùs homines illius vim experiuntur, tantò minùs essentiam explicare valent: quod etiam intelligitur de illis, qui vel maximè amoris legibus obediunt, aut sub illius imperio vivunt. Ipse Aristoteles, qui in abditissimis rebus definiendis ubique aliis palmam præripuit, contentus fuit nobis solùm descriptionem aliquam illius relinquere, sicque quasi omnibus posteris spem præscidit, manifestiùs cognoscendi rem,

S

quam

quam ipse sufficienter exhaurire non poterat. Alii amorem appellârunt complacentiam, & inclinationem ad bonum, alii instrumentum commutandi naturas, & proplastice compaginandi corda, ac orbis glutinum: non defuerunt, qui dicerent esse vulnus amabile ab objecto grato inflictum, esse radium, qui inflamat, esse incantationem, cujus occultis mysteriis suaviter trahimur; quibus tamen tot diversis terminis aliud non impetrârunt, quàm ut magis ostenderent summam difficultatem integrè amoris naturam exhauriendi.

Fortè non multùm à vero aberraret, qui assereret, amorem esse concitationem animæ cum idonea fibrarum ac spirituum animalium agitatione ad sese conjungendum cum re, vel objecto, quod exhibetur statui nostro conveniens. Habet nimirum amor patheticus in animalibus aliquid non absimile amori eorum, quæ sensu, & vita carent, quique vocatur à D. Dionysio amor naturalis. Amor autem ille non est aliud, nisi propensio, & inclinatio rerum cognitione carentium in suas perfectiones juxta illud Augustini lib. II. de civit. cap. 28., *amores corporum momenta sunt ponderum, sive deorsum gravitate, sive sursum levitate nitantur*. Rectè igitur etiam dicitur amor vitalis esse incitatio in bonum, consentiente iterum eodem magno Doctore eodem loco: *amor meus pondus meum, illo feror, quocunque feror*. Nec alia mens fuit Dionysii, cum inquit, amorem esse vim quandam conjungentem, & miscentem, qui superiora quidem impellit, ut inferioribus prospiciant, & consulant; paria autem, ut inter se societate jungantur; ac denique inferiora, ut se ad superiora convertant. Voluit namque duntaxat amori inesse pondus in rem dilectam.

Hinc nullò modò approbare possum doctrinam subtilis Scoti in 1. disput. 1. quæst. 5. ubi amorem esse actum vitalem, seu ab intrinseco procedere negat, eò quòd appetitio hæc non sit libera. Vel enim nullus alius appetitus est vitalis operatio, vel hic maximè, cum sit fons, & origo cæterorum omnium; & si negetur amoris actum ab intrinseco oriri, ansam dabimus Atomistis, ut magis in suo errore confirmentur, quo defendunt, causas secundas nihil operari, & omnes actiones in Deum debere ita reduci, quasi ille solus ad præsentiam creaturarum operaretur. Nunquid experimur nos habere ejusmodi actus, excitari ad illos per cognitionem, in eis defatigari &c.? quid ergò amplius requiritur, ut credamus eos à nobis prodire? aut cur tunc ad Deum recurremus? quòd verò Scotus dicit de necessitate ejus appetitûs, non est ad rem; quia ut aliquid procedat ab alio, non est opus, ut procedat liberè; alioquin nec calor produceret calorem, nec lux lucem, nec arbor fructus, cum nihil horum liberum sit, Ad-

Additur secundò locò, hanc inclinationem involvere fibrarum, & spirituum insolitam *agitationem*, ut sufficienter ab amore spirituali, qui in sola voluntate residet, distinguatur. Tertiò dicitur, amorem niti ad conjungendum se, quæ unio ita propriè amori tribuitur unanimi consensu, ut apud scriptores & sacros, & prophanos nihil frequentius, nihil significantius sit decantatum. Recolas velim celebria sapientum virorum effata, quibus mirabiliora amoris officia prædicantur; & fallar, si quid sæpius expressum deprehendetur. Sic lib. 2. polit. cap. 2. tradit Philosophus ex Aristophane, *ex amantibus fieri quasi unum*. Idem effectus tanquam amoris proprius exprimitur Act. 4. dum dicitur: *multitudinis autem credentium erat cor unum, & anima una*; ex vi utique charitatis. Quid aliud indicat responsio ejusdem Stagiritæ, qua interrogatus, quid amicus esset, reposuisse fertur esse unam animam duobus corporibus inclusam? quid aliud denotat osculum, quod peregrè advenientibus exhibetur, quàm quòd animæ conjungi affectent, & ut Petronius bellè exhibet, conentur transfundere hinc, & hinc errantes animas? quid aliud vult illud Hipponensis Antistitis, amorem transformare in rem amatam amantem? si terram, inquit, amas, terra es, si Deum amas, audeo dicere, Deus es: quòd amantem amor in ipso extinguat, ut in eo, quod amat, vivere ille incipiat. Quid denique designat amantis animam non habitare, ubi animat, sed ubi amat? quid similia plurima quotidianis sermonibus trita? eò nempe hæc omnia delabuntur, ut denotent conjunctionem illam amori propriam esse.

Ultimò denique additur ab amore occultis ponderibus, atque momentis urgeri animal in objectum sibi conveniens secundum se, hoc est, ut præscindens ab existentia, vel carentia existentiae, per quod sufficienter differt à desiderio & lætitia. Per hoc tamen non excluditur omnis amor ab appetente facultate brutorum. Quamvis enim ista non considerent bonum cum ea præcisione, sed propositum bonum absens appetant, de possessio gaudeant: nihilominus ex propositione bonitatis resultare in eis potest quædam complacentia, qua bene afficiantur erga illud objectum: quæ complacentia ex natura sua subsistere posset, etiam si apprehendissent illam eandem bonitatem abstrahendo ab existentia, vel absentia.

§. II.

Discrimen pervulgatum Amoris Amicitiae, & concupiscentiae.

EX his eruere incipiamus vulgatam divisionem in amorem concupiscentiae, & in amorem benevolentiae. Amorem amicitiae appello, quo subiecto bonum volumus, ita ut ipsum ametur secundum se, & propter se, atque in ipso sistatur impetus amoris tanquam in centro: amorem concupiscentiae dico, quo tendo in rem amatam alteri, ita ut in illam secundum se non ferar, sed tantum ut bonam alteri: ideoque non tam amatur, quam coamatur, & concupiscitur. Per secundum amamus plerumque bona infra nos posita, & externa, ut hortos, equos, per ambitionem gloriam, & honorem; per avaritiam divitiarum cumulum &c. quae non amantur propter se, sed à nobis propter nos, & ex amore nostri proprio; scilicet, vel ut proximè delectemur, vel ut inde potestatem consequamur ad fruendum pro libitu nostro. Amor iste non tam urget, ut amanti conjungat rem amatam, quam ut eandem ipsi subiciat? Idque saepe affectu tam inordinato, ut diligens ex concupiscentia nihil prorsus intendat, ac spectet, nisi se ipsum; veluti unus ille esset in rerum natura dignus bono, & ideo ex se ipso idolum quodammodo constituit, cui res amatas omnes devoveat, & mactet. Parabit amicum, ut habeat, qui sibi ægro assideat, qui succurrat inopi, vel in vincula coniecto: sed quemadmodum cæpit, ita mox desinet. Paravit amicum adversus vincula laturum opem; cum primum soluta fuerit catena, à latere discedet: qui causâ utilitatis assumptus est, tam diu placebit, quam diu utilis fuerit. Initia, & exitus inter se non congruent, quod tot nefaria exempla demonstrant, in quibus hunc aliorum metu relinqui, hunc aliorum metu prodi cernimus; & modò florentem magna amicorum turba circumdari, modò eversum in ingenti solitudine deserui, & tunc amicos fugere, ubi se maximè tales probare deberent.

Longè sublimior est idea amoris amicitiae, quæ desumenda est ex illo ipso amore proprio, quo quisque se ipsum ex naturali instinctu amat. Hunc profectò non admitto esse amorem concupiscentiae, sed vel largiori appellatione amicitiae nomine donandus est, vel si vox amicitiae juxta usum communioem respiciat alios ab amante distinctos, benevolentiae titulus erit compellendus, eritque in consideratione morali idem amor amicitiae erga alterum, atque amor sui proprius. Hoc affectu quis amicum

cum habere vult, ob nihil aliud, quàm ut exerceat amicitiam, & ne tam magna virtus jaceat: non ad hoc, ut habeat, qui ad ægri lectulum assideat, aut è carcere liberet: sed ut habeat aliquem, cui ægro ipse assideat, quem ipse circumventum hostili custodia liberet. Non venit ad temporariam amicitiam, non lucrò captus negotiationem instituit, non fortunæ varietate perterritus amicitia suam detrahit majestatem. In quid ergò amicum expetit? in hoc, ut habeat, pro quo mori possit, ut habeat, quem in exilium sequatur, cujus se morti opponat, & impendat. Verbò, hic amor incitat, ut cum objecto amato amans velut ex æquo conjungatur; scilicet ut neque illud nobis, neque nos illi subdamus; ut nostri, rerumque nostrarum obliviscamur, ac veluti in nihilum abivissemus, aut ex transformatione idem cum eo, quod amplectimur, evasissemus; ut simili amore, quo quisque se ipsum diligit, amicum amemus. Generosissima hæc passio mater est, & semen, vel comes omnium heroicarum operationum, quæ in historiis leguntur: hæc in stuporem rapuit tyrannos, qui aliud à suis non desiderarunt, quàm hanc amicitiam: hæc Principibus ostendit omnem illorum potentiam imbecilem esse, nisi innitatur tanquam fulcro amicitia suorum subditorum. Multis quidem doloribus, ærumnisque indivulsè conjuncta est: affert tamen secum sinceram, & omnium purgatissimam voluptatem, vixque unquam cum excessu conjungitur, nisi in amorem concupiscentia degeneret, & abeat.

Hæc tamen non ita sunt intelligenda, ac si esset possibilis amor nudæ amicitia, nullam in se involvens rationem concupiscentia respectu ullius objecti; hoc enim esset à mente nostra deviare, qui duas istas denominationes jungimus, ita ut omnis amor amicitia habeat adjunctum amorem concupiscentia, & vice versa. Amare enim juxta definitionem philosophi est *velle bonum alicui*: igitur amor semper, & necessariò fertur indivisim in duo objecta, quorum alterum se habet per modum subjecti, cui desiderat bonum, & alterum est hoc ipsum bonum. Impossibile nimirum est, ut quis optet bonum aliquod perfectivum alicujus, v. g. sapientiam, sanitatem, divitias, gloriam &c., quin ista velit alicui; cum res hujusmodi non sint bonæ sibi ipsis, sed aliis, adeoque nullam includant bonitatem, aut amabilitatem, præterquam cum respectu ad subjectum, cui prodesse possunt. Subjectum autem cui intenditur bonum perfectivum ipsius, amatur utique & ipsum, nec fieri potest, ut non eò ipsò multò magis ametur. Rursus repugnat similiter, ut quis amet subjectum capax aliquorum bonorum, quin illi hæc velit. Nam qui amore alterum prosequitur, vult ipsum bene habere, aut quoad omnia, aut quoad aliquid. At quomodo bene habere poterit, quin adsint

ea, quæ ipsi prodesse, ipsûmque in ordine ad finem intentum adjuvare possunt? quin etiam in eo amore perfectissimo, quo quis uni personæ vult suum intrinsecum bonum, v. g. Deo infinitam suam perfectionem distinguere licet expositam partitionem. Nam Deus est, qui amatur amore amicitiae: divina verò ejus perfectio Deo concupiscitur, & diligitur amore concupiscentiae. Tandem etiam amor, quo quis vult bene esse equo suo jam emerito, & cui ob servitia antecedentia præbet pabulum abundans, nullum ab eo amplius commodum expectans, veram habet rationem amoris amicitiae respectu illius, cujus commodum quaeritur in eo affectu, nempe ipsius amantis. In ea enim equi cura, & provida pabuli subministratone homo considerat bene sibi fuisse per equi laborem, & inde movetur, ut ei vicem rependat, quod planè est moveri ex amore sui ipsius, adeoque verus ibi cernitur amor amicitiae erga se ipsum. Quamvis autem in omni amore involvatur ratio amicitiae, & concupiscentiae, cum sit de natura illius, ut velit aliquid alicui, & respectu ejus, cui vult bonum, dicatur amicitia, & concupiscentia respectu rei eisdem volitæ, tamen adest sufficiens fundamentum distinctionis eodem modò, quo motus contritionis alius est amoris erga Deum, alius detestationis adversus peccatum.

§. III.

Causa amoris primaria.

Quænam sit amoris primaria causa, frustra docerem, cum omnibus natura duce, perspectum sit, amorem ferri in bonum, & pulchrum, ut supervacaneum sit, pluribus id dilatare. Nomine boni significatur, quod honestum, utile, & jucundum; & quò majus est bonum, eò aptius est ad amorem sui efficiendum; ac ideo Deus, cum sit summum bonum, summum etiam est amabile. Qui ulterius quaerit, quare bonum sit causa amoris, ignorat significationem boni; bonum enim, & conveniens appetitui idem sunt. Bonum autem magis amamus labore paratum, & magis carum, quia in eo, quod labore acquisitum est, labores veluti nostros inspicimus; nec alia est causa juxta philosophum, cur matres liberos ardentius diligant, quàm patres. Pulchrum etiam, cur ametur, cæci esse interrogationem, respondisse dicitur Stagiritæ apud Laertium. Platonicus referunt hoc ad memoriam primi, summi, & purissimi pulchri, ab anima, priusquam corpori infereretur, perspicue percepti, &

& dilecti, cujus vestigia, & participationes aliquas in his inferioribus occurrentes, reficere summi illius pulchri memoriam, asserunt, atque ita ejus cognitione excitari amorem cujusvis pulchri.

Quia verò passionis motus, quem in appetitu venustas procreat, est singulare numinis donum, quod vitæ civili nos aptos efficit, discretos etiam eloquentes, ac solertes, breviter quadam de ejus indole adducemus. Requiritur ad pulchritudinem primò, ut quæ pulchra vocantur, possint vel ab intellectu, vel potentia visiva, vel auditiva percipi: hinc Deus, anima rationalis, color, musica pulchra dicuntur, quia ex facultatibus omnium distinctissimè sua objecta cognoscunt memoratæ potentiae. Ulteriùs cum pulchra omnia etiam bona appellentur; bona autem debeant esse convenientia, & apta aliis rebus, ideò ut aliqua sint pulchra necessariò ad potentias cognoscitivas, quarum sunt objecta, proportionem habere debent. Ex his sequitur aliam pulchritudinem esse intellectualem, aliam sensibilem, eò quòd alia potentia cognoscitiva sit intellectualis, alia sensitiva. Quòd si itaque pulchritudo consistat in bonitate rei, in quantum habet convenientiam ad potentiam cognoscitivam; bonitas vero sit ipsa essentia & perfectio rerum, infertur, eò rem aliquam esse pulchriorem, quòd in se majorem continet perfectionem. Cum igitur Deus, Angeli, & anima rationalis perfectione reliqua omnia multis parasangis superent, erunt etiam in ordine ad potentiam intellectivam ex omnibus pulcherrimæ. Aliter multò se res habet de pulchritudine sensibili; hæc enim non dependet ex sola rei perfectione, sed ex ipsis etiam organis, quæ eandem percipiunt, uti & aptitudine rerum, quam debent habere in ordine ad corpus, cui insunt. Quare si quædam objecta, ob nimiam sui intensionem potentiam visivam, vel auditivam lædant, in se licèt sint perfectiora, non tamen pulchra apparebunt. Quòd si autem etiam aliqua ipsis potentiis cognoscentibus plùs congruant, sint verò improporionata ad totum, cui insunt, necdum pulchri cujusdam nomen sibi vendicabunt. Quem enim colorem plus oculos delinire scimus, quàm viridem? si tamen hic hominis faciem tingat, tantum aberit, ut hæc pulchra appareat, ut etiam summe deformis habeatur. Cujus rei ratio alia vix invenietur, quàm quòd color viridis temperamento hominis minùs conveniens deprehendatur. Quòd si igitur de sola pulchritudine corporis humani loquamur, videtur hæc esse justa compactio singularum dispositionum, quæ corpori sunt necessariae ad functiones, quibus obeundis est destinatum. Quamvis igitur pulchritudo creata abdita sit intus in animo, quia tamen anima in suis actibus dependet ab organis materialibus, quòd hæc perfectiora fuerint, eò

cò præstantiores etiam actus eliciet, & ex ista externa constitutione, etiam internarum potentiarum, & actuum præstantiam colligere poterimus. Si itaque illud inter pulchra numeratur, quod in suo genere extremam perfectionem obtinet, & tale habeatur, quod suum finem, qui in actione consistit, est consecutum; bene inferre poterimus, illam rem absolutam esse ad operationes suas ritè peragendas, quam optimis, quæ indiget, organis instructam cernimus: sic autem ex facie formosa mutè animi imago comendabitur, & per hunc florem bonitatis foris promicantem pertingemus ad ejus semen, internam scilicet bonitatem, à summo, & vero bono derivatam.

Cùm verò juxta axioma philosophicum corruptio optimi generatio sit pessimi, nihil novi erit, si sublimis iste ignis, ubi corruptus fuerit, & noxiis materiis immixtus, vetitos, & noxios secum fumos suscitaverit. Et isti quidem, quando turpissima, quando ea, quæ cum periculo, aut damno sunt conjuncta, quæ in miseriam, & in calamitatem deducunt, quæ in pœnitentiam desinunt, dicuntur amare, alieno affectum suum exornant nomine, & ipsi vim veritati inferunt. Non sunt veri amatores, sed æquivocè tantum, qui passionem amoris prodigunt in objecta revera non pulchra; cujusmodi sunt omnia fœda, rationi adversantia, & moraliter mala. Nam si quod pulchrum, sive bonum pro amoris objecto statuitur, planè illud erit veri amoris objectum, quod non tantum videtur esse pulchrum, & non est, sed alterum, quod videtur, & est. Homini autem, qui ad rationis amussim omnia dirigere obligatur, nihil revera debet, pulchrum videri, quod pugnet cum regulis rectæ rationis, sitque moraliter malum. Quidquid igitur hujusmodi est, spurius, & adulterinus amor est, potius amoris idolum, coinquinatio veræ amicitiae per sordes concupiscentiae, obnubilatio candoris per tartaream libidinem, bullientis picis exæstuans torrens, ac animi exlegis, & effrenis petulantia nominandum est.

§. IV.

Causæ amoris minùs præcipuæ.

AD primariam amoris causam ex objecto ductam pullulant aliæ quædam minùs præcipuæ, quæ per ordinem ad illam radicalem alligendi vim, & amorem ingerendi sunt adeptæ. Hujusmodi imprimis est similitudo. Omne enim animal, ut est apud sapientem Ecclesiæ 13. diligit

git simile sibi, sic & omnis homo proximum suum. Omnis caro ad similem sibi conjungitur, & omnis homo simili sui sociabitur. Sic etiam philosophus lib. 7. Magn. Moral. cap. 4. id confirmat, dum ait: similia similibus mox gaudent, & homo homini est jucundissimus. Adhæret istis Ovidius suo ingenio:

Scilicet ingenis aliqua est concordia junctis,

Et servat studii fœdera quisque sui.

Rusticus agricolam, miles fera bella gerentem,

Rectorem dubia navita puppis amat.

Fundamentum hujus rei est, quia in iis, qui nobis similes sunt, elucemus ipsi quodammodo velut in speculo; at nemo est, qui peculiari cum intentione, ac vehementia non afficiatur erga bona sua? quia hæc est judiciorum nostrorum qualitas, ut semper quæ nostra sunt, bona, & optima judicemus. Unde fit, ut eodem amoris impetu, quem unusquisque sibi ipsi impendit tanquam in aliquid optimum, eodem etiam feratur in eos, quos similitudine sibi proximos conspiciatur, minimumque à se distitos, atque adeo bonitate conjunctos. Quare adversa patientes compatiuntur magis similia patientibus, magisque misereantur eorum, ac proinde magis eos eatenus amant. Eodem modo eminentes in scientia, aut arte militari, aut aliqua alia dote naturali, vel acquisita specialiter applaudunt, eosdemque eatenus magis æstimant. Deinde quodvis simile pollet peculiari vi fovendi, juvandi, & promovendi sibi consimile in ordine vel ad suam conservationem, vel ad suum aliquem effectum seu physicum, seu intentionalem, & consequenter præeminet peculiari aliqua bonitate respectu ejusdem sibi consimilis; igitur novus est titulus conciliandi mutuum amorem.

Nec sola similitudo, sed etiam diuturnior convictus sodalium, & animalium amorem progignit, nisi hic per accidens ob nævos quosdam detectos benevolentiam rescindat. Sic bovem videbis, quod aberrasset ab armento, solusque sibi relictus esset, miserabiliter mugientem, montesque, & saltus pereurrentem, dum ad gregem reducatur, à quo recesserat. Nec brutis homines duriores sunt; videbis enim quemadmodum, quos via publica junxit, idemque tectum, ac diversorium, aut umbrosa per æstum meridianum arbor exceptit, quomodo fortuitum occursum in occasionem amicitiae rapiant, & cum ad divortia viarum pervenerint, non sine ægrimonia divellantur, ac fixis alter in alterum oculis consistant, symbolaque mutua largiantur: ut progressi deinde paululum rursus sese convertant, revocatisque fausta ac felicia apprecentur: ut de-

nique brevis usura temporis tam arctam jungat anicitiam, ut ægrè digredi, cogendique tantum non videantur.

Quodsi similitudo subinde conjuncta sit cum dissimilitudine, ut contingit in duobus mercatoribus, quorum uterlibet velit augere suas divitias impediendo directè, vel indirectè augmentum earundem in altero, idque præstetur toto conatu (quod genus dissimilitudinis nocivæ quoad lucrum, plausum, vel gloriam plerumque adjacet similibus in officio, juxta vulgare illud Philosophi 2. Rhet. cap. 4. *Figulus figulo invidet.*) in hoc casu mutux simultates, & odia excitantur inter ejusdem conditionis, & instituti homines ex adjuncta dissimilitudine & contrarietate, qua sese impediunt à consecutione boni, quod utrique consecuntur. Imò propter coexistentem similitudinem attemperaturaliquatenus odium; minus enim figulus figulum odit, quàm alterius aris hominem tantundem nocentem, ac facilius unusquisque adducitur, ut subveniat egenti, ac periclitanti similis, quàm dissimilis professionis, vitæ, ac artis cæteris paribus; adeoque est inspersa aliqua amoris indulgentia odio similium, tametsi odium soleat absolutè præeminere.

Altera amoris conciliatrix est ipsemet amor, juxta illud Senec. epistola 9. monstrabo tibi amatorium sine medicamento, sine ullis veneficæ carminibus: si vis amari, ama. Ratio eruitur ex hoc, quòd existimemus eum, à quo diligimur, bonum esse; unde nihil promptius, quàm ut in illum concitemur benevolentia: econtra autem, eum, qui nos amore non prosequitur, nominatimque si amatus non redamet, facile adducimur, ut credamus destitutum bonitate, ad quam opinionem rigor voluntatis consequitur, & amoris, si prius conceptis fuerat, restinctio. Deinde amoris proprium est unire affectivè amantem cum amato, ac efficere, ut bonum amantis sit quodammodo amati, atque idè, ut ab amato ametur juxta illud lib. 8. Ethic. *amabile bonum, unicuique autem maxime proprium.* Scilicet si amare pigebat, saltem redamare non pigeat, & humanissimæ invitationi respondere, quæ sit amore prævenièdo. Nimis durus est animus, qui dilectionem si nolebat impendere, nolit & rependere. Et hinc videmus in ipsis flagitiosis, & sordidis amoribus nihil aliud eos agere, qui amari vicissim expetunt, nisi ut documentis, quibus valent, aperiant, & ostendant, quantum amant, eamque imaginem justitiæ prætereundæ affectant, ut vicem sibi reddi quodammodo flagitent ab eis animis, quos illecebris capere moliantur, ipsique ardentius æstuant, cum jam moveri eodem igne etiam illas mentes, quas appetunt, sentiunt. Quodsi in turpibus amoribus verum est, nullam esse majorem causam, qua vel inchoetur, vel augeatur amor, quàm cum amari se

se cognoscit, qui nondum amat, aut redamari se velle posse sperat, vel jam probat, qui amat; quanto plùs hoc manifestius erit in amicitia? quid enim aliud cavemus in offensione amicitiae, nisi ne amicus arbitretur, quòd eum vel non diligamus, vel minùs diligamus, quàm ipse nos diligit? si enim hoc crediderit, frigidior erit in eo amore, quo invicem homines mutua familiaritate perfruuntur.

Referuntur etià ad causam hanc beneficia collata; sunt enim indicia amoris latentis. Imò, cùm se ipsum quis valde diligat, necesse est, ut etià amet ea, quæ sibi sunt bona, quales sunt amici. Etià ferè pro exiguis licèt beneficiis amorem rependunt, & canis gladius vivus nominatur, quòd domini, à quo alitur, & domo excipitur, amantissimus sit, illique defendendo alacriter operam navet. Ac tandem ab Aristotele 9. Ethic. cap. 7. acutissimè observatur, beneficos magis amare eos, quos bonis affecerint, quàm ab illis amentur; unusquisque enim magis suum opus amat, quàm ab eo amaretur, si opus animatum foret: beneficium autem affectus opus ipsum est. Adde, quamquam & superiores velint se ab inferioribus diligi, eorùmque in se studiosò delectentur obsequiò; attamen quantò magis id senserint, tantò magis eos diligunt, & semper gratio erit amor, ubi non aestuat indigentiae siccitate, sed ex uberitate beneficentiae profluit. Sunt & aliæ plures amoris conciliandi causæ, ut est vinculum consanguinitatis, quo copulantur, qui sanguinis necessitudine junguntur: conversatio, & alloquiorum commercium, quæ ratione per fomenta epistolarum amicitiae jam dudum initæ inter amicos etià locis divisos convalescunt. Pretiosa etià nobis redduntur & perchara, quæ multò paravimus labore: rei raritas etià pretium auget; sic unicus filius parentibus superstes impensius ab iisdem diligitur; & peregrina, quæ à dissitis regionibus ad nos transvehuntur, solemus pluris æstimare, & abundantia res contumeliosiores efficit.

§. V.

De proprietatibus amoris.

Post naturam, discrimina, & causas amoris proprietates ejusdem consequuntur. Inter illas ea se primò offert, qua fit, ut nunquam amor pacatè quiescat, sed incessanter, quamdiu viget, investiget, quod amat; & hoc amorì cuilibet vel sanctissimo commune est, dicente Augustino: habet omnis amor vim suam, nec potest vacare in anima amantis. Hinc

continuò amans infinitas imagines venustatis, quam adorat, animò versat; unde fovetur continuò passio ipsa, & ubi unus motus desierit, suscitatur alter, & hoc præ cæteris passionibus, quæ per intervalla cientur, & iterum deponuntur. Sic odium sopitur quandoque, nec ferè excitatur, nisi extremo incurfu, aut commemoratione inimici: ira facilè evanescit: delectatio ipsa citissimè tollitur, quoniam in fruitione posita est, quæ brevissimâ morâ absolvitur. Verùm amoris affectus, quamdiu prorsus non aboletur, continenter velut sagitta hæret in corde. Ex alio capite passio hæc nihilominus apprimè inconstans & vaga est: excurrit, & circumvolat ab hoc bono ad illud, ut in multitudine inveniat, quod ob inanitatem, & exilitatem cujuslibet boni creati in singulis non reperitur: hæret in singulis solùm tam diu, donec propriis experienciis docta deprehendat, possessionem boni, cujus idololatra facta est, non explere desideria. Inde poenitet ipsam admissi erroris, & ad aliud objectum transfertur, paulò post etiam ab illo separanda, in quo non nisi modica portio universalis illius boni latet, ad quod illa tanta suspirat anxietate. Hæc ipsa inconstantia, etiamsi ratio naturalis deesset, deberet nos instruere, invisibilia esse, quibus inhiamus, & non posse nos pertingere hic ad eadem possidenda, sed solùm speranda esse.

Ex hoc oritur secunda proprietates, quòd fortissimus, & juxta suavissimus sit supra reliquas omnes passiones amor ad exequendum id, quod sibi proposuit: & licèt in cunis sit quasi fascibus constrictus, tam generosum tamen ostendit robur, ut omnes labores subeat alacriter, pericula invadat intrepidè, dolores etiam ultrò excipiat, quos tamen intuitu rei amata proximè consequendæ mira suavitate perfundit. Secari, & urise homines patiuntur, ut dolores non æterni, sed aliquando diuturnioris ulceris, ac eorum dolorum pretiò redimantur, languida, & incerta mora ultimæ vitæ. Immanissimis miles bellis atteritur, pluribus fortassè annis inquietus in laboribus, quàm in otio quieturus. Quibus tempestatibus, & procellis, quàm horribili, & tremenda sævitie cœli, & maris impliciti sunt mercatores, ut divitias ventosas acquirant, majoribus, quàm quibus acquisitæ sunt, periculis & tempestatibus plena? quos æstus, quæ frigora, quæ pericula, ab equis, à fossis, à præcipitiis, à fluminibus, à feris perferunt venatores? quem laborem esuriendi & sitiendi, quantas vilissimi, & sordidissimi cibi, & potús angustias, ut bestiam capiant, & interdum nec ipsius bestię carnes, propter quam hæc tanta sustinent, epulis necessarias? sed in his omnibus nullò modò sunt onerosi labores amantium; sed etiam ipsi delectant, sicut venantium, aucupantium, piscantium, vindemiantium, vel ludò aliquo sese ob-

oblectantium, & in eo, quod amatur, aut non laboratur, aut & laboratur. Difficultas nulla deterret, & si fortè quædam opponantur, ad amorem retardandum, ille sibi persuadet, hæc alio ex fine non fieri, quàm ut suorum incendiorum vim periclitentur; unde gloriæ stimulis incitatur, non quærit, nec admittit ulla excusationes; sed omnia arma arripit ad pugnandum & vincendum, ac omnes vires colligit. Antequam se impotentem, & imbecillem profiteatur, omnia tentat, & sæpè debellat inimicos, quos etiam magis heroicæ virtutes non fuissent ausæ aggredi. Hinc venit, quòd in sacris litteris morti assimiletur, non tantum quia amantem separat à se ipso, ut eum conjungat rei dilectæ; sed vel maximè quia nihil potest illi resistere. Quare pulcherrimè D. Augustinus in psal. 121, magnum verbum, fortis ut mors dilectio: magnificentius exprimi non potuit fortitudo charitatis. Quis enim morti resistit? ignibus, undis, ferro, potestatibus Regum resistitur: venit una mors, quod ei resistat, nihil est. Propterea viribus ejus charitas comparatur. Ratio physica hujus proprietatis est, quòd natura hujus passionis cum Entelechia statùs ipsius corporei perficiatur: itaque admodum vegetæ, validæque operationes exeruntur, & potissimum circa bona corporea, quæ intuitivè, ut dicitur, percepta impellunt ad sui amorem efficacius.

§ VI.

Effectus amoris ad animam spectantis.

NUnquam finirem, si omnes amoris proprietates describere in animo esset; idèd ad ejusdem effectus progredior, qui ut imagines illius melius nobis naturam hujus repræsentabunt. Præter effectus corpori imprimi solitos dantur alii in ipsa anima recepti, qui tanquam rivuli ex prima motione, ut è suo fonte emanant, & animæ ad suum finem intentum aliquid conferunt. Ex his primus est unio, & transformatio quædam amantis in dilectum, & diminutè de amore sentit, qui amantem putat dimidium amati: non sic; est totum, est unitum, est unum. Hæc autem unio tripliciter contingit; primò per affectum, quatenus magna propensione, tendentia, & motu inclinatur amans in dilectum, qua ratione Sancti cum D. Paulo fateri coguntur: *vivo autem jam non ego, vivit vero in me Christus*. Ut verò in alio incipiant vivere, oportet, ut priùs in se ipsis moriantur, & nec sacri, nec profani amatores diligere possunt, nisi priùs in se ipsis moriantur: nec integrè intelligi possunt

illa ad Coloss. cap. 3. *Mortui enim estis, & vita vestra est abscondita cum Christo*, si hæc veritas non admittatur. Quæstuosa tamen est hæc mors, quia mater alterius vitæ, & quidem magis charæ, quàm ea, quæ fuerat perditæ; resuscitatur ut novus Phoenix ex cineribus miraculò amoris ob objectum, quod deperit. Copulatur amans cum re amata per similitudinem voluntatum, ut idem velit, idem sapiat cum dilecto; impellitur ad ejus obsequium, & fit quasi illius instrumentum. Denique proprium amoris est coalescere cum bono suo per continuam cogitationum catenam; illud enim semper ante mentis oculos præsens habet, & memoria tota occupatur & defixa hæret circa ipsum amatum.

Secundus internus amoris effectus vocatur extasis, quæ non multum differt ab unione, ac significat alienationem quamdam amantis à se ipso, ac spontaneam quamdam peregrinationem. Qui enim de altero assidue cogitat, & ejusdem cum altero est voluntatis, totus in rebus alterius versatur, & extra se quodammodo egreditur, totus in dilectum translatus, sui, & rerum suarum oblitus, & cum de se non cogitet, nec in se nec secum habitabit. Hæc alienatio est per solum affectum, & intentionem, quæ per cogitationem validam, & intensam adhæSIONem non raro eò usque crescit, ut fiat extasis etiam secundum ipsum effectum. Hoc autem tunc accidit, quando sequitur interstitium in ipsis externis sensibus ob intensum amorem, ita ut homo vel solum tenuiter, vel omnino nihil audiat, videat, aut sentiat. Cum enim mensura virium animæ finita sit, & spiritus, quibus vitæ actualis ministris indiget, in contentissimam appetitionem insumpti, non possunt ad reliquas operationes suppetere, necesse est, animam quoad eas feriari, nisi de ea contentione aliquid remittat.

Tertius amoris effectus internus dicitur zelus, verè, & non tantum metaphoricè, prout priores duo, ab amore distinctus, quo quis ex vehementi passione determinatur ad repellenda ea, quæ vel amato sunt adversa, vel integram possessionem boni amati impediunt. Et hic maxime locum habet erga bonitatem creatam, quando ad Zelotypiam transit; nam infinita bonitas, cum sit potens omnibus perfectissime satisfacere, non est timendum, ne, si ametur ab aliis, mihi ideò desit, ut periculum est in amore limitatæ bonitatis. Ex quo capite homines agré tolerare solent, quòd alij valdè diligantur ab eis personis, quas ipsi depereunt, ut ab Amasia, à Regibus &c. imò non tantum zelus, sed omne passionum genus, iis exceptis, quæ necessaria sunt ad eorum conservationem, aut propagationem, vel quæ procedunt à potentiis usque adeò remotis à ratione, & sensu, ut propter summam earum imperfectionem nulli directioni

tionem subsint; omne, inquam, hoc passionum genus ab amore elicitum, vel immediate, vel mediate certissime procedit. Quæcunque enim sunt, propter finem utique aguntur, & prima operatio circa finem est origo, & causa reliquarum omnium. Prima autem operatio circa finem est amor, cujus objectum, & causa consistit in bono secundum se, quatenus hoc est universalius, & prius, quam bonum absens, aut præsens. Unde etiam, quæ fiunt ad reprimendum, aut etiam extinguendum amorem aliquem oriuntur ex alio amore, cujus fini nocet amor, qui suffocatur.

S. VII.

De effectibus amoris, prout spectant ad corpus.

Quia verò amor circa cordis penetralia, id est, circa interiores illius fibras potissimum regnat, in quibus mira viget potentia motrix; sanè fit, ut etiam in venarum, & arteriarum vasa, imò & membranarum, à corde, quasi à principe radice affectionis motus traducatur. Quantum se diaphragma agitet, ipso sensu percipitur, crebraque testantur suspiria. Animus enim conversus ad id, quo sollicitatur, negligit, & quasi officii sui obliviscitur, ut musculis thoracis vim movendi suppeditet. Cor igitur cum neque per intensionem pectoris aërem capiat, quo ventilari, refrigerarique possit, neque per remissionem sevocet, quæ sanguinis ardor favillacea excrementa commisit: ne stranguletur, animam cogit, & ad desertum officium revocat, portaturque, ut ampliorém inspirationem, expirationemque musculis præstet; & ut copiam aëris frigidi capiat, & excrementorum largam ejiciat massam: ita ut quod vires minutæ, crebraque spirandi essent facturæ, hoc una major respiratio reficiat. Ex nimio hoc nisu, & conatu calor amantium; hinc ardere, & flagrare amore dicuntur, quòd certè non tantum per metaphoram, sed re ipsa quoque intelligendum est, cum caput, labra, oculi, pectus, reliquæque partes per summum amorem incalescant, & tantum non accendantur. Calor iste ab ignitarum particularum collectione provenit; cum nunquam in animum inducere potuerim, calorem ab anima procreari. At quomodo poterunt ignis partes colligi? aio, per segregationem humidarum partium, quæ fit expressione, percolatione, obstructione. Ubi enim multus sanguis arteriosus per motum cordis, & arteriarum nisu in carnes effunditur, à venis tanta vis exsugitur;

nequit; sed subtilior, & humidior duntaxat illius portio: qua segregata, particulas ignis colligi, & calorem augeri est necesse. Pulsus amantis magnus, altus, & latus observatur ob uberem materiam à sinistro cordis ventriculo in magnam arteriam effusam, quæ vasa materiæ copiam quoque versum inflat, ex quo magnus, altus, & latus pulsus oriri debet. Inde quidam specialem pulsus amatorum agnoscunt, nixi experimento Galeni, qui de iusta Romana, Boëtii Viri consularis uxore scribit, eam se amore Piladis in theatro saltantis flagrantem interveni ejusdem signi notasse.

Ex hisce motibus varii alii effectus sensibiles formantur, quorum initium ab oculis ducamus, qui in amore duces habentur. Supponimus autem amoris perpetuum comitem esse delectationem; haberi insuper de amato summam affectionem, ac erga illum reverentiam; quod si etiam amati boni possessio denegetur, sollicitari amatum constanti desiderio ejusdem potiundi. Hos omnes verò affectus omnium maximè exprimunt oculi, latinis *Pati* dicti, & à veteribus amorum Deæ consecrati. Splendent imprimis oculi, ob affusum enim uberem humorem splendorem turgent, & quia tensiores tunica, expunctis omnibus rugis laeviores sunt, hinc lumen instar speculi melius reflectunt. Nistantes etiam sunt; vel quia nimium luminis appulsus ægrè ferunt, cuius appulsu retina novo calore aucta, ne nimium inflammetur, time, & ideo palpebris hostem pro viribus arcet: vel quia reverentia, quæ erga amatum geritur, easdem palpebras deprimit. Ipsa pupilla furtivè eundem versus amatum objectum fulgurans propter lumen affatim percussum, languorem, quem amans patitur, significat. Semiclaus tenentur, ut intra se firmius conceptam de amato ideam conservent obtentamque contemplentur attentius. Quia autem de amissione prius ideæ solliciti novam aliquam identidem ex aspectu rei amatæ acquirere laborant, subsultim oculos aperiunt. Quod si aliquando fixi, in inquieti, ac subsilientes; modò tristes, jam hilares circumferantur, id ex diversis passionibus, quæ cum amore conjunctæ sunt, proveniet ratione quarum suar etiam non desunt amanti lachrymæ. Cum namque multa humoris copia in caput effunditur, partem aliquam in pelvem descendere oportet, & hinc per ductus destinatos in lachrymas abire.

Ab oculis ad frontem fit transitus, quæ semper expressa, & serena ab amore explicatur, nisi alterius passionis societas eandem efferet, & contrahat. Venit hoc à calido humore, qui per carnem diffusus rugas omnes, & salebras cutis expungit, & serenitatem conciliat. Hic ipse affectus rubore floridam frontem potissimum tingit; quis enim inficia-

ficiabitur, in fronem multum sanguinem appelli, eumque arteriosum, perpetuo id attestante calore? labra quoque impensè rubent, tum quòd partes hæ molliores, delicatam cuticulam sint sortitæ, tum quòd siccò & humido calore accensa simul & delibuta modico risu explicentur. Pallescere verò ad finem passionis exsiccata labia incipiunt, eò quòd subtiliores partes sanguinis à nimio ardore consumpti, vel spiritus se ad interiora contulerint.

Lingua etiam in hac scena partes suas agit; nempe mēbrum hoc mobile, minùsque cæteris fulcitum affuso ubertim sanguine ad tremulum quendam motum determinatur: blæsa evadit, & sæpè ob nimiam motuum vim & agitationem mentem fallit. Mira est in hac passione vocis inflexio; mollis præsertim, & dulcis evadit, cùm calidi amoris appulsu aspera arteria tensior efficiatur, ad leniora verba emollienda, quibus amantes submissionem suam, atque debitam reverentiam erga amantem testantur. Quòd si autem voces modò extollantur cum exclamatione, modò cum languore remittantur; modò decurrentur, aut protrahantur, variorum affectuum, quibus amans succutitur, mutationi hæc erunt imputanda. Præsertim ob frequentem micationem organum quasi tripudians ad cantus propendit. Dum autem anima nimium quantum affectui huic indulget, actionum ad vitam conservandam utilium obliviscitur; unde ob perennem cordis dilatationem, & evacuationem plurima fit spirituum è corde diffusio; unde corpus exfugitur, efficiturque macilentum. Præterquam quòd amor fortem, & assiduam rei amatæ cogitationem ingerat: sicque ob multos spiritus consumptos bonæ concoctioni non parùm officiat. Juvant hanc maciem, & tabem frequentia insomnia; inquietus enim, & creber fibrarum motus ob nimiam exsiccationem, concalescentiam, & jugem jactationem somnum prohibet, ex quo spirituum defluxus absque ulla reparatione consequitur.

§. VIII.

An huius passionis objectum sint etiam spiritualia?

ANtequam dissertationem hanc concludam, non possum non ex convenientia statûs mei dubium hoc movere, an per hanc passionem non modò corporea, sed etiam spiritualia objecta possint attingi. Sed quid multùm hærendum? quis enim neget cum agitatione passionis ab homine Deum ipsum, & nudos spiritus amari posse? ex hac namque pro-

fluunt sensibiles illæ deliciæ animarum piarum, & suavis mira, dum divinis contemplationibus vacant. Ubi enim imaginatio boni infiniti per species alienas repræsentati eò usque vivida, & efficax excitatur, ut spirituum animalium motum insolitum concitet, amoris passionem enasci oportet. Imò judico, amorem patheticum, qui in nomine exsurgit, semper cum inclinatione ad summum bonum esse conjunctum, quod dupliciter fieri potest. Primò enim contingere potest, ut concitationes & tumultus erga res creatas admoneant animam primogeniti sui appetitûs, & suscitetur ingenita naturæ agitatio versùs supremum numen; ita ut homini quasi exprobet: quid iconibus præsentibus contenta absentiam fallis? quid solaris te boni simulacro, quæ expleri non potes, nisi vivido omnis saporis, suavitatis, & pulchritudinis archetypo? dum quæris bene tibi esse, quamdam beatitudinem, & Dei statuas cois. Sicut aquæ, qua parte labuntur, contrahunt saporem aliquem ex metallorum venis; ita omnis amor sapit suam originem, unde fluxerat, sucum amoris combibit à bonitate Dei, & quantum potest, ad illum se reuocit, illique appropinquat.

Potest secundò inclinatio primæva passionem amoris provocare, quatenus homo patriæ memor, & amantissimus, quam tamen hic & nunc possidere non licet, à meliori & perfectò ad peius procedit, & peregrinatur. Ex duplici hoc capite, quo cum amore cujuslibet rei generalis ille erga summum bonum amor conjungitur, non nemo dixit, animam amoribus suis quibuslibet lambere vestigia, & imagines spremi numinis. Hoc ipsum quoque compertum est experimento, quoprehendemus, hominem, dum circa sensibilia amando versatur, tametia omnia possideat, quæ cor expetit, nihilominus tamen in hac possessione, & conjunctione non vacare dolore: dolor porrò iste, & tristitia cum possessione boni quid aliud demonstrat, quàm animam revera id tantum assecutam non esse, quod amabat, scilicet summum bonum, cujus duntaxat imagine tunc potitur. Tristatur igitur non aliter, ac si quis pro eo, quod amat, umbram illius amplecteretur. Intercipiat igitur, & præveniat omnem nostrum boni diruti amorem ipsum bonum consistens. Nihil, nisi bonitatem cupimus, & omnis in Deo bonitas, & stat, & præstat: ab isto pulchro fluit, quidquid delectat: in illo stagnant omnia. Quidquid præterea est, stilla ab illo est, & hujus est, & quidquid præter Deum animamus, suum est. Tantus ille est, ut etiam, qui eum non amant, non nisi aliquid ejus amare possint. Ubi autem diviniissimæ huic flammæ succubuerimus, canamus:

*O felix hominum genus
Si vestros animos amor,
Quo cælum regitur, regat.*

DIS-



Non odiis post fata modum, flammâsque rebelles. Thebaid.

M. I. Mullendorfer del.

B. F. Lutz sc. A.V.



DISSERTATIO II.

De quidditate , causis , & proprietatibus odii.

§. I.

De natura odij.

Qui contenti sunt ex solis apparentiis externis de natura rei judicare, imaginantur sibi non esse in orbe terrarum aliquid magis homini contrarium, quàm odium; eò quòd homo ab ipsa humanitate nomen desumens sustinere nulla ratione debeat passionem, quæ inter cadavera habitat, & mortalium sanguine nutritur. Hinc miris ejus malitiam modis exaggerant. Fuit, qui dixit, odium esse virus pacis, discordiarum matricem, civile naturæ bellum, igniarium facinorum, officinam ærumnarum, lippitudinem mentis, humani cruoris ebrietatem, nervum malignitatis, contagem scelerum, gymnasium maleficientiæ, alvearium fellis, imbrem amaritudinum, ac omnium malorum syllabum. Attamen sicut indigemus amore, quo uniamur objectis ad nostri conservationem necessariis; ita non minus opus habemus odiò, ut separemur à malo, quod stragem nobis minitatur. Mundus fortè jam dudum defecisset, nisi pace, & bello elementorum, ex quibus componitur, conservaretur. Nisi aqua suo frigore resisteret igni, universum ab eo jam in cineres fuisset redactum, & deficiente materia ad nutriendum requisita ignis ipsemet destrui debuisset. Humores nostri corporis inter vivos nos retinent ipsorum antipathia naturali; & bilis jam pridem exsiccasset omnia corporis nostri ossa, nisi continuò affusâ pituitâ dulcesceret; Ita ut & magnus, & parvus mundus suarum partium contrarietate conservetur. Id quod in naturalibus videtur, in moralibus quoque accidere solet, ubi animæ concessæ sunt inclinationes ad se conservandam, & aversiones ad se defendendam, ut feratur ad placida, & elongetur ab horridis; & nisi Deus ad illius custodiam hos duos affectus posuisset, cogere-tur illa omnibus malorum assaultibus subjacere sine spe eadem impugnandi, aut eadem debellandi. Ne igitur de naturæ providentia conqueri possemus, postquam illa nobis providit de inclinatione ad bonum, eadem nobis etiam instillavit magnum vigorem ad fugienda nociva.

Definiri potest hæc passio, quòd sit *motio appetitûs, quâ anima se abalienat à malo prout illud nondum videtur præsens, vel absens;*

per quæ duo ultima adjuncta convertitur in tristitiam, vel fugam. Quærenti ulterius, quid sit ea elongatio, separatio, discrepantia, discordia (omnia enim hæc idem fonant) respondendum est, rem esse ipsâ experientiâ ita claram, ut vix amplius quid dici possit. Sicut enim sentimus in nobis actum, quo bene afficimur erga aliquod objectum, ita è contrario sentimus alium oppositum, qui est displicentia in objecto malo, quo illud detestamur. Uberiorem horum terminorum explanationem vix invenies; prout res accidere solet in affirmatione & negatione, ubi per unum actum dicitur: ita est; & per alterum, non est ita, quin nobis suppetant termini magis sub experientiam cadentes.

§. II.

Partitio odij.

Natura odii dupliciter distinguitur; nempe in odium, quod respondet amoris amicitiae, diciturque *odium inimicitiae*, & in alterum proportionale amoris concupiscentiae, quod odium *abominationis* vocatur. Porro sicut amor duo respicit, nempe bonum volitum, & personam, cui est volitum, ita & odii objectum duo includit, personam scilicet, cui malum volumus, & malum ei volitum, cum hac tamen discrepantia, quod amor se habeat ad illa duo per modum prosecutionis, & consonantiae: e contra odium fertur in personam tendentiâ prosecutionis, ad malum verò tendentiâ averfiva. Nam odium abominationis est displicentia mali, quod nos, aut alii nostri amici patimur, puta paupertatis, ægritudinis, aliorumve hujusmodi incommodorum, à quibus affectus dissonat, licet consonet personæ, à qua cupimus ea mala averti: odium verò inimicitiae dissonat personæ, congruitque malo ejus; vult enim malum alicui, quatenus malum illius est, ex displicentia personæ. Dissimilitudinis ratio est, quia in odio abominationis non persona, sed res mala habet rationem objecti & causæ: vel si interdum persona habet rationem objecti, non id habet ut persona, sed præcisè ut res quædam est. ut cum pater odit liberos, quia plures suscepit, quàm possit alere, non odit vitam illorum, ut tales sunt, sed ut res ipsi onerosa & nociva; atque ita liberi odiò habentur, non ut personæ quædam sunt, sed ut nocumenta quædam. In odio autem inimicitiae persona habet rationem mali & causæ.

Ut autem odium inimicitiae, & abominationis servant proportionem

nem cum amore amicitiae & concupiscentiae, necesse est, illum, erga quem exercetur odium inimicitiae, terminare volitionem mali nocivi non ex alio fine honesto, sed ex mera personae illius displicentia: ita ut sicut is tantum dicitur amare amore amicitiae, qui vult bonum alicui, praecise quia hoc est bonum illius, & ex complacentia talis personae; sic is tantum dicatur elicere odium inimicitiae erga alterum, qui vult malum illi, praecise quia id est malum ipsius, & ex displicentia personae ejus, hoc ipsum in bonis suis reputans, quod videat inimico male esse. Sic autem accipiendo odium inimicitiae clarè patet, judicem, qui debitam reo decernit poenam, eum non prosequi odio inimicitiae; vult enim personae noxae malum, non quatenus ipsius malum est, cum ream vel ob sanguinis conjunctionem, vel aliò titulò complectatur: sed poenam infligit, quia vi muneris adstringitur ad cavendum, ne respublica detrimentum patiatur ex delictorum impunitate. Patet, neque in se ipsum saevire odio inimicitiae, qui in ultionem scelerum suorum adversus se ipsum animatur, & carnem suam maceratione, inedia, omnique illo sensibili vexationis genere afficit, quod conceptum peccati odium justissimum homini priorem suam vitam averfanti subministrat. Patet eadem ratione nec patrem odisse filium, in quem flagella exierit, cum tamen tunc maximè eum amet, & leviora delicta plectat doloriferis malis, solum idè, ut graviores errores praecaveat. Patet denique neque Deum animas sibi gratissimas odio inimicitiae prosequi, cum igne emendatorio purgatorii leves illarum maculas eluit, quin potius mali istius sensibilis volitio cum verissimo conjungitur amore. Igitur non omnis volitio mali alicui irrogati appellanda est odium, sed illud tantum, quod cum displicentia personae connectitur.

Non tamen praetereunda est insignis diversitas inter amorem amicitiae, & concupiscentiae ex una parte, & odium inimicitiae, ac abominationis ex altera. Nam amor amicitiae & concupiscentiae constituunt unicum actum; cum sumantur per comparisonem ad personam, quae placet, & ad bonum, quod illi desideramus. At odium abominationes & odium inimicitiae differunt reipsa, & ob rationes repugnantes, quas includunt, unicus actus esse non possunt, cum is qui abominatur mortem Patris, quia ejus malum est, non possit simul eum odisse odio inimicitiae; quin potius idcirco abominatur tale ejus malum, quia illi bene esse cupit, & optimè erga Parentem afficitur. Qui autem odio inimicitiae hostem prosequitur, non displicet ipsi malum alterius, sed illud confectatur, & hosti vult, quantum potest juxta mensuram odii conceptam. Ideo nihil invenio, quod possit terminare odium abominationis, quando opto

inimico malè esse. An enim malum volitum? at id non est objectum abominationis, cum sit volitum. An ipsa persona inimici? at illa terminat odium inimicitiae. Igitur sicut is, qui diligit amore amicitiae personam aliquam, non simul amplectitur eam amore concupiscentiae, nisi quando persona est sibi volita, ut cum Deo volumus suas perfectiones: ita neque qui, aliquem exosum habet ex displicentia ipsius, dicendus est eum abominari. Et posset quidem aliquando proportionaliter contingere circa odium, ac circa amorem, nempe ut quis apprehensa ipsa persona, tanquam sibi ipsi nociva, vellet eam ipsimet personae exosae; tamen id & infrequens est, & alienum ab odio abominationis. Persona enim illa prout volita, non terminaret abominationem, sed prosecutionem: apprehenderetur ut mala inimico, ideòque ab eo, qui insensus est, non fugeretur, sed quæreretur inimico. Hoc autem abest à ratione odij abominationis, consistentis revera in amore personae, cujus malum refugimus, & idcirco illud refugimus, quia apprehenditur, ut personae nocivum.

§. III.

Causa odij primaria cum administris.

CAusae odij, de quibus nunc agendum sequitur, elucescunt ex dictis circa amoris causas, quibus istae omnino sunt oppositae. Itaque sicut bonum, & pulchrum alicui appetitum, & ingenerat amorem, ita malum, & turpe avocatur, & fugat appetitum. Et quamquam malum, ut malum nullam habeat entitatem; cum juxta Augustinum illud non sit in rebus, sed in usu peccantium, nullamque proinde vim motivam exercere valeat: nihilominus, cum nullum inveniatur purum malum, atque omne malum insit alicui bono tanquam subjecto, cui nocet; ideo bonitas conjuncta malitiae, aut quae convenit subjecto capaci mali, exercet virtutem in ipsum odium. Ut tamen aliquas administras primae causae adjungamus, adhuc tres ordines odii hominis in hominem adducamus, quae tamen non sunt novae species, sed varias duntaxat causas continent, & sunt odium spirituale, naturale, ac ferinum. Primum concitatur ob animi vitia in altero deprehensa, quibus inducitur in hominem affectus avertendi sese, & separandi vel reipsa, vel saltem affectu ab illius societate. Non potest hoc odium in hac vita ab homine erga hominem esse supernaturale; ne quidem propter peccata, licet haec ipsa supernaturali odio

odio habeantur. Neque in odio adversus homines flagitiosos imitari fas est Deum. Quemadmodum enim fratri, qui in crucem agitur, iudicis sententia arridere non debet, quin potius optandum illi est, ut salvo legum vigore frater vivat: ita nemo voluntati Divinæ, quæ odii inimicitiae hostes suos prosequitur, simili se odio conformare debet. Hujus rei momentum est, quia quemadmodum licet quis facinorosus ad patibulum damnatus sit, non cessat tamen esse frater: ita licet peccatis quis inquinatus sit, perstat tamen esse proximus cæterorum hominum. Distinguendum est id maximè cum S. Prospero.

Natura quisquis propria non spernis honores

In quocunque hominum, qua tua noscis; ama.

Quæ namque artificis summi fecit manus, unum est;

Quæque auctore bono condita sunt, bona sunt.

Divinum in nullo figmentum despiciatur,

Sola malis studiis addita non placeant.

Plura autem sunt, quæ hujus generis odium parturiunt; puta, mores agrestes, inurbanitas, ignorantia, & pleraque ex vitiis moralibus, non tamen omnia; non nullæ quoque ex virtutibus ipsis, quæ morosiores videntur, & societati mutux minùs gratæ.

Fæcundissima verò odiorum parens est calumnia, seu falsi criminis impositio, cum quisque proprio enixè studeat honori, famæ, & gloriæ. Vix invenies homines, qui patiantur adversis linguæ telis se impeti, & qui fœdati nominis denigrationem sanguinis effusione eluere non studeant. Per mendacia talia fucata, quibus alterius splendor vel extinguatur, vel imminuitur, forti viro plus mali infertur in foro, quam ab hostium telis fuisset inflictum in bello, & castris. Quidquid igitur illam redolet, summè vitandum, cum detractores teste Apostolo ad Rom. 1. sint ipsi Deo odibiles. Sævitur etiam in culpam magna indigent cautela, ne sæviant in hominem, & ex duobus invicem complexis transfodiant unum de nocte, illæso altero. Gophyrius unus ex septem conjuratis, qui ingenio Ortanis Regnum Persicum asseruerunt, complexus alterum Tyrannorum, socios in loco obscuro hortabatur, ut vel per suum transverberarent corpus, ne sibi parcendo alter evaderet. Difficile, & subtile est in tenebris confusa discernere, & ideo in alienis peccatis minùs, aut cautiùs est indulgendum odio, ne indignaturi factis humanis, indignemur hominibus. In propriis erratis securissimus est iste affectus, ubi amor nostri tenacissimus, & importunus se ingerit. Diversè nostra & aliena insident. Aliorum odium, & nostri amor facilissimus est, & summus: aliorum amor, & nostri odium difficillimus, & exiguus.

Alte-

Alterum odii genus inducitur ex antipathia, & aversione quadam, quod iterum duplex est, vel naturale, vel morale: posterius provenit à rebus inclinationi nostræ, pro diversitate temperamenti diversæ, summe contrariis nihilque facilius est, quàm ut ob dissimilitudinem in animum inducamus, aliquid malum, aut turpe esse. Hac ratione sinceri ofores esse solent fucorum; generosi odisse ingratitude; valentes esse hostes ignavia. Naturalis aversio vel oritur ex ipso instinctu naturæ animali indito, prout ovis horret lupum, pullus milvum, alia animalia alia: vel ex constitutione corporis, ob quam ante omnem consuetudinem, aut offensionem incitatur ad unum præ alio fugiendum. In hac radice fundantur aversio equi erga camelum, Elephantis erga caprum. Naturalis non nullorum horror ad conspectum catorum, ranarum, aliorumve animalium. Pro causa hujus dissonantiæ non solum recurrendum est ad operationes phantasie; sed advocanda sunt etiam effluvia corpusculorum, quæ nimirum ex corpore, potissimum vivo continenter effunduntur undequaque velut in atmosphæram quamdam singularem. Dum enim ex occurssu corporis unius effluvia in nos incurrunt, & per poros nostri corporis subeunt, quandoque nihil immutant, idemque præstant, quod aër ipse per eosdem meatus penetrans. Quandoque tamen ob texturam, & motum eorundem certo modo repugnantium poris, & particulis nostri corporis, immutationes, & determinationes eas invehunt, quarum similes, & analogos vapores, & odores ingrati, & aër ipse pro diversa qualitate corporibus iisdem affert: scilicet sanguinem, & spiritus fomentant; unde agitatio perturbata illa resultat, quæ passionem odii provocat. Ad hujusmodi ergo originem referendi sunt genii, & inclinationes repentinæ, citra patentem, & conspicuam causam abortæ, quibus afficimur erga occurrentem quempiam, cætera ignotum, quo pacto affectus fuit, qui scripsit:

Non amote, sabidi, nec possum dicere quare.

Hoc tantum possum dicere: non amote.

Postremum est odium ferinum, quod assurgit ad eam animi effertionem, quæ ordinariam mensuram, qua homines aliquid aversari consueverunt, transcendit, & ad immanitatem belluarum pertingit. Hujusmodi odio impelluntur, qui inimicorum nece quàm acerbissima, & dirissima non exsatiati, truncare insuper sædèque discerpere cadavera inanimata habent in delitiis. Aliqui eò interdum hac sævitia processerunt, ut carnes cætorum mandere, & hepar vel cor hostium recens exemtum dentibus suis crudum commolere non perhorrescerent. Sic Hannibalem dixisse ferunt, cum fossam sanguine humano plenam conspexisset.

spexisset: O formosum spectaculum! risit, multaque voluptate perfrictus, inter millenas mortes iratum vultum exuit, & quasi per otium sæviit. Quamto pulchrius illi visum esset, si flumen aliquod, lacumque compleret? sed quid mirum, hoc maxime spectaculo captum fuisse, sanguini innatum, & ab infantia cædibus admotum? Volesus etiam sub Augusto Proconsul Asiæ cum ter centum una die securi percussisset, incedens inter cadavera vultu superbo, quasi magnificum quid conspiciendumque fecisset, græcè proclamavit: O rem regiam! quid hic fecisset rex?

Numeratur quoque inter odii causas conjunctio, & connexio eum. argumento odij. Sicut enim, qui aliquem diligit, fertur etiam amore in omnia, quæ illius sunt, ita vicissim sentiendum de odio. Tale fuit odium Davidis, quando psal. 138. dixit: *Nonne qui oderunt te Domine, oderam, & super inimicos tuos tabescebam? perfectio odii oderam illos, & inimici facti sunt mihi.* Hinc assequi possumus radicem incensissimam illius odii, quo nos dæmon insectatur. Nimirum rebellis iste osor, postquam Omnipotenti repugnavit, & ob contemptum ab eo alienatus est, quando videt hominem ad ejus imaginem factum, in eum suam exercet malignitatem, qua authorem ipsum lædere concupivit, sed non valuit. Veluti, si quis homo, quando Regem inimicum attingere non valet, ejus simulacrum turibundus concerpit ac dilacerat.

§. IV.

De subjecto ad odium opportuno.

AD odii passionem valde accommodati sunt ignavi, & timidi, qui undecunque damnum metuunt. Ideo erga vim quamcunque adversariam facile odio inflammantur, elisam, & contritam volentes, ne jugi metu impendentis ab ea mali percellantur. Eidem affectui etiam facile subjacent suspiciosi ob non dissimilem causam; ubi enim suspiciones facile nidum construunt, ferè locus metui, atque adeo etiam odio inde progerminanti patet. Odii item affectum promptissime suscipiunt, qui amoris sunt dediti, quod amorem pro jure suo se exposcere arbitrentur, omniaque ingrata, quæ profluunt ab eo, quem dilectione prosequuntur, graviora ducunt, quam si ab iis proficiscerentur, erga quos ipsi aliter afficiuntur. Et hanc germanam esse causam judico, cur odia conjunctissimorum, si parturiantur, sint gravissima. In hoc tota est difficultas, ut mater, quæ sanguine, visceribusque constricta erat, incipiat

non amare filium; ubi semel in contrarium desleat, frontemque exuit, toto pondere, omnibusque viribus inclinata trahetur. Vigor, qui sibi permissus in dilectionem excrevisset, in ipsius robur adolescet, & reliqua præcipiti furore decurrent. Redituræ caritati obstabit, quidquid obstitit odiis. Nempe in domesticis minima offendent; in amicis negligentiam vocamus injuriam, quia quæ contra spem, & expectationem evenerunt, judicamus talia esse, quæ pati non deberemus. Si autem opportunum odii subiectum sunt ij, qui se maximè læsos existimant, etiam superbi, & sui ipsorum amatores maximè erunt proclives ad aliorum odium. Cum namque impensè sese ament, & toti sint in curandis suis commodis, & bonis, quæ faciliè interrumpuntur, celeriter concitabuntur ad offensionem, facilièque adducentur, ut putent se maximè læsos, & qui læsit, maximè esse malum.

Præter vulgaria hæc, & ordinaria odii subiecta in quibusdam hominibus accidit; quod inter bruta serpentibus, ut scilicet neminem ament, omnes oderint; ita ut quemadmodum prava plerumque constitutio stomachi, aut linguæ nauseam ingenerat quorumvis eduliorum: sic nonnulli adeo à communi hominum complexione exorbitant, & reliquos omnes habeant exosos, quos similis animi tabes adurit. Atrâ linguâ omnia culpant, obvia quæque agere prohibent: dirorum alitum modò omnibus invident; nec ullum aliud abominati spiritus novère præmium, quàm omnia odisse. Ratio tam inauspicati habitus esse potest, quòd quis nullâ adhibitâ cautelâ vehementer alicui crediderit, existimâritque veracem omninò, fidumque aliquem hominem, quem postea nequam, invidum, versipellem, atque vertumnum experitur. Cum verò id cuiuspiam sæpius acciderit, & ab iis quidem, quos amicissimos, familiarissimosque esse arbitrabatur, tandem offensus, & quasi allidens, omnes odit, & censet, nihil planè in quoquam homine esse integrum aut sincerum. Alia causâ tetra huiusmodi dispositionis esse potest cænosus, turbidus, ac sæculentæ melancholiæ sordibus redundans sanguis.

Si de temperamentis in specie sermo veniat, videbimus, quòd plerumque sanguinei fugiant serios, melancholici lætos & hilares: bilioso fastidium procreant ignavi, ac lentis, quale phlegmaticis ciet ardens atque ad agendum præceptus animus. In amoris passione sanguinei præ omnibus amant cholericos, à quibus mutuò redamantur: phlegmaticum item eodem cum fructu: afficitur item post diuturnam consuetudinem erga melancholicum: rarò tamen ab hoc redamatur. Cholericus sanguineum amat, melancholicum item, ubi reciprocus intervenit amor. Cum phlegmatico tamen ob oppositum è diametro temperamenti habitum.

nul-

nūllum ipsi intercedit amoris fœdus. Phlegmaticus verò alienus à cholerico, rarus item melancholici amator; sed ubi ad illum afficitur, constanter eum amat. Præ omnibus autem amat sanguineum, idque perseveranter. Oppositum in sanguineo accidit, cujus propterea symbolum est aëris elementum. Melancholicus vehementer, & obfirmatè amat, ubi inceperit; cum phlegmatico rarò illi convenit: nunquam ferè cum sanguineo: præ reliquis cholericus arridet, ubi tamen contentionibus, & jurgiis perpetuò miscebitur ille amor.

§. V.

Expenduntur odij attributa.

Inter odii attributa primùm occurrit, quòd initium minimè occultum habeat, sed statim sensum sui vehementem ingerat, ut anima clarissimè advertat sese turbari, & ea affectione concuti. Cùm afficiatur ab objectis, quæ sine vulnere non incurrunt, in principio sui ortûs statim nos torquet, & in cunis adhuc evadit noster carnifex. Emergit tam citò, quàm amoris passio, & modicò alimentò subministratò spargitur per omnes animæ facultates, atque ut ignis devorans obvia quæque consumit. Secus res se habet in amore; illabitur iste inobservatus; oportet, ut te amici tui admoneant, dicântque tibi vicini, te amore esse implicitum: antè arctissimis vinculis anima detinebitur, quàm intelligat, se amare; feritque ille tam suaviter, ut vulnera vix etiam tunc detegantur, quando ob longam temporis moram nullam ampliùs curam admittunt. Opinor hoc accidere ex eo, quòd amoris affectus ad entelechiam, & perfectum vitæ statum maximè congruat: odium verò temperamentum corpori debitum perturbet, & violenter de statu naturali fibras vatorum, & per reliquam viscerum compagem dimoveat, quæ non potest non notabiliter adverti.

Diffidet præterea ab amore, quòd pertinaciùs inhæreat, diutiùs vi-geat, nec levitatem illam, cujus amor accusatur, participet. Ubi semel in corde radices egit, beneficiò temporis non exscinditur; nec à philosophis hucusque inventum fuit remedium, ad sanandum hominem tam pestilenti febre laborantem. Ipsa religio nunquam magis videtur occupata, quàm ubi cum tam obstinata passione est confligendum, videturque Filius Dei hunc in finem descendisse in terram, ut nos amorem inimicorum doceret, & condonare inimicis, Voluit exemplò præire, &

mori pro suis , priusquam alios obligaret , præsciens ad stabiliendam legem adeò sensibus nostris repugnantem opus fuisse , ut illam propria persona confirmaret , sua morte auctoritatem tribueret . & sanguine effuso subscriberet . Adeò pertinaciter inhæret hic affectus , ut Poëtæ commentis fuerint , odia etiam post mortem supervivere , & nobis deficientibus ea non finiri . Inventa est Regina , quæ apud Senec. in Hercule furente ita sæviret :

*Patrem abstulisti , regna , germanos , lares ,
Patriam : quod ultra est ? una res superest mihi ,
Fratre , ac parente charior , regno , ac lare :
Odium tui .*

Quasi in afflictione sua aliis animum non oblectaret , quàm odiò , quamquam sibi ab hoc sentiret viscera arrodi : quasi minùs premeretur dolore deperditæ felicitatis , quàm occuparetur desiderio se vindicandi . Frequens experientia testatur , morituros patres , ubi animam extremis labiis retinere non ampliùs possunt , superstitem adhuc desiderare odiorum suorum vigorem : obligant filios ad perpetuas inimicitias , harum hæredes scribunt , onerantque mille imprecationibus , ubi reconciliationem admiserint .

Si à longè secretissimæ hujus proprietatis rationem conquirere liceret , dicerem , causam physicam esse , quòd textura , quæ in fibras ab odio inducitur , ad rigorem , & firmitatem determinet , adeoque ad stabilitatem : contrà , amor agitationem æquabilem , tranquillamque conciliet , ac proinde facilè mutabilem ; æquabiles enim viventium motus diuturni esse non possunt . Mòralis ratio esse potest , quòd ex amore felicitatis ingenito amor quilibet , & odium proveniat . Quoniam verò majus impedimentum felicitati affert , vel minimum malum , quod odij objectum est (nam illam è toto exturbat) quàm adjumentum sit ad eandem felicitatem parandam parvum , & singulare quodpiam bonum , infertur hinc , cùm adeò difficulter deponatur odium .

Denique odium passio est omnium imprudentissima , utpote quæ maxima , & perniciosissima mala ultrò accersit , & adit , ut inimicum eandem secum ruinâ involvat , redditque osori mortem dulcem , si modò simul videat perdi adversarium . Ubi quis se integrè committit iræ , tantum æstimat voluptatem vindictæ , ut nunquam videatur ipsi sufficiens pretium solutum : omne supplicium dulcescet , modò serviat ad explendum passionis nisum . Hinc iterum illud apud Senecam in Thyeste

Inclyti Pelopis domus

Ruat vel in me , dummodo in fratrem ruat .

At unde hoc? ex eo, quod amor ipse proprius à pluribus agendis etiam nefariis hominem absterreat: in eoque sita est ejus utilitas, ut raram sit ex amore proprio urgente, & vigente scelera plura, eaque statui, & conservationi vitæ humanæ damnosa non cavere. At tyrannis odii singulari quadam ratione amorem proprium obruit. Et quasi extinguit, inclinâque in omnem perniciem inimici, & quantum est in se, vult illi omnia mala, & omnia, quæ potest, infligit.

S. VI.

Perniciosi satellites odij.

SI proprietates odij sunt virulentæ, non minùs funesti prodeunt ex eo effectus. Permisso semel recessu, & aversione appetitûs ab objecto promanabit imprimis timor causarum, quibus objectum, si nondum illatum agnoscatur, inferri potest; qui timor interdum ob adjunctam ignaviam valdè augefcit. Quodsi ignaviæ adjungatur potestas, influet etiam sævitia, ut perspectum fuit in Caligula, & Nerone, aliisque ignavis Principibus, qui, quod imbelles essent, & malè semper metuerent, ex odio in sævitiam versi immania odij sui ediderunt exempla. Sicut amor est causa omnium operationum suavium; ita qui odio cæcè indulgebit, facilè in omnes tragicos casus, in omne malum imaginabile ruit. Homicidia, & mortes sunt effectus ordinarij possessionis generi humano tam inimicæ. Illa fuit, quæ primis diebus mundo ostendit, posse hominem in flore ætatis occumbere, non esse securum fratrem à fratre: illa effecit, ut homo dulcissimæ suæ indolis oblitus commisceret potum venenò, ut mensarum mappas humano sanguine conspurcaret. Illa fabricata est arma ad depopulandas urbes, ad destruendam pulcherrimam ex omnibus Dei imaginem: illa induxit funestissimam artem, quæ tradit præcepta, quomodo unus alteri mortem infligere possit. Ut omnia compendiò complectar, sufficit scire, iram, tristitiam, invidiam, desperationem, cæterosque omnes affectus oppositos ab odio enasci. Verum est, non illud assurgere ad extrema hæc mala, nisi ubi passio fuerit inordinata: at excessus ipsi semper est connaturalis, & nisi ratio, vel gratia eam moderetur, ordinariè in profundum præcipitabit: imò sicut impetuosus subruit torrens repagula, quæ opponuntur; ita si quis obex resistat, sæpè odium exasperabitur.

Omniùm autem odij effectuum pessimus est, quando sub grata ami-

citæ specie in corde delitescit. Qui palam tibi adversatur, hunc facile cavendo vitare poteris, si fronte, vel voce tecum in amicitiam redit, hic misericordiæ formam mentitus Trojani instar equi fallit. Armatam inimicorum affectuum cohortem occulit, quæ data occasione extremam machinabitur perniciem. Sicut venenum in mulso colliquefactum, ocys permeat in venas, ac ubi ad cor pervenerit, interimit: ita dolus amicitæ admixtus odiò præsentissimè nocet, omnemque remedio aditum intercludet. Denique observatione indignus non est effectus in judiciis, & factis illorum, quos oderimus. Ubi enim amicitia permanet, nihil facile creditur, nihil facile recipitur, quod dissidium operari possit: Si verò inimicitæ semel occupaverint animos, omnia, quæ sunt quæ dicuntur, quæ audiuntur, ita accipiuntur, & intelliguntur, ut ad majores, & longiores proficiant inimicitias. Si quidem boni dicatur de inimico non creditur; si quid autem mali, hoc solum creditur, & confirmatur.

§. VII.

Characteres, quos odium corpori imprimit.

Morosi characteres, quos odium corpori imprimere solet, ab interno cordis motu provenire solent, cum nempe per odium anima sese ab ingrato objecto amoveat, segreget, & disjungat. Hoc facile intelligetur, si dicamus in hac passione primo loco cor contrahi, ejusque fibras ita affici, ut pravi motus suscitentur. Hinc modica sanguinis arteriosi vis in carnes effunditur. Arteriæ quoque, in quas etiam ejusdem generis affectio traducitur, sese contrahunt; hinc angustiores meatus, hinc per capillares vix sanguis effluere potest. Accedit, quòd tales sint ij motus, ut calidum dividatur: hinc amor caloris, odium frigoris indolem præferet. Calor enim congregat homogenea, partes scilicet ignis, vel calidi; frigus verò segregat; hinc osor frigere, & algere dicitur. Et verò per capillares contractas humor aqueus longè facilius, quàm sanguis traicitur, & in carnes effunditur, ex quo frigus formatur. Ubi si osor solus degit, vultus erit pallidus, & tristis, aspectus fixus, atque immobilis. Tristitiam exproment aversæ cogitationes, quas apud se volvit, & revolvit: pallor vultus, corporis rigor, flaccida labra, arctæ fauces, lingua minùs expedita, diaphragmatis lentitudo, respiratio item lenta, pulsus parvus, & depressus, & ex omni parte diminutus.

nutus. Hæc omnia ex eo, quod nec tanta sanguinis arteriosi copia à corde in aortam effundatur, nec arteriæ sese exsplicent, sed potiùs contrahant. Eodem semper statu oculos relinquit, quia anima functionum naturalium oblita modo injuriâs, quas ab inimico recepit, secum recoquit, modò media sese vindicandi, & ulteriora mala, quæ timet, propellendi indagat. Frons osoris nihil sereni habet, nihil explicati, sed contracta rugas agit, & nil nisi ferum, & asperum præfert. Præterea cùm recordatio inimicorum ad iram revocet, hac inflamatus mordere labra, jactitare caput, quaterere pedibus solum, suosque intra dentes, nescio quæ verba vindictam olentia, tacitè murmurare incipit, & ut canis in saxum injectum rabiem exerere. Vox ipsa asperior, cùm trachea minùs tensa sit, & aura frigidior vocem exasperet; hinc nullus cantus, nulla inflexio vocis. Oculi denique interiùs adducti, flavidi, sine ullo splendore, aperti, & quasi hiantes ob defectum sanguinis arteriosi. Qui aliàs in amantibus eosdem distendit. Tunicæ autem subsidentes quasi rugas agunt, ob quam superficiem minùs tersam etiam oculi minùs apti sunt ad lumen repercutiendum. Unde quò plus luminis hauriant, palpebras, & supercilia tollunt, & corrugant frontem. Si autem non sit solus, sed in aliorum societate laudabilia de hoste percipiat, ex accensione nimia palpitare cor, ex propulso ad faciem sanguine, rubescere vultus, & quia indignationi conjungi solet inquietudo quædam, continuus ab uno loco in alium resultabit itus, & reditus: contrahetur nasus, ut dicta à se contemni adstantes judicent. Denique quo se satiatum allatis laudibus ostendat, in risum contemptu plenum dissolvetur. Contraria prorsus accidunt, si mala de hostibus spargantur; similes enim sermones gestu capitis, ac totius corporis inclinatione approbabit. Quod si denique æmulus obviam fiat, horrore subito succutietur, & genibus contremiscet, quòd spiritus tum in timore, tum in audacia, quarum alterutra passio interveniet, ad interiora cordis penetralia confugere soleant. Vel igitur confidit de vindicta, ex adversario reportanda, atque arietabunt ipsum impressiones communes audaciæ, & iræ, vel animo cadit se vindicandi; & tristitiâ, timore, ac desperatione absorbebitur, ubi iterum commotiones his affectibus propriæ corpus irritabunt. Quod pertinet ad somnum, nisi odium cum furore conjunctum sit, somnolentum redit; frigus enim cerebri somnum conciliat: nulla etiam, vel rara somnia, quia fibræ rigidiores ad motum minùs habiles, & minùs dociles sunt: igitur simulacra rariùs inter dormiendum excitabuntur, quæ per motum duntaxat excitari admitto.

DISSERTATIO III.

De Desiderio.

§. I.

Exprimitur nîsus desiderij.

PRæclare nobis indoles desiderij elucescet, si observemus, hunc affectum medium obtinere locum amorem inter, & gaudium: & habere primum ut principium, istud verò ut terminum. Quippe amor pondus quoddam animæ addit, illudque fortiter, & suaviter in bonum inclinat. Unde quemadmodum in rebus naturalibus, si gravia avulsa, & remota sunt à suo centro, ex pondere nascitur conatus, ac nîsus ad centrum repetendum, quo adepto cessat talis motus, eique quies succedit: ita in animo, si bonum amatum sit absens, ex amore nascitur impetus, quo in illud rapimur, quique desiderij nomine intelligitur. Obtentò verò bonò illi motui succedit quies in bono, quæ delectatio nominatur. Strictius definiri potest, quòd sit *animi commotio, quæ seu stimulo urgetur, & velut igniculo accenditur ad investigationem, & adeptionem boni delectabilis, sensibilis, quo caret*, sive quia futurum est, sive quia jam abiit; ad utrumque enim tanquam ad bonum absens desiderium in longum porrigit animam, eamque extendit, ut possit rem adamatam contingere, tanquam in orbiculari machina, semper sequendo, nunquam assequendo: non quòd nunquam, qui desiderat, perveniat ad rei desideratæ fruitionem; sed quòd anima, quamdiu desiderat, & vi hujus actûs non potiatur re concupita. Extendit se tantum ad bonum sensibile delectabile; nam appetitus sensitivus, cum non sit capax honesti, ut honestum est, atque utile, non habet vim movendi appetitum ratione sui, sed semper, & necessariò diligitur ratione alterius, nempe ejus, ad quod utile esse conspicitur, respectu cujus proinde obtinet rationem puri mediî, hinc totum motivum appetitûs sensitivi dicitur delectabile sensibile. Attingit autem desiderium omnia objecta sensibilia, licet ipsum non tangatur; percurrit omnia loca, licet non moveatur: volitat per aëra cum avibus; innatat aquis cum squammigero grege, trajicit æquora cum navibus; conscendit montium editiora juga cum feris, venaticisque canibus: nullis finibus circumscribitur, nullo angustatur loco, nullo littore coarctatur. Affectui huic specialiter ac-

com-



M. I. Millorfer del. Sculp.

Namur in vetitum semper cupimusque negata

Pl. Book 16.



commodatum est nomen concupiscentiæ, quamquam enim hoc sit commune omni passioni appetitûs sensitivi, eò quòd per sensibilia bona corpus pariter, & anima afficiatur; ideòque terminent affectum, quatenus utrique prodesse possunt; quia tamen impressio, ac motio appetibilis, quatenus tendit in bonum absens, præ reliquis sentitur, ac manifestius cupit, ut simul sint illa, quæ simul non sunt, ideo præ reliquis hoc nomine exponitur, & sapientissimus Socrates judicavit, passionem istam, alas animæ, quibus ad absentia feratur, posse nuncupari: Alii eandem cursori comparârunt, qui præcurrentem tardior pervicaciter insequitur.

§. II.

Statuitur diversitas essentialis ab aliis passionibus.

Conceptum desiderii varii convellere satagebant, qui eum variè cum aliis passionibus confundere allaborârunt. Et in primis rationem, absentia, quam in objecto à desiderio attendendam vidimus, dixerunt non conferre amorì simplici novam & distinctam speciem: accidentariam duntaxat esse denominationem, quæ salvam relinquat utrobique actus identitatem. Suadere hoc studuerunt ex eo, quòd sive objectum sit præsens, sive absens, eandem tamen habeat bonitatem, ratione cuius solius movet; & absentiam, quæ bonum convestit, potiùs arcere à prosecutione, atque ideo non esse partiale motivum desiderii. Adquunt pro confirmatione solida locum Apostoli 1. Petri 1. quo significatur Angelos desiderare prospicere in Deum, quem intueri ibidem dicuntur. Prout autem se habet desiderium in appetitu rationali, eo modo se habet concupiscentia in appetitu sensibili. Videmur igitur adigi ad admittendum eandem utriusque esse essentiam, & accidentariam absentiam solum fundare diversam denominationem inter desiderium, & amorem.

Nihilominus impugnatio hujus diversitatis soliditate non nititur. Licet enim absentia non moveat, nihilque causet, cum ex se nihil sit: attamen sicut ipsa præsentia boni, est bonum quoddam particulare, potens per se ipsam movere, & agere simul cum bono, quod reddit præsens; ita absentia confert, ut bonum, cui adjacet, operetur aliter, atque operatur idem ut præsens. Insuper patet amotâ unâ causa partiali, alteram exercere se sola diversam activitatem, nec sufficere ad eundem specie effectum, ad quem sufficeret simul cum alia concausa. Igitur abs-

sensu boni delectabilis non variat passionis speciem tanquam causa partialis specialiter influens ratione sui ; sed solum tanquam impedimentum causæ cujusdam partialis , qua absente oportet , ut virtus efficiens , quæ superstes remanet , inducat effectum specie diversum , nempe minus essentialiter perfectum , quam posset parturire conjuncta cum alia concussa . Delectabile igitur absens generabit desiderium existente tota vi causativa penes ipsum delectabile secundum se ; absentia verò ejusdem delectabilis solum diminuet influxum delectabilis , & inhibebit à comunicanda majori , & peculiari perfectione affectui .

Desiderium prospiciendi in Deum ab Apostolo memoratum non denotat beatas illas mentes strictè desiderare contuitum , quo potiuntur ; sed tantum significatur , ab eo contuitu , tametsi jugi , & æternum duraturo , procul abesse omne rei visæ fastidium , secus quam in usu bonorum creatorum solet accidere . In delectationibus enim imperfectis , cum non plenè satient , generatur fastidium aliquod , ac molestia , ob quam contingit , ut succedat appetitus eam removendi , nec in eadem amplius perseverandi : econtra Angeli semper vident , quia semper videre desiderant : ne autem sit in desiderio anxietas , desiderantes satiantur juxta illud Psalmistæ : satiabor , cum apparuerit gloria tua : & iterum ne sit in satietate fastidium , satiati desiderant . Verbo , desiderant sine labore , quia desiderium satietas comitatur : & satiantur sine fastidio , quia satietas ex desiderio semper accenditur .

Minus dubitatur , quomodo desiderium ab aliis passionibus secernatur . Quamvis enim desiderium tendat in illud ipsum objectum , in quo postea per motum delectationis quiescat ; attamen gaudium à desiderio est sejungendum . Distinctionem hanc , præter dicta , hauriunt ex eo , quòd desiderium insuper spectet assécutionem , & conjunctionem boni tanquam parziale objectum . , in quod nulla ratione fertur delectatio . Differt desiderium etiam à passionibus partis irascibilis , præcipuè à spe , cui magis affine videtur ; spes enim non est qualiscunque absentis boni prosecutio , sed ardui , ac difficultatibus circumsepti ; nec quomodo-cunque in illud tendit , sed cum quadam electione , conatu , ac lucta contra difficultates animum deprimentes : at verò desiderium est
simplex animi motus , & affectus in bonum
absens.

§. III.

Instituitur divisio desiderii.

IN accessu ad partitionem desideriorum instituendam, occurrit primo efficax, & inefficax, posterius dicitur, quo quis desiderat quidem bonum aliquod, non tamen manum admovet operi, nec exercitè usurpat media, quæ ad illud obtinendum judicavit opportuna. Hoc autem, ex duobus capitibus oritur: vel quia non est ampliùs in potestate desiderantis; si enim esset, tunc ea adhiberet; & hoc est tantum inefficax per accidens: vel quia reipsa non adhibet media efficacia pro sua libertate, licet sit in potestate operantis ea applicare, & hoc est tantum rudimentum, sive delineatio desiderii efficacis. Robustum desiderium est, quo intendens se determinat ad mediorum usurpationem, quæ certa, & infallibilia reputat ad assecutionem finis intenti. Judicant aliqui desiderium inefficax locum non invenire in brutis, & bruta semper appetere rem omnino efficaciter. Sed videtur hoc experientiis non congruere; si enim proponitur cani bolus pinguior, haud dubiè illi inhiabit: si autem quis simul eidem minitetur baculo, terribitur, non audebit accedere: igitur tunc non habebit appetitum efficacem, alioquin, cum solutus sit catenis, & possit accedere, si velit, certè si efficaciter cibum appeteret, in illum involeret. Videtur hoc etiam indicare ipsa inquietudo, qua agitatus quasi perpetuò in carnes suspirat, & tam lamentabiliter oculos in eas convertit, ut de desiderio, quo in eas fertur, dubitare non liceat. Econtra non terretur baculo ne hominem invadat; sed magna rabie in illum insilit, quia id efficaciter intendit. Licet igitur bruta priventur libertate; videtur tamen hæc non requiri ad diversitatem desideriorum efficacium, & inefficacium, quantum quidem nos possumus in illis cognoscere. Ut passio generatim, sic desideria distribuuntur ab Aristotele lib. 11. politic. cap. 11. in naturalia, & innaturalia, seu potiùs ultra naturalia. Desideria circa cibum, & potum, & qua dirigitur circa cupiditatem ad propagationem, & conservationem speciei dicuntur naturalia, quia eadem bona cadunt sub appetitum quoque naturalem ac innatum, continentque in se inclinationem, quæ proportionaliter est communis omnibus naturis, seu sentientibus, seu non sentientibus, quæque deprehenditur in animalibus independenter ab omni sensu. Desideria verò, quæ tendunt in bonum, & malum præcisè quatenus apprehensum per cognitionem, qualia sunt præcipuè, quæ feruntur ad bo-

num vel malum futurum sunt, præter naturalia, quia limites appetitûs innati excedunt. Videtur difficillimum, quod defendit S. Thomas, desideria nimirum præter naturalia brutis denegare, cum tamen deprehendamus animalia multa appetere, quæ ex se illorum naturæ non conveniunt, sed eis repræsentantur ex aliqua phantasie læsione, aut apprehensione velut convenientia. Cur enim corvus appetit omnia abscondere, quæ invenit, etiam non comestibilia? cur quascunque plantas aut alias res infixas eradicare, aut extrahere? an abscondere ex se animalibus convenit? an specialis delectabilitas in ea actione relucet? vel an non hoc potius ex singulari ipsius corvi apprehensione provenit? multa certè animalia ex zelotypia optant, ne aliud sibi præferatur. Sic refert Arriaga, foeminam leonis curam gessisse, cui jubar manibus contrèctare licuit, & ferocissimo animali sæpissimè blanditiis gratificari. Cum verò semel accessisset mulier infantem ulnis gestans eundemque dissuavians, vellètque pariter leonem pro more demulcere, ille indignatus, quod foemina infantulo blandiretur, non tantum tactum non admisit, sed apprehensum foeminæ digitum extrema parte abstraxit, & mutilam dimisit. Quis ergo negabit leoni huic concupiscentiam rei ipsius naturæ non convenientis? an hoc desiderium diversum ab eo, quo homo solus laudari exoptat? canes venatici, qui leporum capturâ delectantur, quos tamen nullò modò comedere cupiunt; videntur moveri ea delectatione naturali, ut imitentur concupiscentiam avari, qui delectationem reperit in divitiis accumulandis, quibus tamen non utitur.

Inter istas duas classes super est aliud discrimen, nempe quòd desideria naturalia in omnibus tum brutis, tum hominibus sint uniformia, cum sequantur ductum, & imperium naturæ, & dirigantur dictamine sapientiæ divinæ, quæ est incommutabilis, ac invariabilis, atque ideo omnibus uniformiter disponit, quæcunque ipsis congruunt. At desideria præternaturalia, quia diversi diversa opinantur, maximam sortiuntur diversitatem, & in diversis diversa insurgunt. Ex qua amplitudine rationis in homine insurgit nova divisio desideriorum, scilicet in finita, & in infinita; qua de causa scripsit Aristoteles I. politic. cap. 6. *Quòd infinito existente concupiscentia homines infinita desiderant.* infinita humani sinûs capacitas & voracitas penitiùs probatur ex intellectûs humani vastitate, qui, cum aptus sit ad apprehendendam bonitatem sine fine, nulla etiam par esse potest pabuli ingestio ad eundem exsaturandum, & explendum, nec malè comparabitur tantalicæ siti, cujus toties fabulæ mentionem faciunt. Sic avarus, qui centum comparavit, vult habere mille, si hæc quoque obvenerint, centum millia, & sic deinceps, nec ulus

lus finis erit prolabendi in vastum illud pelagus insatiabilis cupiditatis. Sic etiam in sanitate corporis, ubi semel nimium augmentum exoptatur sine limite exceditur, & in infinitum recidit, ita ut humani cordis os tantæ vastitatis esse videatur, ut mundus universus non nisi exigua buccella nominandus sit, incapax explere ejus famem. Illud præterea insigniter circa hanc humanæ cupiditatis inexplabilitatem à Platone traditum, uno desiderio avulso non deficere aliud, sed suppullulare: & subnasci novum, vel quod alioquin jacuisset, augescere: quasi corrivatis ad eam amplificandam viribus appetitûs, in aliam cupiditatem non impenfis. Sic intuemur in quorundam cordibus, nuptiarum cupiditate suppressa, nummorum desideria successisse. Nam sicut in ipsis sensibus corporeis acutiùs audiunt, qui non vident, & tangendo multa discernunt; nec tanta vivacitate tangunt, qui oculis utuntur, cum uno aditu nempe luminum, represso, sentiendi vis in aliis sensibus promptior exerceatur, tanquam in altero conetur explere, quod negatur in altero: ita etiam sæpè lasci-viâ cohibita, majoribus viribus in pecuniæ se porrigit appetitum, & il-linc averfa, huc se impetu ardentiore convertit.

§. IV.

Pergitur ad proprietates desiderij.

EX dictis non erit difficile eruere proprietates desideriorum, quarum prima facilè dici potest, quòd perinde, ut flamma semper in motu nunquam quiescat, & ubi semel animam occupavit, maximam ipsi violentiam inferat. Ex natura sua per unionem conglutinatur illa corpori; per desiderium fertur ad rem amatam, ex quo æstum aliquem exsurgere est necesse. Quòd si in abditis montium visceribus stabulentur flammæ sulphure, ac bitumine nutritæ, tunc montium cacumina, rupiùmque propugnacula horrendo fragore excutiant, disrumpuntque; & eò lethalius apparant excidium, quò diutiùs intùs hærentes exitum per hiantes montis latebras difficulter aperiunt: ita dixerim flammantia nostris in pectoribus desideria, quo uberius ex diuturnitate subeunt incrementum, eò difficiliùs moras patiuntur, nec contactionem sustinent. Omnis quidem affectus calor est; verùm, qui in cunabulis viribus destitutus moras sustinuit, ubi desiderio flagellatur in incendium excrefcit, omnisque cunctationis frænum excutit, ac quævis torpens celeritas testudinea ipsi lentitudo videtur, contra quam celeriori armatur motu.

Nec solum moræ impatiens ; sed mira insuper elucet vis , & efficacia cupiditatis , quod totas exerat animæ vires , & corporis nervos intendat omnes ad expugnanda quævis impedimenta ; imo naturam ipsam , atque fortunam cogere allaborat , quo præsens sibi constituat , quod cupit. Hinc bruta ferocissima sunt , & robustissima sibi constituat , quod cupit. Quidquid de efficacia amoris generatim dicitur , cum amore feruntur. Quidquid de efficacia amoris generatim dicitur , in desiderium potissimum cadit : minus verò in gaudium , & amorem simplicem , imò præsens gaudium , vel delectatio enervat , & imbecillem facit. Opinor hoc ex eo accidere , quòd desiderium à centro ad circumferentiam constanter spiritus , ac sanguinem proliciat , ex fine scilicet ipsius desiderii , ut ad bonum absens accedat. In gaudio econtra refluxus frequens fit à circumferentia ad centrum ; inde languor , & anima quasi sopita , & extatica. Quòd si quandoque furens ferocia incitetur adversus interpellantem ; illud est ex desiderio deinceps fruendi , adeoque propter bonum absens. Præterea in desiderio vilis quædam impudentia elucet , qua indigentiam nostram ostendimus. Ad desideria recurrimus , quando deest potentia ; vota non facimus , nisi ubi effectus ex nostris viribus non dependet. Excurrimus per omnia loca , & desideriis publicamus paupertatem nostram , inquirimus apud alios ; quod nobis deest. Unde digne naturam hujus passionis descripsit , qui dixit : *qui optat , honorat* , quod idem significat , ac desiderium est honor rei desideratæ , ac dedecus desiderantis. Objecta enim , quæ accendunt nostra desideria , necessario debent habere quandam amabilitatem , quædam illicia , quæ ad se rapiant , & perfectiones , quæ fascinant : ex altera verò parte voluntas indiga magnâ premitur ægrimonîa , cui remedia inquirat. Desiderium igitur encomium est ipsius pulchritudinis , & macula ipsius impudici : augeat splendorem ipsis aureis , & argenteis cistis , & ignominiam afficit ipsos avaros. Laudat dignitatem , & opprobrium infligit ipsis ambiosis. Quando infidet cor alicujus Principis , statim ostendit , non esse illum adeò opulentum , fortunas illius non tam amplas , ut videbatur , cum ipsum cogat , proprio ex throno descendere , & aulâ exire ad procuranda cum pudore non modico subsidia , quæ domi suæ non reperiuntur. Est quidem certissimum , quod subinde Reges , & Principes desideriorum calcari incitentur ad gloriosissima , & summè ardua facinorosa , inspirabunt illa non rarò nobilissimum audaciæ ardorem , sine quo pleraque languent , & nihil magnanimum executioni datur : at simul docentur iidem sæpissimè posse eadem facta inutilia , & sine effectu remanere ; posse eadem impediri à levissimo obice ; & hinc obligari se ad vires aliunde implorandas. Solus Deus sibi ipsi est sufficiens , & hoc est

est potissimum ipsius encomium juxta Psal. 16. *Dixi Domine, DEUS meus es tu, quoniam bonorum meorum non eges*; solus ille in omnipotentia, immensitate, & sapientia sua possidet omnia; nec est obstrictus ad formanda desideria, nec ad quærendam requiem extra se in creaturarum possessione. Igitur desiderium declarat nostras misérias, semperque est signum nostræ paupertatis. Denique præterquam quod desiderium inquietum, ferox, & indigum sit, insuper expleri illius avaritia nunquam potest. Gustamus bona, quæ duntaxat cupiditatem acciunt, sicut prægustatio cibi esurienti tantum est irritamentum: bona ista fluctuantia, sicut aqua marina, sitim solum provocant. Qui plus habet, plus eget: premetur duplici egestate, & egebit pro se, & pro rebus utique egentibus, ipsæque res alias desiderant. Credo, si sensum vocibus exprimere possent, cum gemitu clamarent, & intentis multa postularent vocibus. Dives es; jam indiges famulis, qui administrant, qui servant opes, qui comitentur: jam indiges magnifica domo, & domus magnifica magnifico apparatu, atque suppellectili: parietes pudet, si nudi sint: alia alia desiderant, alia aliis indigent, atque aded magnæ egestatis non sola inopia causa est, sed etiam magna copia. Qui pauper est, nec indiget, superflua domo, nec inutilibus utensilibus, nec multis famulis. Ditiore est ipso divite, qui non tantum tot eget, quot habet; sed per tot eget pluribus, quam habet. Nunc quæro, quomodo exsatiabunt tot indigentissima fortunæ instrumenta, quæ & ipsa fame plena sunt? an non citius abstinentia harum rerum famis impetum frangeret? sed quid miramur omnia non explere humani cordis sinus? inæqualia illi sunt ad Deum capiendum fabrefacto.

§. V.

Elucidantur causæ desiderij.

Desiderii causam concinnè Plautus sub fabellæ involucri exposuit, quem ex Poro, & Penia sive ex indigentia, & copia simul exortum fingit. Indigentia quidem desiderantem premit, copia autem obijcitur consequenda, & adjicienda ad bonum innatum, quod boni deficientis desiderium ingenerat. Ego sine verborum involucris dico, causam desiderii esse agnitionem egestatis propriæ, bonique eam explere idonei propositionem. Dignitas nimirum humani cordis ad omnia se extendit objecta possibilia; credit, se habere jus supra omnia, quæ
etiam

etiam imaginationi occurrunt, & inter divitias suas numeranda bona : quæ etiam nondum possidet. Credit omnibus promissis fallacis fortunæ ; blanditur sibi de omnibus, quæ fuerunt, aut futura sunt ; persuadet sibi se posse justè exspectare, quæcunque felicissimis hujus mundi mortalibus obtigerunt. Ideo à magno Gregorio Apostoli, licet nihil dereliquerint, multum deseruisse dicuntur, imo tanta à sequentibus derelicta sunt, qui voluntatem habendi dereliquerunt, quanta à non sequentibus desiderari potuerunt. Infinitæ capacitatis est cor humanum, quòd solùm adimpleri potest à bono infinito : reliqua omnia inextinguibilem sitim augment. Finis unius desiderii est principium alterius, & ita currimus ab uno objecto in aliud, ut tandem attingamus illud, cujus reliqua omnia aliud non sunt, nisi sola umbra. Ex hac radice luxuriabant omnes inordinatæ Monarcharum appetitiones, ex hac processit ambitio Alexandri, cui parvus nimis visus est universus orbis, doluitque, cum conspiceret, victorias suas ab universi terminis finiri. Ex hoc fonte derivavit avaritia Crassi, qui pauperem se existimavit, etsi divitiis omnes Romanos superaret ; adiit horrida deserta, ut inimicis thesauros eriperet, quos ipsis invidebat. Omnes, omnes inordinationes ex nimia capacitate humani cordis enascuntur, quòd, cum ex natura sua anhelet ad bonum, nec inveniat, quod plenè satisfaciat, novum indagat, nec unquam certos sibi limites præscribit. Etsi intellectus noster non sit illuminatus ad exhaustiendas veritates supernas, etsi voluntas non sit prædita viribus sufficientibus ad amplectendum bonum infinitum, quantum illud in se est amabile : utraque tamen potentia non desinit esse illimitatæ capacitatis, quam adimplere nequit omnium rerum cumulus. Causæ huic plerumque adjungitur noxius error, dum falsum bonum pro vero obtruditur, nostri que appetitus inani imaginatione deluduntur. O quàm sæpè injustis elogiis commendantur, quæ mala sunt, ut bona, & optabilia. Expectationem boni, tanquam scintillam aliquam mortalium animis insevit Deus : inventionem abscondit.

Nigra illi radix, par flos albedine lactis.

hinc testificatione exteriori decepti avidè optamus, vehementius prosequimur, libenter amplectimur. Quid inde ? necessitas quædam inevitabilis miseriarum, sive obveniant hæc bona, sive aufugiant, utrolibet modo vexabit nos suâ scuticâ fortuna, & cupido. Namque si non obtineatur, quod putatur bonum, avidè que capitur, certa est ærumna, & mæror animi, deceptione omnium molestissima spei. Si consequamur, quod optavimus, certus quoque angor veniat necesse est ; appa-rens enim illa rerum bonitas, quam nostrum fabrefecit cerebrum, deli-
catif-

catissima, & tenuis est contractu dispergetur, comprehensione diffluet, interque digitos, quasi aqua pugno constricta elabetur. Omitto alias causas, ut sunt rei novitas, & admiratio, quæ desiderium parit sciendi: oblata præmia, objecta gloria, exhibitus honor, boni sperati propinquitas, lucri facile incrementum, pinguioris fortunæ promissio, memoria patriæ, prosapia recordatio, facilitas obtinendi dignitatem, oportunitas aucupandi benevolentiam Principis, significatio rei quæsita, & quæ sunt alia id generis pleræque. Hoc præterire non possum, quod subinde ipsa experientia voluptatis præsentis habeat vim accendendi desideria similium imposterum gaudiorum, ac quod proinde ipsum frui sit causa iterum desiderandi. Provenit hoc ex eo, tum, quod delectabilia habeant vim augendi cognitionem experimentalis notitia, tum, quod voluptates corporales jam elapsæ ostendant per eandem experientiam imbecillitatem ad quietandum, & explendum appetitum, nisi sæpius repetantur; atque augent cognitionem necessitatis quærendi alia rursus, & alia delectabilia.

§. VI.

De subjectis ad desiderandum accommodatis.

FRæquentissimè hæc passio regnat in hominibus, quia plura semper ab illis absunt bona congruentia, quàm adsint; plus igitur virium, & temporis ijs comparandis impendi oportet, quàm alijs fruendis. Hinc quilibet non immeritò *vir desideriorum* vocari meretur, cum cuique maxima pars vitæ desiderando elabatur. Præ reliquis autem ad desideria maximè feruntur juvenes. Refertur hoc in ætatis ferventis æstus, & quod sint difficultatum inexperti, facilèque bonum propositum apprehendant, ut obtentu non operosum. Quodsi sanguinis in eis abundantia, & bilis vigeat, vehementibus, & acutissimis flagrabunt desideriis, quæ tamen ob humoris mobilitatem facilè residunt, nec pertinaciter obdurantur. In frigidis item & siccis facilè ob meticulositatem, & caloris egestatem multiplicantur desideria, eò quod suam imbecillitatem habentes compertam, dissident suis viribus, & affectionem desperent; unde desiderij mutatio identidem consequetur. Quod autem humorum potentia variis qualitatibus imbuta ad excutiendas cupiditates sit aptissima, constare videtur in quibusdam personis ex præposteris eorum desideriis, quoad cibos ab hominis comestione alienos. Hoc non tan-

tum mulieribus circa tertium mensem uterum gestantibus evenit, ut ita improbè appetant; sed etiam in aliquibus esurientibus vi famis, quam bulimiam vocant, atque etiam morbo majoris intestini laborantibus multa intolerabilia accidunt. Si enim stomachus atra bile refertus erit, vitia sua ad os stomachi transmittet, atque ita carbones, aut lateres, & id genus fictilia appetet; si pituita acida, saporos acidos concupiscet; si bilis vitulina; pingua quæret; si alia miscella fiat, aviditas quoque gustandi alia oborietur. Cur igitur varia humorum temperies servire non possit etiam ad alia varia desideria excitanda? denique imaginosi, & in eo, quod semel animo receperunt, semper defixi, ægerrimè depellunt desideria, quibus semel fuerunt incensi. Hinc brutorum animalium concitata quidem sunt desideria, sed tamen quàm brevissima. Vaccarum una die alterave mugitus auditur; nec diutiùs durat equarum vagus ille amensque discursus. Cùm feræ aliquoties catulorum vestigia consectatæ sunt, & sylvas pervagatæ; cùm sæpiùs ad cubilia redierint, rabiem intra exiguum tempus extinguunt, nec ulli animali longum sui sætus desiderium est. Solum homo, qui tenaciori phantasia pollet, obfirmatè magis desideria concepta fovere solet.

§. VII.

Quinam conjungantur affectus interni cum desiderio.

EX causis & proprietatibus facile erit deducere, quinam nascantur effectus ex desiderio. Cruciatus, & tormentum est potissimus, qui animum pacatum esse non sinit, ne quidem cùm aliquo bono fruitur. Oculi rem aliquam remotam cernere cupientes, plùs fati, & supra vires intenduntur, & dum frustrantur, nec eam valent exactè cognoscere, insuper conatu suo nimio hebetantur. Sic fremitus obscurus auribus à longinquo allapsus eas excitat cupidas rem cognoscendi propiùs, & sonitum percipiendi clariùs. Quo tamen est obscurior; & quò minùs augetur, eò magis accenditur desiderium nihil proficiscens. Ad hunc modum nisi bonus medicus cohibeat diffundentem se concupiscentiam, circumquaque corpus occupabit, nec ullam partem dolore intactam relinquet. Huius doloris acerbi, quod teste Scriptura prov. cap. 12. accidit, multi homines impatientes elegerunt crudelissima supplicia, tanquam dulcia remedia, ut liberarentur tam indomito morbo. Inter supplicia ad puniendos reos inventa vix est severius aliquid exiliò, quod nos separat

parat ab omnibus, quæ diligimus, & solum longiorem vitæ usum concedit, ut diuturniore morte affligamur. Et tamen juxta Senecam ad Helviam cap. 8. inventa est mulier, quæ pati maluit exilium, quàm desiderium. Hinc benignissima mater natura, cùm prævideret, intolerabiles futuras desiderii plagas, suppeditavit etiam spem, ut amaritiem deliniret, curavitque, ut nunquam in via hac expromantur appetitiones, quas animus noster sibi non prius persuadeat adimplendas. Apud inferos solum hi duo affectus à se invicem separabuntur in anima, ubi justitia Divina condemnabit impios ad acutissima desideria sine ulla spei dulcedine, ad expetendam beatitudinem, ad quam tamen in æternum non pertingent. Suspirabunt in illa omnium malorum abyssu ad fontem omnis boni, & non obstante qualicunque odio concepto erga Deum, à quo acerrimè castigantur, non desinunt tamen naturali inclinatione in illum ferri, & ejus fruitionem exoptare, quamvis omnis obtinendi illius spes ipsis sit præcisa. Hoc desiderium erit illorum immanis carnifex, tormentum ipsis inferni flammis, ipsa dæmonum societate, & infelici æternitate gravius: hoc, si abstinere possent, reliquæ omnes pœnæ, quibus animæ abjectiores terreri solent, minùs rigida evaderent; modò non essent coactæ ad anxie appetendam felicitatem, quam sperare non possunt. Amaritudinem multùm auget dilatio interposita inter bonum, quod desideratur: æquiore quidam animo ferent præcidi spem suam, quàm in longum ad eò trahi. Secundò vexatio hæc acuet industriam desiderantis. Hinc fit, ut quorum desiderium concitandum proponitur, iisdem aliquamdiu negetur usus rei concupitæ; quorum enim habemus usum, eorum cupiditate haud facillè tangimur, animo segni securitatem permittente: sin ab ijs prohibeamur, quæ pridem tenebamus, contra accidit; & tantò impatientius feretur obstaculum, quantò amantior est quilibet suæ libertatis. Sanè vix est alia causa, cur ad prohibita adeò exardescat animus, & ut illustrat Poëta:

Nitimur in vetitum semper, cupimusque negata.

Sic interdictis invidet ager aquis.

& illud ejusdem:

Quidquid servatur, cupimus magis, ipsaque furem

Cura vocat; pauci, quod sinit alter, amant.

Tertiò denique unum desiderium ex alio pullulat, nec solum quiescere non sinit hominem, donec re optata potiatur, sed sætu novæ proli usquequaque amplificatur, quia caducum est, & leve omne, quod desideramus, nisi ad æterna, & increata figatur anchora. Sunt quædam apud Indos volucres, quarum clamor advocationem simulat, &

hunc sonum reddit: *Heus, hieft*. Clamorem audientes rati se vocari, appropinquant, qua vox descendit: aves accedentem intuitæ, remotius fugiunt, & confident, ubi iterum restaurant eandem cansionem: pergit illuc, qui caperat quærere vocantem; rursus viciniore illo, avolant volucres recinentes simile: iterum sequitur ille, donec per diversa tractûs loca viam amittat, & in inquisitione hac fame cum multis pereat. Non aliud sunt rerum creaturarum ludicra advocantium ad se simplicem voluntatem. Boni quemdam clamorem edunt: quidquid placidum, quidquid pulchrum est, non solum vocale est, sed suaviorum. Singulæ vociferantes dicunt: heus, hîc est bonum. Occurrit cupiditas id verum rata; fallitur: statim transvolat aliò hæc boni species. Sequitur avaritia: rursus aufugit, quod placebat. Iterum insectatur illa; recedit istud. Sic semper proficiscitur cupiditas, nunquam venit: sic erramus, sic aberramus, sic devii imus, sic nos gerimus, sic fallimur istis volucris bonis, sic perpetuò desiderio angimur, donec assidua fame conficiamur.

§. VIII.

Quinam motus in corpore fieri soleant ad passionem desiderij.

Motus, qui in corpus inducuntur in hac passione ex animæ mandato, præcipuè observantur esse prominentia & fixus oculorum intuitus; tremor labiorum ab aqua, qua os suffunditur, procreatus; variæ vocum inflexiones, discursus, atque silentium, totiûsque corporis irrequieta agitatio. Oculi in desiderantibus assueverunt esse procaces ac devorantes, seu quod in idem recidit, avidi: unde adagium illud: *oculis aliquem devorat*, quo indicamus, quòd cum inflammatione quadam animi alterum aspicimus. Cum enim desiderii natura sit, ut rectè pergat ad executionem operationum exteriorum, quæ sufficere possint ad inducendam præsentiam rei concupitæ; non est mirum, quòd spiritus in majori copia foràs ad oculos profluant, eosque simul vivacitate, & splendore aliquo repleant. Quia autem fieri potest, ut cum affectu concupiscentiæ alij affectus interiores conjungantur, eò quòd appareat concupiscenti alias passiones interiores; cum effectibus eorum proprijs, esse opportunas ad consecutionem rei delectabilis, pro varietate harum diversarum
etiam

etiam vocum inclinationes nasci solent. Præsertim autem intuemur desiderijs plenos semper inquietos, continuò locum, & situm commutare, oculos nunc huc, nunc illuc jacere, se modò in hoc, modò in aliud latus convertere, nunc sedere, nunc stare, incedere modò, modo subito ab incepto itinere desistere, quæ omnia variarum resolutionum, quas anima perpetuò mutat, effectus esse solent. Cùm autem anima conatum adhibeat, ut optato bono perfruatur, similes motus etiam membris imprimuntur. Hinc caput profertur, brachia extenduntur, inceditur, aut potiùs volatur magnis, & concitatis passibus ad desideratum objectum. Vultus interea ex nimio sanguinis appulsu, qui in hac passione ad externas partes diffunditur, rubescit, ipsiusque boni tam concupiti absentia, dum attento animo pervolvitur, lachrymas ex oculis elicit. Calidiores tamen sunt hæ lachrymæ, quia ex æstu amoris nascuntur, & ex calore desiderii prodeunt. Hac de causâ D. Magdalena, quæ Magistrum in domo Simonis ardentius amavit præsentem, geminatis suspiriis, & multis lachrymâs quærebat absentem; quo tamen fletu nolebat desiderium extinguere, sed potiùs ejus ardorem magis accendere. Sic etiam Ægyptiacus Prorex Josephus, cùm intellexisset, Iacobum Patrem senem adhuc vivere in Chananitide, uberiori exarsit desiderio eum videndi, facièmque uberrimis irrigavit lachrymis, ut dulci fletu dilata interim desideria satiaret. Cùm autem ob emissam nimiam quantitatem spirituum ad partes exteriores, tum cor, tum arteriæ distendantur, hinc istarum motus magnus ut plurimùm comperitur, frequens etiam ex nimio impetu, & festinatione, cum qua spiritus protrudi solent. Denique uberiozem etiam aquam ad os transmittit, & ubi desiderata objecta conspicit, pergratò quodam humore perfundit linguam; vel quia de rebus istis sermonem instituere lubet, vel quia imaginatio objecta præsentia reddens, illam ipsam affectionem organo imprimit, quam efficerent, si re ipsa ore tenerentur. Unde abundantia æquæ in ore, etiam effectus appetitui alimentorum propius, scaturit.



DISSERTATIO IV.

De fuga, seu abominatione.

§. I.

Attingitur natura fuga, ejusque comparatio cum aliis affectibus.

Fuga è diametro opposita est desiderio, ut amor odium, lætitiæ tristitia, diciturque esse incitatio animi ad discedendum à malo, seseque adversus illud muniendum. Ut tamen hujus natura magis pateat, breviter ordinem attingemus affectuum, quibus appetitus à malo per facultatem cognoscentem propositò abhorret. Sicut igitur, cum agitur de bono aliquo per appetentem facultatem amplectendo, præmissa ejus notitiâ, exsurgit primum amor simplex, qui est boni illius secundum se præcisè spectati velut suaviatio, & prægustatio; tum desiderium, quo bonum illud non jam simpliciter, & secundum se tantum, sed etiam ut assequendum, & involutum distinctè absentiam appetitur; tandemque sequitur gaudium de eo adepto, & complacentia: ita proportionem servata, facultas appetitiva circa malum propositum elicit primò odium simplex, quo simpliciter averfatur malum illud; dein si malum illud absens sit, apprehenditur fuga, quæ pro absentiae multiplicitate varia, & multiplex esse potest. Si enim malum in futurum impendeat, fiatque ardua ejus declinatio, tunc fuga coincidit cum timore. Si autem malum futurum non appareat esse declinatu arduum, actus ejus averfativus, qui elicitur, servabit communem fugæ appellationem. Utrumque hunc actum contingit roborari per adjunctam appetitionem assumendi media ad declinandum malum impendens, quæ appetitio vocari potest propositum, si autem malum absens jam abierit, fuga ejus donatur nomine detestationis propriæ & strictè acceptæ, quæ supponit malum præteritum non amplius perseverare: præcessisse tamen antea; idque ipsum facultati appetenti amaritudinem causat. Si modum illius tendendi desideres, aio, sic concipi posse: *nollem, fuisset*. Si denique malum præsens incumbat, inducitur tristitia, quæ est meta totius progressus averfativi circa malum. Differt igitur fuga ab odio simplici, quòd illud sit averfio à malo, præscindendo, utrum hoc sit præsens, an non: à dolore item, quia hic est



M. I. Meißdorffer del. Oenip.

Nescio, an in Sylvas, an eam mergendus in unius.

M. Röck sc.



est de præfenti, & mali fuga posterior. Evidens etiam est distinctio realis, & entitativa doloris & fugæ, quod in beatis subsistat summa fuga, ac peccatorum detestatio, nec tamen locum habeat tristis dolor, à quo felicissimus ille status est omninò immunis.

§. II.

Quomodo fuga possit esse in appetitu, cùm bruta futura non attingant?

Circa fugæ naturam non sunt dissimulandæ duæ difficultates, quarum prima spectat malum futurum, quod non videtur posse per phantasiam appetitui sensitivo prælucentem repræsentari, cùm sensus non feratur in futurum: igitur neque facultas appetitiva poterit malum futurum averfari, ut argumentantur Seneca, Medina, & alii, quibus etiam Aristoteles 3. de anima textu 53. favere videtur. Judico tamen obicem hunc tantum non esse, ut ob eundem statim sit fugiendum, & dico, bruta præconcipere, & interno sensu attingere tam malum, quàm bonum futurum. Malum enim, quod plerumque bruta efficaciter refugere fatagunt, quando ad sonum terrificum prius aures erigunt, & aliquamdiu suspensa hærent in expectatione mali non est adhuc positum, sed superest ponendum, Idque ipsum bruta non latet: at hoc est esse malum futurum, & percipi ut futurum: cur igitur negemus futurum non posse à bestiis attingi? similiter admittit S. Thomas 1. 2. quæst. 40. art. 3. brutum ferri in rem sub ratione possibilis. Nam quando canis leporem nemiùm distantem conspicit, non movetur, quia nempe cognoscit, se esse ejus affecutioni imparem, atque adeò eam sibi non esse possibilem: apprehendet autem eam ut possibilem, si lepus propinquior fiat. Hæc autem possibilitas adipiscendi, tametsi ruditer, & confusè percepta denotat ordinem ad tempus futurum, & ad opus in eo futurum; cùm possibile dicatur per actionem alicujus, quod potest per eum futuro tempore effici. Igitur futuri perceptio non est brutis deroganda.

At quàm vera est præfensio mali futuri, tam arduus accidit modus eam explicandi. Angelicus recurrit ad Deum, qui prævidet omnia futura, vultque ab illo infundi brutis instinctum, perinde, ac si noscerent futura, quod non videtur ex integro satisfacere. Vel enim intelligit Divus Doctor à Deo bestiis immitti veram cognitionem apprehensivam

rei primum imminētis, & sic dari cognitiones per se infusas? & hoc est recurrere ad miracula sine ulla causa. Vel negat Aquinas tales cognitiones? & tunc cū brutum ferē non habeat nec à se, nec infusam à Deo cognitionem probabilem rei futuræ, movebitur in eam cæco, & mortuo modo, ut movetur lapis in centrum, quod non cognoscit, nec poterit ulla ratione explicari passio fugæ. Alii igitur rejecto hoc instinctu, asserunt in brutis tantum excitari recordationem mali aliàs inflcti. Sed insto. Vel brutum præcisè attingit cognitione sua malum præteritum? an ex ejus perceptione fertur ad percipiendum aliquod malum imminens? si primum defenditur: sequitur tantum refricari memoriam mali antecedentis, proindeque non aliter affici, quàm cū aliquando casu incidit in cognitionem mali præteriti, ejusque recordatur. Sed hoc videtur plausibiliter effereijciendum; ea quippe recordatio non afficit brutum eodem modo, quo cū præfagit malum imminens, ideoque fugam capeffit, aut aliter, qua ratione potest, conatum suum prodit ad mali impendentis declinationem. Si verò dicatur secundum, concedaturque brutum ferri in malum imminens, restabit ipse modus explicandi. Adhuc durius vexabitur, qui hæc assumit, quando brutum prima vice fugit ob incommodum re ipsa nondum positum. Quando enim columba prima vice umbram conspicit volitantis per aëra accipitris, seseque in fugam conijcit, ob ungues nunquam adhuc infixas, in hoc casu occluditur omnino recursus ad recordationem similis mali prius illati, cujus recordatione brutum ad fugam commoveri posset.

Hinc sunt alij, qui quamvis supponant, sensus exteriores non posse ferri in rem nondum positam, à qua ad agendum determinari possint: tamen affirmant id de sensu interno, qui præter notionem ab extrinseco adhibitam, adjungit rationem aliquam exterius insensatam, ad quam percipiendam volunt sensum internum ex natura sua esse determinatum, cū primum objecti applicatio sensus externos ferit. Hac ratione ovis, efficta in sensu interno lupi ratione, quo modo exterius à sensu repræsentatur, excitatur insuper ad efformandam notionem inimicitiarum, nec lupum eò tantum modò imaginatur, quo exterius est sensibilis, sub qua ratione lupus lupum, quem conspiciatur, apprehendit. Similiter sensus internus attingendo aliquod præsens fertur simul in rationem alicujus futuri, cum præsentis illo connexam, eamque percipit mediante notione per illud præsens illata. Quidquid sit de hoc explicandi modo, quem ego nec approbo, nec improbo; dici potest, quòd bruta cognoscant causas per se sensibiles, in quibus præcontinentur effectus nondum existentes, & in his etiam præsentiant id, quod erit. Futuratio enim non
disting.

distinguitur ab existentia causarum per se sensibilem, quas vel visu, vel alio quovis sensu percipiunt. Adde, quòd sermo non sit de re strictè futura, sed de objecti absentia respectu operantis; hanc autem absentiam nobilissimè cognoscunt bruta, cum hæc in alio non consistat, quam quòd objectum ab uno distet: certum est autem Arriagæ in libris de anima, quòd bruta videant inter se distantias, & ubicationes rerum, quocunque id tandem sensu fiat. Per hoc tamen non admitto prænotionem futuri in somniantibus, & furore correptis; multò minùs credendum est competere bruto cognitionem futuri in actu signato, & cum ea temporis subsequenti ad præcedens comparatione, quæ rationis usum expostulat; hoc enim vires illius superaret. Sufficit, ut brutum in actu exercito cognoscat futurum in sua causa, vel rei à se distantiam.

§. III.

De modo detestationis.

ALtera difficultas est, de detestatione mali præteriti, si robusta, & efficax sit, nec tantum ad modum simplicis displicentiæ; videtur enim impossibilis, & in superiore, & in inferiore appetitu, cum nulla facultas feratur efficaciter in aliquid impossibile, quippe prorsus destitutum ratione motiva facultatis appetentis. Atqui objectum actûs prædicti ponitur non existentia rei præteritæ, quam non existentiam liquet esse impossibilem, supposita existentia oppositæ præteritione. Igitur in appetente facultate vigere non potest actus efficax tendens in destructionem rei, quæ præteriit, intendendo efficaciter, ut non fuerit. Statuendum nihilominus est actum fugæ mali præteriti non conditionatum duntaxat, sed etiam absolutum, efficacem, & robustum esse admittendum. Non hæreo in probando, quòd aliquis actus positivus facultatis appetentis ultra simplex odium, quod nulla ratione spectat destructionem mali, exerceatur actualiter circa huiusmodi impossibile præteritum, qui exprimitur illis verbis: *nollem, fuisset*. Id enim persuasissimum est Theologis, qui docent partem primam Sacramenti poenitentiaæ esse actum aliquem immediatè avergantem delicta perpetrata; quæ non esse repugnat, cum ad præteritum non detur potentia. Hunc insuper actum volunt non esse displicentiam simplicem, sed debere esse detestationem, quæ, si fieri posset, prohiberet sceleris admissi existentiam, causarétque dolorem facti præteriti. Porro impossibilitas objecti non obstat formationi actus præ-


dicti, quia voluntas non nititur in objectum, nisi sub conditione possibilitatis. Supposita igitur veritate detestationis, sive fugæ declarandum restat, quomodo ea aversio possit esse actus absolutus, & efficax. Afferro igitur, etsi talis actus dici possit conditionatus ex parte objecti; attamen ex parte potentiae cum elicientis non est conditionatus, sed absolutus. Sensus enim locutionis illius; *nollem, si possibile esset*, non debet statui iste: *si hoc esset possibile, elicerem actum nolitionis, quem nunc non elicio, sed duntaxat per intellectum declaro, quam voluntatis actionem eliciturus essem, si ea conditio, quam deesse video, interveniret*. Ubi utique nullus eliceretur voluntatis actus, odio simplici ulterior; quia ut ajunt Philosophi conditionalis nihil ponit in esse, quamdiu conditio non ponitur. Quare conditio, quæ intervenit, tenet se ex parte solius objecti, in quod voluntas non tendit, nisi prout convenit aliqua conditione, v. g. possibilitatis. Hac ratione non implicat actum re ipsa elicitum, & eatenus absolutum terminari ad conditionem aliquam, per quam non suspendatur. Sic enim quando hic, & nunc elicio volitionem dandi aliquid Petro, si talem ille conditionem impleverit, actus est re ipsa præsens, & elicitus, ita ut sine novo meo actu donatio efficiatur valida, cum primum Petrus conditionem fuerit exsecutus. Cur ergo idem fieri non possit in actu aversativo fugæ, de quo quæritur? Quod verò actus iste sit inefficax ex parte effectus, quem actu non ponit, quique poni nequit, clarius est, quam ut de eo multis contendere possit; quantumcunque enim homo conetur, fieri non potest, quin actus culpæ præelicitus antecesserit. Est tamen hic ipse actus aliquatenus efficax, non modo quia de facto excludit à voluntate quemcunque actum similem præterito, quem per istum aversatur; sed etiam quia vi hujus actus voluntas ita afficitur, ut si effectus esset possibilis, illico esset ponendus non expectato ullo alio voluntatis actu: quod demonstrat non stare per actum & ejus efficacitatem, quo minùs effectus ponatur, sed præcisè stare per impossibilitatem effectus.

§. IV.

Reliqua succinctè ingeruntur.

Causæ excitantes passionem fugæ sunt mala omnia, quæ damnum, incommodum, aut molestias afferre possunt. Tria autem sunt malorum genera, à quibus per fugam appetitus se avertit. Quædam mala animal

animal interimant; cujus modi sunt flumina, præcipitia, naufragia, incendia, eluviones, hostium incursiones, ferarum impetus. Alia quæ ingenti sunt nobis molestiæ, ut parentum amissiones, conjugum, liberorum, fratrum, amicorum, fortunarum, honorum, dignitatum; ignominia, carceres, exilium, infamia; amissiones itidem bonorum spiritualium. Alia denique tanquam signa rerum ejusmodi indicant periculum, qualia sunt portenta, prodigia, & alia id genus, quæ præter communem rerum naturalium cursum obtingunt, ac gravissimos solent mortalibus terrores incutere. Præsertim excutitur hæc passio dolore, aut pudore. Proinde ex naturæ institutione passio fugæ ordinatur ad hominem avertendum à malo tum culpæ, tum pœnæ. Quamquam nisi cætera incitamenta succurrant, non satis præsidij subministratur ab hujusmodi pathemate adversus scelera, quorum nonnulla quandoque pudor, sive erubescencia non comitatur. Contra verò malum pœnæ dolorem, aut externum, aut intimum secum perpetuò affert. Hinc ex perverso genio abutitur homo hac passione, ut fugiat malum pœnæ præ malo culpæ, & abominetur visa mala præ veris. Effectus, qui in corpore producitur, solet esse affluxus spirituum in eas partes, quæ idoneæ sunt, ut animal à malo divertat, aut illi aditum obstruat, & à conjunctione arceat. Hinc subinde sanguis ad centrum refluit, ut exinde frigescant, & concidant externæ corporis partes, & clausis ea ratione poris sensus mali obtundatur, aut excludatur, custodito interim corde, & partibus nobilioribus ab illius accessu prohibitis. Quandoque cum expedita patet via ad recedendum remotius ad circumferentiam spiritus delabuntur; ad pedes videlicet, & cæteros actus. Reliqua conveniunt abominationi contraria, proportionaliter ad eum modum, quo diximus desiderio competere; quæ quia similia sunt, non expedit distinctius suggerere. Tædiosum enim est, nec utile, quando quivis faciliè accommodare potest, similibus jam expositis.



DISSERTATIO V.

De delectationis passione.

§. I.

In quo constituatur delectatio?

Licet omnes animi passiones delectationi palmam concedere cogantur; licet inter illa sit quasi sol, cujus radiis omnium reliquarum splendor obscuratur. Ejus tamen natura tenebris plurimis videtur esse involuta. Prout illa abstrahit à passione, & rationalis appetitus affectu, vocatur 7. Ethic. cap. 13. natura divinum quiddam. cap. 11. omnium rerum finis architectonicus, & mensura bonitatis omnium rerum. Si spectetur ut operatio sensibilis, & corporea, definitur illa ab Aristotele lib. 1. Rhet. cap. 11., *quod sit transitus sensibilis ad statum corporis convenientem naturam, in quo quiescat.* Quam definitionem, si volueris, sic explicare poteris. Delectatio est affectio appetitus, quo anima in adeptione boni quiescit. Aio esse affectionem appetitus: non enim qualiscunque suavis, & jucundus sensus, quem secum asferre solet operatio vitalis, cum perfecte versatur circa objectum conveniens, delectatio vocari potest; alias in facultatem quoque cognoscitivam, quando perfectas rerum notitias producit, delectatio cadere posset. At quis dicat, demonem, qui clarissimam rerum naturalium notitiam est præditus, perfundi voluptate? insuper si in facultate cognoscitiva admitteretur delectatio plusquam causaliter, frustra alia formalis delectatio in appetitu assignaretur; cum omni delectationi appetitus præluceat notitia perfecta circa objectum conveniens, cujus delectatio abunde sufficeret ad munus, cui natura delectationem destinavit. Solet etiam ab imperitis delectatio existimari esse illa perceptio objecti convenientis, quæ fit in sensu externo, v. g. delectationem gustus appellant perceptionem esculentorum; sed immerito confunditur id, quod causat delectationem, cum eo, quod est formaliter delectatio; nam objectiva, & causalis delectatio cognitio quædam est, at ipsa delectatio, cum versetur circa bonum, in appetitu est constituenda. Dicitur præterea, quod anima per delectationem in adeptione boni quiescat; cum enim omnis motus tanquam medium ordinetur ad quietem tanquam consecutionem finis, & eo obtento quiescat; etiam desiderium, quod est



Exhaustis subeunt gaudia plena malis .

F. B. Lutz Sculps. a. v.



est motus tendens ad præsentiam rei delectabilis , oportet , ut cùm hoc fuerit præsens , succedat motui quies. Igitur , si delectatio promittat nobis bona , facit insuper , ut cum voluptate ijs perfruamur ; si ostendit flores , affert insuper secum fructus ; non solatur verbis tantum , sed effectu ipso beatos nos reddit. Sicut amor est principium , ita delectatio est finis omnium passionum. Terminum figit volatili desideriorum impetui , cogit gustare quietem , quamvis hæc desideriorum naturæ repugnare videatur : delinit nativam iræ feritatem , quam ubique secum affert ; compensat obsequia præstita audaciæ , estque ipsamet delectatio præmium omnis ardui laboris , qui pro eadem obtinenda suscipitur. Timorem abigit , omnesque vanos timores , quæ animam perturbant ; interimit desperationem , quæ ad illius ruinam dicebatur conjurasse ; destruit suâ præsentia tristitiam , & absomit lachrymas , ac suspiria , tanquam spolia , quæ ex inimica passione retulit , amor ipse oblectatur , quando conspicit , se post tot viarum ambages tandem ad optatam metam , pervenisse. Econtra desiderium , dum indigentiam suam nobis ostendit , simul pudore nos suffundit. Spes non titillat sine stimulo timoris , & hæc duo se ita individue comitantur , ut timor vix non degeneret in tristitiam , si à spe deseratur ; & hic in desperationem migret , si à suspitione derelinquatur. Audacia commiscet nos pulveri , sudoribus , laboribusque , si gloria obtinenda blanditur , altera ex parte periculum terret , minitaturque. Odium semper nos ipsos torquet , & malum quod inimicis precamur , nostra rodit viscera. In fuga deficiunt vires , & abominamur objectum , quod offendit , quia ab eo defendere vix nos possumus. In desperatione depositis armis victori cedimus , & devicti in triumpho ducimur. Tristitia miserrimos nos reddit , & memoria peractæ felicitatis ad aliud non servit , quàm ut præsentis dolores magis augeantur. In delectatione omnes absolvuntur labores ; omnia complentur desideria , profunda tranquillitate fruimur bono tam diu quæsito , & felicissime in termino constituimur. Quæ dicta sunt de delectatione corporea , proportionem servata , de spiritali etiam sunt intelligenda ; quod enim est appetitui sapor per gustum , & phantasiam , id voluntati est bonum per intellectum exhibitum , cùm rebus intelligibilibus etiam suus non desit sapor. Tunc autem voluntas congruè propositum amabit objectum , deque apprehensa veritate exultabit. Quando autem delectatio pervadit à corpore ad voluntatem , tunc intellectus representat eidem bonum sensibile ob naturalem potentiarum externarum subjectionem , quod non fit , ubi objectum est merè externum , nec ullum percellit sensum ; sed solo intellectu tenetur delectabilitas.

§. II.

Enodantur aliquæ difficultates circa naturam delectationis.

Non sunt hæc oblivioni danda, quæ contra hanc explicationem videntur niti. Primò igitur aiunt delectationem, sicut omnem passionem, esse motum, esse perturbationem; motus autem opponitur quieti; cum quies sit terminus, & cessatio motus. Multò magis opponitur perturbatio, cum per illam tanquam per rem naturæ contrariam animal malè habeat; per quietem verò naturæ conformem animal gestiat. Sed hæc omnia distinctione facilè declinantur; alius nimirum est motus intentionis, & alius exsecutionis. Delectatio est meta motus spectati quoad ordinem exsecutionis, cum omnis exsecutio cesset, quando bonum intentum redditur præsens, & possessum. Secundum ordinem verò intentionis delectatio non est cessatio, sed motus omnium maximus; cum delectabile præsens omnium maximè inclinet appetitum ad inhærendum sibi per actum. Non est igitur quies ista otiosa, sed vitalis, ac proinde operosa, quæ objectum ita intrò amplectitur, ut illud quasi suscipiat, & ita sibi conjugat, ut moraliter unum, & idem evadat. Quod perturbationem spectat, ea adjacet delectationi per accidens ratione organi corporalis, & præterea semper præeminet ratio quietis imponentis finem exsecutioni, labori, ac defatigationi ex quo facilè celebris illa inter Platonem, & Aristotilem his evolutis vocibus definitur; num scilicet sita sit voluptas *in fieri*, vel *in facto esse*? quod Aristoteli est operatio, idem Platoni est generatio, & in fieri: quòd verò designat in facto esse, est ipsa quies. Itaque controversia componitur, si dicatur in quiete operosa, & in operatione pacata, & quasi circulari delectationem reponi. Alterum, quod assertur, est, voluptates corporales, quibus vel maximè convenire deberet ratio passionis, non invehere quietem, sed magis irrequietam progignere sitim, & aviditatem. Unde orta est vulgaris comparatio voluptatum corporalium cum hydropè, de qua dicitur:

Quo plùs sunt pota, plùs sitiuntur aqua.

Poëtæ adjungo convenientissimum ex Augustino locum, qui habetur tractatu 15. in Joan. cum pervenerit, inquit, quisque ad voluptatem sæculi hujus, cibus est, potus est, spectaculum est &c. nunquid non iterum sitiet? accedit voluptates corporales plurimùm nocere, & initium

tium esse plurimorum dolorum. Blandissimæ dominæ sunt, quæ facillimè sibi obtemperantes faciunt. Unde salutare monitum Horatii :

Sperne voluptates, nocet emptæ dolore voluptas.

¶ corporalem voluptatem admittis, jam fidem dolori promittis, quem non excludes, quia uterque eadem januam introducit. Quemadmodum nox sequitur diem, ita angor aliquis succedit nimie lætitiæ, nisi quoddam impares sint : noctes invenies breviores luce : dolor, qui cum voluptate divisam habet vitam, velut Castor, & Pollux lumen, plerumque prolixior est lætitiâ. Nolo quidem delectationibus favere; si physice tamen discurrendum, suum cuique jus est tribuendum. Quapropter assero, sitim, & anxietatem non consequi ad cognitionem boni præsentis, & ad præsentem voluptatem secundum se, sed ratione adjunctæ simul cognitionis delectabilium absentium, & necessitatis eorum. Cognoscitur enim, delectabilia sensuum ex sua natura esse fugacia, nec singula plenè satiare, sed indigere assidua successione, & substitutione aliorum post alia : & quia hæc cognitio quoad utrunque evadit major ab experientia uniuscujusque oblectationis corporalis, insufficientis ex se ad felicitatem, ideo procreant ejusmodi elationes hilares sitim, & irrequietam sollicitudinem. Nociva gaudiorum malignitas, quæ improbis, nescio, quibus nos prodit, non oritur ex conceptu voluptatis sed ex nimia abundantia eas in vitium vertente.

§. III.

Suggeruntur proprietates nostrarum delectationum.

IN popularibus, & futilibus delectationibus, quæ sensu funguntur, primario considerandum, easdem esse turbidas, & sæculentas. Præterquam enim, quoddam, ut obtineantur, semper requirant pro sui pretio multo majora desideria, quàm valeant, commixtæ semper sunt perpetuo dolore. Exhibe mihi voluptatem ab omni malo defæcatam, & aliqua laude dignam : quam nulla excipiat poenitentia : hac ego lege non ægrè feram, si deserta virtute ad gaudiorum castra deficias. At ubi ostendes, quæ non sit vitiata mœrore, in loco, ubi nihil sanum, nihil solidum natura hominibus concessit ? rosæ istæ spinis sunt conjunctæ : externam gratiam molestiam obtegunt, & tantum non aperta nos voce contestantur, & dicunt : quæ jucunda sunt vobis, ô homines, tristibus permiscantur.

Ex

Ex omnibus vix ullum sincerum reperies gaudium ; sed hilaritati conglutinetur mœstitia : conjugio viduitas ; puerorum educationi cura , & sollicitudo ; sæcunditati abortus ; vitæ splendori ignominia ; prosperis successibus dispendia , deliciis satietas , sanitati infirmitas. Præsertim autem aculeum infixum relinquunt in suo discessu , per quem vel omnis antea dulcedinis sensus extinguitur , vel profundius doloris vulnus infligitur. Hinc sapientes te monent , ut , si animo occurrat fallaci specie inescans voluptas , tibi modereris , nec primo statim impetu movearis. Rem examina , & tibi ipsi deliberandi spatium præbe. Deinde utriusque temporis memento , tum ejus , quo voluptate perfrue- ris , tum ejus , quo percepta jam voluptate dolebis , tēque ipse objurga- bis. Hæc non semel , sed bis , aut sæpius confer. Si pœnitentia omnis abforet , semper tamen ista vicissitudo interveniet , ut recens objecti conjunctio vehementer delectet , mox verò moderatè : tandem dolorem inducat. Cur hoc ? nimirum prima voluptatis affectio ex novitate maxi- mè advertitur : in progressu verò minùs : donec sensum doloris faciat scilicet distractis , aut debilitatis organi fibris.

Altera proprietas , qua puritas delectationis vitiatur , est perniciosi- ma illius fugacitas. Umbra , somnium , fumus , & quidvis eorum , quæ quàm celerimè avolant , naturam delectationis vix referunt. Secun- dum se , & ex genere suo non est in tempore ; sed in ipso ortu jam in oc- casum præcipitatur. Illa enim dicuntur esse in tempore , in quibus datur successio partis ad partē. Hoc autem repugnat oblectationi , quæ non con- sistit in fieri , non in motu acquisitivo , sed in termino ipsius executionis. Quod si subinde delectatio sensibilis longiori tempore perseveret , id vel ex objecto , vel ex subiecto transmutabili contingit. Sic quia omne sub- jectum , voluptatis sensibilis capax , eandem non percipit sine transmuta- tione successivè in humoribus existente , hinc in momento non faceffit : & quia ipsum etiam objectum admittit successionem , cum pleraque de- lectabilia sensus fugacissima sint , ideo iterum accidere potest , ut in ipso transitu non pereat hæc passio , sed tempori commensuretur. Caterum si objectum suave esset depuratum ab omni transmutatione , & ipse affe- ctus perageretur sine instrumento corporei organi , quod solum contin- get in cœlesti beatorum sede , delectatio non adæquabitur temporis tran- situ. Aliquoties memoria non cessat nobis repræsentare prosperitates elapsas , ut sic præsentem miseriam veterum gaudiorum amana recordatio- ne soletur , & nos recreet dulcedine ex præteritorum annorum ruderi- bus effossa. Sed præterquam , quod fidelius conservet tristiores casus , & sæpius occupetur circa illa , quæ nos offendunt , quàm quæ demulcent ;

rarò

rarò, etiam omnibus viribus adhibitis poterit decipere animam, ut præteriti recordatione exsiteretur impressio talis, in qua plus sit gaudii, quam mæroris : & sicut bonum primum futurum solum generat desiderium ; ita bonum præteritum plerumque non nisi tristitiam affundet. Quod si verè memoria præteritorum malorum exhilaret, id accidit ex eo, quia conjungitur cum cognitione industriæ. aut fortitudinis laudabilis, quæ adhuc insunt, vel numinis specialiter propitii, quod immutabile creditur, Ipsa verò mala præterita delectant indirectè, quatenus testimonium perhibent bono alicui præsentì, ejusque ut præsentis cognitionem vel augent, vel confirmant.

Ne autem accuser tanquam hostis omnis prorsus delectationis, & quasi vellem privare hominem omnibus mediis, quibus eum natura instruxit, ut suas misérias mitigaret ; aio, sinceræ, & liquidas dulcedines esse animi gaudia ; nec hominem exsatiare posse, nisi nobilior illius pars, qua componitur, felicitate fruatur. Clara perceptio, & studium disciplinarum, & continuum exercitium virtutum moralium, ista duo sunt, in quibus ultimò captanda est vera, defæcata, & limpida suavitas. Opus est, ut homo sequatur in suis operationibus inclinationem à natura inditam, & cònetur personà suà potius imitari Angelum, quàm brutum. Opus est, ut meminerit corpus esse mancipium animæ, & æquum justumque esse, ut in electione suavitatum major habeatur ratio superioris, & non vilioris particulæ. Non patiar hîc desiderari, quæ in rem nostram insigniter planè protulit Seneca epist. 41. *Quod proprium est hominis, quæris quid sit ? animus, & ratio in homine perfecta. Rationale enim animal est homo. Consumatur itaque ejus bonum, si id adimplevit, cui nascitur. Quid est autem, quod ab illo ratio exigit ? rem facillimam, secundum naturam suam vivere ; sed hanc difficultatem facit còmunis insania.* Voluptates sensuum limitatæ sunt ; animi gaudia terminum non agnoscunt : illæ ab extrinseco à quocunque auferi possunt ; istæ in anima residentes nec ab ipsa morte, quæ tamen nòs omnibus honoribus, & divitiis spoliât, abripi possunt : corporeæ continuò mutantur, nec possunt simul subsistere, sed lege invariabili præteritæ disparent ad præsentium adventum, & posteriores jam sunt in via ad interitum ob futurorum exspectationem ; ita ut corpus nunquam possideat omne suum bonum. Indiget, ut mendicus, in medio thesaurorum, & tum ex una parte gaudet, languebit ex altera ; & ob pessimam suam conditionem nunquam ita gestiet, ut simul, & semel omnibus sensibus satisfiat. Econtra dulcedines animæ non separantur, eadem cogitatio scientifica, quæ illuminat intellectum, inflamat etiam

voluntatem, & simul ditat memoriam. Illius hilaritates sese extendunt universaliter; non luget facultas una, dum altera lætatur; sed quasi in communi omnibus fruerentur bonis, quod uni placet, omnibus gratum accidit.

§. IV.

Aperiuntur causæ delectationis.

AD primariam delectationis causam tria sunt, quæ concurrere cernimus; bonum scilicet delectabile, præsentia, & ejus conjunctio, atque cognitio, & possessio ejusdem boni, & conjunctionis, convertitur porro possessio cum cognitione boni conjuncti; quia per cognitionem subicitur bonum appetitui, eidemque tanquam dominanti subordinatur, quod absque cognitione nullo modo haberi potest. Ex defectu cujuslibet ex his tribus extinguitur delectatio, & similiter crescit, ac decrescit juxta augmentum, & diminutionem horum trium requisitorum. Itaque quo bonum præsens, ac possessum fuerit majus, eò cæteris paribus delectatio evadet major, si minus fuerit, minor exsurget. At si præsentia, & conjunctio boni minoris sit intimior, ac major, quàm boni majoris, accidere potest, ut compensetur excessus, aut defectus boni, contrario excessu, ac defectu conjunctionis. Eodem modo se res habet de cognitione comparata cum magnitudine boni & conjunctionis, poteritque modicum bonum perfecte cognitum sæpè magis delectare, quàm majus bonum imperfectè cognitum: cum appetitus non feratur in bonum prout est in se, sed quatenus apparet in cognitione, quæque idè est mensura proxima, atque ultimò determinativa delectationis quoad suum incrementum, aut diminutionem. Præter hæc exigitur insuper amor ad delectationem, & quidem essentialiter, ac tanquam aliquid tenens se ex parte motivi delectationis: ita ut ne de potentia quidem absoluta poni possit delectatio absque amore prævio. Experimur enim res quantumcunque delectabiles, ac etiamsi earum delectabilitas non lateat, de facto tamen vim suam non exerere, si odio habeantur. Sic qui fastidit fraga ex eo, quòd vitiò imaginationis arbitretur, sub illis stabulari bufones, etiamsi ea per externum sensum perceperit, non tamen delectatur, sed potiùs nauscam concipit, quod non accidit illi, qui dulcedinem gustu perceptam diligit; is enim tunc exultat. Idem videmus in eo, qui obiectum pulchrum, & elegans contuetur, sed sibi aliquo nomine exosum.

Nul-

Nullam quippe delectationem inde hauriet, quamdiu ita est affectus, haud dubiè percepturus, si amor non foret delectationi præmittendus tanquam pars motivi delectationis. Hinc intelligitur, quomodo Aristoteles lib. 7. ethic. cap. 12. dicat voluptatem ex operatione enasci. Nimirum quia delectatio præter complacentiam in bono possesso, quæ etiam est operatio quædam, supponit aliam quoque operationem, vel quasi operationem, & ex ea manat tanquam consecrarium, ideò habita ratione anterioris illius operationis, rectè dicitur, delectationem prodire ex operatione, & hanc prædicationem, *delectatio est operatio esse causalem*. Dixi autem à delectatione præsupponi præviam operationem amoris, vel quasi operationem. Quævis enim boni conjunctio, ac unio cum subiecto, venit nomine operationis delectationem antecedentis. Ita qui gestit de proprio suo esse, seu naturali perfectione, præter amorem, nullum alium actum antecedentem elicit ad delectationem de amore. Similiter quando tempore æstatis refrigeramur aura frigidiorè, aut hyemis tempore cubiculò commodò incalescimus, delectamur, etsi nihil agamus, sed merè patiamur.

Quia tamen ad palatum magis faciunt spectata seorsim singula, quàm quæ in unum congesta cumulum, confusam ideam animo sciendi cupido relinquunt, causas aliquas delectationis singillatim contemplabimur. Inter eas numerat Aristoteles 4. ethic. cap. 8. Eutrapeliam, quæ est urbanus quidam verborum lusus & vestitus. Omnibus enim rebus sua sunt intervalla. Terra, quæ in novalibus culta hoc anno segetem dedit, quiescit sequenti, ne nimio usu sterile scat, atque deficiat: somnus continuas remittit vigilias, & istæ, quod per otium torpescit, vicissim excutiunt, & neutrum horum continuò durat, sed alterum alteri mutuis succedit vicibus. Ab ipso munificentissimo numine adversa prosperis interpolantur, ut per mutuam hanc vicissitudinem malorum, & bonorum alternante requie durare valeamus. Ubi igitur ex assiduitate laborum animi quædam hebetudo, & languor insurget, si succedens quies condiatur sermone ab omni turpitudine, & fæditate remoto, compto tamen salibus, jocis, & veracitate; spiritus, & facultates fractæ mira voluptate reficientur, ac velut exactam hyemem ver excipit, ita meliores, alacriorésque resurgemus. Secundò apta ingendo gaudic sunt humaniorum præsertim litterarum studia, nullæque sunt epularum, aut ludorum voluptates, si cùm iis conferantur, quæ ex mitioribus disciplinis hauriuntur. Subinde enim in contemplatione severiorum exercitiorum tædio succumbimus; namque nec incorrupti sumus, nec divinæ mentes, sed easdem in animantium corporibus in-

sitas habemus. Nostri ergo causâ ex alto quodammodo descendimus, & litterarium ludum capeffimus, ut quod ludus solet esse corpori, hujusmodi exercitiô menti afferatur levamen. Natura aliquo lenimentô indiget. Qui igitur limpida hujus voluptatis oblectamenta non adhibet, quid est, quod agere possit, aut quonam se convertet? non ad ea, quæ ne memoratu quidem digna sunt: nec etiam naturæ ordinem excefferit, aut indefessô ad contemplationem profundam animô incumbet; nec affectionis omnis expertem se, & quasi carne circumfusum Deum putet. Si dicas rerum potius, quàm cogitationum. lusu animum laxandum; admittam tibi tertio etiam hunc, ubi magis arte, & corporis agitatione ac agilitate regitur, quàm fortunâ; in aliis enim, qui à fortuna videntur dependere, majus adest periculum, ne vitium aliquod irreat. Hujusmodi sunt pugilum, luctatorum, cursorum, saltatorum, quorum corpora cum modicè sudore madent, pravi humores per hiantium pororum exhalationes foràs excutiuntur.

Limpidior tamen multô captatur quartô lætitia à parentibus, & magistris, ubi conspiciunt filios, aut discipulos ad directionem præmissam bene operantes. Nascitur hæc dulcedo vel ex largitione bonorum temporalium, vel illuminatione intellectûs, & instructione morum, atque incitamento ad bene operandum per exempla virtutum: vel quia ex actibus aliorum laudativis innotescit magis excellentia, & bonitas peculiaris illius qui laudatur: vel denique ob unionis vinculum, quod inter istos mutuus amor construxit; unde fit, ut perfectio accrescens dilectis ex bona operatione æstimetur quasi propria, ideoque delectet sicut bonum proprium. Denique affirmat Philosophus lib. I. polit. cap. 3. *Largiri, & auxiliari amicis, aut extraneis esse delectatissimum.* Si beneficia exercentur absque ullo beneficientis nocumento, ut cum alii laudantur, instruuntur, verbô, aut opere, sequitur jucunda suavitas ex perfectione operantis propria, & ex emolumento dilecti cum benefactore quasi unum constituentis. Si beneficia nocumentum afferant benefactori, ut cum quis largitur alteri suos thesauros, aut alia pecuniis æstimabilia, sentitur delectatio permixta dolori. Jactura namque propria parit per se dolorem, & tristitiam in eo, qui spoliatur bonis suis. At perfectio propria ex operatione benefica, & bonum accrescens dilectio, præsertim si adsit spes gratitudinis, delectationem inducunt.

§. V.

De ijs, quæ delectationem magis incendunt.

AUctior autem delectatio ex sequentibus capitibus ingeneratur. Primò si longa expectatio amorem incenderit, ideòque præstolantis expectatio vocari solet gemma gratissima; hoc est, rem expectatam, cum tandem tenetur, accidere pretiosissimam. Quod ita expressit Propertius, epigr. 68.

Gratior est fructus, quem spes productior edit:

Ultrò objectorum vilius est pretium.

Ex eodem fonte nascitur, quòd maiore suavitate perfundant objecta, in quibus parandis diu ac vehementer laborandum fuit: ut idcirco Aristoteles 9. Ethic. cap. 5. scribat, maiore amore exardescere matres, maioremque de liberis delectationem capere, quòd operosior ejus fuerit illorum procreatio. Ex hoc tanta delectatio in occultis sacræ Scripturæ sensibus eruendis; quamvis enim prima Religionis nostræ capita in multis locis apertè ac manifestè tradantur; ubi tamen figurati amictus deteguntur, in nostra quodammodo cognitione renovantur, renovata dulcescunt, quæ aliàs, nisi sensum quærentis exercuissent, nuda, ac prompta apparuissent vilia. Hinc etiam res deperdita, cum recuperatur, post interpositam acerbiteriam longè magis sapit absterfo eo mærore, quàm priùs securè possessa satiasset. Quantò majus exhaustum periculum in bello, tantò majus resultat gaudium in triumpho. Edendi & bibendi voluptas nulla est, nisi præcedat esuriendi, & sitiendi molestia, jactat tempestas navigantes, minaturque naufragium, expallescent omnes ob imminentem mortem: tranquillat cælum, & nimis exsultant, qui nimis timuerunt. Immensa voluptas irruit in patrem Anchisen, cum primùm venientem vidit Æneam post plures exantlatos labores, vitæque superaddita discrimina, ut Virgil. 6. aeneid.

Isq, ubi tendentem adversum per gramina vidit

Æneam, alacris palmas utràsque tetendit;

Effusaq, genis lachryma, & vox excidit ore:

Venisti tandem? tuâque exposita parenti

Vicit iter durum pietas, datur ora tueri

Nate tua, & notas audire, ac reddere voces.

Sic equidem ducebam animo, rebârque futurum,

Tempora dinumerans, nec me mea cura fefellit.

*Quas ego te terras, & quanta per aquora vectum
Accipio, quantis jactatum nate periculis!*

Constat denique ad delectationis copiam, & incrementum plurimum conferre novitatem; est enim novitas talis hilaritatis parens, ut ipsa voluptas, si jugis sit, in fastidium vertatur; e contra multò suavior accidit, si recens, & ob infrequentem raritatem nova contingat. Unde hoc veniat, non multum quærendum; nimirum in prima voluptatis de libatione, & rei jucundæ fruitione nondum perspiciuntur, nec quasi attenduntur defectus conjuncti cum ea bonitate, quæ tunc primùm obijcitur. Illis autem usu, & experimento deprehensis non modò obtunditur, & hebescit acer ille sensus dulcedinis, qui initio voluptatem movebat, sed etiam satietas, & fastidium creatur.

S. VI.

Quinam facti ad delectationes?

INter omnia animantia homo à Deo ratione præditus voluptati maximè studet; ingenio namque & cognitione plurimum valet: eandem igitur rimatur maximè, & in eam summè propendit, donec assequatur. Ex ipsis verò hominibus præ reliquis naturæ quadam pronitate jucundis operationibus inhiant, corpore sani, & qui multo abundant sanguine, eoque dulci & leni, non acri, bilioso, & melancholico. Quæ melior dispositio cum in pueris, & puellis circa tempus pubertatis maximè reperiatur, ideò Philosophus historiæ animalium lib. 7. cap. 1. sapientissimè admonet, ut cura præcipua custodiantur. Si enim tunc ab illicitis voluptatibus abstineant, sequentibus etiam annis temperantiam cautè custodient. Si autem præmaturæ indulgeant libidini, tota vita teterrimis spurcitiis coinquinabitur, tum ob malam animæ dispositionem, quæ de libatæ oblectationis memor vehementius ejus perfruitionem expetet, tum ob organorum flexibilitatem, & laxiores poros, ex quibus facilius pestis fluet. Sæpius idem Stagiritæ defendit ex hominibus fœminas magis salaces esse, quàm mares, cujus asserti rationem assert lib. 3. de generat. animalium cap. 1. Ex masculis ad intemperantiæ usum proniores esse volunt, qui calvitio tentantur. Unde Romani, ut meminit Lactantius lib. 1. cap. 2. calvam coluerunt venerem: non quòd censerent pulchritudinis Deam calvam formaliter; nam tanta est calvitii in muliere deformitas, ut venus, licet omni gratiarum foro stipata, & toto cupidinum

dium choro comitata, baltheo suo insuper cincta, cinnamoma fragrans & balsama rorans, ne Vulcano quidem suo esset placitura, si calva incederet: sed calva tantum est causaliter; quia licet ipsa capillitio exornetur, calvitium tamen inducit in sibi addictos clientes. Et sic historico sensui admiscetur alius mysticus. Permovei ad sic sentiendum potuissent, quod calvities originem trahat à capitis exsiccatione, quam maxime infert libidinis usus, vel à plurimo calore, qui in sexuum fruitione proritur funestè, & accenditur. Unde ab hoc probro immunes sunt mulieres, pueri, & eunuchi, nec etiam cæci nati calvescunt, cum hujusmodi humido & pingui vapore abundant, qui per majores poros, & cutem molliorem facili extruditur. Huic tamen Aristotelicæ opinioni se se opponunt multi calvitii buccinatores, & eum egregii mendacii arguunt. Quam multi enim capillitium amittunt, qui lacunas has nec à longè degustarunt? & cur non ex nimia studiorum defatigatione, cur non aliis ex causis deficere possint humores cerebro, & capillis nutriendis necessarij? quod autem asserat, neminem calvescere ante ætatem ad has sordes aptam experientiæ repugnat, cum deprehensi fuerint pueri, quorum syncipita præ raro & exiguo capillamento protegerentur. Imò videtur sibi ipsi repugnare, quando in problematis sect. 10. pilosiores, & hirsutos magis libidini deditos ob excrementitium humorem arguit. Ex reliquis animantibus aves præ quadrupedibus voluptati inhiant. Cum enim exiguum alimenti in corpusculi incrementum convertatur, plurimum remanet excrementi, quod ad alios usus servire poterit. Promovebunt subiecti inclinationem ad lætitiā facili securitas animi, solutioque; juvabunt etiam externæ à tempore, & loco amœnitates, cum nemo non experiatur lætitiæ propensionem cæteris paribus majorem vere, quando omnia rident, quàm hyeme; in locis temperatis & amœnis, quàm inter tesqua & nivalia.

S. VII.

Quos animi motus voluptas secum trahat?

PER se quidem delectatio nullum invehit affectum interiorem aut exteriorem effectum, cum sit terminus & complementum omnium passionum; ratione autem organi corporalis, aut peculiaris conditionis convenientis objecto ex imperfectione ad quietandum adæquatè appetitum potest eadem varios affectus asferre. Et primò quidem insigniter
stimu-

stimulat, acutque operationem, ad quam consequitur, & cui affinitate quadam jungitur. Hoc ipso autem dum eam firmiorem, & diuturniorem reddit, impedit operationes alias, vel certè earum intensiorem, perfectionem, diuturnitatèque infringit, quod experientia, & exempla satis clarè ostendunt. Ita inescatus Geometricis demonstrationibus hostes in ipsa obsidione urbis non advertet: inebriatus concentu musico tanta vi incumbet, ut cætera aut omittat, aut contemptim, & negligenter exsequatur. Hominum vulgus obeundo varios tractus usque ad extremam thulem, maria trajiciendo, & sinus ejus penetrando, nullam hujus universitatis partem imperscrutatam relinquendo, ubique, & semper aliud colligere non laborat, quàm velut retibus inclusas, & obsidione cinctas jucunditates capere. Voluptatis causâ morbum aliquis, vulnera, labores, & sexcenta subibit mala: in corporum morbis secari non recusat æger, aut uri; sitim etiam perferre famémque, & quidquid naturâ ingratum est, ut pro his postea somnò suò frui possit; quòd si spem futuri tollas boni, & præsentium tolles malorum patientiam. Hoc solum quæro, an non virtuti ipsi vim præcidat, si quis eidem voluptatem demat? certè qui laborem ex virtutis suscipit præscripto, amore voluptatis, aut præsentis id facit, aut futuræ. Sicut enim in requæstuaría nemo sciens talentum cum drachma permutat, nec cum argento aurum; sed in permutatione, quamvis æqualis sit, permutantis spectatur commodum: ita in subeundis laboribus nemo laborum causâ laborem sumit, sed præsentis labores cum voluptate commutat. Sic naturæ author quarundam operationum perpetuitati consultum voluit, ut supervenientem amaritudinem condimentò mitigaret, & hac esca mortales avidius pellicerentur. Observant tamen plerique, quòd delectatio de operatione, quæ non est cognitio, plurimùm impediatur usum rationis; quando enim delectatio nascitur ex attentione rationali ad veritatis pulchritudinem, potiùs eam acuit. Corporeæ verò dulcedines, quia animi vires vehementer applicant ad bonum non solum absens, sed etiam præsens, dimovèntquæ partes, & organa à statu suo conaturali, hinc quandoque minuitur, hebetatur, aut omninò extinguitur vis ejus nativa. Et hæc corruptio, præsertim prudentiæ, per externas voluptates tactiles non solum intelligenda est, cum actu percipitur jucunditas; sed etiam de elapsa, cum spiritus animales vel exhausti, vel ad alia organa deflexi, cerebri sedem deslituant, & sic facultatem intellectivam hebetent. Secundus effectus delectationis, qui ab hac passione progignitur, est sitis, & desiderium, quod ex duplici capite contingit. Primò quidem ex parte objecti delectabilis, quando

una solum illius pars post aliam successivè advenit, cum tamen animal toto indigeret, cujusmodi sunt omnia bona creata. Adhæssio namque cognitionis circa partem delectabilis adhuc absentis cum cognitione præsentis suavitatis aviditatem acuit, augétque, sicut quando audita prima parte versùs, eaque delectante desideramus avidius audire alteram ejusdem partem, & delectationis præsentis complementum. Altera causa est ex parte possessionis, seu operationis, qua nobis bonum delectabile conjungitur; tametsi enim illud sit perfectissimum, si tamen imperfectè solum possideatur, imperfecta delectatio scaturiet: sic cognitio inchoata veritatis cum delectatione imperfecta circa ipsam accendit sitim; ac desiderium cognitionis magis intimæ usque ad cumulum totius perfectionis absolute possibilis. Hujusmodi est gaudium viatorum, quo hic fruuntur de Deo imperfectè cognito, per quod sitis accenditur illum perfectius cognoscendi. Tertius effectus, qui imprimitur, est fastidium, quod bona creata percepta procreant. Quænam enim invenitur voluptas humana, quæ ipso sui usu perniciem non inferat, vel incursum contrarii objecti dolore prolicientis, vel assumptione causæ conciliantis voluptatem, aut admittance molestiæ? irruit homo in bonum exsatiationem suam inde quærens, quàm aliqua ejusdem fruitione non affecutus, fastidit bonum, in quod præcepta dabatur, cupitque vicissitudinem, si fortè in bono succedente plenior voluntatis refectionem nanciscatur, quàm in eo, quo hætenus est potitus. Aliam rationem addit Philosophus 7. Ethic. in fine petitam ex conditione naturali hominis, quæ simplex non est; hinc in continuatione rerum magnum experitur fastidium. Dulcedo mellis si assidue sumatur, nauseam pariet. Serena ipsa, quamvis magnopere desiderentur, jugiter adepta fordescent; & ubique homo mutabilis naturæ suæ desiderat habere qualitates. Si autem natura alicujus simplex sit, inquit, ei semper eadem actio erit jucundissima, ideoque Deus una semper, & simplici delectatione gaudet.

S. VIII.

Quos effectus corpori conciliet?

SI cum ludibundo Poëta ludere liberet, dicerem, quod in gaudio festivus sanguis spatietur, & lætabundi spiritus discurrant, accurrantque ut excipiant, & celebrent adventans bonum; quod ipse animus in hono-

rem festi purpurâ induatur rubore per ora fuso. Sed nos physica magis delectant. Itaque nemo negare potest, quòd in hac passione organi fibræ vellicentur, titillentur, affusò sanguine arteriosò, vel alio quopiam calido, & grato succo afficiantur, ut jucundissima sensatio percipiatur. At præter hanc non est ambigendum, quin appetitus suas quoque partes peragat; traducta enim in cerebrum affectione sensum internum occupat, & ferit: unde postea in reliquas fibras toto corpore dispersas novus motus, ac spirituum effusio traducitur. Quomodo verò differant hi motus ab aliarum passionum motibus, ex diversis effectibus, quos pariunt, facile colligitur.

Dilatât scilicet lætitia cor, vasa, viscera; hinc sanguis toto corpore facile fluit, & laxatis meatibus cuncta permeat. Cum enim delectatio sit quasi acceptatio boni præsentis, ejusque in animum inductio; hinc similitudinem quandam analogicam cum receptione, ac inductione unius corporis in aliud participat: quia autem omnis receptio dilatât corpus recipiens, ut subingrediatur corpus, quod recipitur; ideò delectatio in animo se habet per modum dilatantis. Jam cum passio qualibet immutet corpus juxta indolem suam peculiarem, redundabit etiam in corpus idonea delectatio. Hinc gratus tepor; hinc tumidus calor; hinc vegetus, nitidusque totius corporis habitus, & status; hinc carnes succo imbutæ turgescent; cor ipsum summam nactum libertatem magnos, æquabiles, raros, & quietos motus ciet. Consequitur ex cordis motu magnus pulsus arteriarum propter uberiorem humoris appulsum. Equabilis; quia laxatis meatibus nulla obstant repagula: rarus & quietus, quia nulla præcipationis causa. Hinc aliter in ira, & febris, aliter in júbilo afficimur. In lætitia enim sanguis subtilior instar placidissimi fluminis leniter effusus mulcet partes, & blandius titillat. In ira, & febris torrentis ritu violenter erumpens corpus irritat, & multiplicem fibrarum edit stragem. Dum autem cuncta lætissima passio dilatât, frontem etiam exporrectam reddit, ut vultus sit floridus, complanatæ rugæ, labra purpurea, depressa tantillum supercilia, & quendam semirissum præferentia. Oculi semiaperti nescio, quid grati fulgoris jaculentur, seu potius repercutiant: aspectus sunt dulces; vix tamen sine aliqua petulantia, & motu inquieto, ob musculos quasi lascivientes per calidum teporem affusum. Nonnunquam tamen intuitus fixus, & oculi immobiles hærent, mente scilicet absorpta, & reliquis sensibus feriantibus, quando nimirum júbilus totum animum occupat, & suis præstigiis irretit. Unde in summo gaudio oculi nonnunquam ita languent, ut morientis esse videantur. Vox gravior, trahæa scilicet dilatata; quòd enim fistula

fistula magis contrahitur, eò acutiorem edit sonum. Lingua tripudians loquelam præcipitanter fundit; hinc qui nimia lætitia exsultant, loquaciores, & garruli efficiuntur. Grata enim hæc affectio magnam spirituum copiam ad cerebrum transmittit, qui phantasiam fecundiores ad generis phantasmatum suo calore reddunt: & cum ex altera parte humor ad organum vocis affluens hoc pariter magis flexile ac mobile faciat, sufficiens assignatur causa loquacitatis. Quod si ad ista superveniat iudicium debile (quod singulas passiones aliquantum vehementiores comitari solet) non poterit ratio omnia ad limam examinare; unde juvenes, foeminae, sanguinei, biliosi, & ebrii loquaciores deprehenduntur, & aves nunquam magis garrulae, quam cum sanguine calente pruritu pariendi laborant. Exsurget inde, ut imprudenter, & parum caute se, ac sua omnibus credant; parum fidis arcana revelent; nec aberit inconsiderata jactantia; insolens præsumptio, nimia credulitas, animi facilitas, gestuosæ manus, pedes subsultim tripudiantes, totumque corpus inquietum, & ejusdem sitis impatiens. De se quidem hic affectus salubris est, & non parum commodi sanitati affert, quia cuncta viscera grato calore perfundit: interdum tamen immodica lætitia eò usque progreditur, ut horrenda symptomata, animi scilicet deliquia, & aliquando mors ipsa sequatur. Ita refert Cardanus quendam Galeateum Rubrum præ gaudio insanum factum ob inventam, quam diu quæsierat, hauriendæ aquæ cochleam. Ita Angelus Politianus teste Lethoyer usque adeò exarsit corrupto amore, ut cum ad levandam affectionem, qua interius flagrabat, lyram apprehendisset, subito inter eam pulsandam, deque suorum desideriorum deliramentis nonnulla concinendo expiraverit. Præ nimia nempe dilatatione pectoris cor ipsum deficit, valvula situm mutant, motus ipse impeditur, aut certè spongiosa pulmonum substantia laxatis plus, quam fieri deberet, fibris sanguinem exfugit, ut vox præcludatur, obstruatur respiratio, fibræ pressæ suarum functionum impatientes evadant, præ nimio sanguinis appulsu, caput fatiscat, ac tandem suffocatio oriatur. Porro pulsus, qui initio magnus, lentè tamen incedebat, sub finem parvus velociter currit; postquam enim aliquamdiu exteriores partes magna sanguinis vi intumuerunt, aliquas inde obstructions contingere oportet: igitur minùs liber sanguinis circuitus, unde cor laborat: ex hoc parvus motus propter obstantem materiam, itémque celerior, tum ut obex superetur, tum ut motus parvitas compensetur.

§. IX.

De ijs, quæ spectant ad risum.

GAudium præterea in corpore risum excutit, qui in varias classes distribuitur. Aliquando tantum fingitur, ac simulatur. Irati, & contemptui habiti risum dissimulant, qui vulgò dicitur dentium vallum non transcendere. Alius est ascititius, ipsòque usu comparatur. Ita plerique homines, ubi in alios sibi notos incurrunt, vel eos salutant, risum illicò leviolem quasi in condimentum advocant, sola vultus explanatione contenti. Alius profuit à morbo, vel alia prava qualibet affectione; sic vulnus septo medio infictum risum excitat: sic apium risus, herba scilicet in Sardinia enascens teste Pausania ita ad risum commovet, ut externa specie ridentes moriantur: inde risus sardonici acceptio pro joco amarulento. Alius denique est nativus & sincerus risus, qui soli ferè homini congruit, utpote instructo aptis ad eum organis. Hujus effectus causam plerique excepto Nancelio docent esse diaphragmatis affectionem, qua ad talem motum tremulum determinatur, estque aptissimum utpote instar tympani tensum. At unde hæc affectio emergit? ex multiplici causa; & primò quidem lætitia gestiens risui ansam dare solet, ut perspicimus in pueris, qui præ gaudio lasciviant, & multiplici cachinno suos jocos condiunt. Hic tremulus diaphragmatis motus cum non efficiatur à voluptate sensu externo percepta v. g. à grata Musica, pulchra imagine, à dulci sapore, vel odore; necesse est, ut ab interiore lætitia in cerebro orta proficiscatur. Secundò risum ciere solet ludicræ rei memoria aut cogitatio. Ludicrum porro vocatur, quod aliquam deformitatem continet, eamque singularem, aut expressam, vel nativam in corpore, motu, actione, casu, quæ inopinatò in sensus incurrant. Sic pro ludicris naturalibus habetur, si pueri nullo rationis ductu ludant, vel quidpiam insolentiùs agant; catelli ludentes, rixantes foeminae, nanus quispiam, vel morio, quælibet deformitas insolita circa nasum, frontem, &c. turpis aliquis gestus palam factus, lapsus inopinatus; aut si quispiam per jocum traducatur, ludatur, fallatur, ad iram, spem, aut aliam quampiam passionem concitetur. Ludicra ex arte quæsita sunt, cum quis actionem alterius per jocum probè exprimit, non quidem tragicam, aut illustrem, sed comicam, aut humilem, v. g. cum quis probè hypocritæ personam agit, aut furis, aut lixæ &c. Tertiò risum inducit ipse risus; sic unus dum ridet, alii risum tenere vix possunt; opi-

nor ex eo, quòd ridere sit actus ludicrus, qui ludicrum cerebro motum imprimit. Aliqui faciliùs se continent, ut severiores quidam tetrici, ac melancholici, qui fibris rigidioribus sunt instructi, ubi tamen in risu pro-
siliunt, ab effuso cachinno vix abstinebunt. Econtra juvenes, puellæ, sanguinæ indolis risum continere vix queunt, quia plexu molliore, & ideo dociliori istorum fibræ constant. Quartò titillatio nonnullos ita ad risum incendit, ut ferè mente capti videantur; præsertim in plantis pedum, in axillis, in collo, & in ipso illorum tractu, in quas partes aut multa vasa, & nervi desinunt, aut ad diaphragma propiùs accedunt. Hanc tamen titillationem priùs ad cerebrum traduci deberi, ut ex interno sensu affectio ad diaphragma derivetur, vel ex eo patet, quòd si quis se ipsum titillet, in risum minimè prorumpat; imò non nullos solius titillationis cogitatio potenter afficit. Denique delirantes in altissimos cachinnos animantur, tum quia in delirio septum medium malè afficitur, unde etiam phrenetici appellantur: tum quia commoto cerebro inepta specierum combinatio facilè resultat: tum quia nulla seria cogitatio, nullus rationis ductus impressos motus còhibet. Tam multi porrò & varii motus risui adjunguntur, ut ab eo, cùm mediocritatis metas transgreditur, valetudini non parùm sit metuendum. Turgent vasa arteriarum & venarum, quia musculorum compressione motus ordinarius sanguinis inhibetur: inflatur, & intumescit guttur: vultus rubet, ac splendet ob eandem causam: vox hæret, & lingua suspensa manet; quia laringis muscoli distrahuntur motu diaphragmatis: nihil deglutiri, nihil sorberi potest; quia per trachæam subsultim erumpit anhelitus, ut claudi non possit: venter & ilia dolent ex succussione septi: agitantur brachia propter affectos musculos: inclinatur pectus, ut venter plus spatii nactus non tantopere flagelletur ab incumbente diaphragmate: denique totum corpus, ubi diu se torfit, humi prosternitur. Hæc de quinta passione, de qua Aristoteles lib. 3. ethic. cap. 3. constituit: *Totum virtutis negotium esse, rectè hominem disponere circa delectationem.* Cùm enim potissimùm illa ducantur homines, & alia sit delectatio visa, alia sit vera, labor, & opus non exiguum est, solidam, honestamque delectationem unicè optare & quærere.



DISSERTATIO VI.

De affectu trititiae,

§. I.

Explicatio doloris , & trititia.

Explicatio delectationis non modicam lucem afferet investigationi trititiae, & ei vicissim splendorem conciliabit. Promiscue dolor, & trititia accepta definiri potest affectio perturbata ex malo presenti eidem renitens, atque repugnans. Pressius trititia dicitur passio, quæ ex malo per imaginationem exsurgit: ut dolor contractius acceptus designat affectionem tactus ex divisione, & distractione fibrillarum tactilium profectam. Priori loco de hac passione agemus, prout ex tactus actione procedere solet, eò quòd sit notior, & sensibilior. Dolor igitur non est præcisè tactio, ut plerique medici ex Atomistarum vorticibus, aut chymicorum furnis prodeuntes perperam docent: sed est ratio appetitus, per quem anima tanquam per instrumentum & principium proprium, de malo carni, quam informat, immisso mæret. Rationem non invisa contradicendi libido suppediat, sed veritas perspicuam subministrat. Omnia namque, quæ ante appetitus actionem assignari possunt, præsupponuntur potiùs ad dolorem, quàm ut sint dolor ipse. Antecedit appetitus operationem sensatio exterior, & interior, quarum illa mediatè, hæc immediatè appetitum determinat ad operandum. Neutra autem habet rationem doloris; aliàs si transiremus ad intellectum, asserendum esset, trititiam ejus sitam esse in cognitione intellectus, quod esset hariolari, cum officium facultatum cognoscitivarum sit percipere conveniens & disconveniens, illaque exhibere facultati appetenti, quam natura concessit ad amandum & respuendum, quæ per cognitionem obijciuntur. Sicut igitur desiderare, & prosequi bonum, vel malum absens non est alterius facultatis, quàm appetentis; ita de iisdem lætari vel dolere ad eandem pertinere debet. Ex quo colligitur, dolorem non esse propriè in parte læsa, v. g. in dentium gingivis humore corrupto perfusis, vel in parte perfossa manûs; sed in solo appetitu residere, quamvis pro objecto habeat malum partis hujus, aut illius; & idcirco dicamus, doleo dentibus, vel auribus; non autem doleo appetitu



Expleur lachrimis. egeriturque dolor.



petitu cerebro insidente. Univerſus igitur animæ ad dolorem progreſſus his veluti gradibus perficitur. Aliqua primùm læſio in corpus vivum inducitur, v. g. per calorem ignis: hæc tamen cauſa extrinſeca non efficit ſenſationem ingratam immediatè, ſed vivens ipſum: ſicut licet ſpecies viſuales producantur in oculis ab objectis externis; verumtamen quod producit viſionem corpoream, & auditionem eſt vivens ipſum, & non cauſæ externæ. Ratio eſt, quia ſenſatio non eſt mera paſſio affectionis, ut iterum delirant Atomiftæ, quam objectum in organo cauſat; ſed eſt actio, qua anima in parte corporis diſpoſita per nervorum ramulos & muſculos, cui accedit aliud corporeum, producit qualitatem, quæ eſt formalis, & immediata perceptio, ſeu experientia proprietatis illius corporeæ. Hanc qualitatem fateri oportet; cum ſentire ſit agere, ſit vitaliter operari, & quidem ſubinde cum magna deſatigatione, & non merè pati. Hinc qui dormiunt oculis apertis, circumſtantium objectorum ſpecies in ſe quidem recipiunt, nec tamen eadem intuentur. Sic etiam phantafia habet infinitarum rerum ſpecies, quas actu non percipit. Igitur ut animal ſentiat, requiritur, ut aliquid verè phyſicè ab eo efficiatur: hoc non poteſt eſſe objectum, quod ab animali non efficitur: ergo aliquid realiter diſtinctum, ſcilicet dicta qualitas. Item ſi ſenſatio externa conſiſteret in eo ſolo, quod unum corpus operetur in alio, tunc quodocunque hoc fieret, daretur ſenſatio: at quoties contingere poteſt, ut vel per extaſim, vel modo diabolico, vel etiam naturali, medicato ſcilicet potu, conſopiatuſque animæ vigor, illiusque virtus perceptiva (quæ utique finita eſt) tota abſumatur, ut quamvis ferrum, vel ignis operetur in corpore vivo, illa tamen nihil ſentiat? ergo concedi debet aliquid aliud, in quo ſtet ſenſatio, ſcilicet dicta qualitas perceptiva. Poſtquam autem tactus læſionem exterius factam percipit, mox appetitui ſenſitivo ab externo ſenſu incommodum renunciatur: hic pro inſita ſibi averſione à malo illo refugit, & ſi mali immiſſio declinari non poſſit, doloris paſſio ex tot præmiſſis ſubſequetur.

Læſio autem corporis eſt bimebris; nimirum vel vitiata corporis temperies, vel continui diviſio. Ac primò calor, & frigus, ſi excedant debitum temperamentum, v. g. in feбри calida, & uſtione, aut tertiana, & quæcunque prima qualitas intemperata dolorem ingenerare poteſt; nam etiam ſiccitas & humiditas, ſi nimium excreſcant, quamquam languidiùs torqueant, malè tamen ſubjectum afficiunt; imò etiam mortem inferre idoneæ ſunt, ut conſtat ex fame & ſiti, ſi autem habeant debitam ſubjecti temperiem, moleſtiam non afferent. Patet hoc à poſteriori, cum non ſentiamus cerebri frigus, carnis mollitiem, of-
ſium

sium duritiem, aut cordis calorem, quamvis ita sit calidum, ut aliquando carnifex illud evulsurus ab eo non aliter, quàm à carbonibus manum retraxerit. Hæc sentiendi qualitas plurimùm afferret nocummenti animali, cum continuò spiritus absumeret, animam fatigaret, eamque à suis operationibus impediret, ideòque censenda est à provida natura non fuisse illi indita. Alterum læsionis doloriferæ membrum aiebam esse divisionem, & continuï dissolutionem, prout complectitur partium distractionem & compressionem præter naturam factam. Et quamvis, cum isti motus excitantur, interveniat quædam variatio temperiei ob spirituum, & sanguinis abscessionem, attamen etiamsi sola continui divisio fieret, dolor necessariò conjungeretur, cum animal à statu connaturali extraheretur, & à partium concentu, quem tamen maximè fovet. Quæ hæcenus de dolore sunt allata, eadem proportionaliter de tristitia præse accepta sunt intelligenda, & varia discrimina, quæ ab aliis inter dolorem, & tristitiam afferuntur, non pertinent ad varian-
dam genericam hujus passionis rationem. Si tamen aliquod discrimen esset assignandum, videtur illa passio vocanda dolor, quæ ex ingrato sensu externo, potissimùm tactu, oritur; ille verò motus, qui operâ sensûs interni nascitur, & molestam in exterioribus sensibus impressionem corporis producit, nominanda erit tristitia.

§. II.

Dolor dirimitur in suas species.

Tristitia variè multiplicari solet, penes varia nimirum mala, quæ nolentibus occurrunt. Primò se offert misericordia, quæ est animi ægritudo ex concepta miseria alterius imerentis, eo respectu habitò, quòd simile quiddam malum etiam ei, qui misericordia movetur evenire possit. Hujusmodi affectus incapaces sunt omnino miseri, & eximie felices, ut Beati, ac Deus: nam primis non vacat aliena mala dolore deplorare: secundi verò minimè putant similibus se malis obnoxios esse. Hinc misericordia Divina quæ toties, & tam magnificè in scripturis, & alibi ubi-
vis proditur, non est hujusmodi affectus; sed sita illa est in charitate, & est volitio sublevandi alienam miseriam ex amore boni alieni, eam relevationem consecuturi. Ad miserandum plurimùm propendunt, qui paria sunt experti, quales sunt senes ob prudentiam, & rerum præteritarum memoriam; debiles item, & timidi: etiam eruditi ob rerum & casuum

suum humanorum cognitionem: similiter, qui filios, uxorem, parentes superstites habent. Denique qui temperamento medio constant inter iram & timorem. Movent misericordiam primò mala, quæ dolorem corporis afferunt; deformitas enim sine mæore risum procreat. Secundò etiam illa, quæ interitum afferre possunt citra doloris sensum. Tertiò commiserationem singularem provocat, qui exinde mala crebrò patitur, unde bona sperare debuerat; ut quoque eadem affectione moveamur, eum bona importunè accidunt. Scilicet quando iis frui aut juvari nequit. Denique misericordiam progerminant ficta in tragædijs mala. Ferè ut imago depicta amorem suscitât. Subinde hæc miseratio plurimam efficit delectationem ex eo, quòd naturam suam, & indolem misericors experimento deprehendat bonam, & humanam esse, quam commovet, vel sola alienæ calamitatis imitatio. Misericordia ferimur primò in nobis proximè conjunctos cognatione vel amicitia: erga hos enim afficimur, ut in nos ipsos. Secundò hoc affectu prosequimur, quos conditione, & statu æquales censemus. Tertiò miseremur recentibus malis afflictorum: vetustior enim ærumna longioris temporis beneficio mitigata creditur. Quòd verò misericordia dicatur versari circa miseriam, quæ indigno accidit, non eò spectat, ut negetur misericordiam tendere posse in eum, qui dignè calamitatem sustinet; cum judex æquum nocenti supplicium decernens, nihilominus commiseratione tangi possit: sed hoc idèò prolatum fuit, quia illustrior est misericordiæ materia. Secunda species, & vitium diabolicum est invidia, quæ definitur dolor de alieno bono, existimato, ut proprio malo, quatenus judicamus, nos ab alio superari, bonum nostrum infuscari, & minùs splendidum reddi. Enascitur igitur ex opinione falsissima mali præsentis ob prosperitatem æqualium, quos dolet invidus ornatos esse. Ad invidendum accommodati sunt primò plures æquales genere, ætate, eruditione. Secundò qui ferè omnibus bonis innatant, aut magna gesserunt, aut eximiè honorantur. Cum enim omnium oculos, & venerationem in se convertant, præter modum faciliè superbiunt, noluntque pati, ut quispiam alius præter ipsos sit spectabilis. Tertiò, pusillanimes invidia commoventur, vel quòd perspecta sui humilitate nollent quempiam eximium esse, vel quod exinde sibi, rebûsque suis timeant. Quartò discerpitur secretis quibusdam unguis anima adversus illos, qui celeriter, & faciliè adepti sunt illa, quæ alter vix tardè, ac laboriosè consequitur. Quintò torquent bona illa, quibus vel ipsi compotes fuimus, vel nobis convenire credimus, & ita senes junioribus invident. Tertium membrum appellatur nemesis, quæ cum indignatione passim per-

miscetur, & dicitur tristitia de prosperitate immerentium, eaque malis artibus parata. Si passio hæc inter invidiam, & malevolentiam modum teneat, laudem mereri poterit. Indignantur tum viri probi, tum cupidi honorum; viles econtra, & mancipiis similes negligunt, nec tristantur, si videant ordinatam pro meritis bonorum distributionem inverti. Accommodati etiam ad indignationem sunt, qui summis bonis digni ijs frustrantur; nam privati mali dolor facillimè indignationem quoque suscitabit. Cæterum non exsurget indignatio, quod alter bonis virtutum exornetur: neque quod bona naturæ amplissima obtineat, sicut neque indignamur, si bonis fortunæ longo intervallo à majoribus relictis quispiam indignus fruatur. Sicut superius notavi de malis vetustis misericordiam non resutare. Sola enim recens à malis & immerentibus possessa prosperitas sauciat, quasi nimirum sententiæ nostræ adhuc sit locus, & ad bonum reipublicæ conferat, recentia mala cum indignatione suscipi, & improbari. Quod si tristitia aliquando conjuncta est cum impossibilitate malum declinandi, quod nos vexat; efficitur species quædam tristitiæ, quæ nuncupatur anxietas, seu angustia. Nempe affectus aggravat animum absque ullo aditu refugij, omnique destitutus spe, & evadendi possibilitate. Aliquando verò non solum deest tristitiæ potentia fugiendi, sed etiam motus membrorum exteriorum, & facultas eadem incitandi usque adeò, ut ne vocem quidem emittere valeat contristatus. Et per hoc efficitur tristitiæ species, quæ vocari solet acedia, cui nec convenit ratio fugæ, nec secundum rationem suam differentialem est in appetitu, sed in membris exterioribus cerebri residet.

§. III.

Ingeruntur cause tristitiæ.

AD concipiendam tristitiam tria concurrere solent, sine quibus nullus unquam dolor elicitur. Primum est malum præsens, & nobis conjunctum: secundum est ejus notitia: tertium ejus odium & execratio; sic enim constat ex oppositis gaudij causis de bono præsentē, ac conjuncto & amato. Quolibet ex his tribus aucto redundat cæteris paribus augmentum proportionale tristitiæ: similiter diminutio ejusdem promovebitur ex decremento cujuslibet ex istis. Ex quibus colligitur, mala spiritualia compungere majori molestiâ, quàm bona temporalia; quia videlicet illa incomparabiliter excedunt, utpote nocentia animæ immediate, æternumque nocentia ex animæ natura, quàm ista, quæ corpus im-

immediatè torquent, & intra tempus determinatum habitura sunt finem. Ingenerat igitur primò dolorem malum, sed illud duntaxat, si sit conjunctum, & immissum nobis, quamvis non adeò stricta habitudo. Et connexio ad subjectum proprium exquiratur, ut de immisso tristitia concipi possit. Ita dolemus de alienis malis, vel si alij tituli deessent, quia sunt personarum naturæ nobiscum communione gaudentium. Mali itidem phrasi sumitur non solùm, quod positivè nocet, tollendo, vel lædendo convenientem nostrum statum; sed etiam privatio boni, orbitas, & antecessus nostrorum. Subinde tamen nulla prorsus apparet causa mæroris; non morbi, non damna, non ignominiosæ injuriæ, non amicorum mors, neque ullus omnino rerum talium inopinus rumor, sed dolendi quædam voluptas mæstam facit animam. Pestis hæc eò funestior, quo ignotior causa, atque difficilior cura ab anima tanquam scopolus, omni velorum, ac remorum auxiliò est fugienda. Hoc tamen non est ita intelligendum, quasi revera deesset malum quodcunque, si-ve reipsa, si-ve respectu potentix cognoscentis, quasi revera homo amaritix contabescere posset, nullo malo facultati cognoscenti obversante; hoc enim æquè repugnat, ac appetitio absque prævia notitia. Significare ergo solùm potest, interdum malum illud, quod nos prostermit, non cognosci reflexè, nec distinctè objici intellectui, quamvis iste satagat perspicere, ecquam ob causam appetitus concipiat tristitiam, & morositatem. Contingere hoc solet præsertim, quando objectum tristitiæ ex multis minutis incommodis partim corporis, partim animi coalescit, quorum singula non sufficerent ad obnubilandam animæ serenitatem. Unde, quia singula physico vinculo non copulantur, vix deprehendere possumus, quorsum, & unde affligamur. Potestas, cui resisti non potest, eatenus promovet luctum, quatenus per se ipsam est malum, cum potentix beneficæ non renitatur; & insuper est præsens, licèt nondum noceat, quantum nocet, cum reducitur ad actum secundum. Sicut enim quælibet appropinquatio boni, & dispositio quælibet ad illud inducendum, est quoddam bonum præsens; ita quælibet imminetia mali, est malum quoddam, quod animum offendit. Denique poenitentia, sicut & verecundia consequens ad delectationes præteritas, præsertim turpes, de quibus Philosophus lib. 9. Ethicorum cap. 4. *malus tristatur, quoniam delectatus est*, hæ duæ species non exsurgunt ex delectatione præterita, qua præterita præcisè est, ut apparet in beatis, quos, tametsi memores priorum delictorum, delectationis causa commissorum, nihilominus nec levissima pungit tristitia, sed potius delectantur de voluptatibus illicitis per opera poenalia compensatis. Igitur gaudia

præterita solum possunt angorem parere, quatenus memoria illorum conjungitur cum cognitione mali alicujus præsentis, vel saltem præsentis imminentiæ mali, quæ ex delectationibus præteritis resultant. Quam sæpè recedente delectatione remanet infamia, pauperies, morbus corporis per illas inductus! manent etiam, idque præcipuè, habitus vitiosi, qui vel maximè sunt nocivi: manet reatus poenæ temporalis, & æternæ: manet ira Dei illativa utriusque, nec non vindicta hominum per delicta concitata! horum itaque præsentia malorum animum torquet, quæ ex delectationibus præteritis tanquam ex radice pullulant. Præterita itaque delectatio mala est objectum solius odii: quatenus autem adhuc in aliquo effectu subsistit, eatenus triste tormentum affert.

Intervenit etiam semper ad causandam dolorem, laxato non nihil vocis rigore, prævia cognitio. Repugnat enim, potentiam cæcam, cujusmodi est appetitus, tendere in objectum nulla prælucente notitia. Itaque ne in infante quidem recensè matris utero fuso, appetitio cibi, & potûs fit absque prænotione alimentorum. Nec obstat quod cibum, & potum nullo unquam sensu externo usurpaverit; nam parvulus neque intra uterum, neque extra illum, cùm primùm fame, & siti corripitur, appetit distinctè cibum aliquem, aut potum, ac proinde nulla distincta apprehensione talium objectorum indiget: sed sufficit apprehensio confusa alicujus necessarij, quod sibi deesse sentit, stimulante incommodo, quod famem, & sitim excitat. Quod si subinde malorum imminantium prævisio à sapientibus dicatur, ea imminuere, cùm evenerint juxta paræmiam: *jacula prævisa minus feriunt*: id non contingit ex eo, quod quomodocunque prævideantur: hoc namque modo præconsiderata magis valent ad augendam tristitiam; qua de causa ejusmodi præmeditatio à Christo Domino reprobatur, dicente Matthæi 6. *Sufficit diei malitia sua.* Solùm igitur juvat ad leniendam mæstitiam in tempore consideratio illa malorum imminantium, per quam vel ponderantur utilitates, & commoda, quæ ex iis malis per prudentiam, aliàsque virtutes, maximè verò per patientiam colligi possunt: vel quæ nobis ostendit, ex parvo infortunio magna etiam commoda temporalia provenire posse. Subinde prodest ad mitigandam displicentiam præcogitare mala cum agnitione priorum meritorum illa lubeundi; nec non cauta observatio calamitatum animæ incumbentium ex continuata, & nunquam interrupta prosperitate fortunæ, & abundantiae delectabilium. Hinc illud Senecæ lib. de providentia: nihil mihi videtur infelicius eo, cui nihil unquam evenit adversi. Et iterum paulò infra: miserum te judico, quod non fuisti miser. Transisti sine adversario vitam, Igitur malorum futurorum

rorum prævisio ideo minuit tristitiam, cum ea occurrunt, quia facit, ut apparentia mali sit minor. Sapiens nimirum præmeditatio efficit, ut ad adventum mali jam præsentis non sola subsequatur cognitio malitiæ secundum se, sed etiam notitia bonorum, quæ inde solè olefcere possunt, nec non circumstantiarum, ob quas ratio nocumenti non est tanta reipsa, quanta primo intuitu apparet sensibus, & videretur intellectui, nisi sapienter esset præmunitus.

Ultimò denique exigitur ante quamcunque tristitiam, & dolorem, odium mali, eò quòd inquietudo illa, & renisus, quibus mæror constituitur, feratur in malum exosum, & invisum. Sufficit tamen ad complendum objectum tristitiæ actus nolendi conditionatus. Ita constat mercatorem, ingruente tempestate, adactum ad proijciendas merces, velle quidem simpliciter eas proijcere, ut evadat imminens naufragium; conditionatè tamen nolle hanc projectionem. De tali autem projectione tantum conditionaliter rejecta concipit tristitiam. Sancti Apostoli, & Martyrum Chorus verè tristabantur de suppliciis, & calumniis sibi illatis. Cum tamen in conspectu atrocium tormentorum, aliorumque malorum temporalium simul considerarent bona æterna, eorumque spem, & merita, tanquam bona præsentia, horum præponderantia in eis efficit, ut verè prævaleret lætitia. Subinde etiam gratia singularis lenivit supplicia, & ille, qui in fornace succensa Babylonis mutavit flammam in Zephyros, convertit etiam aliorum ærumnas in delicias: aut si ipsi non placuit hanc adhibere methodum, adhuc magis stupenda ratione impedivit, ne animæ communicarentur corporis pœnæ, & ita orbi ostendit, se Dominum supremum totius naturæ creatæ.

§. IV.

Tetræ hujus passionis proprietates.

SI omnis perturbatio passionis miseria est, tristitia certè erit deterrima ægritudo. Habeat ardorem libido, levitatem lætitia gestiens, humilitatem metus: majora hīs includet tristitia: & quidem ex genere suo, non tantum ex accidente malus est iste affectus; imò omnium pessimus. Sicut enim delectatio omnes vitæ functiones perficit, ita iste tam corporis quam animæ operationes vitiat, ut ex inferiùs dicendis clariùs apparebit, & plurima miseranda exempla ostendunt. Horum unum est Niobe, quæ ob angorem in saxum versa fingitur: est etiam Hecuba, quæ,

quod ejus mæror demum in rabiem, ac desperationem migraverit, in canem mutata dicitur. In hunc numerum, miseris fabulis, referenda est octavia Marcelli mater, quæ in unam semper rem intenta, & totò animò affixa, flendo, & gemendo talis per omnem vitam fuit, qualis in funere apparuit. Non admisit ullas voces salutare aliquid afferentes; non ausa consurgere, allevari insuper recusavit; nullam habere imaginem charissimi filij voluit, nullam sibi fieri de illo mentionem. Tenebris, & solitudini familiarissima, lugubrem vestem nunquam deposuit, & aures adversùs omne solatium clausit. Ut autem ex omnibus passionibus tristitia est maximè virulenta, ita præ omnibus est magis communis, videturque illa nobis connaturaliter adherere, & gaudium è converso tantùm accidentaliter. Omnes corporis partes expositæ sunt doloribus: & paucissimæ numerò gustare possunt voluptates. Calamitatum integræ cohortes in nos insurgunt, & licet alias inter se sint oppositæ, in nostram nihilominus perniciem conspirant, & uniuntur. Gaudia, si sibi invicem occurrant, sese destruunt, & quasi conditioni nostræ inviderent, in adventu unius colliquefcit, & desinit alterum. Dolores ætatem ferunt, & quasi natura in nostris suppliciis sibi complaceret, eadem prolongat, dum interim voluptas, cum maximè delectat, extinguitur; non multum loci habet; citò implet, citò tædio est, & post primum impetum, marcet. Ad persuadendum dolorem nobis magis familiarem esse, quàm gaudium, sufficit intendere oculos in miserum vitam nostræ statum, in quo inanem lætitiæ mille veris emimus doloribus. Non opus est è contra luctum advocare; sponte sua advenit; dolor unus brevi alium subsequenter nuntiat, ubi deliciæ multo sudore sunt quærendæ, & plerumque majori pretio constant, quàm valeant. Denique gaudia semper permiscetur dolore aliquo; non colliguntur hæ rosæ sine spinarum aculeis; non gustantur dulcedines sine afflictionum amaritie, & plerumque vivacius molestiæ pungunt, quàm suavitates demulceant. Levissima febris robustissimas prosternit consolationes: modica infirmitas extinguit in belliduce victoriarum saporem, & decreti triumphii splendorem obnubilat.

Denique ex omnibus passionibus nulla est, quæ magis veritate nitatur: omnes aliæ plurimùm à nostra imaginatione dependent, & sine hujus auxilio non adeo vehementem in nostris sensibus impressionem causarent. Desiderium, & spes quoties nobis illudunt? ut ille propius naturam illorum descripsisse videatur, qui dixit, esse somnia vigilantium. Amor, & odium occupant animam sine fructùs, & utilitatis perceptione. Timor umbræ non malè assimilatur, & sæpè phantasmata
nos

nos vanis spectris terrent. Audaciæ, & iræ victoriam promittit inimicorum imbecillitas. Dolor præ cæteris verum est malum, quod animam, & corpus premit, & uno ictu utramque partem ferit. Scio, maiores aliquos omnem vim suam contra nobiliorem hominis partem, contra spiritum scilicet exserere; sed si violentiores evadant, ad corpus quoque descendunt, & occulto contagiò infirmitas dominæ fit etiam morbus servi. Tam arctis inter sese vinculis colligantur corpus, & anima, ut omnia sua bona, & mala sibi invicem communicent, ita ut anima commodis suis contenta medeatur infirmitati corporis, & corpus ægrum affligat animam. Suffert patienter anima in suo carcere omnes calamitates sibi incumbentes, & modò corpus eximatur doloribus, semper consolationum copia abundabit. Magnanimiter spernet divitiarum perditarum amissionem, & restrictis desideriis paupertate contenta vivet. Contemnet honores, & sciens, hos ab hominum opinione dependere, felicitatem suam tam fragili fulcro non laborabit stabilire. Non multum curabit voluptatum defectum, & pudor, qui eas plerumque comitatur, imminuet dolorem, qui ex perditione nascitur. At verò quid faciet animus (verba sunt August. lib. de gratia novi testamenti) ut non doleat, cum corpus vulneratur, aut uritur, cui tanto implicatur consortio, ut pati possit, non dolere non possit? timebit anima mortem, quæ ex se est immortalis; plagis succumbet, quæ vulnera recipere non potest; si labra in querelas solventur, cogetur lamentari; si oculi in fletus, lachrymari, si cor in singultus erumpet, suspirare. Et si tota sit spiritus, sentiet omnia tamen mala sui carceris, quem animat. Stoicorum quidem Philosophia nihil gloriosius habuit, quam efficere, ut commercium inter animam, & corpus tollatur, & conata est separare duas partes, sine quibus totum compositum subsistere non potest. Prohibuit suis discipulis tyrannico imperio lachrymarum dulcedinem: voluit, ut anima corporis dolores non sentiret, sed ut in medio rogo mentem elevaret ad contemplandam virtutum pulchritudinem, & rerum naturalium miracula. Habuit quidem barbara hæc secta, qui eam admirarentur; nullum qui sequeretur: illius præcepta ad desperationem adigebant omnes illos, qui eadem opere exsequi conabantur.

Hæc tamen non sunt ita accipienda, quasi in nulla tristitia aliquid reperiatur, quod sit approbandum, & quasi ab omni mæore tanquam à lue esset declinandum. Pro multis calumniis non nihil nunc de illa mereamur, & aliquos usus ad felicitatem elogiò commendemus. Illa igitur tristitia misera non est, quæ cum fructu urget; & felicissimus mæror illorum malorum, quæ auferri possunt, & debent. Non loquor tantum

tum de tristitia spiritali, per quam deplorantur peccata, & peccatorum causæ, ac occasiones; huic enim opus non est remedium adhibere, cum ipsa sit remedium; nec mala dici possit, quæ ad mala tollenda consecratur applaudente natura, & cælo. Reperio etiam aliam tristitiæ laudem, & insignes moderati ad rectæ rationis præscriptum mæroris fructus, qui in mollissimo cæteroquin genere, solutissima fluxarum rerum irritamenta submovet, & ad frugem reducit. Ubi trossulus talis aliquem suorum amiserit, continuò velut fulmine tactus aufugiet, & nusquam apparebunt dissolutæ lætitiæ: nusquam ventris cura, aut sollicitudo carnis habebitur, sed acerrimam continentiam introducet Philosophia. Juges vigiliæ, summum silentium, humilitas ultima, mansuetudo ineffabilis, miseratio immensa. Audientur apud famulos, & omnes domesticos philosophici sermones de mundi contemptu, de rerum mortalium caducitate; dicent omnia hic in scena agi, & nihil inane, aut fluxum celebrabunt. Tunc verè miseræ, probrosæque apparebunt divitiæ: tunc fæda videbitur jactantia: invidia verò, & ira, ac libido ne ad extremas quidem lugentis januas accedent; sed hæc omnia extinguentur, ita ut ne odor quidem ullus horum occurrat. O fortunatum luctum, quo multi desinunt esse lamentabiles! O salubrem ægrimoniam, quo sani fiunt. Ad levandas quoque alienos mærores noster prodest. Sic enim inter plures onus divisum nulli est tam grave onus, & consortium aliorum erit malorum solatium. Quemadmodum enim meticulosi, si soli sint in aliquo loco, trepidant; si cum sociis, remittunt timorem, quòd putent plures esse, qui resistere malis possint, & periculum aut minus, aut languidius futurum multis obsistentibus: ita qui mæret, communitate languentium sperat majorem resistantiam, minus pertinax malum, nec diu durare posse, cui tot repugnant. Ad hæc ex compassione aliena præsumit se amari, lachrymæque ipsi sunt gratissima amoris cæremonia: amor autem lætitiæ expromet, & sic festivitas benevolentiae mærorem extenuat.

§. V.

Quinam ad tristitiam opportuniores?

Tristitiæ magis obnoxii sunt, qui contrariis ægriùs resistunt, & ad læta obeunda non sunt dispositi. Itaque senes, & ægros, ac illos qui valetudinem nondum confirmarunt, quia pauci caloris sunt, & exan-

exanguis, ac debiles, ægrèque contrariis obfistunt, facile mæstitia vulnerabit. Nec aliter statuendum de iis, in quibus atra bilis, melancholia, & amarior sanguis abundat. Sunt enim isti à jocis prorsus alieni, ac sol ipse, & hujus aëris perspicua natura impedimento videtur esse taliter affectis, ac illorum luctus profundissimam noctem imitari, imò tenebræ noctis tam atræ non sunt, quales mæroris nox in multis procreat. Colliguntur ex cogitationum obscuritate, formidabiles quædam imagines, ac intoleranda crux circumfertur. Iracundi etiam ad hanc tabem procliviores sunt, quod ira adjunctam semper, & admistam habeat tristitiam, ratione malè offendentis, quod iram concivit.

Subinde etiam prævalet novus aliquis humor, aut dispositio corporalis peculiariter nociva, ratione cujus, aut apparentia bonorum extinguitur, vel extenuatur; aut è contra apparentia malorum nova inducitur, vel ob perturbatam, aut confortatam phantasiam augetur. Cum enim species materiales bonorum, & malorum insideant subjecto corporeo, atque hoc sit dilatabile per rarefactionem, & constringibile per condensationem; fieri planè poterit, ut tam bona, quàm mala sortiantur novam in phantasia, atque inde etiam in intellectu apparentiam, aut novum præexistentis apparentiæ augmentum, & intensiorem, nulla licet novitas superveniat ipsorum aut bonorum, aut malorum,

§. VI.

De effectibus tristitia.

Tristitiæ effectus planè sapiunt parentem, suntque tales, ut à nullo affectu plus homini creetur molestia. Cum enim hominis maximum bonum, sicut & cujuslibet alterius creaturæ situm sit in operatione, & tristitia maxime omnium hanc retardet, ac impediat: eadem procul dubio præ cæteris nocebit. Et primò quidem perturbat operationem rationis, & intelligentiæ, si modum excefferit. Quid enim mens intelliget, vel addiscent, vel rectè concipere animus poterit, ubi eam cruciatus occupat? ubi doloris objectum totam ad se trahit vim intelligendi, spiritus absorbet, & cor aggravat? excitatâ autem procellâ tetricarum cogitationum, & ubi confusa mens naucleri manum ad navis gubernaculum admovet, appetitum submergi est necesse; & secum in interitum etiam trahere voluntatem. Fatigato appetitu, debilitato corpore, nulla virtus placere poterit. Infiget vulnus avaritia, quæ ex tristitia de

inopia nascitur: servandæ castitatis mæror ad libidinem, & voluptates sædè armabit: illatæ sibi injuriæ amara, & solitaria cogitatio, intus iracundiam, & vindictæ furorem accendet: in gloriæ, & privatæ vitæ dolorosa impatentia fomitem tumidæ ambitionis, & auræ evanidæ eriget, qua animus turgens tandem disrumpetur. Ecce quomodo ab unica hac passione omnis in animo plaga exurgat; ecce quomodo unicus in homine mæror seminarium, & scaturigo sit putrida omnium vitiorum, quæ propter monet Siracides Ecclesi. 30. *Tristitiam ne des anima tua, & non affligas temet ipsum in consilio tuo.* Ulterius progressus D. Thomas quæst. 39. art. 1. & 2. docet, tristitiam per se non esse expetibilem, neque prosecutioni, aut electioni ejus liberæ ullam posse convenire honestatem, præterquam per accidens, & ex suppositione: atque honestum, & laudabile per se esse vitare tristitiam, ad eum modum, quo est honestum per se vitare occisionem hominis, inhonestam per se, ac turpem, solumque honestam, ac laudabilem ex accidentali aliqua suppositione, & circumstantia.

Omnium maximè vim suam exerit ad contrahendum cor, venas, & arterias, imò & omnia viscera, atque adeò ipsum etiam cerebrum, quæ partium sese colligentium arctatio fit non secus, ac in vermium corporibus, dum calcantur. Hinc porum sanguinis arteriosi in carnes effunditur, contractis scilicet meatibus; hinc pallor, vultus, & frigus; ruborem enim, & calorem sanguis arteriosus affusus conciliat. Hinc subsidit caro, nasus acuitur, genæ cadunt: frons evadit austera, & aspera, ipsosque super oculos videtur decidere: oculi ex absentia spirituum hiant, ac obscurati, hebetes, languidi, flaccidi, & quasi defatigati maximam poenam in sui defatigatione, videntur subire: supercilia, cum abjectioni animæ conformentur, se penitus etiam occludunt: labra etiam in hac passione albescere, tremere, ac semet contrahere cernimus; præsertim advertitur singularis quædam levis depressio exteriorum partium in labiis, ut adplorandum se expeditum ostendat.

Amant autem dolentes silentium; quod si ad loquendum adigantur, voce depressa utuntur, magis tamen acutâ ob guttur contractius, caput ipsum vel antrorsum modicè inclinatur, vel brachiis cubito fulcitis innititur, denique etiam paululum in humerum dextrum deprimitur: ipsæ quoque manus, ubi aliquantulum elevatae fuerint, subitaneo quodam impetu in ipsa femora deinittuntur, quasi anima easdem elevando se vellet malo opponere; quia verò se impotentem intuetur inopinati mali magnitudine perterrita spem omnem abiicit. Ubi progredi necesse erit, sequetur incessus lentus, atque incertus, propensio insuper ubique con-

confidendi, vel cubandi; facilis somnus, quia contracti meatus facile obstruuntur; modica cibi appetentia; quod, sicut in morbo, cibus difficilius deglutitur propter fibras impeditas; & quod contractiora viscera novum cibum respuant: denique languor in omnibus actionibus elucens nihil nisi manifesta ingentis debilitatis signa prodit.

Singularis effectus luctus sunt longa, & grandia suspiria, quæ anima sibi vendicat, ut iis aliquantum defectum refrigerationis, quem ob contractos capillarium meatus in pulmonibus, & interceptos fuligines patitur, compensare satagit. Solent etiam in lamenta resolvi tristitiâ oppressi, ut hac specie languidi, & miserabilis clamoris magnitudinem sui doloris aliis participant, & se insuper exonerent aliquantulum ægritudine, qua premuntur: tum denique ut hoc medio aliorum auxilium implorent. Et verò omnia ferè animalia præ dolore ejulant, queruntur lamentantur aperto ore, & lamentabili vocis sonò dolorem suum testantur, ut vel ipsos homines ad commiserationem commoveant. Ubi diminuta molestia mediocrem statum observat, permittitur lachrynis libertas, quæ in se frigidiores sunt iis, quas gaudium exprimit. Ratio est, quia hæc à nimia sanguinis arteriosi copia, quo cerebrum per nimiam latitiam turget, ortum trahunt; hinc multum caloris inesse oportet; illæ verò per expressionem puri quasi humoris, seu phlegmatis distillantur: hinc parùm ignis continent. Quia tamen in dolore ex spirituum subtractione facies frigida remansit, calidæ apparent, non secus, ac aqua in se tepida sentitur calida, cum manu frigida tangitur.

Porro lachrymarum fontem Cartesius censet esse vapores oculorum in aquam resolutos, atque nullam esse corporis partem, è qua plures emittantur vapores. Sed tria huic opinioni videntur obstare. Et primò quidem exterior oculi tunica, scilicet sclerotis, duritiæ, crassitiæ, ac densitate superat omnes corporis membranas, ut in animum induci non possit, alias partes, quæ decuplo calidiores, humidiores, ac porosiores sunt oculis, non plus evaporare. Secundò quomodo tanta vis halituum confluere posset ad delicatissimum organum absque notabili damno, tumore, vel luminis jactura? denique non apparet, quomodo modicissimo temporis spatio colligatur ea vaporum multitudo, quæ liquari possit in continuum, & horarium fletum. Melius statuitur cum Isbrando, & aliis compluribus, lachrymas esse serosum cerebri excrementum, quod per ossis cribrosi angustias, aut alios meatus in fungosas narium partes, ac inde per lateralia foramina in oculorum canthos delabitur. Convenienter enim ad hanc hypothesim explicantur omnia, quæ circa lachrymas occurrunt. Sic in tristitia cerebrum nimium comprimi-

tur ; hinc plus humoris in pelvim ex ventriculis exprimitur ; inde per ductus ad nares , & oculos descendit. Sic flentes coguntur emungere frequentius nares ; emunctione verò narium non rarò sistuntur lachrymæ : serum nimirum compressione cerebri propellitur ad ossa spongiosa narium , ibique crassiores particulæ diutius nasum obstruunt , tenuiores verò , vel magis serosæ tamdiu per latera defluunt ad oculos , donec oblatis crassioribus via referetur in nares. Sic pueri , senes , & mulieres ad fletum pronissimi ; quia nempe præ cæteris ex tædio , amore , vel ira tristantur , ac in cerebro copiosò abundant phlegmate. Omitto alia plurima , quæ hanc sententiam reliquis probabiliorem reddunt. Si tamen velis subinde colligi quasdam guttas ex sero per arterias oculorum allato , non habebis me invitum ; modò non omnem serosum humorem in glandulis ocularibus ex arterioso sanguine derivare contendas ; in tristitia enim nimis comprimuntur arteriæ tenuissimæ , ut fontem lachrymarum in multas horas suppeditare possint. Quia verò longiori fletu mitigatur tristitia , vulgaris ratio redditur , quòd unà cum lachrymis pars doloris quasi exhilaretur idcirco Ovidius lib. 4. tristrium.

Est quadam flere voluptas ,

Expletur lachrymis , egerit urque dolor.

Alii potius credunt , expresso humore partes calidi , vel ignis colligi ; hinc calor , & novus vigor succrescit. Quòd si tamen tristitia ad summum ascenderit , tunc etiam fletus coeretur , quod ideo evenit , quia ipsi quoque ductus , qui à glande pelvi subjecta versùs oculos eunt , ita contrahuntur , ut humor traduci non amplius valeat. Insuper anima nimio doloris sensu abrepta obliviscitur suum dolorem his mediis prode-re. Ubi tamen vinò refocillabitur corpus , & mitius sæviet dolor , uberimus iterum lachrymarum fons scaturiet. Nonnulli ex nimia tristitia etiam statu mentis dejecti leguntur , quod commotio nimia in spiritu causata ipsius imaginationis organa alteraverit , ordinemque specierum intentionalium immutaverit , quo factò tum cogitationes , tum verba ipsa prorsus inepta proflire necesse est. Interdum doloris introrsum conclusio spiritum illico intercludit , unaque vitam eripit. Ita Rutilius referente Plinio lib. 7. cap. 36. audità fratris consulatum ambientis repulsà , illico egit animam. Sic scribit Jovius Ruliacum Suevum , cum relatum filii à turcis cæsi cadaver conspexisset , præ dolore mortuum concidisse. Ingruente enim nimium sanguine in cor , impeditur illius motus , & animal suffocatur , non aliter ac in lampade contingere videmus. Sicut enim nimia olei affusione flamma extinguitur ; ita per spirituum , & sanguinis exuberantiam , obstructis meatibus , sanguis in corde stagnare incipiet.



Fulmina cessabunt: lucet spes certa sereni.



cipiet. Unde non rarò post mortem magna vis coagulati sanguinis in cordis ventriculis reperitur. Subinde quod de Pirrho memorant, cor omnino nigrum, & quasi tostum apparet; quia sanguis nimius ad cor congestus humidus, & pinguiore partes absumit. Ob tam multos igitur, & tam tetros effectus homo laborat omni ope tristitiam à se excludere, & quoniam semper aliquem patitur dolorem, idcirco continuò appetit voluptatem quasi remedium.

DISSERTATIO VII.

De spe prima passione appetitùs concupiscibilis.

§. I.

Disentitur natura spei.

E Lucidatis iis passionibus, quæ ad appetitum concupiscibilem reducuntur, examinandæ supersunt illæ, quæ irascibilem facultatem pro parente agnoscunt. Inter has primo loco se offert spes, quam aliqui cum Arriaga in complexo ex actu cognitionis, & appetitionis constituent, induci hac ratione, quod deficiente solo actu potentia cognoscitivæ, id est omni penitus probabilitate obtinendi bonum, etiam spes corruat. At quare non etiam gaudium in cognitione constituent? æquè enim deficit gaudium, ubi nulla cognitio boni possessi præluceat. Dicendum igitur spem consistere in actu appetitivo, præsupponente cognitionem de practica possibilitate obtinendi rem, licet arduam. Appetitio enim boni præsupponens cognitionem arduitatis, nec non futuritionis illius boni, si per appetentem non stet, vel est possibilis, vel non? si secundum: unde ejus repugnantia? si primum: appetitionem istam spem appello. Non enim est actus simplex amoris stricti, aut puræ complacentiæ; nam hæc à consecutione boni præscindit: non gaudium; nam hoc supponit cognitionem boni ut jam possessi; ille autem conatus, in quo spem stare assero, quamvis supponat cognitionem de boni adeptione, si non stet per ipsam personam sperantem, non tamen supponit cognitionem absolutam de boni futuritione: non item desiderium merè tale; nam hoc non prærequirit, ut bonum cognoscatur esse arduum, vel futurum, Quamvis enim ipsa spes sit aliqua concupiscencia, seu appeti-

tus in bonum, ut bonum ipsi speranti; non tamen pertinet hic affectus ad concupiscibilem, sed irascibilem facultatem, cum boni ardui consecutio indigeat robore animi, opusque sit adhortatione simili *Æneid.* 6.

Nunc animis opus Ænea, nunc pectore firmo.

Igitur aliud non est super, quam ut illa appetitio præsupponens cognitionem arduitis, & fruitionis, dicatur esse spes. Ex quibus liquet, spem esse quasi affectum compositum ex desiderio, atque ex opposita abominatione, & æquivalere simultati utriusque, ita tamen, ut prævaleat in ejus conceptu adæquato ratio concupiscentiæ, seu desiderii. Sicut enim sensus provocari solet non tantum dulcedine, suavitate, & similibus lenociniis palati; verum etiam mixtura quadam ex dulcedine, & amaritudine, ex suavitate, & asperitate; & sicut auditus non tantum rapitur voce suavi, & quasi argentea; sed musica composita ex heterogeneis, atque discordibus vocibus; & oculus non modo pascitur coloribus, sed etiam umbris colori admixtis: ita spes fertur ad bonum absens, atque per hoc coincidit cum desiderio. Convenit verò similiter cum fuga, quatenus tendit in bonum sub ratione difficultatis, & ardui, & omnis difficultas, & arduitas in bono offendit, sicut facilitas expetitur. Unde sperant simul, & indivisim ex una parte amplectitur bonum speratum, & tendit ad conjunctionem cum illo atque ad ejus possessionem: ex altera verò parte avertitur ab ipsius boni arduitate, & difficultate, eamque conatur superare, atque funditus evertere per præsentiam boni. Prævalet nihilominus ratio desiderii, cum ob affectum, & adhæSIONem ad bonum contemnatur omnis amaritudo, quæ illi immiscetur, atque intenditur ejus victoria, & extirpatio; non quidem per purum recessum, quod convenit propriè abominationi; sed per congressum cum difficultate & arduitate.

§. II.

De objecto spei.

Objectum spei esse bonum nemo est, qui dubitat. Hoc queri potest, an etiam in bonum non amissibile possit conatus spei tendere. In qua controversia censeo contra Arriagam etiam illum sperare posse, qui metaphysicè certus est de futuritione boni. Non affirmo quidem objectum simpliciter, & antecedenter necessarium posse esse objectum spei; quis enim prudens serio, & efficaciter speret, hominem futurum esse
ani-

animal, Deum esse omnipotentem, aut similia prorsus necessaria? sed sermo mihi est de illo, quod non potest non dari consequenter ad cognitionem spei directricem, licet antecedenter fuerit res merè contingens. Sic communiter dicitur in sanctis animabus purgantibus flammis detentis vigere spem æternæ beatitudinis consequendæ, & tamen hæc non potest ab eis amitti, cum noverint cognitione infallibili se aliquando avoluturas ad recipiendum præmium beatitudinis. Nec obstat; hanc cognitionem esse obscuram, & sua obscuritate æquivalere defectibilitati; quia nihilominus redduntur illæ animæ certæ de absoluta beatitudine futura, utpote innixæ promissioni divinæ, & dubitarent potius de quibusvis aliis evidentiis merè naturalibus, quàm de gloria ventura. Fulcitur hoc exemplum à purgatorio erutum ratione à priori dicta. Quamquam enim affulgeat infallibilis evidentia obtinendi boni, possunt tamen in objecto concurrere omnes conditiones requisitæ ad hoc, ut sit materia spei, scilicet *bonitas, arduitas, & futuritio*, potestque nullum intervenire impedimentum ex parte potentia. De bonitate non est ullum dubium. Arduitas vel consistit in ipsa excellentia boni sperati, vel in eo, quod dependeat ab alterius arbitrio, vel quod obtinendum sit magno laboris pretio, vel in dubia anxietate sperantis. At edic Sodes, quare evidentia illa componi non potest cum bono ingentis excellentiæ, cum eo, quod donandum sit ab aliena libertate, cum eo, quod acquiri debeat profuso sperantis sudore? cur his illa evidentia adversatur? dubia animi anxietas abesse potest perseverante adhuc arduitate, ut contingit in animabus purgatorii, quæ dubia anxietate non vexantur, & tamen adhuc ardua ipsis accidit cœlestis visio, quam non elicient, nisi difficilibus prius exantlatis laboribus. An ex parte potentia impedit evidentia præfata? at non video, quomodo id, quod spe maximè acuit potentiam ad sperandum, spei obicem ponere possit: sed quemadmodum cognitio de non adeptione boni facultatem retardat maximè à sperando, ita clara repræsentatio maximè invitat potentiam ad sperandum, ut docet experientia: igitur alacriores erimus ad sperandum, si evidentior claritas prælucebit. Secundò nihil evinces contra doctrinam datâ hac paritate, quod sicut cognitio alliciens ad amorem liberum, potest crescere ad talem gradum, ut dari nequeat amor liber, sed sit necessarius, ita spes exposcat cognitionem adeptionis in certo, & determinato gradu, quem si excedat, subsequetur alius prorsus affectus. Nam quamvis crescere possit cognitio alliciens, ut nulla libertas perseveret; hoc tamen nonnisi arbitrariè affirmatur de spe, cum hæc possit esse non libera. Hinc sicut cognitio alliciens, licet interdum impediat libertatem amoris, attamen non perimit

mit amorem ipsum secundum se præscindendo à libertate, quin imò potius urget potentiam ad ipsum: ita cognitio acquisitionis, alliciens ad spem, quamvis progrediatur ad clarissimam evidentiam, non tamen opponetur cum spe ipsa secundum se spectata, sed potius eam stimulat, & ad summum pugnabit cum ejus libertate. Neque me terrent, quæ habet Sanctus Thomas 1. 2. q. 67. art. 4. ad 3. in hæc verba: *bonum, cujus jam inevitabilem causam habemus, non comparatur ad nos in ratione ardui. Verè enim propriè dicitur aliquis, quia habet argentum, sperare se habiturum vestem, quod statim in potestate ejus est, ut emat.* Aliud enim est inevitabilem habere causam, quæ nulla mediante difficultate assequetur effectum: aliud, quæ arduitate interveniente illum fortietur. De primo sermo est sancto Doctore, ut ex verbis allegatis apparet: & nos de secundo disputamus, ubi licet causa inevitabilis adsit, potest ea non nisi post plurimos exhaustos sperantis labores terminum attingere, ut contingit in animabus purgatorii sine hæsiōe credentibus futuram aliquando gloriam, nec non in animabus priscorum Patrum in limbo quondam detentorum sperantium pretium suæ redemptionis, quod sine ambiguitate credebant, & denique in Christo Domino certissimè sciente gloriosam corporis sui Anastasii, & tamen illam sperante.

Ex his infero, affectum, qui tendit in malum infallibiliter venturum, non esse sollam tristitiam, sicut spes de bono certissimè acquirendo non est solum gaudium, cum Divinissimus Salvator noster fructus sit infallibili scientia suæ necis, & tamen timore ejusdem non caruerit; nam attestante D. Marco cap. 14. *cæpit pavere*; pavor autem, & timor in quo differunt? quoddam verò cum hoc timore detur tristitia, non repugnat, cum idem Dominus utrumque habuerit affectum, & cœperit *pavere, & cadere*, & dixerit: tristis est anima mea &c. Interea tamen duo fateor, unum est: quoddam, sicut eadem cognitio bonitatis finis potest impellere ad duos actus diversos, unum qui simplex complacentia, alterum, qui sit efficax intentio finis: ita eadem certa cognitio venturi boni excitare potest duos affectus diversos, unum, qui sit gaudium, & alterum, qui sit spes. Erit gaudium in hoc casu quasi actus reflexus, non de eo, quoddam objectum erit, sed de eo, quoddam *certo erit*. Spes è converso non est de eo, quoddam objectum *certo erit*, sed de eo, quoddam suo tempore erit: & quamvis idem sit à parte rei *erit*, & *suo tempore certo erit*; diversi tamen sunt modi exprimendi, quæ diversitas sufficit ad actus diversificandos, ut frequentissimè accidit, cum circa easdem res soleamus elicere actus valde diversos. Alterum, quoddam concedo est, non
posse

posse nos sperare bonum ut conjunctum cum infallibili cognitione, quia sic est prorsus necessarium: nec etiam possumus illud sperare conatu absolute efficiente ipsum. Interea tamen male concluditur non posse nos sperare bonum spe ex se, & in actu secundo causatura bonum, si, ut fieri posset, abesset infallibilis ea præcognitio. Quod si intuleris spem illam saltem fore inefficacem, utpote supponentem bonum aliunde existiturum, concedam de inefficacia effectiva, absolute in actu secundo; sed abnuentem me habebis de inefficacia affectiva, & causativa sub hypothese, quod non præfulserit infallibilis ea cognitio, ut poterat pro priori abesse ad alium actum spei, qui esset ejusdem moraliter speciei cum isto, quamvis pro priori debeat dari ad actum istum individuum, utpote directum per infallibilem illam cognitionem.

§. III.

An, & qua arduitas requiratur ad spem?

ARduum in præsentī idem est, quod altum, excelsum, accessūque difficile juxta versus illius, qui de Poliphemo 3. Aeneid. canebat:

Ipsē arduus, altāque pulsāt

sydera.

De hac jam pronuntio arduitatem quidem requiri ad objectum formale spei, quatenus illud non movet ad affectum pugnacem prosecutivum, nisi objecti, in quo illa reperitur: sed hinc non colligitur illam esse adæquatè, vel inadæquatè objectum formale spei, sed tantum esse conditionem requisitam ab hac in objecto materiali. Sic tamen quantitas neque adæquatè, nec inadæquatè sit objectum formale visus, cum hoc sit solus color, & lux; nequeunt tamen movere ad videndum, nisi objectum sit quantum. Et ideo scripsit S. Thomas 1. 2. q. 25. art. 3. *Dicendum, quod arduum non est ratio appetendi, vel accedendi potius bonum.* Ratio hujus eruitur ex eo, quod objectum motivum affectus prosecutivi, ut distincti ab averfativo debeat ad illum affectum movere: sed arduitas non potest incitare ad affectum prosecutivum, sed suapte natura potius ab eo retrahit, cum ipsa non sit bona, & ipsam bonitatem potius asperitate aliqua inficiat: solum igitur requiritur, quatenus novum decus, novaque jucunditas accrescit ipsi ex arduitate debellata. Hinc phrasēs illæ, quod magnitudo ipsa bellici conflictus acuat martiales animos, ut se illi ingerant, quod arduitas actionis gloriose animo-

rum generosorum excitet voluntatem ad actus heroicos; hæ, inquam, & similes phrasæ pulchræ sunt tantum Oratoribus concessæ: Philo-
sophis verò non est licitum iisdem uti, quia denotatur per illas, quòd diffi-
cultates per se formaliter, & immediatè, atque in sensu positivo alli-
ciant, invitentque animum fortem, & gloriæ avidum, cum tamen in
sensu solùm negativo & mediato moveant, quatenus nimirum illorum
absentia prohiberet victoriæ jucunditatem, & quatenus necessariæ sunt
ad aliud, quod per se immediatè allicit ad jucunditatem obstacula trium-
phandi. Si tamen in ipsa spe velis ingredi latissimos campos formalita-
tum, & distinguere inter tendentiam prosecutivam, & averfativam, da-
bo tibi, quòd arduitas possit esse objectum formale spei, quatenus est
tendentia averfativa, & contemptiva ardui sui obicis; sed plerumque
solis actibus prosecutivis attenditur, atque idcirco solemus dicere obje-
ctum formale actuum esse id, quod movet ad illos. Necessaria nihil-
ominus est in spei passione arduitas, ut colligitur ex Aristotele 2. Rhetor.
cap. 5. in quam etiam doctrinam frequentissimè eunt reliqui, qui non
student nova comminisci vocabularia. Eruitur hoc ex eo, quòd omnis
actus participans rationem fortitudinis tendat in arduum, cum propria
fortitudinis materia sit difficultatem vincere: omnis autem nifus spei ha-
bet aliquid de fortitudine. Quemadmodum enim desperatio est pusilla-
nimitas quædam, vel difficultatibus cedens, vel minora bona eò quòd
facilia sint, præponens majoribus: ita spes est generosus quidam impet-
us repellens difficultates, nec non blanda bona minora, quæ majoribus
adversantur. Et certè qui in corde interno legere posset hujus affectus
naturam, inveniret, differri bonum, quod efficaciter anhelamus, sine
dubio cruciari animum. Ideo Angeli in statu viæ, & homines in statu
innocentiæ poterant sperare beatitudinem, quia utriusque incerta, nec
illico danda; Deiparæ verò etiam ardua fuit, tum propter dilationem,
tum quia dependens à magnis angoribus prius exantlandis. Cum igitur
omnis res futura secum trahat dilationem, hoc ipso bonum à spe ve-
hementer exoptatum reddet illud obtentu difficile. Notissima est Salo-
monis sententia Prov. 14. *Spes, quæ differtur, affligit animam.* Ean-
dem torturam desiderij efficacis dilati in posterum explicat etiam David
Psal. 12. his verbis: *Usquequo Domine oblivisceris me in finem?* & alii
&c. Hæc autem arduitas, quam spes requirit, non est quæcunque,
sed consistit illa in certis quibusdam gradibus, qui soli Deo innotescunt,
quique sufficiunt ad reddendum vigorosum affectum, non autem ad
ipsum prorsus extinguendum; sicut propinquitās objecti, quam requirunt
oculi, non est quæcunque; nam summa certè officit; sed media quædam
& proportionata.

At

At verò video jam diu expectari, ut tandem explicem, in quonam prædicta arduitas consistat. Aio igitur, eam nec determinatè consistere in eo, quòd bonum obtinendum sit auxilio, vel beneplacito alterius: neque determinatè in eo, quòd bonum hoc sit in se ipso excelsum; sed consistit vagè in quovis inducente dolorem, laborem, timorem, anxietatem, vel dilationem in adeptione boni prædicti. Non nego, dependentiam ab alieno arbitrio esse interdum obicem sufficientem, quippe quæ incertitudinem, torturamque gignere potest; solum ostendo non esse determinatè requisitam. Velenim arduitas eatenus consisteret in ista dependentia, quatenus hæc redderet bonum incertum propter indifferentiam, quam habet arbitrium alienum? at potest dari ista dependentia absque incertitudine, quandoquidem animarum, quæ ignibus emendatoriis eluunt maculas in hac vita contractas, felicitas pendet ex arbitrio divino, & tamen illæ non torquentur incertitudine. Vel quatenus dependentia ab aliena ope reddit objectum arduum? sed hoc repugnat veritati; quis enim dicat, inflammationem pulveris nitrati admo-
to igne rem esse arduam, & materiam spei; licet hæc pendeat absolute ex aliquo concursu alieno, nempe ex generali Numinis supremi concursu? vel quatenus sola dependentia ab alieno *speciali* auxilio sit talis, quæ arduum reddat objectum? sed neque hoc potest admitti; tum quia non solum possumus sperare ea, quæ pendent ex auxilio Dei speciali; sed etiam ea, quæ solam nostram industriam requirunt, uti est victoria de hoste insigniter valido, adeptio doctrinæ præstantis &c. tum quia, si Deus in primo instanti promitteret, se in secundo largiturum felicitatem omnino liberaliter, absque minimo onere, gloria non haberet arduitatem sufficientem ad sperandum, & tamen penderet ex specialissimo Numinis auxilio: igitur arduitas non consistit universim in dependentia ab alieno auxilio. Sed neque consistit arduitas in sola boni excellentia, quamquam hæc ad spem requiratur, cum spes non possit esse de bonis levissimis, sicut timor non est de malis exiguis. Evincitur hoc ex duplici capite, tum quia etiam bona, quæ in se, ac in nostra æstimatione sunt levia, possunt esse obtentu difficilia, atque idcirco deferuntur, quòd pluris stare soleant, quàm valent: tum quia bonum valde exitium potest esse non arduum. Ita si quis tibi in primo instanti promitteret, se in secundo largiturum maximas divitias absque ullo onere subeundo; divitiæ non essent laboriosæ consecutionis, nec aptum spei objectum, & tamen nemo inficiabitur esse ingens bonum: igitur arduitas neque semper in excellentia boni consistit, sed potius dicendum, omne illud rem asperitate obsepere, quodcunque inducit laborem, do-

lorem, timorem, anxietatem vel dilationem boni, quia hæc omnia red-
dunt objectum non nisi caro pretio, & laborioso conflictu assequibile.
Ideo interdum objectum est arduum ratione solius laboris physici, ut vi-
ctoria de hoste robusto, acquisitio profundissimæ doctrinæ &c. interdum
ratione pœnalis doloris, & timoris, ut beatitudo respectu hominum
extra patriam constitutorum: interdum ratione solius dilationis, ut re-
demptio animarum olim in limbo degentium post peccata diluta: inter-
dum ratione anxietatis, atque incertitudinis, ut extractio sortis inter
multas inclusas. Hæc incertitudo rursus profert copiosam arduitatis
segetem subinde enim oritur ex eo, quòd res rarò accidat; vel quòd plu-
res sint modi illam remorandi, quàm inducendi, ut primi senarii in luto
talorum; vel ex eo, quòd res prorsus dependeat ab alieno arbitrio.

§. IV.

Qua ratione objectum spei debeat esse futurum?

Objectum spei aliquo modo futurum esse oportere ex eo clarescit, quòd
spes ex propriis terminis denotet viam, & conatum appetitûs ad bo-
num consequendum, qui motus, ne sit præposterus, apertè probat, ac-
quisitionem aliquo modo esse futuram. Sed labor non modicus insur-
git in ipsa futuritione explananda. Terminus iste complexus duo invol-
vit; præsentem nimirum absentiam, & existentiam venturam; unde
duplex modus insurgit, unus contra absentiam, alter contra existen-
tiam, quam habere debet objectum spei. Absentia dupliciter accidere
potest: primò physice ex parte rerum, quatenus non existit objectum
à parte rei, in quo spes datur. Secundò intentionaliter, quatenus sive
reperiatur à parte rei, sive non, in mente tamen sperantis non existit, &
hæc iterum vel potest esse positiva consistens in cognitione vera vel falsa
affirmante non existere objectum spei: vel potest esse intentionalis absen-
tia merè negativa consistens in sola carentia cognitionis enuntiantis exi-
stere illud objectum. Istis positis aio, ad objectum materiale spei non
requiri, ut indispensabiliter secum trahat absentiam physicam objecti.
Permoveor ad hoc sentiendum ex eo, quia supposita invincibili ignoran-
tiâ circa rei absentiam possum actu prudente, & irascibili erigere ani-
mum ad colluctandum cum molestiis tenaciter apprehensis, sicut Tro-
janus Æneid. 6. corripuit ferrum adversus inanes umbras:

Strictâmq; aciem venientibus offert.

Et

Et actu quidem prudente ita ferri possum, tum quia prudentiæ humanæ non repugnat ignorantia veritatis alicujus re ipsa existentis; tum quia eodem tempore, quo existit motus in rem, potest res ipsa existere, ut ultima dispositio ad formam cum ipsa forma, actio creata cum suo termino &c. Irascibili autem actu, sive fortitendere possum, quia ad fortitudinem spectat non tantum lucta absoluta, & effectiva cum obstaculis, sed etiam affectiva, vel ut magis scholasticè loquar, sollicitatio subjektivè absoluta, & terminativè conditionata contra ipsam, si forte occurrant. Neque ad spem requiritur futuritio intentionalis positiva, quatenus enuntietur non existere objectum; sed sufficit purè negativa consistens in carentia cognitionis proponentis objectum ut præsens. Non requiritur prior, quia ineptum esset anhelare seriò in consecutionem illius, quod antecederet prævidens existens independenter à tuo conatu: & sufficit posterior, quia eo ipso, quod objectum proponatur ut obtinibile, & pro priori non ostendatur ut existens independenter ab illa, possumus ferri in ipsum actu forti, si cætera non desiderentur requisita.

Et ista de prima futuritionis parte, scilicet de absentia objecti: descendendum nunc ad secundam, nimirum existentiam ipsam futuram, ubi iterum difficultas insurgit in assignatione futuritionis, quænam nimirum sufficiat, & requiratur in objecto. Judico inprimis futuritionem non debere esse physicam ex parte rerum; nam quamvis objectum à parte rei neutiquam sit futurum, v. g. ut omnes omnino culpas, quamvis minutas, evitemus per totam vitam, potest invincibiliter cognosci ut futurum, & eo ipso reliquis suppositis poterit sperari. Neque requiritur cognitio absolutè certa enuntians futuram rei existentiam; fac enim hoc esse necessarium; fieret igitur, ut beatitudinem æternam sperare non possemus, ad quod tamen tenemur, cum juxta Scripturæ C. Tridenti, & patrum testimonia non præluceat sine speciali revelatione tale judicium. Similiter hæc futuritio neque consistit in cognitione diætante probabiliter futuram rei existentiam, quòd ita tenderet: *probabile est, me adepturum tale bonum*; quia sine hoc potest dari sufficiens futuritio in objecto spei. Ponamus enim, quòd Deus in pœnam scelerum revelet Petro absolutam suam damnationem, & illa credatur per actum fidei; in hoc casu non potest dari judicium illud verè, & simpliciter enuntians probabilitatem futuræ beatitudinis; & tamen datur sufficiens futuritio in objecto spei. At, inquires, in quo tandem constituenda erit hæc futuritio? assero in hoc complexo, partim, quòd homo cognoscat sibi concessam esse plenam, & sufficientem potestatem adi-

piscendi bonum speratum, & partim in eo, quòd non habeat cognitionem absolutè enuntiantem tale objectum nunquam exstiturum. Qui enim caret hac cognitione, & ex altera parte agnoscit in sua manu esse consecutionem boni, cur nequibit illud sperare? si autem tale bonum sperare poterit, hoc ipso dabitur futuritio, quam spes in suo objecto exigit. Hinc etiam potest quis prudenter, & efficaciter intendere finem, quin prius expendat, sit, nec ne probabiliter ille assequibilis; sed sufficit expendere, sit, nec ne in suis viribus adipisci illum finem, nec dari certam cognitionem de non consecutione ejusdem independentè à potestate illum intendendi. Quo circa inter hanc cognitionem: *possibilis est victoria temptationis*, & hanc: *probabile est, me eam superaturum*, mediat hæc: *sufficientem habeo potestatem triumphandi super eam, si voluero*. Primam rejicio ut imparem ad spem concipiendam: secunda necessariò non requiritur, quamvis sufficiat: tertia, quæ major est, quàm prima, & minor, quàm secunda sufficit, & requiritur. Nam ostendat mihi aliquis, quidnam ex capite futuritionis desit homini illi, qui ex una parte certus est de plena potestate aquirendi bonum, & ex altera non habet firmum antecedentem assensum de eo, quòd sit abusurus ea potestate; assensum assero independentem ab ipsa libertate ad sperandum. Si enim eum habuerit pendente ab ea libertate, nihil obesse poterit, quoniam hujusmodi assensus non potest perimere futuritionem, quam supponit eo ipso, quòd præsupponat proximam sperandi libertatem. Solum dubium superest, an revelatio absolutæ damnationis facta cum evidentia in attestante stare possit cum libertate ad spem futuræ beatitudinis, ad quod affirmativa responsio est reponenda. Libertas enim est plena potestas, ne existat actus spei: igitur est potestas efficiendi, ne unquam in Deo fuerit visio illius: igitur faciendi, ne unquam in Deo fuerit decretum ad singularem hanc revelationem, quod prærequirit visionem illius spei: ergo faciendi, ne unquam fuerit illa revelatio externa derivata ex illo decreto: ergo à primo ad ultimum hæc evidentia est antecederet vitalibilis per libertatem creatam, & ideo solum est necessitas consequens, quæ libero arbitrio non opponitur.

§. V.

De accommodis ad sperandum subjectis.

AD sperandum idonei sunt, qui facillè sibi persuadent, non de fore subsidia

sidia adipiscendæ rei necessaria, vel rem esse venturam. Propterea notavit Aristoteles 2. Rhet. cap. 2. Juvenes esse bonæ spei. Eadem nempe ratione natura juventuti providit de bonâ spe, bonâque nutritione; sicut enim indiget augmento machinæ corporeæ, ita opus est ipsi adeptio-
ne plurimorum bonorum, quibus nascitur spoliata. Utrumque autem consecuta est providentia per eadem adminicula, largiendo scilicet juvenibus maximam caloris abundantiam, quæ sicuti confert ad digestionem nutritivam optimè peragendam, ita pariter prædest ad spei ardorem accendendum. Obtinet verò hunc secundum finem duplici methodo. Primò, quia magnitudo caloris diffusi per totum corpus vegetiora reddit omnia ejus membra, robustiusque disposita ad amolienda obstacula in opere intercurrentia, quæ dispositio causæ operantis non potest non plurimum conferre ad spem fulciendam. Deinde idem excessus caloris vitalis conducit ad majorem bonitatis rerum appetibulum apparentiam. Quatenus rarefactis spiritibus, & organo, impressæ appetibulum species illi insidentes diffunduntur & ipsæ in majus spatium, ideòque quodammodo augentur, redduntque majorem objectorum suorum apparentiam. Nihilominus quia ob experientiæ defectum præluceat juvenibus minor obstaculorum apprehensio ante operis executionem, ita quàm celeriter in illis spes exurgit ante operis aggressionem, tam facile torpescit in ipso operis progressu ejusdem efficacia usque ad completam difficultatum victoriam, & boni sperati præsentiam. Quippe sicut bonitas rei desideratæ movet appetitum ad prosecutionem, & ad perseverantiam, ita arduitas, quantum est de se labefactat appetitum, quo minus ad bonum aspiret, & quo minus prosecutioni inhæreat. Ubi igitur ad initium parva asperitatis apprehensio affulgebit, spes facile ingruet; sed deponetur inde pari cum facilitate, quando in ipsa operis executione laboriosæ molestiæ per experientiam magis innotescunt. Ubi verò ab initio prævit æstimatio jussu impedimentis commensurata, spes in operis exequutione constantissimè firmabitur, nulla nimirum superveniente apprehensione, quæ in progressu operis à spe præponderante deiciat. Quod de juvenibus, hoc idem statuit Philosophus de ebriis 3. Ethic. c. 8. ob eandem caloris abundantiam, quam in eos inducit vini copia, eoque majorem, quo potentius hoc est, atque calidius. Suffragatur Flaccus lib. 1. epist. ad Torquatum, ubi sic ait de ebrietate:

Spes jubet esse ratas, in prælia trudit inermem.

Intercedit tamen hæc differentia inter ebrios, & juvenes, quòd posteriores in ipsa operatione advertant difficultatem ab initio absconditam; ebrius verò ne dum quidem ad eam attendat. In senibus maximè deplorandus

randus est stultus conatus, quo longius vitam protrahere allaborant, etsi mors illorum vultus jam occupet. Deperdunt quotidie usum aliqujus membri; non vident objecta, nisi ope perspiciliorum; non audiunt, nisi subobscure; non moventur sine dolore, & omni suo motu impingunt in nova signa inevitabilis ruinæ; & tamen, quia primi patrum nostrorum vitam in plura sæcula extenderunt, ideo etiam ipsi credunt se posse innumeris cautelis adhibitis mortem effugere: sperant gavisuros se privilegio concesso paucissimis ab innocentia statu non tam longè remotis. Desiderant longiorem vitam, ac si incommoda senectuti infallibiliter annexa non cognoscerent. Omnia reliqua mortis genera quacunque spe permiscuntur: desinit febris post aliquos paroxysmos: maria in littus eijciunt, incolumes quos hauserant: miles pietate commotus ab ipsa perituri cervice gladium revocat, veniamque inimico largitur. Solus nihil habet, quod speret, quem senectus ad mortem ducit, & reges, qui reis vitæ usum largiuntur, eundem senibus concedere non possunt.

§. VI.

Quinam succrescant effectus ex spe?

Spes effectus adeo insignes numerat, ut Philosophi aliqui Græcis Elpisti dicti, vitam spe potissimum contineri affirmaverint; eaque & oblectatione illam consequente abscissa vitam negabant fore tolerabilem. Et primò quidem spes est universalis stimulus, & condimentum ejusvis boni; sine hac nemo quidquam illustre susceperet, quilibet labores defugeret. Hæc Alexandrum magnum impulit, ut se ad universum orbem armis subigendum accingeret. Hanc Cæsar consuluit, quando apud se constituit, Reipublicæ Romanæ statum immutare, & prosternere potentissimam illam dominam, quæ omnibus terræ populis pro arbitrio reges præfecit. Hæc Æneas apud Virgil. Socios animo dejectos inter decumanos fluctus iterum erexit, ubi egregie exclamavit:

*O Socii (neque enim ignari sumus ante malorum)
O passigraviora: dabit Deus his quoque finem.
Vos & Scyllæam rabiem, penitusque sonantes
Accestis scopulos: vos & Cyclopea saxa
Experti; revocate animos, maestumque timorem
Mittite: forsan & hæc olim meminisse juvabit.*

*Per varios casus, per tot discrimina rerum
Tendimus in Latium, sedes ubi fata quietas
Ostendunt: illic fas regna resurgere Troja.*

Omnes duces sunt spei mancipia, & ambitio, quæ plura scelera imperavit, vires suas, sua consilia ab alio non recipit, nisi à spe incitante. Neque ita propria est hæc passio principibus, ut non in subditis quoque dominetur, & favores suos diffundat etiam in infimam, & infelicissimam hominum conditionem. Spe messis agricola agrum excolit, spe lucri mercator æstuantia trajicit maria, spe prædæ miles sollicitatus cruenta subit prælia. Etsi eventus dubius, etsi promissa sint incerta, omnes tamen spei imperiis obediunt, numeratque illa plures subditos, quam omnes Monarchæ simul sumpti, cum æque isti ac plebei homines à nutibus spei dependeant, & eundem successum expectare cogantur. Id quod magis obstupefendum est, creditur ipsi, postquam sapissimè mendaciis decepit: tam nervosè proponit nova promissa, ut omnino commoveant ad novos labores suscipiendos, ad nova pericula spernenda. Etsi hoc anno infelix ager proventum non tulerit, conatur agricola infestissimo sudore sterilitatem illius sequenti superare: consendunt naucleri post naufragium easdem naves, & spe decepti obliviscuntur perfidiæ aquarum, & tempestatum: restaurant milites certamina, postquam per agros fuerunt gregatim dispersi, & inimicos de novo aggrediuntur, fiducia pleni, lassandam fore fortunam in hoc, ut eidem semper parti faveat. Subinde tamen contingit bonum speratum usque ad eò esse propinquum consecutioni, & ejus possessioni, ut parùm necesse sit operari pro ejus adeptione; & tunc sequetur spes magna, & modica operatio, non ex defectu spei, aut inefficacia ad operandum; sed quia necesse non est multum vires atterere, atque ideo sortitur magna spes apparentiam negligentis. Re ipsa tamen eo quisque efficacius, ac intensius incumbit operationi necessariae ad consecutionem finis, quo ejus præsentia magis appropinquat, juxta illud, motus in fine velocior.

Alter effectus internus est, quod labores ratione boni desiderati susceptos suavissima consolatione recreet. Sicut enim tristes amæno, & spatioso camporum, vel pulcherrimarum rerum prospectu demulcentur, & eriguntur: ita qui ærumnarum cumulò afflicti lugent, cum per spem futura contemplantur, animum consolatione mirificè levant. Ad illustrandum hoc non ineptè quadrat collatio spei, cum lapide pretioso. Sicut enim margarita, vel gemma pellucida est; sic spes est quodammodo diaphana, & per eam videntur meliora, & ideo scribitur proverb. 17. gemma gratissima expectatio præstolantis. Sicut ergo olim solemne

fuit per lapides pretiosos, perlucidos, & grati coloris alia spectare, (tradit enim S. Isidorus Neronem gladiatorum pugnas interposito virenti smaragdo spectare solitum) ex quo fiebat, ut cuncta eodem colore imbuta oculis sese offerrent, & jucundius spectaculum redderetur: ita spes est instar lapidis pretiosi, pulchri, & perlucis, qui objectus oculis bona ventura ostendit, & cor ingenti letitia afficit. Unde Sapiencia de ipsis etiam Martyribus dicit: *Spes illorum immortalitate plena est*, id est bene tineta, seu imbuta viridi immortalitatis colore, quo viridia etiam, gratique aspectus ipsa redduntur tormenta. Alii dicunt non ineleganter spei vim ad boni possessionem se habere, non secus ac odoratus ad gustum. Quemadmodum enim odoratus gustui præpositus esculenta, & poculenta fermè præjudicat; ita spes etiam à liberalissima Numinis manu comparata videtur, ut futurum bonum quasi prægustet, idque animo commendet. Scimus, autem, quòd cum quis in itinere conficiendo fame, vel siti correptus est, si repentè fontes viderit, aut arbores, omnis generis suavibus onustas fructibus, tametsi nihil hauserit, talem tamen ipsa fruitionis spe impleri. Et censebimus, nos corporis quidem alimentis ante usum pasci posse, mentis verò cibos idoneos non esse ad nos exhilarandos? rectè ergo de superstite hac semper in quibusvis ærumnis dulcedine scripsit poëta l. 2. eleg. 5.

Spes etiam valida solatur compede victum:

Crura sonant ferro, sed canit inter opes.

Exteriorem corporis transmutationem spes non adedò magnam procreat; cum enim spes sit affectus compositus ex bono, & malo, transmutatio proveniens ex passione circa bonum opponetur transmutationi, quæ provenit ex connisu circa malum, & sic una alterius motus de se inducendos impedit. Verùm quia nihilominus ratio boni prævalet in objecto, & quia in spe delectatio præponderat tristitiæ, vel timori; ideo inducet transmutationem similem transmutationi, quæ consequitur ad delectationem. Diffundentur nempe spiritus vitales, & sanguis per omnes corporis partes, quas proinde fortiores reddunt ad operandum cum majori vigore. Hinc in illa erigitur corpus, caput attollitur, assurgunt supercilia, vox firmior evadit, sit certus, ac minimè vacillans aspectus cum magna palpebrarum apertura, vivacitate, quiete, & firmitate, ut melius scilicet & bonum desideratum, & difficultates obstantes perspiciantur. Ne autem aliquis existimet, animam magnitudine difficultatum percussam esse, solitò magis palpebras diducit, suumque obtutum firmat. Pulsus firmus quidem, sed minimè præceps: hinc demum facultas ad agendum vegetior, ac robustior. Ut enim humores plus æquo



Una Salus miseris nullam sperare Salutem.



agitati vires frangunt, ac dissipant, fibrasque organorum ad obeunda sua munera minùs aptas relinquunt; ita etiam nimia fibrarum contractio, & ut sic loquar, humorum concentratio vim omnem animalis extinguit, atque prosternt. At spei motus medium tenet, ac proinde humores nec plùs æquo agit, nec fibras nimum tendit, aut vasa contrahit; sed omnia aptum situm obtinent ad hoc, ut iis motibus deserviant, ad quos ciendos à natura sunt destinata. Vultus tum dulcedine, tum severitate quadam perfundi solet propterea, quòd eodem tempore & bonum, & malum simul anima videat. Oculi vivacitate pleni huc illuc contorquentur, quòd sperantes tum desiderio, tum timore urgeantur. Credulitas, quæ etiam multa promittit, magnam causat loquacitatem, & suspiria crebriora videmus elici, effectus scilicet amoris, & desiderij.

DISSERTATIO VIII.

De Desperatione.

§. I.

Excutitur natura desperationis.

Natura hujus passionis obscurissima esse videtur, cum perspicui satis non possit, quid sit appetitum desperatione frangi. Vulgaris existimatio cum aliquibus doctis nominatim Almaino confundit desperationem cum judicio de non consequenda bonitate, quod ita tenderet: non possum absolutè consequi hanc felicitatem. Vel in hac: non consequar prudenter felicitatem. At aliter vulgus, aliter Philosophi res inspiciunt. Non potest desperatio consistere in secundo judicio; nam sic desperatio non foret peccatum: neque in primo; licet enim ex illo oriri possit actus appetitus, qui est formaliter desperatio, ille tamen in se ipso non est desperatio, sed hæresis, inducens ad desperationem: sicut judicium de practica possibilitate obtinendi beatitudinem non est in se ipso spes, sed aliquid ad hanc alliciens. Sed neque consistit desperatio in omissione spei, aut in quavis reflexa nolitione sperandi. Quemadmodum enim hæresis formalis non consistit immediatè vel in sola omissione assensus præcepti, aut in positiva nolitione eliciendi hunc assensum; cum fieri possit, ut homo nulli articulo fidei dissentiens omitat assensum,

sum, vel positivè hic & nunc eum nolit elicere, non quòd in eo deprehendat falsitatem; sed propter voluntariam distractionem ad alia objecta, vel ob alia motiva: ita contingere potest, ut homo minimè desperans bonum, omittat hic, & nunc spem, aut eam elicere positivè nolit, non quidem propter arduitatem, diffidentiam, aut minorem æstimabilitatem; sed quia alio vult distrahere animum. Tertiò natura desperationis non bene constituitur in nolitione, & fuga boni, de quo desperatur; nam objectum illud potest intensissimè amari à desperante, qui, si interrogaretur, velletne, si posset, bonum illud obtinere, haud dubiè annueret, quod non cohæret cum efficaci repudio illius. Hoc præsertim videtur manifestum in iis, qui præ vehementissima boni alicujus cupiditate, præclusum sibi aditum ad illud deprehendentes à resti petunt remedium, & levamen tristitiæ, qua opprimuntur. Ea enim tristitia pullulat ex amore boni, cujus affectio desperatur, ac proinde bonum illud non habetur odio à desperante. Quid, quod potest quis desperare affectionem boni, quod odisse non potest? nemo enim odisse potest æternam beatitudinem, quamvis de ea consequenda multi desperent. Quare, si in probabiliori sensu nolitio ardui, recessusque ab eo dici potest desperatio, tunc hoc contingeret, quod appetitus negligat usurpare media, eo quòd prænoscantur fore inutilia ob nunquam secuturam boni adeptionem. Quò minùs tamen existimem plenè hac ratione exponi naturam desperationis, facit in primis, quòd actus iste non versetur immediatè circa bonum, de quo est desperatio, sed circa electionem mediorum ad ejus affectionem tendentium, vel circa actum spei de eo in posterum eliciendum, cum tamen desperatio æquè, ac spes debeat esse directè de bono. Deinde potest aliquis desperare, quamvis nolitionem frustra se fatigandi non eliciat, ut constat ex casu, quo quis desperat de bono, quod prius confidebat sibi obventurum ex mera alterius voluntate, nullis per se ipsum interpositis mediis. Igitur concludendum, desperationem esse actum aliquem appetitùs, quo refugit bonum, ut sibi impossibile, vel ut difficile obtentu, & quasi dicat:

Non est tam magno digna labore salus.

In hac descriptione habetur prosecutio boni, quæ in desperante quæritur, & bonitas rei constituet objectum materiale: objectum autem formale illius est vel impossibilitas, vel difficultas illius boni superans vires proprias.

Ex quibus infertur differentia inter spem, & desperationem. Quando enim ratio bonitatis arduæ, ac difficilis prædominatur laboriosæ difficultati, tunc exurgit in appetitu sensitivo spes, & accessus; quan-

do autem apparet idem bonum ut obnoxium summis difficultatibus, & defectus prævalet ad inducendum bonum speratum, tunc deprimitur idem appetitus & exusta spe, insultabit desperatio. Sicut enim in affectibus spectantibus ad appetitum concupiscibilem ad affectum prosecutionis necessaria est prævia propositio, & ad affectum fugæ prævia mali ostensio: ita pariter in affectibus facultatis irascibilis præluere debet bonitas præminens asperitati, ut procreetur affectus accedendi, sive talis, in quo præcellat ratio prosecutionis; ut verò proliciatur affectus recedendi, seu in quo præmineat ratio fugæ, similiter necessarium est, ut prævia propositio malitiæ obsequentis exsuperet bonitatem rei desideratæ, aut bonæ dispositionis in eadem causa. Cum igitur in affectu spei prædominetur ratio prosecutionis, & in desperatione ratio abominationis, & repudii, oportet, ut cognitio dirigens affectum desperationis repræsentet arduum delectabilis, ut præponderantem bonitati ejusdem delectabilis. A simplici autem fuga differt, quòd hæc avertat à malo absente, & imminente; desperatio autem à bono obtentu minimè probabili.

§. II.

Qui ad desperandum maximè accommodati sunt?

AD desperationem maximè opportuni sunt, qui ob pectoris angustiam, & animi dejectionem facile adducuntur, ut bonum propositum impossibile judicent, vel certò impediendam ejus assecutionem. Hoc autem facile accidit atrabilariis, & melancholicis; his enim omnia quasi tenebrescunt, & vix assurgunt ad grande aliquid, sed facile consideratione difficultatum concidunt, animòque relinquuntur, vel à mali gravitate, & pondere oppressi à resti remedium, & levamen petendum judicant. Advertit hoc Philosophum, qui sect. 3. problem. q. 1. ita atræ bilis habitum expressit: causam verò tam variæ potestatis ipse habitus dat, scilicet prout frigidus, calidusque constiterit. Nam si ultra modum frigidus sit, molestiæ anxietatesque sponte sine ulla ratione nascentur, ex quo mortem laqueo sibi consciscunt, maximè quidem juniores; interdum tamen & seniores. Et paulò infra ita prosequitur: non desunt, quos angor inter potandum eadem illa de causa comprehendat, qua etiam post potum non nullos occupat. Quibus igitur calore emarcescente, oritur ægritudo, ii sibi laqueum potius petunt. Quare juvenes potius, quàm senes laqueo se interimunt. Alteris enim calor per ætatem mar-

cescit, quod naturæ agitur ordine: alteris per vim ipsius affectus, quod contra naturam est. Quibus autem calor extinctus subito est, ij repente se interficiunt, ut omnes mirentur, eò quòd nullum indicium præcenserit. Cum igitur atra bilis perfriget, ut dictum est, varias animi molestias, & anxietates gignit. Calidior autem cum est, securitatem, & lætitiā præstat. Quocirca pueri lætiores; senes tristiores esse consueverunt: alteri enim calidi, alteri frigidi sunt, quippe cum non nisi refrigeratio quædam sit ipsa senectus. Accidit verò, ut calor subito causis quoque externis extinguatur; quemadmodum quæ præter suam naturam candent, ceu carbonēs aqua superinfusa extinguuntur. Facile etiam animi dejectionem sentiunt, quos crebræ anteriores calamitates animo elumbes reddiderunt, quia facile persuadentur, eundem fore exitum cæterorum negotiorum. Abiectionem etiam animum gerunt, qui ardentiori procuratione anhelant ad bonum aliquod v. g. ad gloriam, vel famam, ad quod spectat, quod scribitur de Palatino, cui Boleslaus Tertius Poloniæ Rex leporis pellem, colum, fufum ad ignaviæ exprobrationem transmissit. Cum enim vir gloriæ cupidissimus eam ignominiam non concoqueret, laqueò vitam abruptit. Franguntur etiam facile ignavi, quia facile apprehendunt supra vires suas esse, quod infra jacet. Quamquam desperatio ita ab ignavia exoriatur tanquam radice, & matre, ut simul ignaviæ pabulum subministret. Quemadmodum enim in cadavere tabes parturit vermiculos, quæ ab iisdem iterum augetur: ita ignavia desperationem fodiat, & ab illa mutuo nutritur, adeoque dum servant inter se vices dandi, accipiendique confirmantur in potentiam, haud mediocrem.

§. III.

Defenditur desperatio à calumniis.

EX omnibus affectibus nullus maioribus laudibus fuit elatus, nullus pluribus oneratus ignominiiis ab antiquitate, quàm desperatio. Judicatum est, eandem esse extremum virium conatum in arduis illis hominibus, qui sibimetipsis violentas intulerunt manus, ut libertatem conservarent; qui ferro aut venenò usi sunt, ut se à molestia victoris inimici liberarent. Poætæ, & Oratores omnes eloquentiæ suæ thesauros adhibent ad describendam Catonis mortem, & deformitatem hujus actionis adeò extollunt, ut nisi religio nobis eandem ostenderet tanquam scelus

execrabile, facile inter actiones heroicas collocaretur. Nunquam Seneca ita virtutem encomiis ornavit, prout hanc temeritatem pro qua videtur contendere tam eximiis elogiis, ut omnes homines quasi ad desperationem incitare velit, & omnes infelices obligare ad homicidia perpetranda. Audi illum lib. de prov. cap. 2. *Liquet mihi cum magno spectasse gaudio Deos, cum vir ille acerrimus sui vindex gladium sacro pectori infigit, dum viscera spargit, & animam manu educit.* Miror, stoicum hunc voluisse ex homicidio facere Sacrificium, & commendare lib. de tranq. animi cap. 15. ebrietatem tanquam virtutem, ne Catonem suum vituperare deberet. Alii econtra desperationis passionem absolutè condemnârunt, & quia inventi sunt aliqui, qui furore incitati manus proprio commaculârunt sanguine, ideo judicârunt eandem ex anima nostra perpetuò exulare debere, nec vitæ nostræ casum accidere posse, ubi hujus affectûs impulsus sequi foret permissum.

Ambæ hæc decisiones pariter sunt reprobandæ, & ambæ intentioni naturæ adversantur. Quæcumque crudelia minitetur sinistra fortuna, quæcumque infausta capitibus nostris immincant, nunquam persuadere nobis debent, ut vitæ nostræ insidiamur. Nativitas, & mors nostra non dependent, nisi à supremo universi gubernatore, qui uti solus ingressum in orbem terrarum nobis indulsit, ita exitum ex illo imperare potest. Permittit nobis dispositionem omnium statuum nostræ vitæ, nec sibi reservat nisi principium, & finem: nascimur, quando ipsi placet, & morimur, quando ipse constituit. Velle igitur accelerare necis horam, est involare in jus omnipotentis, cujus juris se tam tenacem subinde ostendit, ut miracula adhibuerit, ut nos doceret, se absolutum esse vitæ dominum. Sed uti desperatio in his circumstantiis est prohibita, ita multæ aliæ occurrunt, in quibus eadem est permessa, videturque mihi, quòd natura nunquam magis curam suam erga hominem demonstraverit, quàm ubi eundem abormavit passione sufficiente ad ipsum liberandum. ab omnibus malis, pro quibus philosophia nunquam efficacia sciret invenire remedia. Quamvis bonum omne sit objectum amabile, quod suis suavitatibus potentissimè attrahit appetitum, nihilominus sæpè tot obseptum est difficultatibus, ut ille appropinquare non possit. Pulchritudo objecti facit, ut anima langueat, ut se desideriis consumat, ut spe incitata inutiles connisus incessanter adhibeat. Quantò bonum concupitum est excellentius, tantò anima erit in illius privatione miserabilior; quanto magis amore accenditur, tantò majorem experietur dolorem; quod quietem offerre deberet, causabit molestiam, & ut paucis absolvam, erit anima ideo infelix, quia nescit cor abstrahere ab objecto, ad
cujus

cujus consecutionem non potest pervenire. Tormentum hoc tam longo cruciaret tempore, quàm est vita, nisi desperatio in auxilium veniret, & prudenti dictamine animal constringeret ad inutiles labores deferendos, & ad desideria comprimenda, quæ ad aliud non profunt, quam ad afflictiones ingerendas. Cum igitur officium hujus passionis sit detorquere animum à bono difficili, & vires nostras superante, poterit illa in mille occasionibus adhiberi, nec erit invenire in mundo tam sublimem hominum conditionem, quæ ipsâ non indigeat, cum omnium hominum vires limitentur, & major mortalium pars intentionibus suis vix non ad impossibilia properet. Spes, & audacia, quæ promovent, plus habent ardoris, quàm consilii: sub his ducibus in præcipitia caderemus, si desperatio nos non retineret, & nisi cognitione nostræ debilitatis à temerariis aggressionibus nos averteret. Magis ergo lamentari deberemus de spe, utpote quæ nos nimium faciliè commiscet periculis, quàm de desperatione, quæ ut fidelis consiliarius sæpè nos iisdem liberat. Hinc summus sæpissimè poenituit principes, non exaudivisse illius imperia, qui si ante belli initium proprias mensi fuissent vires, non coacti fuissent adeò propudiosam inire pacem, & accipere imperia triumphantis inimici. Sed hoc est vitium illorum, quòd ad hanc passionem tunc solum recurrant, quando omnia ad summas jam sunt redacta angustias. Poterit nihilominus etiam tunc prodesse salutari admonitione, & non rarò vidimus integros exercitus periculis exemptos recessu in tempore imperato, Princeps, qui se viribus, & nervo belli inferiorem agnoscit hoste suo, mediante desperatione prudenter cedit; curat cum ipsa resarcire defectus spei, & audaciæ, differtque proposita usque ad tempus, in quo securâ promittitur victoria.

§. IV.

Qui desperationem consequantur effectus?

Desperatio alia est totalis, ac universalis, alia partialis de aliquo tantum particulari bono. Desperatio universalis præcidit vires omnes operandi, & omne opus impedit, quia qui ex animi agritudine renunciavit finì, eatenus nec quidquam operatur, ut tenet Aristoteles lib. 2. Rhet. cap. 2. præter animi marorem & angorem amorì bonitatis propositæ idoneum vix aliud sentietur, ac si nihil posset accedere ad eum cumulum, quo desperatio animum obruit. Hinc abjectio mediorum, &

ple-

plerumque retorsio appetitus in contrariam partem, & qui boni alicujus affecutionem desperant, ut famem appetitivæ potentia quoque modo exsatiarent, & ventrem animæ, si minus pabulo congruente, at saltem, si quis expleant: alia bona piscantur, quantumvis graviter prohibita. Hinc illud Episcopi Hipponensis lib. de natur. & gratia, cap. 5. quidam in peccata prolapsi, desperatione plus pereunt: nec solum poenitendi negligunt medicinam, sed ad explenda inhonesta, & nefaria desideria, servi libidinum, & scleratarum cupiditatum fiunt. Ideo adversus hanc exitialem pestem providentia Dei nobis in divinis codicibus reliquit lapsus eorum, qui post casum resurrexerunt. Suffragatur Plutarchus, qui de Antonio post Actiacam cladem profugo, prodit, eum se totum omnis generis voluptatibus immerxisse, si quo modo posset inflictam sopire tristitiam.

Quod si desperatio tantum sit partialis, tunc illa vel est furiosa, vel timida? si furiosa, tunc uterque oculus ignem evomet, spumabunt labra, obserabuntur, & stridebunt dentes, extolletur clamor ululatus, ut illius Æneidos, 2.

Venit summa dies, & ineluctabile tempus

Dardania: fuimus Troes, fuit Ilium, & ingens

Gloria Teucrorum, ferus omnia Juppiter Argos

Transtulit: incensa Danaï dominantur in urbe &c.

feriet gladius huc, & illuc, projicientur in omnem partem manus, & brachia, evellatur coma, impingetur caput parieti: omnes obvii arripiuntur, onerabuntur injuriis, & si vel modicè resistant, jugulabuntur, quibus actionibus tandem defatigati in terram decident, humum mordebunt, & prius anima corpus deferet, quam desperati animi signa exanimatos vultus destituant. Qui verò timida desperatione percelluntur, eò quod suis viribus uti ulterius renuant, ex incuria sinunt destituta robore brachia defluere, aut manus in modum crucis decussatas ad stomachum. Os, & labia habent semiclosed, funestis, & tristibus exagitantur in somniis, patiuntur languorem, & mollitiem pulsus, omniumque virium diminutionem. Quemadmodum remissæ chordæ non amplius sonant, ita laxatæ vires corporis animositate, & vivaci agendi facultate destituentur. Hinc facies apparet tristis, dejecta, & pallida: demittuntur caput, frons, supercilia, marcescunt oculi, & fracti hac passione vix amplius pedibus consistere valent.

Subinde tamen frigidus mœrore sanguis connisus desperationis, & per antiperistaltum ita accenditur, ut animos sæpè supra vires suggerat. Dum enim perditis, uti putabant, rebus suis omne sui servandi consilium

abjiciunt, in solam intenti ultionem, & illud sollicitè satagentes, ne inultei pereant; adeò strenuè, & tam alacri impetu feruntur ad agendum, ut eladem inferant iis, à quibus in desperationem sunt coniecti. Sic ignavissima animalia, quæ natura ad fugam genuit, ubi exitus non patet, tentant fugam imbecilli corpore. Hinc belli ducibus inconsultum videtur victos ita concludere, ut præcluso omni effugio, & desperata prorsus sorte agantur. Permittunt hosti, ut torrentis instar per medios fundatur agros, ne propter obstacula nimis in tumescens prosternat obices, quibus impetus coerceri debebat. Et in hoc mirabilis est natura hujus passionis, quæ ex pavore nascitur, & tamen ex timiditate majores acquirit vires, in bono sibi proposito considerat difficultates, quæ magis absterrent, quàm gloria alliciat, & sive ex innato frigore, sive ex modica spe minus se reflectit ad bonos, quàm deteriores eventus. Et tamen, ubi extrema imminet ruina, & periculum, quæ vitari non possit, necessitatem vertit in virtutem, & aggreditur inimicos, cum quibus ipsamet spes configere non fuisset ausa, ac victorum è manibus extorquet palmas, & lauros.

DISSERTATIO IX.

De Audacia.

§. I.

In quo sita sit audacia?

Audacia est impetus, & incitatio ad expugnanda, & adeunda terribilia impedimenta, quibus prohibetur consecutio boni exinde summo opere ardui. Terribile autem est, quod ve adducit interitum, vel insignem dolorem procreat juxta mentem Philosophi lib. 3. ethic. cap. 5. ubi distinguit malum, quod est objectum timoris oppositi audaciæ ab aliis timoribus his verbis: *Non enim cuncta timemus mala, ut si erit injustus, aut tardus: sed quacunque vel magnos dolores, vel corruptiones adducunt.* Et iterum: *si ergo id timor est, necesse est, ea terribilia, timendaque esse, quacunque ingentes videntur habere vires corrumpendi, aut ita nocendi, ut nocumentum ad ingentem tendat dolorem.* Quia verò hoc terribile, quod juxta relata philosophi verba est objectum timoris, etiam est objectum audaciæ ideo oportet, ut



*Dum petit infirmis nuncium Sublimia pennis,
Scarus Scarias nomine pect aquas. Ovid.*



ut aliquid superaddatur, per quod objectum audaciæ propriè discriminetur. Hoc autem singulare consistit in evitabilitate horribilis imminētis non qualicunque; si quis enim declinaverit mortem intentatam ab hoste vel per celerem fugam per fallacem industriam, aut per preces supplices, quibus vel inimici ira placetur, vel eidem opponantur amici potentiores, aut clausā januā, nemo profectò hoc pro audaci factò habebit, sed magis timiditati accensebit. Igitur ad audaciæ munus pertinet *adire*, & *expugnare*, per vim invadere, atque perrumpere obstacula, ideòque est compositum ex bonitate operis vincentis, inductivi victoriæ, & ex asperitate periculi adjacentis operi; ac demum ista commixtio proponi debet audenti cum præponderantia bonitatis supra malitiam, hoc est propriæ virtutis idoneæ ad vincendum supra vires causæ renitentis, quo minùs perveniatur ad finem desideratum. Ex quo apparet primò, quòd si declinatio appareat facilior, & malum imminens minus, tunc exsurgat in audaci affectus intensior. Verùm adhæsis appretiatiua ad potentiam aptam vincere, & ad bonitatem operationis victricis eò è converso est major, quò majus est malum imminens, majorque vis causæ, ex qua illud dependet. Apparet secundò quare terribilibus occurrentibus derepentè audaciùs resistatur. Occursus nempe repentinus plurimùm confert ad maiorem mali apparentiam, minorémque declinationis vitationem; quæ enim prævidentur, ipsa sui prænotione animant ad quærenda remedia, disponendámque remotionem, atque per hujusmodi providentiam expugnatio redditur facilior, ipsúmque malum apparet minus propter adjunctam circumstantiarum considerationem, quibus imminuitur ratio malitiæ, & quæ in aggressione repentina terribilium nullò modò considerari possunt. Apparet denique tertiò, quòd sicut difficultates, quæ virtutes comitantur, easdémque magis reddunt illustres quibus vivaciora ingruunt certamina; ita fatendum est, inter omnes passionēs audaciam magis gloriosam esse æstimandam, utpote quæ manus confert cum omni ferocitate.

§. II.

Distinctio audacia à spe stabilitur.

Ambigi solùm posset de distinctiōe audaciæ à spe, cùm utraque circa arduum versetur. At quamvis audacia subserviat spei tanquam instrumentum ad consecutionem boni ardui intenti per spem, superando

nimirum difficultates, si quæ terribiles occurrant, & adeptioni bonorum contradicant, ita ut, ubi audacia est, ibi quoque spes regnet: nihilominus in primis non semper terribilia impedimenta, sed subinde minùs retardantia interveniunt, quæ affectui spei vincenda relinquuntur. Deinde conatus spei tendit adversùs ardua, quatenus provenientia ab extrinseco, nec auferibilia per opus solius sperantis proprium: audacia econtra progreditur ad bonum, quatenus adeptio illius dependet à viribus propriis, & à bona dispositione ipsius audacis ad calcanda & proterenda pericula impediencia. Dicitur enim miles sperare victoriam, & non audere ratione sui immediatè: econtra dicitur idem audere luctam, & non dicitur sperare, quòd sit pugnaturus. Certare autem spectat ad ipsum militem, qui sperat, inque ejus operatione consistit; nec dependet ex magnitudine, aut parvitate virtutis in hoste. At triumphus dependet ex magnitudine virtutis in vincente, & ex ejusdem parvitate in victo. Similiter in nauclero, quòd dirigat navem mugiente tempestate, est opus ipsius naucleri proprium, idque spectat ad audaciam. Quòd verò incolumis ad portum attingat, & contrariorum ventorum, ac fluctuum turbinem felicissimè superet, hoc insuper dependet ex magnitudine moderata ventorum, & maris sævientis, ideòque hoc ad spei pathemam reduci debet. Denique quamvis etiam spes heroicis passionibus annumetur, nec ipsius fructus maturi satis, & dulces videantur, nisi periculis condiantur; attamen semper vel à bonitate objecti invitatur ad sufferendas molestias, vel dignitas ipsi auget vires ad easdem perrumpendas. Verùm audacia hòc auxiliò destituitur, & non considerat objectum, nisi ut diversis circumseptum nocumentis: in hæc insilit non aliter, ac ursæ & leæna, ut raptos catulos recuperet, irruit in armatos, in venabula, & hastis *interrita* se induit amore charorum pignorum. Defixa in terram oculorum acie, ne venabula expavescat. Igitur ambæ hæ passionēs respiciunt diversa objecta, ita ut spei terminus sit bonum, quod concupiscitur, audacia verò versatur circa periculum, quo boni consecutio implicatur; prosequitur una bonitatem; altera impugnat arduitatem; & nihilominus tam diversis viis ambæ tendunt ad eandem metam; ambæ ad animæ quietem properant. Hoc est verum, quòd conditio unius dulcior sit, quàm alterius, quia spes non respicit aliud, nisi bonum concupitum, & si aliquando oculos ad molestias detorqueat, & cum periculis luctetur, hoc magis facit ex necessitate, quàm electione, & non tam ut gloriam, quàm ut consequatur utilitatem. Audacia non intuetur aliud nisi discrimina, & confidentiâ quadam mirabili sibi persuadet, se propriis lacertis omnia prostraturam. Spes levioris indolis est, & facile

esse aggreditur bellicosos conflictus, quos vanè judicat gloriosos, & possibiles; sed aliud non referret, quàm insignem confusionem, nisi audacia auxiliaretur, & heroica sua magnanimitate finiret illud, quod collega temerariè incepit. Spes assimilari potest tympanotribæ, qui ad certamina animat, sed ipse prælio non commiscetur: audacia è contra comparari potest militi, qui in silentio conservat vigorem.

§. III.

Suggeruntur audacia proprietates.

IN primis contrahit audacia cum fortitudine tantam affinitatem, ut una ab altera separata vix possit subsistere. Habent idem objectum, & ambarum inclinationes adeò assimilantur, ut dici possit fortitudinem esse audaciam ratione præditam, & audaciam fortitudinem naturalem. Ambas remorantur iidem hostes; & ambæ impelluntur iisdem motivis, ut unitæ inimicos provocent. Languet fortitudo sine audacia, & nisi hæc generosa passio in multorum Christianorum corde fuisset accensa, fortitudo non tam illustres reportasset victorias: econtra ipsa etiam audacia sine fortitudine degenerat in temeritatem, ut adeò passio hæc indigeat directione virtutis, & virtus exposcat auxilium passionis: audacia est initium fortitudinis, & fortitudo perfectio audaciæ; vel si vis aliis terminis rem explicare, audacia est virtus truncata, & fortitudo est passio intra debitos limites coercita. Plerumque tamen audax modum excedit, & in præcipitem degenerat. Origo hujus rei est, quòd omnis affectus sensibilis incapax sit discursus formandi, & nudè solum sine circumstantiis adjacentibus objectum apprehendat, & inde cæco impetu illud vel amplectatur, vel fugiat. Sed ex omnibus pathematis infelicissima est audacia, quia manus conserit cum potentissimis hostibus; exercitia illius ordinariè consperguntur sanguine, & sæpissimè cū horribilibus monstis, & cum ipsa morte est congregiendum. Interea illa nec consilia, nec auxilia aliunde recipit, nisi à spe, quæ ordinaria est causa audaciæ; sicut enim pharmacum insuave nemo hauriret, nisi spes recuperandæ sanitatis impelleret, ita periculi denuntiatio appetitum avocaret, nisi boni spes accederet, quasi condimentum, acuens periculi appetentiam. At ubi spes audaciam armavit, & vanis promissis in extrema protrusit pericula, plerumque eam deserit, unde illa Aristotelis sententialib. 3. ethic. cap. 2. *Audaces temeritate propositi ante cupiunt adire pericula, quam*

instant : cùm adsunt , ea defugiunt. Infelix iste eventus non alteri est adscribendus , quàm quòd se sensibus , cæcis nempe ductoribus , manuducendam commiserit : sensus autem minus apprehendunt ea , quàm quæ coram adsunt. Unde periculum apparet minùs in principio aggressionis , quàm in ipso conflictu & pugna cum malo. Subinde tamen accedente majori cognitione periculi in progressu , perseverat nihilominus affectus audaciæ , nec succedit timor succumbens apprehensionipericuli , & tunc consurget commotio audaciæ appetitiuè major , quàm ab initio fuisset. Sic vulnerati intrepidè magis aleam subire tentant , & ex ore Philosophi lib. 3. Ethic cap. 8. habemus , *bestias quoque esse audaciores , cum percutiuntur.* Ob superadditam enim continuò iram apprehensio bonitatis in opere excrescit , quatenus eo ipso opus superandum concipitur , ut subserviens non solum appetitui , & inclinationi naturali respectu vitæ , sed etiam appetitui elicitò , & inclinationi iræ ad vindictam. Duplicatur igitur ratio bonitatis , & æstimabilitatis in eodem opere , atque in propriis viribus idoneis ad illud , & apprehensis ut prævalentibus adversùs vim causæ nocivæ , atque ita augmentatur affectus audaciæ ex percussione , licèt ipse vulneratus reddatur in se debilior , minùsque potens ad resistendum , & mortem vitandam. Denique audacia in rebus humanis plurimùm valet ; cùm namque homines plerique dicantur passione , non ratione , sensu non intellectu ; audacia cùm magnum sui sensum præsentibus imprimat , usui est ad excitandas , vel premendas aliorum passiones. Præterea in exequendo commodissima est ; perniciofa tamen in deliberando ; militibus conveniens , & ducem dedecens.

§. IV.

Quinam avidiùs ferantur ad audendum ?

AD audendum accommodatiores sunt , qui spem firmiorem , ac vegetiorem concipiunt , & minoris ducunt pericula. Ita sentit Aristoteles lib. 3. Ethic cap. 8. Ex priore capite *ij sunt audaciores , qui rectè se habent erga divina* , ut exprimit Philosophus lib. 2. Rhet. cap. 5. Istorum enim animis insidet , se propitio numine uti , & se ejus potentiâ , & viribus adjuvandos , atque ita judicant , nihil admodum occurrere posse , quod meritò vereantur ; sed potiùs exclamant cum Psalmista , *Dominus protector vitæ meæ , à quo trepidabo ?* Psal. 26. quia verò Deus duplici ratione auxiliari potest ; primò nimirum impediendo , & avertendo
per

per se solùm mala nobis imminetia , atque si hoc modo creditur nobis propitius , non excitabitur passio audaciæ , sed affectus solius spei. Secundò auxiliari nobis potest exposcendo cooperationem nostram , & conflictum cum nocuentis , in quo casu locum habet audacia , quia hîc intervenire potest operatio victrix periculorum , eritque quoad appretiationem eò major , quò existimatum fuerit plus à nobis , nostra virtute , & resistentia exigere Deum. Ob hanc ipsam causam subjungit ibidem Philosophus , *eos , qui injuriam aliquam acceperunt , audaciores reddi , quia nimirum Deus injuriâ vexatis opitulari creditur.* Tum quòd ex alieno scelere oboriatur ira , unde vires sumit audacia. Ex posteriore capite sive expericuli contemptu firmum munimen ad audendum concipiunt inexperti ; experimentò enim quotidianò deprehendere licet , nihil in pronuntiando promptius esse , nihil in damnandis aliorum placitis , sensisve magis præceps , quàm eos , qui attendentes ad pauca , facile pronuntiant ; nimirum ruditate , & imperitia audaciam ingenerante. Ex eodem capite proclives ad audendum sunt , qui sive per ætatem , sive ob incensum multo mero calorem præcipientes aguntur , non satis considerato discrimine , quod adeunt , segniùs progressuri , si perviderent , in quos casses se induant. Cùm enim optima corporis dispositio ad agendum , & resistendum sit ea , quæ plurimo abundat sanguine ; ideo facîle contingit , tales minùs esse intrepidus : ita ut quamvis pars sanguinis , & spirituum intro subeat , multi tamen spiritus remaneant , quibus tremor , & pallor depellatur. Ex eo etiam assequimur , cur bruta , quæ angusto sunt corde , & arteriis , ac pariter homines simili vasorum conformatione præditi , magis erecti adversùs pericula animi sint ; eam enim idoneitatis rationem affert Aristoteles lib. 3. de partibus animal. cap. 4. hisce : *pavida etiam sunt , quibus cor grandius : audentiora , fidentioraque , quibus minus , aut mediocre. Affectus enim , qui accidit ex metu , jam in ijs præst , quoniam calorem proportionem cordis non habent , sed parum caloris in magno conceptaculo exolefcit : itaque sanguis frigidior fit. Cor magnum proportionem lepori , cervo , mure , hyana , asino , panthera , mustela , & reliquis ferè omnibus , quæ aperte timida sunt , aut propter metum malefica. Simile in venis , atque in ventriculis cordis evenit. Sunt enim frigidioribus , & venæ ampliores , & ventriculi ampliores. Nam ut in parvo , & in magno domicilio tantundem ignis non æquè calefacit , sed minùs in magno , sic in iis calor non pariter agit. Vas enim tam vena , quàm ventriculus est.* Sic etiam animalia duos pilos habentia sunt audaciora , quia tales pili ordinati sunt oer calorem , & per choleram : hæc autem plurimùm acuunt ad pugnandum , ut vide-

re est in urso, & apro. Ex opposito animalia molles crines habentia sunt timida, quia frigida, ut lepus & cervus. Præter ista audaciam promovebunt boni successus, & belliduces favente fortuna, etsi copiis sint inferiores inimicis, eosdem aggrediuntur, credentes, solum nomen posse timorem incutere, suntque quasi certi de victoria, quia vincere assueti. Confert etiam ad hanc passionem plurimum potentia principis, cui si multæ, & amplæ provinciæ provideant de exercitibus, cui nervus belli ad multos annos extenditur, qui solum, si in campum moveat, vicinos populos terrefacit, talis levi negotio classicum insonabit. Denique audaciæ vires suppedidabit opinio, quod mala terribilia ejusmodi sint, quæ tametsi evenerint, nihilominus reparari, & refarciri possunt. Ubi tamen modum excesserit, irridebitur audacia. Nam deformitatem citra dolorem præferet, ubi audax spe decidit, & ubi summò infortuniò non obruetur, inde cum voluptate spectabitur gloriosus suis frustratus votis, & exinde confusus. Hoc ut evitetur, plurimum conferet, perspectam habere propriam potentiam, nec illam pluris facere, quam revera fieri debeat juxta illud Flacci, quod ad plurima humana valet :

*Sumite materiam vestris, qui scribitis, aquam
Viribus, & versate diu, quid ferre recusent,
Quid valeant humeri.*

§. V.

Quos audacia pariat effectus?

Affectus hujus summa vis ad agendum in utramque partem, tam ad bonum, quam malum inducendum manifestior est, quam ut multarum paginarum explicatione egeat. Et ad bonum quidem plurimum conducit; cum enim virtus in arduo posita esse ab Ethicis demonstratur, hocque ipsum experientiâ nimium quam sæpè compertum habeamus ob rationis & sensus in nobis conjugium, & raram boni honesti, ac delectabilis mixturam, facile accidit, ut prosecutioni honestatis periculum nocuementi ingrati facultati appetitivæ representetur. Quare nisi tunc audacia prosterndum alioqui animum erigat, & tadium ex ostentata acerbitate abstergat, magna sterilitas generosorum operum consequetur. Quod si verò alacris animositas hominem trudit, sequetur inprimis magna securitas, quæ est æctus judicii, quo cum magna certitudine censemus nos esse securos, & discrimine exemptos. Secundò comitatur hanc

hanc passionem resolutio tum sine aliqua anxia ponderatione, & examine motivorum, tum absterrentium, tum allicientium statim nos resolvimus ad hostem aggrediendum. Et ultimò sese offert confidentia, quæ est quasi consummatio, & summa perfectio spei; dum enim spem concepimus de acquisitione boni, vel debellatione mali, nósque contra omnes casus venturos obfirmavimus, eò adducimur, ut nobis persuadeamus non defutura nobis valida præsidia vel ad malum superandum, vel ad bonum acquirendum. Hinc modestia in loquendo, amæna, & jucunda affabilitas erga victos, superstitionis odium, cum debiles potissimum, quales sunt faminæ, & pueri, superstitioni, prophetiis, & revelationibus fidem adstruere videantur. Ex altera tamen parte audacia non repressa effectus procreat admodum lugubres; nam quod in una vel altera occasione feliciter evenit, non ita semper succedet, nec cælum eodem semper modo favebit temeritati audacium. Tunc verò incendium tam promptè extinguetur, quàm citò ab initio exarsit, & furor in meram abibit spumam. Animofitas degenerabit in vilem animi abjectionem, & ex tot ausis nihil remanebit, nisi pudenda fuga, timor, desperatio, & extrema tristitia. Præterea quòd bonam de suis dotibus opinionem audaces concipiant, dominari aliis, non autem subesse appetunt.

In transmutatione corporali, quæ ex hac passione sobolescere solet, duo sunt distinguenda, hoc ipso, quod objectum audaciæ compositum sit ex bono, & malo cum præponderantia boni. Hinc, quia simul non potest provocare utriusque motus contrarios, ideo eodem inducit successivè. Et primo quidem inducet mutationem contractivam, & tremulam, propterea, quòd causa nocumentum minitans obijciatur ut præsens; ratio verò boni in principio aggressionis concipitur ut absens, & magis remota, quàm in progressu. Hinc revocabitur sanguis ab exterioribus partibus, tanquam fugiat & ipse terribile juxta naturam affectus existentis in vi appetitiva, cui præ cæteris conformatur motus sanguinis, & spirituum. Revocato autem sanguine, & calore ab exterioribus ad interiora frigent partes exteriores, eoque magis, quo plùs distant à corde; unde manus, & pedes ea de causa præsertim contremiscere incipient. Tremet etiam labrum inferius præ superiore, quod inferius teneatur sursum vi caloris, ideòque faciliè concidit diminuto sanguine, cum labrum superius suo ipso pondere firmiter in loco connaturali teneatur. At tremor iste, & ineptitudo operandi illi conjuncta citò commutantur in animosam firmitatem affectu audaciæ prævalente in progressu adversus impressionem terribilis. Et quia audacia nititur viribus audentis, earumque præponderantia supra pericula, atque ideo participat naturam dele-

Stationis circa bonum præsens, ut præeminens malo imminenti, idè confurget mutatio corporis dilatiua, & diffusiva sanguinis per totum corpus, tametsi remissior ob adjunctum respectum ad malum. Hinc aspectus audacium fixus, cum ipsi malo progrediantur obviam. Accedit magna palpebrarum apertio, sicut in animalibus rapacibus, ita ut hæc ad videndum enucleatius hostem inserviat, & ostendat, se mali imminantis rigorem non perhorrescere. Formantur insuper diversi contuitus, severitate quadam animati; cum enim audaces sint in statu configendi cum altero constituti, lumina sua cum quadam vehementia versus hostem suum torquebunt, & eodem momento caput in adversam partem deflectent, ut conceptam de illo aversionem manifestent, & prodant, indignum à se censi hostem, ad quem infringendum omnes suas vires impendant. In illis, qui non puerili, & fæminea, sed nobiliori, & mascula feruntur audacia, characteres vultus sunt majestas quædam veneranda, non inamæna ferocitas, & generosa moderatio. Consideramus etiam in audacibus pilos erigi, quod in brutis evenit ex musculis immediatè cuti subnexis, qui fortiter à spiritibus tensi cutem constringunt: in hominibus verò tribuitur avocationi spirituum, qui periculo urgente colliguntur in brachia, & alias partes defensionis necessarias. Cutis his destituta contrahitur, quæ ubi rugosa evaserit, pili se necessario erigunt. Nares in hac passione apertæ deprehenduntur, cum internus calor sit intensissimus, adeoque ad majorem respirationem peragendam opus erit, ut partes, per quas fit respiratio, amplientur. Observamus etiam in ipsis silentium arrogans, vel quia anima se ipsam totam colligit, vel quia ex despectu hostis cum eo sermonem miscere dedignatur, vel quia nimia garrulitas debilitatem indicare solet. Ubi alios ad hunc affectum excitabunt, perbrevis, sed penetrante voce animabunt, qua Turnus usus est apud Virgil. 9. Æneid.

*Sed vos O lecti, ferro quis scindere vallum
Apparat, & mecum invadit trepidantia castra?
Non armis mihi Vulcani, non mille carinis
Est opus in Teucros: addant se protinus omnes
Etrusci socios; tenebras, & inertia furta
Palladii, casis summa custodibus arcis
Ne timeant: neque equi caca condemur in alvo:
Luce palam certum est igni circumdare muros.*

Laconicè hæc constrinxit Leonidas, quando milites fortiter ita est allocutus: *Sic commilitones prandete, tanquam apud inferos canaturi.* Fretus etiam animus suarum virium erectum caput retinet, labia premit, den-



Et totum nutu tremefecit Olympum. Virgil.

M. L. Muller fecit del. G. Knip.



dentésque stringit. Respiratio fit cum impetu aliquo ; nam dum ad tempus halitus retinetur, tandem homo cogitur majorem prodere, ut hac intensiore exufflatione fumosi cordis halitus ob compressionem ante collecti dissipentur. Denique incessus est magnificus, & leonibus proprius, cum grandi quodam, & gravi passu : terram pedibus sæpè quatit, ut suas prodat vires : subsilit leviter, ut hoc motu tum vires, tum ardor incrementum accipiat. Denique plura alia præstat, quæ cuivis sunt obvia.

DISSERTATIO X.

De Timore.

§. I.

Expositio timoris.

Non est hic sermo de timore intellectuali, qui tam in sacra, quam in profana litteratura significat dubium, aut suspicionem latentis alicujus mali : sed disputamus de timore affectivo, cui competunt hæc attributa, quòd sit *fuga efficax saltem affectivè à malo futuro, magno, & arduo*. Dicitur primò *fuga* contra quod reclamant quidem Carmelitæ in suo cursu disput. 4. de spe, aientes actum timoris sufficienter salvari per puram prosecutionem : at impugnantur claris textibus desumptis ex Doctore Doctorum, qui 1. 2. q. 42. art. 9. ad 2. ita differit : *proprium ac principale objectum timoris est malum, quod quis refugit*. Et paulò post : *timor autem principaliter respicit malum, cujus fugam importat*. Non negamus, quod timor sit etiam aliquis actus prosecutionis, qua in eminentem causam tendimus, quæ malum nobis potest infligere : sed quod ratione nostra primariò dicat fugam mali, hoc est, quod defendimus. Nec immeritò hoc facimus, quia potest dari pura prosecutio subjectionis, & reverentiæ erga causam præcellentem, v. g. Dei deficiente omni prorsus timore. Cur enim non possit dari actus religionis vel humilitatis ex solo motivo reverendi eminentiam Divinam, ut distinctam à malo, quod nobis potest infligere ? an illa secundum se non est digna, cui nos totos subijciamus ? atque ex his colligitur, quàm sæpè timorem cum reverentia, & veneratione confundamus. Sic dicitur privatus homo timere, quando Principem allo-

quitur, etiamsi nullum ab eo sibi immineat malum; sic Divus Petrus apud Luc. cap. 5. ait: *Exi à me, quia homo peccator sum.* Sic ibidem, qui paralyticum viderunt sanatum, *repleti sunt timore, dicentes, quia vidimus mirabilia hodie.* In his enim, & similibus modis loquendi non utimur, exacto, rigido, & severo modo loquendi, sed vulgari, laxo, & figuratis seate locutionibus, prout denotatur veneratio majoris dignitatis, ut de Jove Deastrorum supremo cecinit Virgil. 10. *Æneid.*

Et totum nutu tremefecit Olympum.

Potest tamen subinde hanc admirationem, venerationemque timor vere talis subsequi, ubi nempe ex violata majestate, quæ nobis præsens est, suspicamur malum aliquod in nos resiliere. In homine privato timente Regem alloqui sæpè intervenit strictus timor, tum excitandi regiam displicentiam, tum gerendi se in verbis, actionibus, & toto corporis habitu minùs decenter: si pura est reverentia, tunc potest eosdem causare effectus, quos ipse timor, scilicet pallorem, tremorem, cordis contractionem &c.

Additur, quòd timor sit fuga *efficax* non tamen effectivè semper. Nam efficacia effectivè talis vel consisteret in connexionione infallibili ipsius mali, vel saltem cum mediis ad illud vitandum? non primum; ut constat ex reprobis: non secundum; quia fieri potest, ut in primo instanti vehementissimo replear timore ob mortem imminentem, & ideo efficaciter proponam adhibere media ad eam evitandam; & tamen evanescente timore in altero instanti, media adhibere negligam. Ergo sicut contritio duntaxat connectitur negativè cum mediis ad vitandum malum, quatenus in instanti, in quo ipsa datur, repugnat volitio peccati, aut nolitio efficax ponendi illa media; ita poterit se res circa timorem habere. Clarius rem intelliges ex damnatis spiritibus, qui vehementer timent longam durationum seriem, in quibus sunt cruciandi, quin tamen timor ipsos urgeat, ut media inquirent ad fugiendum illum tormentorum cumulum, utpote independentem ab ipsorum libertate. Cæterùm sicut spes ita debet esse affectivè efficax, ut non jungatur cum nolitione sui objecti effectivè efficaci, ac proinde, qui metu tempestatis projicit merces in mare non elicit spem fruendi illis, quia, licèt habeat voluntatem illarum affectivè efficacem, hæc tamen enervatur per oppositam nolitionem effectivè efficacem vitandi illud malum: ita timor debet esse ita affectivè efficax, ut non jungatur cum volitione effectivè efficaci sui objecti.

Dicitur item à malo futuro; quia si malum præsens est, vel præteritum non cadet illud sub objectum timoris, sed doloris potius, & mæstitiæ,

stitiæ. Sunt qui præterea velint malum debere proximè imminere, ita ut si malum nondum positum prospiciatur valde procul abesse, non timeatur, sed tantùm cum non procul abest. Ita notavit Aristotel. 12. Rhet. c. 5. asserens: *Non enim cuncta timemus mala, remota namque non timentur; omnes enim sciunt se morituros, verùm quia non propè, ideo non curant.* At tametsi dubitari non possit, quin malum, quò vicinius est, eò intensius timeatur; tamen fatendum est etiam malum procul positum timeri posse, quamvis languidiùs, eò quòd mali distantia minùs acrem ejus repræsentationem ingerat. Fundamentum Aristotelem deferendi est sacra Scriptura & PP., quibus, si adhæremus firmiùs, bene facimus. Hi autem incutiunt nobis timorem tum pœnarum infernalium, tum capitalis sententiæ definitivè ferendæ in extremo mundi die, quamvis hæc non immineant nobis proximè. Dicitur etiam *magno*; quamvis enim nemo diffiteri possit etiam malum non terribile posse in nobis concitare timorem: attamen sicut spes non est de minimis, ita neque timor. Adjungitur denique arduo; nam sicut illa, quæ faciliè obtineri possunt non sunt materia digna spei: ita neque illa, quæ faciliè possunt declinari, sunt materia digna timoris.

Ex his faciliè erit conijeere, quomodo timor differat ab aliis passionibus; differt nempe ab amore, desiderio, gaudio, atque spe; quòd istæ pro suo objecto habeant bonum, timor verò malum. Deinde malum dupliciter considerari potest, nempe secundum se præcisè, vel prout est conjunctum cum aliqua bonitatis ratione, atque ut concipitur adhuc vitabile. Quòd si malum consideretur secundum se præcisè, tunc spectabit ad appetitum concupiscibilem, nempe vel odium, vel abominationem, vel tristitiam. Si spectetur ut conjunctum cum bono, & vitabile, excitatur fuga appetitùs irascibilis; & siquidem bonum vitabile præponderet arduitati procreabitur spes, vel audacia: si autem econtra præponderet malum difficultatis, bono irrepet timor.

S. II.

Sejungitur timor in suas species.

Solliciti hîc sunt multi, ut naturam timori propriam, qui audaciæ opponitur inveniant, & ideo passionem hanc in timorem diffidentæ, & timorem ignaviæ distribuunt, illum spei, hunc audaciæ contrariam. Utriusque discrimen hîc exemplò discas: timet nauta, ne instante tem-

pestate mergatur; timet miles ne occidatur à singulari aggressore: scilicet primus timet malum difficile, à quo suis viribus eripi nequit: timet alter id mali, quod ipse audendo, & fortiter pugnando cavere potest. Primus timor, seu diffidentiae opponitur spei, potestque ex natura sua procreare desperationem: alter verò contrarius est audaciae. Utrumque autem in eo differre volunt, quòd timor diffidentiae sit metus mali imminentis, ut difficulter evitabilis ope, atque actione aliorum à se distinctorum: ignaviae autem sit timor imminentis mali, quatenus difficulter evitabilis per operationem victricem illius, proveniente ab eo, cui malum imminet. Cum enim affectus specificentur ab objecto, ubi hoc fuerit diversum, diversa erit etiam passio: quod cum in utroque casu sit diversum, etiam passiones circa hæc versantes erunt diversae. Porro quia in spe attenditur bonum arduum ut consequibile virtute aliena, in audacia ut virtute propria, hinc passio, quæ attendit ad malum arduum, & ope aliena difficulter obtinibile, & cum diffidentia quadam de aliorum virtute, opposita erit spei: audaciae verò, quæ respicit malum ut difficulter evitabile viribus propriis cum diffidentia de istis. Hinc patet, quam ob rem spes consistere possit cum timore diffidentiae: secus audacia cum timore ignaviae. Nam spes locum obtinere potest habita ratione plurium ex causis extrinsecis, quarum operâ difficultas interposita submoveatur; simulque timor adesse potest, ne aliqua ex iisdem effectû frustretur. At ubi audacia vim exferit adversus periculam obstantiam, abesse debet ignavia, quæ vires comprimat, animumque despondeat. Cæterum neque spes consistere potest cum ignavia, quoniam hæc à mediis etiam non terribilibus adhibendis deterret: potest tamen audacia sociari cum timore diffidentiae; quamvis enim miles audeat pugnam, victoriam tamen aliis ex causis impeditam nosse potest.

Præter dicta creduntur timori subesse sex aliæ species, nempe segnities, pudor, verecundia, admiratio, stupor, & agonia. Segnities oritur ex apprehensione laboris gravantis naturam, & excedentis vires operantis, unde quis ex metu nimiae defatigationis refugit ab opere. Pudor seu erubescencia est timor labendi, ac famæ, & bonæ opinionis læsionem promerendi. Verecundia est infamiæ ob scelus jam admissum: hæc enim duo, quæ sæpe confunduntur, tamen in rigore ita secerni debent, ut pudor sit timor de admittendo dedecore aliquo, cui iustè rependatur vituperatio: verecundia autem sit metus probri ob admissam turpitudinem. Causæ pudoris possunt esse vel actiones, vel perpeffiones, vel alii defectus, quibus adjuncta est infamiæ nota vel ex ipsa natura, vel ex reipublicæ consensu, vel ex privata agentis opinione. Quod
verò

verò scribatur lib. 4. Ethic. cap. 9. verecundiam esse solum de iis, quæ sponte agimus, cum veritate non congruit; nam ob plura, quæ prorsus nolentibus accidunt, pudore suffundimur. Sanguis in hoc pathemate effunditur in faciem; unde rubor, ad quod alludit Poëta, dum canit:

Heu quàm difficile est, crimen non prodere vultu!

Quamvis enim reliqui timores sanguinem, & spiritus revocent ad cor: hic tamen, qui rationalis est, & in brutis vix observatur, ad caput illos propellit, ubi imaginatio, & opinio residet, in quibus tanquam in arce superbè locata tota ratio bonæ famæ, aut infamiæ continetur. Alia verò mala adversantur vitæ, quæ sedem in corde figit. Alii fortè melius ita de hac rubedine philosophantur: cum in pudore facies ob conspectum alterius, qui gravat deprehensum in probro, & ob recessum illum spirituum, laboret, & cæteroquin pudor modicus sit metus, natura non adèd est sollicita de corde firmando; hinc post aliqualem spirituum revocationem à facie, uberem sanguinis copiam eodem transmittit ad opitulandum parti laboranti. Ea fere ratione, qua iis, qui frigidissima quædam contrectant, v. g. glaciem, aut nivem, initio quidem frigescunt manus; mox tamen cum primum natura sollicita de partis laborantis incolumitate transmisit ad eam magnas sanguinis suppetias, non tantum frigoris vehementia depellitur, sed etiam fervidæ evadunt. Admiratio est timor magni mali, cujus non possit fervidè reperiri exitus. Non tamen huc omnis admiratio pertinet; nam plerumque admiratio sumitur pro desiderio rei sciendæ latentem effectus noti causam, de qua 1. metaph. c. 2. dicitur, quòd fuerit mater philosophiæ. Subinde etiam sumitur pro suspicionem, & laudationem rei magnæ, tametsi causa ejus non lateat, quæ admiratio ex parte intellectus involvit, quòd res verè sit magna, ex parte autem voluntatis complectitur affectum delectationis in illo objecto. Hac ratione, qui intuetur aquam arte deductam in locum aliquem, si deductio sit magnæ artis, concipit admirationem, non hæsitans, quomodo res fieri potuerit, cum causam habeat optimè perspectam, sed laudans rei raritatem, & opificis industriam. Stupor est timor mali quod propter novitatem, & nullam habitam experientiam ingens videtur, retrahitque intellectum ab applicatione considerationis talis objecti. Agonia ab aliquibus dicitur timor improvisi mali, cui prospici non potest, ut sunt spectra, telluris tremor, afflatus latronum &c.; vel timor, ne quòd aggressi sumus, non cadat ex sententia. Addunt Christiani Doctores alia adhuc divisionis membra timoris scilicet mundani, servilis, & filialis, quæ tamen magis Cathedram Theologicam, quàm philosophicam sapiunt,

§. III.

Pergitur ad causas timoris.

IN digerendis ijs, quæ metum incutere possunt, principaliter causa est malum futurum, ubi statim monendum, ne falsa mali specie delusi, affectum timoris usurpemus improvidè, & sicut pueri larvas extimescamus, ac interea manus ad flammam intrepidè admoveamus. Ex eo autem, quòd malum sit causa timoris inferre videtur Seneca epist. 75. Deum non esse timendum, cum malus non sit. At cum nihil magis ingeminetur in scriptura, quàm Deum esse timendum, ideo statuendum est primò Deum esse objectum ut quo timoris, id est principium, à quo mala magna nociva timere debemus, si ipsi pervicaciter restiterimus. Est item Deus objectum ut quod timoris, non quidem secundum se præcisè inspectus, quia in se noxius non est; sed ut à nobis amittendus, quoniam eadem bonitas, quæ possessa exhilarat animum, amissa torquet ut talis bonitas. Sicut enim dolor est immediatè non de amissione ut-cunque, sed de amissione determinata talis boni: ita licèt Deus secundum se præcisè spectatus non sit bonum, aut malum nostrum, attamen ut possessus per beatitudinem est bonum nostrum, & ut amissus est summum nostrum malum. Non est igitur audiendus Seneca, quando lib. 2. de ira, c. 27. disertè hæc tradit: *Quadam sunt, qua nocere non possunt, nullamque vim, nisi beneficam, & salutarem habent, ut Dii immortales, qui nec volunt obesse, nec possunt. Natura enim illis mitis, & placida est, tam longè remota ab aliena injuria, quàm à sua.*

Malum culpæ posse esse causam timoris negat absolutè Aristoteles 2. Rhet. cap. 5. inquiens. *Non enim cuncta timemus mala, ut si erit injustus, tardus &c.* placet magis aliorum discretio, qui tenent, quòd licèt malum culpæ non sit causa timoris secundum nudam rationem utilitatis, voluptatis, aut voluntarietatis; neque etiam secundum præcisam rationem malitiæ: verum absolutè loquendo, omnibusque pensatis malum culpæ formaliter tale potest esse objectum timoris. Ratio primè est, quia culpa secundum rationem utilitatis, voluptatis, aut voluntarietatis non proponitur ut positivè mala, & hæ proprietates reperiri possunt in re undequaque bona, cum tamen objectum timoris debeat esse magnum malum futurum, difficulter evitabile. Ob hoc ipsum etiam culpa secundum nudam rationem malitiæ, transgressionisque legis, tametsi concipiatur ut ingens malum, si tamen præscindat ab ar-

duitate

caute cavendi, non replebit animam timore, cum ratio nuda malitiæ reperiri possit etiam in re, quæ facile potest eludi, ut primi parentes facile potuissent manum temperare à fructu prohibito. Restat tamen ultimus titulus, ut cum Augustino lib. de Doct. Christiana, c. 2. dicere possim: *Illud potius time, quod sine nobis non erit, quid? peccare; peccare time.* Ideo enim malum culpæ non posset inducere timorem, quia non est malum terribile, & hoc ideo, quia non provenit ab extrinseco, sed ab intrinseco, cum ex propria natura sit voluntarium cujus character est esse à principio intrinseco; hoc tamen absolutè non evincit, malum culpæ non posse timorem procreare. Namque edic, cur res voluntaria potest contingere sufficientem arduitate ad animandam spem juxta phrasim Apostoli ad Rom. 15. dicentis, *cum in Hispaniam proficisci capero, spero, quòd prateriens videam vos*, quod utique erat liberum Apostolo; & cur ipsum voluntarium non etiam possit sufficientem completi terribilitatem ad suscitandum timorem? quemadmodum igitur ut aliquid dicatur verè calidum, sufficit, quòd verè afficiatur calore, sive ille oriatur ex natura ignis, sive contra suam naturam, ut aqua: ita ut aliquid sit capax accelerandi metum, plus non requiritur, quàm ut involvat magnum nocumentum, imminens, & superatu difficile, sive illud oriatur per se ab intrinseco, sive ab extrinseco. Atqui malum culpæ sæpè includit gravem malitiam, futuritionem, & arduitatem, ut patet ex omnibus illis criminibus, quæ ægrè admodum, & non nisi cum speciali auxilio Dei debellari possunt ratione fragilitatis, inveteratæ consuetudinis, vehementis tentationis, & aliarum circumstantiarum passim volitantium: ergo malum culpæ potest instigare ad timorem, licet sit ab intrinseco.

Timentur etiam, qui possunt, & volunt nobis male facere, cujusmodi sunt potentes irati, & inimici; jam enim in periculo versamur. Magis tamen timentur, qui sunt astuti, & tardi ad iram, quàm qui sunt iræ præcipitis; nam iracundi produnt vultu, aliisque manifestis indicibus malum, cui, & quando imminet, adeoque prævideri facile poterit, & sic opportunis remediis vel imminui, vel repelli. At astuti, & lentioris iræ non significant, cui, & quando calamitatem sint allaturi, utpote naturâ suâ occulti; hinc malum ab ipsis imminens accommodis præsidiiis nec imminui, nec vinci potest. Solent etiam lenti, & astuti diutius retinere iram utpote indolis magis terrea: præcipiti verò irâ feroces magis ignea constant naturâ, adeoque ira magis mobilis citius evanescet. Nec ira tantum potentum, sed etiam ipse meras ipsorum metuendus est. Da enim principem sibi ab aliquo timere; facile

continget, ut, quod potest, velit, & alterum malefactis præveniat. Sollicitantur quoque timore, qui injuriam à nobis acceperunt, aut accepisse sibi videntur: item adversum nos injuriosi, cum periculum ingruat, ne par pari referatur. Incidit verò quaestio, utrum fugiendi magis sint, qui nos læserunt, aut quos læsimus? sensus communis hominum videtur judicare, passum injuriam esse magis formidandum juxta illud:

Pulvere, qui ladit, scribit: sed marmore, laesus.

Sed Tacitus, & Aristoteles timendum magis facit lædentem. Videtur controversia componi posse distinctione propensionis rationalis ab irrationali: prima, quæ ratiocinatio & ingenio abutitur videtur lædentes potissimum stimulare, ut amplius affligant ad sui securitatem, quos semel læserunt. At irrationalis altera proclivitas, quæ sensuum apprehensione nititur, & homini cum brutis communis est, læsos vehementius exagitat, quia ille habet objectum sensibile, quo irritatur ad vindictam, quo alter caret. Præter causas hæcenus allatas suppetit denique amor; prius enim naturâ, quam actum mali eliciamus, necesse est generari actum boni prosecutivum, qui sit ratio averſandi malum, Nam

Res est solliciti plena timoris amor.

§. IV.

Quinam magis timori obnoxij?

Meticulosi magis esse solent inprimis, qui omnia mala magna arbitrantur sive ob modicam experientiam, sive ob judicii imbecillitatem, cujusmodi præsertim sunt pueri, & mulieres ob ætatis, & sexus infirmitatem. Item, qui parum habent calidi sanguinis, & ob atræ bilis ubertatem enerves, omnique vigore extincto torpent. Ita suò calculo Aristoteles 2. de part. c. 4. *Timidiora sunt animalia, quibus sanguis dilutus nimium est; metus enim refrigerat. Atque ea, quibus ejusmodi temperamentum in corde habetur, metuendi affectioni sunt opportuniora: aqua enim frigore congelascit.* Præterea meticulosi sunt, qui oppressi jacent malorum expectatione, quæ omnia existimant gravia, & intoleranda ob corruptum judicium. Quin etiam prudentes, quia justis momentis pericula æstimant, & prospiciunt, quo res devenire possit, ac plerumque reformidant, in quibus alii minus oculati minorem trepidandi occasionem deprehendunt. Hinc accidit, ut noctam-

noctambulis periculosa sit solutio somni, quod per somnum non æstimantes discrimina, liberrimi, & intrepidi incedant; somnò autem solutò, agnoscuntur præcipitia: unde metus, ac plerumque casus, aut exitium. Improbi quoque malè sibi semper conscii, & ab irato numine nihil sperantes opis, ac subsidii, facilè timore corripuntur, præsertim noctu in tenebris, si soli sint, & nigrore permoti, dæmonum sibi species objiciant. Annotavit hoc etiam Tullius, *magna*, inquit, *vis est conscientia, ut neque timeant, qui nihil commiserunt; & panam semper ante oculos versari putent, qui peccaverunt.* In senibus pleræque ex prædictis causis adunantur, ut adeò mirum non sit eos timore, & omnibus formidinis adjunctis, suspicione scilicet, diffidentia, pusillanimitate, & querimoniis abundare.

§. V.

Quos effectus invehat timor?

Symptomata eorum, qui timore corripuntur, singularem promerentur considerationem. Et primò quidem, sicut spes dicitur lætitiæ lætitiæ prænuncia: ita timor, qui spei è diametro opponitur, est tristitiæ præviæ, hoc est, prægustatio molestiarum, ac tædii, quæ malorum præsentia expromet. Unde illud D. Hieronymi in Malcho. O multò gravior expectata, quàm illata mors. Confirmant hoc majus tormentum ex timore, quàm ex perpeffione, qui opus præoccupaverunt: hi scilicet in navibus tempestate pressi, non expectaverunt navis submersionem. Sed semet priùs interfecerunt: alii ab hostibus comprehensi, licèt manifestè scirent, se nihil gravius passuros, animam in auras effuderunt. Ob hanc ipsam etiam rationem sentit Philosophus sect. 5. probl. quæst. 25. cur longior esse via videatur, majusque pariat fastidium, cum quanta sit ignoramus. Timemus enim, ne major forte sit, quàm sit re vera, quæ causa est, cur majori supplicio afficiantur homines timendo, quàm angantur patiendo. Degenerat timor etiam facilè in odium, & in desperationem. Non amamus multum, quod timemus; liber amor est, coactionem non patitur; nobilis est, violentiam non sustinet; quidquid amorem exterret, irritat, & omnem illius suavitatem in amaram iram, & aversionem convertet. Hinc oritur, nullum tyrannum posse veris gaudere amicis; cum enim cogatur subditos pavidos reddere, nunquam sibi conciliabit amorem. Videns au-

tem talis infelicem statûs sui conditionem, successivè contemnet amorem subditorum, nec multùm curabit odium illorum, modò terribilis evadat, & sic crudelitatem induet. Sunt nihilominus quædam personæ, quas vereri tenemur, nec tamen possumus odio prosequi: sublimitas illarum incitat ad reverentiam, & æquitas prohibet aversionem: majestas, quæ ipsas circumdat, advocat timorem, & tutela, quam nobis impendunt, obligat ad dilectionem. Et hæc duo præcipuè unit supremum numen, qui & consternationem incutere potest iis, à quibus amatur, & amorem provocare ab iis, à quibus timetur. Convertitur etiam faciliè in desperationem, cùm pericula adeò atrocia depingat, ut spes generosa ampliùs vigorem retinere non valeat. Sed ex omnibus timoris effectibus magis periculosus est torpor, qui ex eo procedit. Quamvis enim non polleat tanta activitate, ut alia vitia, & ex natura sua langueat ad seditionem contra virtutem: nihilominus reus agitur omnium calamitatum, quas ipsa patitur, & videtur omnibus intervenire consiliis, quæ in illius damnum conspirant. Quia torpor abhorret à laboribus, ideo innocentiam non patitur, quæ sine sudore non conservatur. Ille nutrit impudicitiam, & amor viribus destitueretur, nisi ab infami hac quiete vires acciperet: ille cohibet voluntatem, ne gloriosa moliatur facta, quibus homines illustres redduntur; ille corrumpit mores, producitque omnia vitia, quæ umbris occultantur, ad hoc autem vitium naturaliter inclinatur timor attestante Scriptura Prov. 18. *pigrum deiecit timor*. Excusat se formidolosus sua debilitate: credit omne exercitium vires illius superare: difficultates somniat ad eximendum se ab omni laudabili occupatione, dicitque *piger, leo est in via, & leena in itineribus: sicut ostium vertitur in cardine suo, ita piger in lectulo suo*. Ut iterum sacer codex accuratè advertit Prov. 26. subinde tantopere crescit mali timor, ut in insaniam vertatur. Quis enim. Artemonem est stultorum syllabo eximat, cùm legerit, eum præ metu, etiam cùm domi contineretur, clypeum æneum à duobus servis capiti superimpositum ut haberet, semper curâsse, ne quo fortè decidente gravi malè afficeretur? imò etiam minor animi consternatio, quamvis animum minùs percellat, attamen, proportionem servata, nocet etiam ipse sapientiæ juxta illud Ennij:

Pavor sapientiam omnem mihi ex animo expectorat.

Ex ea verò sapientiæ dissipatione frequentissimè accidit, ut malum, quod exhorremus, & secluso timore potuisset declinari, revera eveniat juxta illa Martialis:

*Frangere dum metuis, frangis chrySTALLINA, peccant
Secura nimium, sollicitaq; manus.*

Intendit quidem natura, ut hæc passio serviret prudentiæ, quæ sapienter prospiceret malis venturis: nihilominus ob perversum abusum, quæ deberet nos periculis liberare, magis sæpè nos iisdem implicat: deberet quidem timor nos inducere, ut maturè deliberaremus de modo, & mediis ad nos defendendos ab inimicis nostris: & tamen ille animam nostram tanta subinde replet confusione, ut incapaces ad consultationes reddamur, & pericula adeò formidolosè apprehendamus, ut desertâ prudentiâ desperationi nos committamus.

Porro motus, quos corpori hic affectus imprimit, dicit talem vasorum contractionem, nervorum deliquium, viscerum, & omnium ferè membrorum defectionem, qualem victus irato, & implacabili hosti succumbens præferre solet. Et omnium primò quidem oritur spirituum, & sanguinis recursus ad partes interiores; nam passio proveniens ex apprehensione terribilis imminentis ea ratione commovet corpus, qua turbaret malum ipsùm, si physicè illud afficeret: atqui malum corruptivum vitæ (ad cuius mali similitudinem apprehendit sensus omne aliud malum animalis sentientis) cùm adest, revocat sanguinem, & spiritus ab exterioribus ad interiora, ut constat ex moribundis, quibus frigent omnes exterioris corporis partes: ergo etiam affectus consequens ad imaginationem mali imminentis retrahet sanguinem, & spiritus ab exterioribus ad interiora. Unde sequitur tristis, & omnino pallida facies, ita tamen, ut hic pallor pro diversitate temperamenti in diversis diversus sese offerat. In biliosis ad flavum, & viridem quemdam colorem accedet: in melancholicis plumbeus ad lividum declinabit: in aliis erit coloris in albidum lutei. Oculi turbantur ex defectu caloris, & humoris; cùm enim minùs tendantur tunicæ, quid mirum, si ad lucem reflectendam oculi minùs sint idonei, & minùs splendeant? imò res distinctè non vident, cum species laboranti retinæ difficiliùs imprimatur, & per corrugatas tunicas, ac minùs tersas radii lucis modificati minùs ordinatè in ultimam bassim projiciantur. Ex caloris abscessu sequitur frigus, tremorque in reliquo corpore, præsertim in manibus, genibus, voce, & labio inferiore. Sudor frigidus, quem magnus timor interdum exprimit, ex eadem fibrarum compressionem ortum ducit, qua fit, ut per capillares arterias humor subtilior in carnes, & ex carnibus per poros foras erumpat. In summo timore, cùm inciditur vena, sanguis non effluit ob contractionem meatuum: emittitur autem sanguis post insolitum terrorem, ut, quod propter caloris defectum extra vasa com-

putruit, vel in vasis abiit in grumos, educatur. Pulsus timentis est parvus; cum enim contrahantur arteriæ, sanguinis motus impeditur, & minus emittitur; hinc minor pulsus, qui tamen est frequens, ut vel ipsa frequentia compenset parvitatem; nempe illa sanguinis portio, quæ in ventriculis cordis remanet, quamque major systoles motus extruderet, ad frequentem motum cor sollicitat. Vox raucescit, quia trahæa nimium corrugatur, imò quandoque vox omnis intercluditur; quia laryngis muscoli spirituum præsidio destituuntur, vel immodicâ vicinarum partium compressione impediuntur. Observatum tamen fuit ad initium hujus passionis magnum edi clamorem, effectum scilicet audaciæ, & extremum conatum, quo se animal malo opponit. Arriguntur etiam capilli, quia cutis ex absentia spirituum, aut sanguinis riget, pori clauduntur, & radices pilorum compressæ non amplius jacent. Uterque hic postremus affectus exprimitur à Virgil. hoc versu:

Obstupui, steteruntque coma, & vox faucibus hæsit.

aliquos præ timore obiisse, historiarum monumentis proditum est, valida nimirum contractione cor ipsum præfocante: item aliquos incanuisse. Sic Laurentius Sannutus Patritius Venetus cum classe à Gallis captus, involutusque velis, ut mergeretur, dum longa mortis expectatione cruciatur per horas quatuor, planè canus evasit; indeque solutus periculo, per reliquam vitam ita permansit.

DISSERTATIO XI.

De Ira.

§. I.

Investigatur natura ira, ejusque differentia ab alijs passionibus.

Hujus passionis naturam aliter exponunt physici amatores, aliter Dialectici, ut habemus ex philosopho; de anima t. 16. physici definiunt iram, fervorem sanguinis circa cor, qui potius est effectus iræ; non enim ebullitio sanguinis est causa iræ, sed potius ira est causa effervescentiæ sanguinis circa cor. Altera Dialectica, in qua potius sistendum, ita ad mentem Aristotelis exprimi potest. Agitatio ex dolo.



Nunc face Supposita fervercit Sanguis, et ira.

M. S. Müllerer del. Vasa.

M. Rock sc.



dolore, & audacia coalescens, determinata ab actione aliena, nobis, aut nostris incommoda, & cum nostri contemptu conjuncta, incitans ad vindictam sumendam. Contra datam hanc definitionem urget non leviter, quòd irascamur sæpissimè adversus inanimata, quæ certè neque nos contemnunt, neque injuriâ afficiunt. Ita iræ motus irrepit contra calamum, cum aut grossitudo illius, aut exilitas displicet; contra scalpellum, cum incidenda hebeti acie-segniter exsecat; contra silicem, si fortè, nobis festinantibus, tardius scintilla emicuerit. Patet hoc maxime in cane, ex affectu iræ mordente lapidem adversus ipsum projectum. Nec valet universaliter dicere cum Seneca, quòd nos offendant, qui talia fecerunt; nam plerumque nos ipsi sumus, à quibus res iram concitantes sunt profectæ: nemo autem se ipsum despiciere voluisse putatur. Quare melius asseritur, veram ulciscendi appetitionem, & quasi umbram retributionis intervenire, & quòd homo eodem modo se gerat, ac si retribuisset personæ sensûs, & rationis capaci, à qua se læsum existimat, vel à qua censet incommodum, vel actionis impedimentum emanasse. Fatendum tamen, cum ineptissimus, & valde ridiculus sit hujusmodi affectus, ac talis, de quo meritò erubescere debeat, qui ita operatur, nec quidquam respondere possit, interroganti, quid mali fecit? cum hoc ita se habeat, fatendum, inquam, est, cognitionem directivam talis indignationis esse valde distortam, atque omnino dissonantem naturæ rei, circa quam versatur. Apprehendit nimirum rem inanimatam ad modum animatæ, & sentientis, atque illudentis domino suo cum contemptu, nec aliter, quàm pueri, qui si ceciderunt, terram verberari volunt tanquam læsionis ream. Ex ineptitudine autem talis cognitionis præviæ, mirum non est, si oriatur adeò inepta passio.

Ex quibus colligitur, iram quodammodo participem esse reliquarum. ferè omnium passionum tanquam effectum ex earum confluxu redundantem, ea ferè ratione, qua amor est principium, & radix omnium reliquorum pathematum. Namque necessarius est in primis ad iram influxus amoris, quatenus ira dicitur appetitus quidam specialis. Requiritur item affectus desiderii, quatenus ira anhelat satisfactionem tanquam lenimentum, quòdque est bonum nondum habitum. Quia verò compensatio desideratur ab ira cum dolore; hinc oportet etiam aliquam intervenire tristitiam de malo præsentis, cujus deletio per vindictam inquiritur. Cum autem nemo per affectum aliquem stimuletur ad aggredienda impossibilia, debeat iræ etiam prælucere spes aliqua ultionis, quod optimè insedit animo philosophi lib. 2. Rhet. cap. 2. unde si is, qui injuriam intulit valde excellat patientem, non orietur ira in ipso læso, sed so-

lùm.

lūm contristabitur ob absentiam nimirum spei ad retributionem consequendam. Porro cum omnis spes ex sua natura uniatur cum aliqua delectatione, hic quoque affectus ad iram inducendam concurret juxta vulgare illud: *Ira multò dulcior melle distillante in pectoribus virorum gliscit*. Idcirco etiam immoramur in cogitatione ulciscendi, quæ imaginatio voluptatem similem ei generat, quæ somniantibus accidit. Omnium tamen maximè passio odii, & audaciæ interveniet: odii quidem, quia in se involvit aversionem ab eo, de quo ultionem concupiscit sumere, ac proinde duplicem mali rationem sibi ob oculos ponet. Aversabitur enim eum, à quo fuit contemptus, tanquam à malo suæ personæ, eidemque studebit rependere malum, per quam illationem vindicta completur, quod est proprium odii. Participat etiam multum de audacia, non solum quod utriusque objectum spiret aliquam arduitatem, cum circa levia, & facilia non procreetur ira ad mentem Aristotelis eodem loco, sed etiam quod ira attendat malum sibi illatum per operationem propriam vel physicè, vel moraliter repellendum. Quare oportet ut iram antecedit affectus audaciæ parvinidens malum terribile. Quomodo enim fieri poterit, ut irascatur, qui lædentem formidat? quomodo subsidente animo per tremorem fieri poterit, ut erigatur idem ad reponendam offensionem?

Ut tamen natura iræ accuratius constet, observo discrimen inter odium & iram. Odium excitari potest citra ullam actionem injuriosam, & molestam; dum sæpe antipathia, aut alterius generis odium adversus invisum hominem concipiatur, qui nunquam læsit, & tamen hujusmodi sit, ut eum aversemur, & longissimè sejuncti ab illo esse velimus: secus de ira est discurrendum. Secundò odium exurgere potest adversus communitatem integram, imò adversus integrum hominum genus, quale fuit Simonis Misanthropi: non verò ira, ut observat Philosophus 2. Rhet. cap. 2. contingit tamen subinde, ut quando quis læsus fuerit ab aliquo certæ nationis, aut ordinis, contra reliquos ejusdem classis non solum odiò insurgat, verum etiam irâ impellatur. At studium istud vindictæ in quemlibet occurrentem ex eodem ordine plerumque solum durat ab initio, quando recens est injuria, tunc enim conjunctio, & satietas cum lædente sat esse videtur ad explendam vindictam: elapsò verò temporis spatiò ira non nisi in offendentem desæviet, & nudum odium perseverabit contra singulos ejusdem ordinis. At cur odium pertinacius adhæret, quàm ira? aio, quia ex malo perseverante, scilicet ex merito velut inhærente qualitate ipsi inimica, non verò ex actione, quæ fluat, & abeat, proficiscitur. Tertiò odium eò usque incre-

men-

mentum fumit, ut impellat ad interitum inimico volendum : ita verò urget ad damnum ejusmodi inferendum, ut ægrimoniam, & tristitiam lædenti inferat, ut sentiat calamitatem, ut noscat, quis malum intulerit, ut apud Homerum Ulysses Polyphemo enarrat, quis eum excæcaverit. Scilicet eò ex natura sua tendit, ut contristet læsum eumque pœnitentia subeat, quòd primus offenderit. Quartò, ira cum amore componitur, non tamen potest odium cum amore consistere. Ita Augustinus humil, s. ex 30. inter iram, & odium, ait : *Vultus videre, quantum intersit ? sæpè invenimus irasci patrem filio ; patrem odisse filium difficile invenies. Filio, quem diligit, irasci potest pater. Irascitur, & amat, potest dici : odit, & amat, non potest dici.* Desiderium etiam universè acceptum aliquatenus ab ira sæcerni, ambigi non potest. Nam ira est affectus efficax, cujusmodi non est semper desiderium. Ita item prærequirit dolorem, quatenus ejus objectum est malum compensans tristitiam irrogatam : desiderium verò ad dolorem nullam dicit habitudinem. Si tamen inspiciamus id, quod ira directè dicit, fateor, iram esse desiderium quoddam, cum dicatur esse appetitus vindictæ de offendente sumendæ. Neque tamen omnis, qui appetit inferri alteri vindictam, dicendus est irasci, cum interdum solùm attendat ad communitatis incolumitatem, & improbitatis exilium per cohibitionem facinorosorum, quæ vindicta non est propria redintegratio contemptus, atque adeò neque ira : sed cum vindicta suscipitur ad retribuendam mæsticiam, vindicanti ingeneratam, tunc talis propriè irasci dicitur.

§. II.

Elucidantur cause iræ.

CAusas iræ omnes revocandas esse ad injuriam, seu contemptum, tantumquam ad causam remotam communis fert sententia ; quia licet tres sint veluti partes contemptus propriè dicti, despectus, detractio, & contumelia : quælibet tamen injuria ad iram concitat, tametsi nulla sit, quæ generosum animum magis fodicet, stimuletque, quàm injuria damnoſa. Nempe in qualibet damni irrogatione potest agnosci, quædam materialis, & interpretativa despicientia, quantum est ex vi actionis, qua damnum infertur, licet ille, qui lædit suum præcipuè commodum intendat, & fortè libentiùs quæsiturus, si absque læsione alterius id fieri

posset. Quodd si tamen nocumentum injustè inferatur ex intentione nocendi, & absque alio emolumento offendentis, ut cum quis cum Samsonè alterius segetes comburit, in hujusmodi casu intenditur directè depressio, & contemptus patientis, atque in ejusmodi parvi pensione constituit bonum, & voluptatem suam, qui lædit, non facturus idem, nisi displiceret, & alteri minor aestimatio conciliaretur. Hinc accidit, ut magis excandescamus adversùs despectum directum, & quos ex industria putamus nocuisse, quàm ubi ex ignorantia, vel ex ira, aut alia passione injuriam exortam esse suspicamur: magis displicet, quodd coram, quàm quodd clam, & in absentia molestiæ ansam præbet. Itaque causa remota iræ est læsio injusta, quatenus hæc in se involvit injustam parvipensionem, ita ut magnitudo commotionis ad iram commensureretur non tam magnitudine nocumenti injusti, quàm magnitudine parvipensionis, cujus patiens non est dignus. Quamvis autem animalia bruta honorem formaliter apprehendere non possint, nec etiam jacturam honoris: nihilominus excellere appetunt, & ægrè ferunt, quodd indignè deicieantur ab excellentiæ gradu, qui ipsis conveniens apparet, ut docet Angelicus 1. 2. quæst. 47. art. 2. ad 2. Sed restat difficultas, quomodo bruta sine ullo discursu appetant vindictam, quæ à D. Thoma non explicatur. Dici poterit, eò ipso, quod canis mordeatur ab alio, vel ab homine percutiatur, deprehendere alterum canem, aut hominem, ut malum, & contrarium sibi, idcòque insurgere in illum ut sibi inimicum, sicut ursus sine ulla prævia læsione insurgit in hominem, quem ut inimicum sibi apprehendit, & canis in cattum, & sic in aliis animantibus sibi invicem infestis sine ulla discursus apparentia. Erit tamen affectus iste proprius vindictæ, cum sit appetitus nocendi alteri, eò quodd sibi nocuerit, nec oportet intervenire aliam comparisonem inter quantitatem mali accepti, & pœnæ infligendæ. Provocat autem magis ad iram amicus contemnens, quàm inimicus, tametsi offensio sit æqualis juxta illud Psal. 54. *Si inimicus meus maledixisset mihi, sustinuissem utique.* Causa est in aprico; nam eò major est injuria quævis, quodd magis contradicit debito: major autem incumbit obligatio amico ad colendum amicum, quàm aliis, cæteris paribus: unde eadem depressio magis exprimet iram adversùs amicum ejus authorem, quàm adversùs extraneum. Hinc etiam sola amicorum, & consanguineorum oblivio censetur offensiva, quatenus oppositam eorum memoriam censemus debitam. Præterquam quodd eadem oblivio specialiter denotet contemptum, quem plerumque comitari solet, cum difficulter memoria excidant, quæ magni facimus. Similiter hilaris exultatio in infortuniis pro-

propriis, aut prompta denuntiatio eventus improperi passionem iræ adducit, quia nihil horum fieri solet circa illos, quos plurimum magnificamus.

Opportet autem ad concipiendam iram, ut offensionis morsus videatur vindicabilis ab ipso patiente. Finge enim, vindictam, seu retorsionem despicientiæ apprehendi ut impossibilem; certè non emerget ira, sed affectus tristitiæ, cum nemo expetat, quod vires suas superat. Vult etiam ira ultionem procurandam ab ipso irato, & læso; non verò ab alio. Pertur enim ira ad hoc, ut refarciat excessum deprimentis supra depressum, ita ut magnitudo compensationis commensuretur ex æquo magnitudini despicientiæ; aliàs non apparebit obtenta reparatio, neque videbitur detrusus emergere sufficienter à vilitate contracta, quidquid aliunde accadat ad diminuendam lædentiæ aestimationem. Quamdiu enim non imminuitur excellentia ab illo ipso, quem vilipendit, & sicut vilipendit, tam diu nihilominus alter manebit superior in hujus comparatione. Sed amabo, inquiet aliquis, cur ad vindictam adeò anhelat iratus, cum hac via malum præsens, quod actu patitur, amoliri nequeat? quid intendit, dum adeo ad ultionem pergit? ut dubio huic satisficiamus, statuendum, quòd ira in malum præteritum, quale in se ipso est, directè non tendat, sed in illud feratur, quod ex illius energia, & noxia efficacitate etiamnum superest. Cum aut ex contemptu, licet præterito pars potissima perseveret, & malum merè morale sit, ac in opinione, & fama positum, ac proinde persans moraliter, postquam etiam physicè præterit, inde est, quòd præ cæteris aliis malis, illud quod adversatur honori, & existimationi, scilicet contemptus ipse, tolli, & reparari possit vindicta: qua de contemptore sumpta perinde moraliter sit, ac si nunquam despectum ille exercuisset. Et hæc quidem de causa remota iræ; proxima enim statuitur dolor ex despicientia conceptus. Ubi nolo intelligi causalitatem physicam in genere causæ efficientis; sed intrinsecam, ita ut ira aliud non sit, quàm dolor, & desiderium vindictæ, sive illi sint duo actus realiter distincti, sive unus realiter æquivalens duobus.

S. III.

De propensis ad iracundiam.

IN quadruplici differentia proclives ad iracundiam statuo. Vel enim
 L 1 2
 pri-

primò effervescent ex natura, & temperamento? & hoc ex eo contingit, quòd assidue doleant interno, & minuto quodam dolore. Vel tanguntur irâ ob mutatum, & malè affectum corporis habitum? & causa iterum nor discrepabit à priori. Suppono namque, ut manifestissimum est, homines certis diei horis, certis animi mensibus, certa aëris, & cœli temperie, certa etiam vitæ ætate, cum ægrotant, cum esuriunt, promptiores esse ad excandescendum. Horum quidem postremorum propensio ad irascendum passim refunditur in bilem à sanguine secretam, nec obrutam, aut dilutam ingestis ciborum humoribus, aut vaporibus, quod quidem ita se habet; sed præterea patientiori adhuc causæ effectus ille est adscribendus, nempe dolori copiam, ex cujus impressione famelici ad irascendum provocantur. Hi enim jam ex sensu doloris à fame procreari, quo tenuissimæ ventriculi fibræ irritantur, ad tristem instigantur impatientiam. Hinc de novo irruente vel tenuissima læsione iram illico parturiunt, & egerunt, quæ suavis, & melle dulcior, ac proinde dolorem pristinum sedare potest, & priori molestiæ mederi. Quod hîc de famis, & sitis doloribus edicimus, id ipsum statuendum est de singulis, qui ob mutatum corporis habitum malè afficiuntur. Quo etiam ex capite, qui lassî sunt corpore facîle succensent, juxta vetus dictum: à lassò rixam quæri. Ideo quibus stomachus suspectus est, processuri ad res agendas majoris momenti, bilem cibò temperant. Quòd si corporis status sit ritè constitutus, animus verò cæteris passionibus indulgeat, iterum facîle iracundia pedem figet. Sic qui sub tristitiæ jugo gemit, facîle succenset: nec non ille, qui cupiditate aliqua agitur, cum omnis cupiditas dolore permixta sit. Quare etiam mora juxta Plautum *bilem in nasum concit*. Prout etiam discurrendum de sollicitudine in rebus amissis quærendis. Denique ad iracundorum classẽ referuntur, qui ex viciosa animæ rationalis indole facîle inflammantur. Hinc ad hanc passionem promptiores censentur viri principes, divites, eloquentes &c: quippe cum se admirentur, & magnifaciant, nisi summa veneratio ipsis exhibeatur, neglectos se reputant, ac inde ocyùs dolent, dolorẽque recens ineussum laborant per iram fugare. Ea de causâ, qui eximiè excellunt, aut sibi videntur excellere in aliqua disciplina, frequenter exasperantur; præsertim si putent, se ex doctrina, & præstantia sua eum non capere fructum, & emolumentum ex hominum incuria, vel injuria, quod sibi deberi pro certissimo præsumunt. Propendent etiam in hunc affectum, qui severioribus disciplinis operam navant. Effectus refertur eò, quòd purissimos spiritus consumant, & ut plurimum atrum sibi sanguinem procreent, unde enascitur

tar stomachositas, & facilis in iram prolapsio. Quòd autem melancholici citò in iram prorumpant, rejicitur in id, quia teter humor abundans infigit in iis, augetque cogitationem, ac sensum despicientiæ, & alioqui dispellit humorem hilaritati accommodatum, spiritusque exfugit; unde obnubilatio animi, & consequenter acrior ille morsus, ex despicientia, hujusque amplificatio. Quia verò iracundi à philosopho alii dicuntur acuti, alii amari, & alii difficiles, ideo de his quoque pauca sunt audienda. Iracundi acuti vocantur ex abundantia humoris cholericici, qui, utpote naturâ suâ igneus, facit, ut facilè, ac citissimè inflammentur, quamvis modico iterum temporis intervallo eadem mitigetur. Amarulenti sunt, qui exulcerantur lentè, sed difficiliùs placantur ob inhærentem animo pertinaciter offensionis memoriam, longoque tempore affectum illum occultant, quousque tempus opportunum vindictæ superveniat. Adscribitur hoc prædominio complexionis terreæ, quæ non admittit mobilitatem vagam spirituum vitalium, nec inducit transpirationem copiosam, adeoque species impressæ longiori tempore possunt in suo vigore præteritam vilipensionem conservare. Ira demum difficilis ex intentione magna ita dicitur, quòd tristitia ex offensa illata non deponatur, nisi dolor ultionis voluptate placetur, quæ & proprio subjecto, & aliis impensè est molesta.

§. IV.

An assignanda sit passio ira contraria?

OMnes reliqui affectus oppositum sibi habent, amor quidem odium; desiderium fugam; delectatio tristitiam; spes desperationem; audacia metum: an autem iræ suus sit adversarius, an verò lenitas, placabilitas, mansuetudo sint pura iræ privatio, paucis hîc disputabitur. Perstandum esse videtur in sententia D. Aquinatis, negandumque, ullam esse passionem iræ adversantem. Vel enim vacuitas iræ, sive mansuetudo sumitur negativè pro carentia omnimoda affectus iræ, vel positivè pro actu iræ remisso, vel languido? si primum: patet manifestè, nullum esse affectum iræ oppositum, siquidem ea cessatio, & quies ab impetu iræ non est affectus positivus, qui possit iræ contrarius statui, sed est tantum negatio affectûs positivi. Si placeat secundum, & lenitatis nomine tibi tantum veniat ira, quæ non pertingat ad debitam mensuram: sic passio illa non differt ab ira, neque erit verè ei opposita, sed

tantum secerneretur ab ea penes intensiorem, & remissionem, quod discrimen non continet oppositionem, sicut furor, & ira non opponuntur, quamvis furor sit aliquid inflammatus, & turbidus. Videtur quidem assertio prima fronte opposita esse Aristoteli 2. Ethic. cap. 7. *ira irum, excessus, & defectus, & mediocritas quoque est: sed cum nominibus fere careant: medium mansuetum, mediocritatem mansuetudinem vocabimus. Ex extremis vero, ille qui excedit iracundus sit, & vitium iracundia: qui deficit ira vacuus, & defectus ira, vacuitas appellatur.* Similia ingerit 4. Ethic. c. 5. ubi addit nomen extremi oppositi iræ tributum esse virtuti inter utrumque mediæ, nomine aliquideffitutæ, quod ea virtus magis accedat ad extremum sibi oppositum per defectum, quam ad iram oppositam per excessum. At ex his tantum evincitur, Philosophum admisisse vitium aliquod circa nimiam placibilitatem, oppositum mediocritati mansuetudinis, & adversans iracundiæ per excessum cum mansuetudine pugnanti. tamen autem nullus ponatur in voluntate actus positivus circa omissionem iræ, mera tamen ejus carentia interpretative volita, vitio vertitur, cum certos denique fines excedit. Non affirmo, eam carentiam effecturam habitum vitii positivum, quod per meram cessationem contingere non potest: tantum censeo, eam quietem, cum irasci oporteret, esse culpabilem, & hoc tantum intencisse Aristotelem.

§. V.

Quam horridissimos secum trahat effectus hæc passio?

Quemadmodum fabulæ, per medicamentorum quandam potionem in brutorum animalium species naturam transmutari fingunt: ita virum repente videre licebit aprum, canem, aut pantheram, aut aliam quampiam similibus ferarum ab ira factum esse. Et interius quidem tranquillitatem mentis ita dilaniat, ut sibimet non congruat, ut deperdat sapientia, ut quid, quove ordine agendum nesciatur, sicut scriptum est: *ira in sinu stulti requiescit*, quia nimirum intelligentiæ lumen subtrahit, cum mentem permovendo confundit. Relinquitur justitia; quia dum perturbata mens judicium suæ rationis exasperat, omne, quod furor suggerit, rectum putat. Amittitur gratia vitæ socialis, quia qui

se ex humana ratione non temperat, oportet, ut bestialiter solus vivat. Quod physicas affectiones attinet, motus cordis altus, frequens, & vehemens, tum ab impressa affectione, tum ab affusa bilis aculeis, quo acri humore natura utitur, ad vellicandas organi fibras. Nec dictu adeò difficile est, quomodo educatur, aut affundatur. Quis enim nescit ex cystide fellis duci, & patere meatus, tum in duodenum, tum in jecoris cellulas eodem succo turgentes? quis nescit multos articularum surculos per duodenum, & cystim sparfos, qui cum faciliè imbui possint bilioso succo, hic faciliè in reliquas arterias diffunditur. Idem de venis potiori jure dictum sit, utpote quorum officium est humorem sugere. Adde, si vis reliquam bilem sanguini admixtam, quæ fibras tali modo affectas altius subibit, ac penetrabit. Denique ex vehementi humorum agitatione, ac propter suam uliginem partes bilis colliguntur, & mirum quantum fibras sollicitabunt ac vellicabunt. Analogiam habes in intestinis, quæ affusa bilis ad egestionem sollicitat, & ventriculolum ad vomitum; imo summos aliquando dolores intestinis conciliat. Non nunquam tanta vis bilis per sumum æstum congregatur, & in carnes effunditur, ut ictericus inde morbus contrahatur, & cutis toto corpore flavescat. Ex cordis motu sanguis, ac spiritus effunduntur ad exteriora: sed quia ira tristitiam habet adjunctam, sæpius eundem ad cor revocat, non ut ibi quiescat sicut in mare; sed ut cum accensus in corde efferbuit ad exteriores partes regrediatur, quasi ad repulsionem mali, quod vindictæ appetitio illum evocat. Ex hoc undoso sanguinis motu oculorum venæ turgere, ac rubere incipiunt. Scintillant præterea tum ob affluxum copiosorem spirituum, tum ob vapores, quos ebullientes humores ad illas partes emittunt: hi enim, cum membranam magis distendunt hanc magis coadunant, poliunt, aptiorémq; ad refringendos incidentes solis radios efficiunt. Quia autem hic splendor spirituum se cum sanguinis rubedine ad oculare corpus delati permiscet, flammeus quidam rubor ibidem apparet, quod & Homerus advertit hoc versu:

Instar ei ardentis candebant lumina flamma.

Turgent præterea, & suis sedibus exire volunt, quod sanguinis influentis copia inflati urgeantur, quasi ad amplius spatium inquirendum. Non nihil tamen tristitiæ iratis oculis aspersum esse videtur, defectu scilicet cujusdam serenitatis, quam lætitia præferre solet in oculis. Quod si subinde lachrymari furore insanientes videamus, procreat illas lachrymas dolor ab injuria illata exortus, vel etiam indignatio ex eo enata, quod desideratam de inimico vindictam à se sumi posse desperent. Quorum omnium manifestum signum præbent tum feminae, tum pueri, qui
ubi

ubi ira æstuarint, in lachrymas ut plurimum prorumpunt. Supercilia comprimuntur, & deprimuntur. In fronte congregatur ingens rugarum nubes. Labra crassescunt, & spongiosa hæc substantia affuso sanguine turget; aliquantulum sunt inversa ob aliqualem convulsionem; hinc etiam tremor, nisi fortè iste oriatur ex affusa, & stomachum lancinante bile, cum labro inferiori magna cum stomacho sympathia intercedat, quod probant ægroti, quorum labra tremula subsequenter vomitum certò indicant. Alii inferius labrum, aut digitum mordent. In furore retrahuntur labra, dentesque denudantur, ut irati istis tanquam suis armis inimicum terreant, vel ut eos magis expeditos ad nocendum habeant. Lingua blæsa, ac tremula, quia fibræ bilis aculeis vellicatæ ordinatorum motuum minus sunt patientes, vel quia nimia quantitas sanguinis eandem gravem reddit. Loquela ipsa præceps, subfultim exprompta, quòd motus ad linguam, & ad cerebrum pertingat, & sicut ex nimio impetu cogitationes, ita & verba præcipitat. Vox producitur acuta, & vehemens ob corrugatas orange fibras, & aërem in pulmonibus contentum cum summa violentia ejectum. Reliqui corporis gestus incompediti, nullus amicorum consiliis, nullus majorum monitis, nullus parentum lachrymis locus. Incessus præces, venarum, & colli inflammatio. Brachia nunc huc, nunc illuc distorquentur, terram pedes quatiant. Insurgit, insilit, præcutit, per tela, per ignes, in media ruit pericula, ut commodè Persius Satyr. 3.

*Nunc face supposita fervere sanguis, & ira
Scintillant oculi, dicisque, facisque, quod ipse
Non sani esse hominis, non sanus juret Orestes.*

Et hæc in re vastissima ob temporis angustias sufficiant, pro rei subtilitate non utique dignè tractata. Promerebimur etiam non medicrem suggillationem eo ex capite, quòd morborum animi naturam, causas, & effectus ostendere conati, interim generalia morborum alexipharmaca tradere omnino prætermiserimus. Sed qui meminerit moralis philosophi curam debere esse præcipuam, ut remedia suppeditet, quibus ad plenam animæ sanitatem perveniatur, retrusa vehementia, quæ symmetriam illi necessariam pessundat; me verò physiognomum agere, etiam hac in parte non difficulter veniam largietur.

F I N I S.



Theses ex universa Philosophia.

Ex Logica.

1. **L**ogica est virtus intellectualis, & scientia simpliciter practica.
2. Cum quo tamen stat eandem posse esse artem activam.
3. Ad omnem syllogismum scientificum eadem est metaphysicè necessaria.
4. Objectum Logicæ sunt operationes mentis.
5. Objectum attributionis est sola demonstratio.
6. Ideæ Platonice, quocunque sensu accipiantur, non sunt universale scientificum.
7. Neque constituitur universale per naturam, quæ à parte rei sit communis pluribus per inexistentialiam, 2. vel indifferentiam.
8. Aut quæ saltem in statu possibilitatis pluribus sit communis.
9. Neque consistit in pluribus naturis, quæ sint unum similitudine.
10. Sed partialiter constituitur per intellectus operationem.
11. Actus judicativus prædicans terminum genericum de specifico, aut individuali constituit universale.
12. Differentia specifica non bene desumitur ex prædicato nobilissimo.
13. Sed assignanda est dissimilitudo essentialis.
14. Relatio consistit in sola ratione fundandi completa.

Ex Physica Universali.

15. Essentia corporis naturalis non consistit in actuali extensione à Cartesio asserta.
16. Materia prima non sunt atomi homogeneæ, nec elementa chymica, aut peripatetica.
17. Sed est substantia incompleta Aristotelis, ingenerabilis, & incorruptibilis.
18. Potest de absoluta potentia Dei existere sine omni forma substantiæ; non potest omni spoliari naturaliter.
19. Non magis appetit formas nobiliores, quàm ignobiliores.
20. Bruta verè sentiunt, adeoque datur in illis forma distincta à combinatione elementorum.
21. Qualis etiam admittenda est in plantis.
22. Plures formæ substantiales non subordinatæ naturaliter stare nequeunt in eadem parte materiæ; possunt tamen per miraculum.
23. Non dantur formæ cadavericæ.
24. Nec formæ partiales, quæ communiter adstrui solent.
25. Unio informativa consistit in prioritatem subjecti ad formam.
26. Possibilis est violentia physica sine injuria.
27. Repugnat moraliter, ut per operationem humanam fiat verum aurum.
28. Physicè contingere non potest mutua naturæ prioritas pro eodem instanti inter duas causas physicas.

29. Eadem tamen dari potest inter causas morales.
30. Actio productiva effectus indifferentis est entitas modalis.
31. Realiter distinguitur à passione, 2. & recipitur in effectu.
32. Causa creata producit accidentia modalia, intentionalia, & absoluta.
33. Divinitus evenire potest, ut causa creata agat, ubi non est.
34. Accidentia nec ut causa adæquata, nec ut inadæquata influunt in productionem substantiæ.
35. Universalis panspermia non probatur.
36. Semina non vivunt.
37. Sola substantia immediatè producit primas qualitates ad intra.
38. Harum attemperatio est adæquatum principium qualitatum secundarum.
39. Ad productionem accidentium in subiecto extraneo concurrit etiam substantia.
40. Sola quantitas est subiectum sustentationis respectu accidentium communium.
41. Quæ naturaliter migrare non possunt de subiecto in subiectum.
42. In destructione compositi non fit resolutio usque ad materiam primam.
43. Intensio qualitatum fit per additionem gradus ad gradum.
44. Qui sunt similes.
45. Simile non potest intendere sibi simile.
46. Elementa ante mixtionem in se agunt, & quidem secundum eandem partem.
47. Non repugnat infinitum categorematicum multitudinis, 2. intensi-
onis, 3. & extensionis.
48. Implicat creatura, quæ ratione suæ essentiæ sit perfectissima in
omni genere.
49. Continuum componitur ex partibus actu distinctis, solum formaliter
divisibilibus in infinitum.
50. Unio continuativa non est modus specialis.

De Elementis.

51. Calor non consistit in agitatione partium ignearum, nec frigus in
earum quiete.
52. Humiditas non componitur ex atomis sphericis dissolutis, nec siccitas
ex iisdem quiescentibus.
53. Humiditas, & siccitas non sunt qualitates activæ.
54. Aër ex natura sua est intensè frigidus.
55. Absolutè gravis, 2. Pollétque virtute elastica.
56. Præter aërem crassiorem admittenda est aura ætherea.
57. Gravitatis præter impetum innatum deorsum non dicit qualitatem
distinctam.
58. Levitas non est præcisè negatio gravitatis.

59. Motus localis consistit in successiva presentia corporis mobilis in pluribus locis immediatis ad exigentiam principii intrinseci.
60. Rarefactio est major extensio, quæ fit per intrusionem corpusculorum.
61. Elementa gravidant in loco proprio.
62. Vacuum naturaliter dari non potest. 2. Metaphysicam illius impossibilitatem malè negavit Cartesius.
63. Solus aër est causa experimentorum, quæ alias in metum vacui re-fundi solent.
64. Elementa manent formaliter in mixtis.

De Anima.

65. Partes fluidæ, ut sanguis, lac &c. non informantur ab anima.
66. Animæ brutorum perfectorum sunt indivisibiles.
67. Non item animæ plantarum, aut brutorum imperfectorum.
68. In anima divisibili partes sunt homogeneæ.
69. Nec in corde, nec in hepate fit hæmatosis.
70. Per corpus animalis datur sanguinis circuitus.
71. In generatione animalium una non succedit alteri.
72. Malè dixit Cartesius sensationem meram esse passionem; eùm sit actio, qua experimentaliter percipitur objectum.
73. Ad sensus externos non pertingunt ullæ species intentionales.
74. Neque sensatio externa communicatur sensui interno per species.
75. Visio ocularis fit in retina. 2. Ex qua non emittuntur radij in objectum.
76. Lumen non consistit in effluvio corpusculorum. 2. Nec in motu corporis luminosi impellentis ætherem.
77. Nulli colores.
78. Nec species visivæ distinguuntur à lumine modificato.
79. Sonus est impetus aëris diffusi usque ad membranam cochleæ auricularis.
80. Odor non est qualitas simplex. 2. Nec propagatur per species.
81. Objectum gustûs fit ex quantitate certa ratione modificata.
82. Qualitates tam organo intrinsecæ, quam extrinsecæ sunt objectum tactûs.
83. Organum sensûs interni nec est cor, nec glandula pinealis, aut aliæ substantia cerebri, sed plexus retiformis.
84. Anima rationalis est indivisibilis in partes integrantes, & spiritualis.
85. Libera libertate indifferentiæ.
86. Cujus actibus non obest præscientia Divina.
87. Repugnat, ut causæ secundæ liberæ prædeterminentur ad actus liberos.
88. Neque respectu causarum necessariarum admittimus hujusmodi determinationem.
89. Prædeterminare ad actus malos non stat cum sanctitate Dei.
90. Immortalitas animæ rationalis demonstratione, etiam purè physica, evincitur.

91. Animæ rationales non sunt inæquales in perfectione substantiali.
 92. Potentiæ inorganicæ identificantur cum anima.
De Mundo, & Calis.
 93. Mundus potuit existere ab æterno.
 94. Potest demonstratione physica everti motus terræ à Copernico assertus.
 95. Materia cœlorum est ejusdem speciei cum materia corporum sublu-
 narium.
 96. Forma eorum est mixtum ex nostris elementis.
 97. Sunt ab intrinseco corruptibiles.
 98. Non solidi, sed liquidi.
 99. Moventur ab intelligentiis.

Ex Metaphysica.

100. Signa infallibilia distinctionis realis sunt separabilitas duorum quoad
 locum, vel tempus, & vera oppositio producentis ad productum.
 101. Gradus metaphysici ejusdem entis non distinguuntur inter se strictè
 realiter.
 102. Non est admittenda inter gradus ejusdem entis creati distinctio
 formalis ex natura rei.
 103. Nec distinctio virtualis intrinseca, sive Major.
 104. Nec extrinseca, seu minor; sed purè distinguuntur ejusmodi gra-
 dus distinctione formali rationis rationatæ.
 105. Existencia causæ primæ demonstratur argumentis moralibus &
 physicis.
 106. Permissio etiam aliquo processu in infinitum.
 107. Concurfus Dei immediatus in omnes effectus non potest committi
 alteri enti suppleti illius vices.
 108. Sola causa prima determinat secundas ad individuationem.

O. A. M. D. G.



- Antiposta a Sappia pag.

- 11 tar. f. t.

2. fr. []⁴, A-Z, Aoi-LL⁴, M²

double-page frontis piece & 11 plates

The background of the entire image is a dense, repeating pattern of marbled paper. The pattern consists of numerous small, overlapping, teardrop-shaped or scale-like motifs. These motifs are colored in a variety of shades, including deep red, blue, green, yellow, and white, creating a complex, textured visual effect.

SPECIAL

87-B

4845

THE GETTY CENTER
LIBRARY

